





Ex Bibliotheca
majori Coll. Rom.
Societ. Jesu

27

12.3.51.



JOSEPHI WEISSENBACH
BREMGGARTENSIS HELVETII
THEOLOGÆ DOCTORIS

DE
ELOQUENTIA
PATRUM

LIBRI XIII.

IN USUM
ECCLESIASTICORUM.



VOLUMEN II.

Operis LIBRUM II. complectens.



SUPERIORUM PERMISSU.

AUGUSTÆ VINDELICORUM
SUMTIBUS FRATRUM VEITH BIBLIOPOLARUM.

MDCCLXXV. †



PRÆFATIO.

Postea, quam superiore libro generalem de eloquentia Patrum Tractationem suscepimus, nunc speciatim quoque de ea pronuntiandum est. Et primo quidem de *Latinis* dicemus, non quod eos Græcis præferre sit animus, qui antiquitate, & numero, atque etiam, ut alibi notatum *, eloquentia ipsa sunt multo superiores: verum Latinæ Ecclesiæ hic erat honos habendus, ut cum illa primas obtineat apud Catholicos, Patres quoque ejus præ ceteris, & primo loco in medium procederent. Ordo autem tractationis iste est. Singulæ Dissertationes singulos Patres exhibent, & tribus non amplius capitibus constant. Horum *primum* laudes memorat, cujusque eloquentiæ debitas, atque ab eruditis, & disertis hominibus in eandem congestas. *Secundum* in notam illam inquit, quæ *Χαρακτηρ* Græcis dicitur, nobis autem id significat, quod cuius est proprium, & quod peculiare quis habet, ut internosci ab aliis scribentibus possit. Stylo enim auctores inter se uti homines vultu differunt. *Tertium* velut digitum in libros eos intendit, qui in laudato Patre potiores sint, plusque ceteris faciant ad eloquentiam sacram comparandam. Et illud quidem quam sit dignum jucundumque auditu, quam multum doctrinæ & eruditionis habeat, nihil attinet dicere. Istuc ingentis

est

est usus, & iis, quibus per negotia non licet omnia legere, delectu facto, in quolibet genere optima commonstrat, ut minori labore, fructu vix non pari accedant ad legendum. De his vero, quæ secundo loco tractamus, præfari quædam necesse est. Quemadmodum enim profani fecerunt, Græci quidem, cum Isocratis structuram & diligentiam, Lyfiæ subtilitatem, Periclis fulmina, Theophrasti suavitatem, Demosthenis vim, Plutarchi iudicium, Demetrii Phalerei amœnitatem, Dionis varietatem ubertati conjunctam, Libanii munditias, ac veneres atticas attenderunt studiose: Latini-vero, cum copiam Crassi, ornatum Hortensii, lenitatem Cæsaris, majestatem Catonis, Ciceronis omnia notarunt, & æmulati sunt; ita & nos facere oportet ad fructum certiorum, & ut quisque eligere possit, quod sit non modo in rem præsentem, sed ad genium quoque ejus faciat. Qua una re dici vix potest, quam juvetur eloquentiæ studium, & perficiatur *. „Ex
 „ lectione SS. Patrum, ait Regius **, etiam spiri-
 „ tum, dicendique modum animadvertet singulo-
 „ rum, ut imitari possit: in Augustino acumen:
 „ in Hieronymo copiam sententiarum, & cando-
 „ rem, vique sermonis: in Gregorio modestiam
 „ prudentiamque ad omnes morales actiones: in
 „ Leone gravitatem, in Chrysostomo fufam &
 „ aptissimam ad persuadendum eloquentiam: in
 „ Bernardo dulcedinem. Ex quorum omnium
 alio-

* S. Sidonius Apollinaris *Libro IV. epist. 3.* omnium five profanorum five Patrum characteres singulis vocabulis exprimere conatus est, & plerumque haud infeliciter. Ipse Chrysostomus *Libro IV. de Sacerdotio* Isocratis, Demosthenis, Thucydidis, Platonis rationes dicendi diversas annotavit. Vide in eandem rem apud profanos *Rhetorica*, & *Critica* Dionysii Halicarnassæi, quæque non uno loco Quintilianus huc in *Institutionibus* habet.

** *Libro III. cap. 11. Oratoris christiani.*

„ aliorumque quamvis variis dicendi generibus,
 „ tanquam vivis coloribus concionem suam noster
 „ Ecclesiastes, si scite omnia dispenset, reddere il-
 „ lustrem poterit. „

Fuse hanc in rem, neque inutiliter Erasmus *Præ-
 fat. ad Tom. II. Hieronymi*, ubi principii instar il-
 lud statuit, num opus aliquod genuinum sit, nec
 ne, ex charactere scribentis desumi potissimum oportere.
 Ait autem inter alia: „ Certissimus index, &
 „ vere lydius, ut ajunt, lapis est character oratio-
 „ nis, & habitus. Ut sua cuique facies, ut sua
 „ cuique vox, ut suus cuique mos, & genius, ita
 „ suus cuique stylus. Nec perinde relucet in spe-
 „ culo corporis imago, quam in oratione mentis
 „ apparet. Hanc normam secutus est Varro in pen-
 „ sitandis Plauti fabulis, non indices Helii, nec
 „ Claudii, nec Aurelii, nec Accii, nec Manilii,
 „ hoc est librariorum titulos, quemadmodum ait
 „ Gellius. Hanc secutus est Aristarchus, hanc ipse
 „ divus Hieronymus etiam inter disertos; nam in-
 „ ter infantem & eloquentem manifestius discrimen
 „ est, quam inter hominem, & simiam, inter fili-
 „ cem, & gemmam. „ Quod varia dein cum ex
 Hieronymo, tum ex aliis exempla petens copiose
 prosequitur.

„ Artifex, inquit, de artifice certissime pronun-
 „ tiat, sculptor sculptoris, pictor pictoris manum
 „ protinus agnoscit, musices peritus cantionis au-
 „ ctorem ex harmoniis intelligit. Protogenes Apel-
 „ lem non ante visum e linea ducta incunctanter de-
 „ prehendit, sed artifex artificem; cum bubulcus
 „ interim aliquis nec Fulvi, aut Rutubæ manum ab
 „ Apellis, aut Xeusidis manu sit discreturus. Quan-
 „ quam ingenue fateor, accidere posse, ut in non-
 „ nullis tanta sit distinctionis similitudo, ut mode-
 „ stius sit ambigere, quam pronuntiare. Quan-
 „ quam cum stylum dico, non solum summam il-

„ lam orationis quasi cutem, aut bracteā intelligo
 „ verborum, aut figurarum in verbis sitarum, ut
 „ ubicunque quinque Hieronymiana verba depre-
 „ hendero, protinus Hieronymum scripsisse confir-
 „ mem, aut quod subinde clausulam orationis ad
 „ hunc modum finiat, *esse videatur*, eum statim Ci-
 „ ceronem pronuntiem: apud quem aliquoties re-
 „ perero, *interim* pro interdum, statim Quintilia-
 „ num putem: apud quem legero *tanquam* pro vel-
 „ ut, aut *insulcire* pro inculcare, mox Senecam
 „ esse credam. Ubi videro *sane quam*, & *oppido*
 „ *quam* pro valde positum, extemplo Gellium ar-
 „ bitrer scripsisse: ubi *nupturire*, *verbigerari*, aut
 „ aliud simile verbum occurrerit, jam Apulejum
 „ existimem loqui: aut qui *ὁμοιοτελεύτοις* & *ὁμοιο-*
 „ *πρώτοις* frequentius utatur, hunc continuo cre-
 „ dam Augustinum esse: quive crebris periodis in
 „ longum producat sententiam, hunc illico putem
 „ esse Gregorium. Plurimas res pariter complecti-
 „ tur styli vocabulum, sermonis habitum, & di-
 „ ctionis quasi filum, figuras, consilium, iudicium,
 „ argumentationis genus, inventionem, tractatio-
 „ nem, affectus & *ῥῆγ*, quæ Græci vocant, atque
 „ in singulis horum mille discrimina, nempe non
 „ pauciora, quam sunt ingeniorum, quorum pro-
 „ fecto totidem differentiæ sunt, quot ipsi sunt ho-
 „ mines. Alius jucundior est, alius exactior, alius
 „ simplicior, alius picturior, alius lenior, alius
 „ acrior, hic severior est, ille festivior, hic fusior,
 „ ille densior, hic eruditior, ille sanctior, hic co-
 „ piosior, ille nervosior: denique ne rem infinitam
 „ prosequar, totius animi simulacrum semel exhi-
 „ bet oratio. Neque secus, quam in corporum
 „ propagatione parentum habitus in liberis repræ-
 „ sentatur: ita quoties ingenium exertis viribus gi-
 „ gnet aliquid, omnes mentis notas illic licet agno-
 „ scere, maxime si quis non imperitus animum ad-
 „ ver-

„ verterit. Quamquam in nullis judicium certius,
 „ quam in his, quos ingenii vis, doctrinæ magnitu-
 „ do, eloquentia singularis, aliæque dotes eximiæ
 „ reddunt inimitabiles. „

Atque illa ipsa in re mirari nemo debet, si hoc,
 & sequenti libro sæpe Erasmi judicium interponi-
 mus. Id enim qua de causa faciamus, ingenue nunc
 profitendum est. Sunt, qui vel nomen hominis exe-
 crentur: sunt item, qui in cœlum laudibus ferant.
 Quos sane utrosque nos minime sequimur. Illud
 quippe reputamus nobiscum, scriptorem multa in
 medio relinquere, & ita temperare sibi debere, ne
 vergat ad extremum aliquod, ac bona & mala ejus-
 dem hominis nullo discrimine habeat. Scio utique,
 & doleo vehementer, tanti ingenii partus plerosque
 non tenuibus maculis sordere, atque eo nomine di-
 vo Parenti meo Ignatio tam exosum Desiderium fuisse,
 uti a promiscua ejus lectione suos æque, ac ex-
 ternos vehementer absterret. Scio eundem Eras-
 mum, ubi minime decebat, morionem agere, &
 Scurrarum in modum sanctissimis de rebus joculari so-
 litum; quapropter *Luciani* nomen retulit a non pau-
 cis*. Scio eum hac ipsa re, tum opinandi, scriben-
 dique licentia *Luthero* viam aperuisse, uti novaret
 omnia, eosque tumultus cieret, quibus Ecclesia
 universa misere distracta, atque vastata est. Scio
 a maximis viris immanium hæresum postulatum, &
 quod huc maxime spectat, scio ex ipsa styli saliva,
 quam tantopere jactat, indubitata etiam opera jam
Basilio, jam *Chrysostomo*, jam *Augustino* abjudi-
 casse, & in vertendo non fraudulentè quidem, sed
 nec æquali semper diligentia, atque accuratatione ver-
 satum. Ut autem hæc omnia fateor, sic & illud
 dari mihi jure æquitatis postulo, non omnia ejus

* Propter *Moriam* præcipue, & *Librum colloquiorum*
 in quibus sane faceto esse licebat, ut *Christianum* se ta-
 men meminisset.

abjicienda, sed colligenda haud pauca, & in honore adeo habenda esse; maxime in foro hoc nostro, quod Patres attinet, de quibus profecto præ multis aliis præclare est meritus. Sapientissimi, & religiosissimi homines non ejusdem modo ætatis, sed consequentium etiam temporum ita de eo statuerunt, uti optarent, Erasmum præter hoc genus studiorum nullum aliud attigisse. Sed vel sic haud parum, ajunt, juvisse rempublicam literariam, tantum, ut moderatius præstare id potuisset. Ipse adeo Sanctissimus Pontifex Franciscus Salesius *Libro 1. Epist. 31.* Erasmum *magnum inter literatos nomen* appellat, & quod majus est, in re ad conciones sacras pertinente non veretur, *Ecclesiasten* illius testem advocare *. Secundo concedi debet, legem, quam tulit hac in parte, etsi ab ipso non semper observata sit, bonam nihilominus, atque in hunc diem ab omnibus Criticis receptam esse **. Nempe aliud est principium aliquod verum invenire, aliud constanter omnia eidem accommodare. Itaque cum juxta legem hanc suam pronuntiat, non est illi semper fidendum; quia ipse eodem loco non negat, vel pro ætate, vel pro argumenti natura, vel studio, vel profectu, vel pro animi habitu nonnihil immutari dictionem; aliter encomia scribi, aliter scholia, nonnunquam data opera stylum variare nos, sive quod libet experiri diversa, & nunc hunc, nunc illum studemus exprimere; jam accrescente per assiduam meditationem orationis facultate nonnihil novari oportere: postremo quemadmodum alius est

sermo

* Sed fusius de Erasmo Abbas Marfollier in *Apologia* pro eo edita *Parisiis 1714.* caute tamen admodum, nec sine *Refutatione*, quæ anno proximo ibidem prodiiit, legenda. Video etiam in *Catalogo Operum Joannis Alberti Fabricii Exercitationem criticam de Religione Erasmi Hamburgi 1717.* in 4.

** Tenuerunt eam Eusebius, Hieronymus, Photius &c.

fermo commoti, alius sedati, alius alacris: ita diversum esse stylum aliter affecti. Et etsi, ut vult ille, internosci tum adhuc possint, tamen adeo facile haud possunt, ut non quam sæpissime decipiamur. Hoc enim solum, nec plus probant pulcherrima verba, quæ loco citato addit: *Et tamen ea res* (scilicet ubi aliter affecti sumus) *non obstat, quo minus agnoscas hominis tibi noti faciem. Quem juvenem noveras, senem agnoscis, cum omnia mutet ætas. Fratrum, aut sororum inter se similitudo non impedit, quo minus Paridem dignoscas ab Hectorē, Cassandram a Polixena, atque adeo haud scio, an unquam inter ullos geminos tam indiscreta fuerit formæ similitudo, quin a familiâribus certe quiverint internosci. Quin etiam vehementer attentis ovum ab ovo, ficum a ficu licet discernere, vel refragantibus proverbiiis, tantum abest, ut stylus a stylo discerni non queat, cum non alia in re major sit varietas: stylus modo sit ullus, & accedat artifex, qui pronuntiet.* Tertio, cum vero eloquentiam scriptoris alicujus serio describit, vel laudat Erasmus, maximi faciendum ejus judicium affirmo, tum quod eos legerat, & ingenio, styloque, quantum pauci, valebat; ad eam ipsam rem quam facillime explicandam: tum quod & virtutes dicendi in quolibet ita extollit, ut vitia tamen, si quæ sunt, minime dissimulet. Quod si non eodem loco id facit, nec laudes semper vituperio jungit, alibi tamen præbita occasione id præstat; maxime cum non simpliciter, & præcise loquitur, sed comparationes inter se quorundam instituit. In quo ipso hominis vafrities, & rhetoricum ingenium subin deprehenditur, ea, quæ causæ nunc faverent, assumentis, cetera tegentis, aut certe relinquentis. Sunt autem descriptiones ejus tam diffusæ, tam eloquentes, tam ad vivum expressæ, ut vel incuriosi harum rerum iis pascantur, tantum abest, ut audire ceteri recusent. Igitur hic locum habent, quæ Hieronymus

Epist.

Epist. 62. alias 76. ad Tranquillinum, & Cassiodorus Libr. Instit. div. lect. cap. 1. de sententia, & auctoritate Origenis recte, ac eleganter admonuerunt: Vel ut propiore exemplo utar, quemadmodum Photii hac ipsa in re sententiam catholici quoque passim amplectuntur, ita & nobis Erasmus licet audire, minus utique improbum, sed multo doctiorem.

Cum autem descriptiones has adducimus, liberum nihilominus cuique iudicium est. Absit enim ut obtrudamus aliena, qui nostra timide, & dubitanter communicare solemus. Ipse adeo Erasmus *Loc. eod.* ita de se pronuntiavit. *Jam quantum meo iudicio tribuendum sit, aliorum facio iudicium. Nec enim agnosco laudem, quam mihi tribuunt hac in re quidam, eruditissimi illi, sed amici. Ceterum in censendo dictionis genere, quandoquidem in ea palestra tot jam annos sum exercitatus, si quid mihi sumo, videor id non omnino arroganter facere, præsertim ad utrumque paratus, ut vel mutem sententiam, si quis adducat compertiora, vel concedam, si quis digladiari malit, quam discere.*

Parebimus, quando ipse sic cupit, & quoties longius ab aliis abit, monebimus diligenter, ut abstrahatur lector a sententia ejus, atque in orbitam reducatur.

Quod si ne sic quidem placare quosdam possumus, & nolunt illi vel hac in re Erasmus audire, illis sane per me licet morosos esse. Minime refragor: imo ut gratiam ab iis ineam, alium illius loco testem adduco, minime suspectum illum, atque in Patribus quam maxime versatum, Sixtum Senensem, qui ea omnia & ipse admonet disertis verbis, quæcunque supra ex Erasmo recitavi. „ Omnium, inquit *ad calcem Libr. 4. Bibl. Sanct.* „ omnium fortasse evidentior, ac certior conjectura est styli diversitas, quæ veluti lydius lapis „ fal-

„ falsas inscriptiones a veris discernit. Nam et si
„ cuius impostori facile sit auctorum patriam, ge-
„ nus, temporaque mentiri, ac dogmata sequi: ni-
„ hil tamen difficilius est, quam alterius imitari sty-
„ lum. Stylum autem appello non illam exterior-
„ rem sermonis superficiem, sed orationis caracte-
„ rem, dictionis contextum, texturæ continua-
„ tem, elocutionis formam, figuras loquendi, di-
„ spositionis artificium, tractationis methodum,
„ & cetera, quæ cuique disertio auctori propria
„ sunt. Sicut enim suus cuique homini corporis
„ habitus est, suus cuique vultus, suus cuique na-
„ tivus color, sua cuique vox, aliæque singulares
„ notæ, quibus a ceteris hominibus distinguatur:
„ ita singulis Ecclesiæ Scriptoribus peculiare quæ-
„ dam proprietates insunt, quæ aut nunquam aut
„ raro alteri convenient, veluti sunt plausibilis An-
„ tiochi pompa, Basilii accurata dictionis diligen-
„ tia, sublimis Gregorii Theologi cothurnus, Chry-
„ sostomi sponte fluens atticismus, purissima Cy-
„ priani facilitas, gallica Hilarii grandiloquentia,
„ gravis & arguta brevium sententiarum in Ambro-
„ sio copia, in Hieronymo picturata rerum, ver-
„ borumque varietas, in Augustino cola similiter
„ finientia, & commata similiter cadentia, in Gre-
„ gorio numerosus periodorum alternatim respon-
„ dentium incessus, & alia his similia, quæ quan-
„ tumlibet quis affectet, minime tamen assequi pos-
„ sit. Nec sum nescius, esse, qui diversum sen-
„ tiant, asserentes in deprehendendis titulorum im-
„ posturis nullum esse indicium stylo fallacius; quo-
„ niam non idem semper sit eidem dicendi modus,
„ sed pro argumenti ratione vel ætatis mutatione vel
„ studii profectu vel affectuum diversitate, & sæpe
„ duorum auctorum character sit omnino persimilis.
„ Quod nec ipse prorsus inficior. Aliter enim in
„ epistolis scribit Hieronymus, aliter in decertatio-
„ nibus

„ nibus adversus Ruffinum, & Vigilantium loqui-
 „ tur, & aliter in Commentariis Prophetarum.
 „ Alio modo dicebat, cum esset admodum juvenis,
 „ & adhuc Rhetorum exercitatione calens; atque
 „ alio modo senex, cum graviora, ac solidiora se-
 „ ctaretur: Sed ita tamen semper scribit, ac loqui-
 „ tur, ut ubique eum agnoscas esse Hieronymum.
 „ Quemadmodum & familiaris tibi amici faciem
 „ nunc iratam, nunc mitem, nunc tristem, nunc
 „ alacrem, ejusdemque semper esse hominis cogno-
 „ scis. Fateor etiam inter aliquos (etsi id rarissi-
 „ mum sit) tantam contingere posse styli similitu-
 „ dinem, ut eos non facile sit discernere. Tamen
 „ industrius styli artifex similitudinem a similitudi-
 „ ne distinguet non aliter, quam adamantes ma-
 „ gnitudine pares, & splendore non dissimiles in-
 „ ternoscunt gemmarii sagaces &c. „

Viden quomodo cum Erasmo Sixtus conspiret!
 Sed & in ceteris, quæ infra daturi sumus, planum
 fiet, quod summis viris viam ipse aperuit in hoc ge-
 nere literarum. Acquiescis jam, & ira deferbuit?
 nullus dubito, sin minus, expende omnia ejus, &
 adhibitis aliorum judiciis ad rationis, & pietatis le-
 ges revoca, ipsas adeo laudes, quas Patribus tri-
 buit, *velut ab hoste profectas* mea maxima pace ac-
 cipe. Sic enim fiet, ut tibi decedat nihil, rei vero
 ipsi quam plurimum accedat.

Est vero præter commoda multa in Patrum cha-
 ractere inquirendo genus voluptatis haud vulgare,
 quod ex eo absque labore, absque sumptu, & mo-
 lestis itineribus quemvis eorum velut de facie nosse
 licet. Non est autem dubium, homini erudito
 magnam inde offerri rationem recreandi sui; acce-
 ditque ad cumulum delectationis, quod si unius le-
 ctione satiatur animus, ad alium transire, & si quod
 obrepsit tædium, illa styli varietate levare protinus
 possit. Unde Hieronymus Platus de oblectatione
 loquens

loquens, quam Religiosi ex studiis literarum, nominatim ex Sanctorum Patrum lectione copiosam haurirent, ita scribit *. *Restat tertius horum studiorum fructus ex accurata Sanctorum Patrum lectione, qui doctrina, sanctitate, eloquentia etiam excellentes tam multa nobis monumenta reliquere, ut iis versandis vix hominis vita sufficiat, non modo ei desit, in quo tempus jucunde consumat. In quo ipso quasi ad levandam satietatem hoc etiam egisse Deus videtur, ut quemadmodum in magno convivio alium aliæ dapes saporem habent: ita illis, quos dixi, tantis auctoribus suum cuique inesset suavitatis genus.*

Atque hæc de Instituto secundi, & tertii Libri præmittenda fuerunt, non solum ut apparet, quem in finem tantum laboris susceptum sit, sed ut contentiones quoque summoventur, a quibus alienissimi sumus. Sunt quidam sane indoctiores, quam ut his de rebus judicare possint: quia vero præjudicatas habent opiniones, nulli etiam doctorum judicant præfractius. Nolunt enim aliorum audire sententiam, quam quorum auctoritati a teneris assueverunt. Quod si nos, qui nihil sumus, audire renuerint, non stomachabimur quidem; quia talium desperata correctio est: sed contenti erimus, quod nec præcipiti consilio, nec arroganter ad hanc causam accesserimus. Magnis enim ducibus, quales hic sequimur, difficile est multum a proposito aberrare.

Sed neque, quod sequitur, prætereundum. Erunt, nil dubito, qui criles Dominici Bonhourii hoc in Libro requirant. Et certe *Ingeniosis Patrum*

* *Libr. III. De bono status religiosi c. 11. ubi etiam singulorum characteres brevissime expressit. Videatur etiam Cardinalis Augustinus Valerius de Rhetoric. Eccl. Libr. III. cap. 42. & Laurentius a Villavincenzio Libr. IV. de Rat. Stud. Theol. cap. 14.*

trum * *cogitationibus* ea subin interfert, quæ quam maxime huc facerent. Tamen imperare mihi nequaquam potui, ut vel verbulum inde delibarem. Hac ipsa enim de causa, quod plurimum illi deferro, nihil exopto magis, quam uti opusculum illud aliquando latine redditum, editumque apud nos lectores mei per se ipsi totum evolvant. Verum quid Dupinum, Tillemontium, Ceillierium &c. nusquam allego? Ut nihil dicam, quod molestiæ plurimum habet identidem ex gallicis latina facere, neque etiam decet, uti eadem apud nos ubique recurrant: pervulgati illi sunt, prostantque omnibus: denique ex aliis, quos adducimus, haurire ipsimet sua omnia debuerunt. Idem est de Henrico Bœclero **, Tobia Magiro, Adriano Bail-
 leto, Thoma Popeblount, Beniamino Hede-
 rich, Petro Baelio, Joanne Clerico,
 & similibus.



ELEN-

* Latinorum scilicet; de Græcis enim nihil habet.

** Non solum in *Libr. de Scriptor. Græc. & Latin.* sed & in *Bibliographia critica.*

ELENCHUS VOLUMINIS II.

LIBER II.

De Eloquentia Patrum *latinorum.*

Dissertatio I. De eloquentia TERTULLIANI.

Caput I.	Quanta ea fuerit, & quibus laudibus a disertis hominibus cumulata? - - -	pag. 1
Caput II.	Quis ejus eloquentiæ character? - - -	8
Caput III.	Quibus in scriptionibus eloquentiæ vires maxime Tertullianus expromserit? - - -	15

Appendix. De eloquentia MINUTII FELICIS. 23

Dissertatio II. De eloquentia S. CYPRIANI.

Caput I.	Laudes ejus, & judicia auctorum. - - -	35
Caput II.	Notæ peculiares. - - -	45
Caput III.	Ubi potissimum illa eloquentia resplendeat? - - -	52

Dissertatio III. De eloquentia LACTANTII.

Caput I.	Quid de ea viri eloquentes senserint? - - -	63
Caput II.	Dotes hujus eloquentiæ. - - -	75
Caput III.	Ubi ea excellat præcipue? - - -	87

Dissertatio IV. De eloquentia S. PACIANI.

Caput I.	Laus ejus. - - -	95
Caput II.	Notiones styli. - - -	100
Caput III.	Ubi placeat præcipue? - - -	100

Dissertatio V. De eloquentia S. AMBROSII.

Caput I.	Encomia illius. - - -	113
Caput II.	Quid eloquentiæ illi maxime proprium? - - -	119
Caput III.	Ubi eminent Patris hujus facundia? - - -	131

Dissertatio VI. De eloquentia S. SULPITII SEVERI.

Caput I.	Encomia hujus eloquentiæ. - - -	140
Caput II.	Notæ Severi peculiares. - - -	145
Caput III.	Elegantiora ex scriptis Severi. - - -	151

Dissertatio VII. De eloquentia S. HIERONYMI.

Caput I.	Elogium hujus eloquentiæ. - - -	160
Caput II.	Quid habeat peculiare? - - -	178
Caput III.	Ubi maxime expomat facundiam suam Hieronymus? - - -	196

Differ-

Dissertatio VIII. De eloquentia S. AUGUSTINI.

<i>Caput I.</i>	Quæ laudes illius, & sententiæ auctorum?	204
<i>Caput II.</i>	Quod ejusdem discerniculum?	221
<i>Caput III.</i>	Ubi eloquentem magis se <i>Augustinus</i> ostenderit?	231

Dissertatio IX. De eloquentia S. PAULINI.

<i>Caput I.</i>	Laudes ejus.	241
<i>Caput II.</i>	Lineamenta, quibus internoscatur.	246
<i>Caput III.</i>	Pretiosiora ex iis, quæ adhuc extant.	253

Dissertatio X. De eloquentia S. EUCHERII.

<i>Caput I.</i>	Elogium.	257
<i>Caput II.</i>	Dos characteristica.	264
<i>Caput III.</i>	Delectus scriptionum.	267

Dissertatio XI. De eloquentia SALVIANI.

<i>Caput I.</i>	Commendatio, & celebritas ejus.	274
<i>Caput II.</i>	Character proprius, & peculiaris.	281
<i>Caput III.</i>	Ubi triumphet imprimis <i>Salviani</i> eloquentia?	291

Appendix. De eloquentia S. VINCENTII Lirinensis.

Dissertatio XII. De eloquentia S. LEONIS.

<i>Caput I.</i>	Præstantia hujus, & existimatio apud disertos homines.	303
<i>Caput II.</i>	Quid habeat <i>Leo</i> uni sibi proprium?	310
<i>Caput III.</i>	Quæ <i>Leonis</i> scriptiones præcipue laudentur?	318

Dissertatio XIII. De eloquentia S. BERNARDI.

<i>Caput I.</i>	Quam eximia, quam celebris <i>Bernardi</i> eloquentia sit?	321
<i>Caput II.</i>	Character, & discrimen ab omni alia eloquentia.	328
<i>Caput III.</i>	Quibus locis præstet <i>Bernardus</i> in dicendo, & scribendo?	339





DE
ELOQUENTIA PATRUM
LIBER II.

Patrum *Latinorum* Eloquentiam singulatim
exponit, atque considerat.



DISSERTATIO I.

De Eloquentia TERTULLIANI.

CAPUT I.

*Quanta ea fuerit, & quibus laudibus a disertis
hominibus cumulata?*

Vix est alius antiquorum, qui tot encomia ab
omni genere doctorum, & disertorum homi-
num referret, quot Tertullianus retulit. Et
certe nescias, utrum acriori ingenio, an ampliori
eruditione, an demum potentiori facundia esset.

S. CYPRIANUS summus orator, tanti eum fecit,
ut magistrum appellaret, & nec unum diem absque
ejus lectione elabi sibi pateretur.

EUSEBIUS CÆSARIENSIS in *chronico* ad annum 210.
omnium Ecclesiarum sermone celebrari Tertullia-
num ait. Neque hoc contentus *Libr. 2. Histor. c. 2.*

Vol. II.

A

virum legum Romanarum peritissimum, & inter latinos Scriptores celeberrimum vocat.

S. HIERONYMUS, cujus in dijudicandis Scriptoribus tam sanum, tamque incorruptum iudicium est, *Epist.* 125. nunc 36. ad Damasum Tertullianum eloquentissimum virum dicit. *Epistola* vero 128. nunc 64. ad Fabiolam nullam sustinet inter suum, & Tertulliani calamum institui comparisonem. Quæso, inquit, ne meam stillam illius flumini comparetis; non enim magnorum virorum ingeniis, sed meis sum viribus æstimandus. Idem *Præfat.* in epistolam ad Ephesios aliis quoque summis Scriptoribus præponere eum videtur. Et *Epist.* 84. nunc 70. ad Magnum: Quid Tertulliano eruditius, exclamat, quid acutius?

S. AUGUSTINUS *Libro de bono viduit. cap. 5.* vocat disertissimum, & *Libro de Hæresib. ad Quodvultdeum, versus finem, ejus legi opuscula multa* affirmat, *eloquentissima scripta.*

Auctor ANONYMUS, qui contra Prædestinianos paulo post obitum Augustini scripsit, ita de Tertulliano habet: *Opuscula eloquentissima, & ferventia in defensione edidit veritatis.* Idem *ibid.* de catholicis ejus lucubrationibus testatur, quod omnia bene, & prime, & incomparabiliter scripserit.

NICEPHORUS *Libro IV. cap. 34* eloquentia admodum pollentem, acrem, & valde ingeniosum vocat.

Sed nemo copiosius, elegantius nemo Tertullianum laudavit, atque a VINCENTIO LIRINENSI est factum. Ita autem *Commonitorii I. cap. 24.* loquitur: Sicut ille (Origenem significat) apud Græcos, ita hic apud Latinos nostrorum omnium facile Princeps judicandus est. Quid enim hoc viro doctius? quid in divinis, atque humanis rebus exercitatus? nempe omnem Philosophiam, & cunctas Philosophorum sectas, auctores, assertoresque sectarum, omnesque eorum disciplinas, omnem historiarum, ac studiorum varietatem mira quadam mentis capacitate complexus est. Ingenio vero

nonne

nonne tam gravi, ac vehementi excelluit, ut sibi nihil pene ad expugnandum proposuerit, quod non aut acumine irruerit, aut pondere eliserit? &c.

Ex Recentioribus ANGELUS POLITIANUS *Miscellaneorum centur. I. cap. 56.* Quid porro, exclamat, *Septimio Florenti Tertulliano respondebimus, christianorum omnium, quorum quidem latine opera extant, ut antiquissimo, sic ausim dicere, in omni pene literatura diligentissimo?*

BEATUS RHENANUS, qui primus Tertulliano situm, & squallorem detergere coepit in *Epist. ad Episcopum Olomucens.* de præstantissimis, atque vetustissimis quarumcunque divinarum Literarum enarratoribus loquens: *In quo genere, inquit, primum occupat locum Tertullianus, omnium disciplinarum exacte peritus, & in arcanis literis nulli secundus. Philosophiam calluit egregie, disputandi rationem summe tenuit, in Rhetoricis exercitissimus, in omni antiquitatis, & gentilium literarum cognitione consummatissimus.*

DESIDERIUS ERASMUS Roterodamus *Præfat. ad opera S. Cypriani, Inter permultos, quos olim Africa ediderit, eloquentia, doctrinaque celebres in primis Tertullianum ponit. Idem in Psalm. 38. ad Vers. Dixi, custodiam vias meas, Virum vocat omnium disciplinarum genere perpolitum.*

JOSEPHUS SCALIGER in *Primis Scaligerianis pag. 96.* *Tertullianus, inquit, semper in manibus habendus, accurateque legendus est, tum propter linguæ Romanæ (eo ævo) proprietatem, tum propter disciplinarum, ac literarum omnium cognitionem. Fuit enim doctor omniscius, & argutus, qui illotis manibus tractandus non est, nec obiter legendus; ubique enim remoratur lectorem. Tertullianus certe excellentissimus auctor est in omnibus.*

SIXTUS SENENSIS in *Bibl. Sanct.* *Virum profecto acris, ac vehementis ingenii appellat, humanis non minus, quam divinis disciplinis imbutum, suorumque*

temporum Rhetorem præstantissimum, & publicum ejus artis in urbe Carthaginiensi præceptorem.

CARDINALIS BARONIUS ad annum 197 magnifice Tertulliani eloquentiam extollit. Libros enim illius præstantissimi ingenii monumenta vocat. Jam ait, illum omnes scientias calluisse, Latinorumque ejus temporis disertissimum ab omnibus prædicari: jam affirmat, tam insignem, atque adeo excellentem christianæ Theologiæ scientiam consecutum, ut adversus omnes Hæreticos, & Judæos, & Gentiles tam disertos, tam copiosos, omniq; argumentorum genere refertos, & divinæ Scripturæ thesauro depromptos tractatus ederet, quos christiana pietas hætenus admirari non cesset.

TARQUINIUS GALLUTIUS Orat. 5. Neminem quidem ex Latinis (sequiorum temporum) habeo Tertulliano parem.

NICOLAUS RIGALTIUS in *Judicio de Tertulliano, & ejus Scriptis*: Inter Scriptores Latinos principem locum Tertulliano deberi, veterum elogia super eo præclara consentiunt. Neque est facile Græcorum aliquem proferre, qui religionis christianæ cultum tantopere, tantoque studio posteritati sanxerit, ut jam hinc nobis illud semel statuendum sese offerat, in armariis præcæ christianorum literaturæ scripta non reperiri alia, quæ secundum Evangelia, & Apostolos ab viris antiquæ pietatis amantibus majore cum fructu, ac voluptate legantur. Et infra *ibid.* addit, Tertullianum suapte nobilitate clarum eruditionis, facundiæ, pietatis splendore proprio fulgentem caliginis offusæ tenebras dissipasse. Id est, etsi ex æqualibus ejus nemo, ex propius remotis pauci * mentionem ejus fecerint, iique velut damnatæ memoriæ hominis, nihilominus celebritatem ex scriptis summam adeptum.

Lupo.

* Rigaltius cum solos Eusebium, Hieronymum, & Augustinum Tertulliani meminisse ait, errore non minimo Lactantium, Prædestinatum, Vincentium Lirinensem omittit.

LUDOVICUS THOMASSINUS *de veter. & nov. Eccles. Discipl. Parte II. Libr. 3. c. 83.* Tertullianum primo loco inter veteres Presbyteros ponit, quorum tot literarum monumenta supersint, ex quibus & eruditionis ubertas, & eloquentiæ vis ea emineat, quæ non possit non admirationi esse.

CLAUDIUS FLEURY *Histor. Ecclesiast. Libr. IV. c. 47.* Ea tempestate, ait, apud Carthaginienses Quintus Septimius Florens Tertullianus, hoc ultimo nomine notissimus, doctrinæ, & facundiæ laude florebat. Natus erat Carthagine, patre copiarum proconsularium centurione. Omnibus scientiis operam dedit cum plausu, omnesque cœvos latinæ eloquentiæ fama superavit.

JOANNES SIANDA in *Lexico Polemico* Tertullianum ait omnium scientiarum evasisse peritissimum, & inter Latinos disertissimum.

Infinitus forem, si omnes adjungere vellem viri laudatores. Nam & Criticorum, & Editorum, & Historicorum plerique ex professo, & fusc de eo commemorant.

Laus altera Tertullianicæ facundiæ illa etiam, quod præstantissimi ex doctoribus nostris satis non habuerunt eam verbis celebrasse, sed profecerunt adeo quam plurimum ex scriptis ejus; Tertulliani argumenta adhibuerunt passim & diduxerunt, emphasim, & conversiones figurarum imitati sunt, nec raro phrasas, & sententias ipsas transcripserunt. Norunt quod dico, quicumque in *Minutio Felice*, *Cypriano*, *Arnobio*, *Lactantio*, *Paciano*, *Hieronymo* non sunt omnino peregrini. Accedit, quod primus christianorum scripsit Tertullianus; neque enim ante ipsum alius, teste Hieronymo*, nisi Victor Pontifex, & Apollonius Senator brevi libello ostenderunt viam, & facem prætulere. Scripsit autem difficillimo tempore, cum maxime insultarent Ethnici, in-

* In *Catalogo*.

scitiam objicerent, & non ferro tantum & igne, sed stylo etiam christianos oppugnarent. Rursum Tertullianus insignem apparatus, omnisque generis suppellectilem ad scribendum attulit. Rhetoricam docuisse, ait ex Trithemio Sixtus; sed non memini id apud veterem aliquem reperire me, bene autem istuc, quod ethnicus etiamnum causas in judicio egerit Carthagini. Erat autem lectionis infinitæ, & tanta eruditione, qua nemo postea, ne illis quidem demptis, qui disciplinarum omnium cognitionem sibi pararunt. Ad hæc multitudo Librorum ejus tanta fuit, ut nihil relinqueret intactum. Nam & Philosophos, & Gentiles, & Judæos, & Hæreticos adortus est, moralia vero omnis generis attigit, recteque Trithemius: *Scriptis pene infinita opuscula.*

Sed & illud est argumentum non vulgare interioris eloquentiæ ejus, quod non solum præter omnem morem græce est redditus ætate sua, verum, quod nec alius habetur sive sacrorum sive profanorum, cujus scripta in hunc diem tot notis, scholiis, observationibus, & commentationibus ab omni gente, & genere hominum illustrarentur. Edidit illum primo, & subin-explicavit *Beatus Rhenanus* Selestädiensis, dein *Renatus Laurentius de la Barre* notis, ac emendationibus hæud pœnitendis, post *Ludovicus La Cerdæ*, qui in Rhetoricæ studiis incanuerat, ingentibus voluminibus eundem est interpretatus. Sed & *Jacobus Pameli* vir doctissimus, ac *Nicolaus Rigaltius* in editione ejus & emendatione defudarunt. *Latinus* item *Latinius Viterbiensis*, ac *Joannes Harris* *Anglus* quam plurima in eo vel restituerunt, vel ex conjecturis aliter legenda ostenderunt. *Joannes a Wouwer* emendationes epidicticas ad opera Tertulliani vulgavit, & *Paganinus Gaudentius* difficiliores illius locos peculiari libro expendit. Taceo *Alciatum*, *Zephyrum*, *Scaligerum*, *Panciroolum*, *Heraldum*, *Cujacium*, *Gelenium*, *Vertra-*

tranium, Crinitum, Turnebum, Quintinum Heduum, Hotomannum, Marcilium, Mercerum, & Mercerum (qui diversi sunt) Gagnæum, Junium, Gothofredum, Richerium, Scioppium, Albaspinæum, Gretserum, Petavium, Salmasium, Priorium, Le Nourryum, Lupum, Havercampium, qui in ejusdem viri locos, aut libros commentati sunt.

Hi, inquam, omnes, aliique nondum mihi cogniti, ingens profecto monumentum sunt suadæ, & efficaciz, quæ in libris celeberrimi hujus oratoris reperitur. Equidem non dissimulo, obscuritatis causa a plerisque factum, uti explicandum sibi putarent: sed quid, amabo, tot eruditi, atque disertii homines immanem eum laborem conscivissent sibi in auctore difficillimo explanando, nisi obscuritate insuper habita summas in illo eloquentiz opes, atque omnigenam ubertatem latere intellexissent?

Haud absimili de causa, ut ego existimo, Georgius Ambianensis Capucinus *Tertullianum redivivum*, Theodorus Petrejus Carthusianus *Confessionem Tertullianicam*, Carolus Moreau Eremita Augustinianus *Omniloquium Tertulliani*, Michael Vivien Franciscanus *Recollectus Tertullianum prædicantem* ediderunt. Certe cum fontes ad dicendum amplissimos aperiant, & uberrimam pro moralibus æque, ac dogmaticis materiam ministrent, ostendere quam maxime nostris præconibus possunt, quantum in uno Tertulliano subsidii haberent, quantusque in Libris ejus omnibus ecclesiasticæ facundiz apparatus esset

His Tertulliani Laudibus addo, quod P. Bretonneau in *Elogio P. Bourdalouë* refert, oratoribus sacris minime prætereundum. Ait enim, principem hunc concionatorem, uti ex sacris scriptoribus Isaiam maxime, & Paulum volvere consueffet, ita ex Patribus ante alios Tertullianum, Chrysostomum, & Augustinum adamasse; quod scilicet oratio illorum

grandior ipsi esse, nervorumque & virium habere plus ceteris omnibus videretur.

Ista etsi non sunt valde multa, sufficere tamen possunt, ut generatim saltem noscatur Tertullianus, dignaque ejus imago animo informetur. Illud Bacherii comittere non possum ut præteream, qui collatione inter Tullium, & Tertullianum instituta sic denique non sine lepore quodam concludit:

*Tullius ille fiet Romanis: dummodo nobis
legatur hic Tertullius.*

Itaque caput hoc concludimus, quin plura addamus. Ut enim clarissimus vir Nicolaus le Nourry in *Apparatu Dissert. V. c. 1. a. 5.* ait. *Operæ prorsus nullius foret hoc, sicut facile est, illustrium cujuslibet ætatis scriptorum testimoniis comprobari, quod a nemine ignoratur, & ipsamet auctoris scripta manifestissimum omnibus faciunt.*

C A P U T II.

Quis ejus eloquentiæ character?

Et nos paulo ante significavimus, & jam tot abhinc sæculis Lactantius, atque Hieronymus admonuerunt, tam præcellentem Tertulliani facundiam vitio tamen, & maculis quibusdam minime carere. Prior enim *Libr. V. Divinar. Instit. cap. 1.* ad finem ita ait: *Septimius Tertullianus fuit omni genere literarum præditus, sed in eloquendo parum facilis, minus comptus, & multum obscurus fuit.* Alter vero *Epist. 13. nunc 58.* quæ est ad Paulinum, *Tertullianus, inquit, creber est in sententiis, sed difficilis in eloquendo.*

Hos passim velut agmine facto recentiores quoque scriptores sequuntur. Nam & Rhenanus, affectati styli duritiem queritur, & alii alias in causas culpam eam refundunt. Rigaltius id potius tribuit dialecto africanæ; quare & indicem apposuit glossarum styli africani. Et profecto extra dubium est, afri-

Africanos difficilins multo, atque implexius ceteris Romana lingua usos: neque difficile mihi accadat id ex pluribus, si non univēlis, ejus gentis scriptoribus demonstrare. Mihi vero, quod Tertullianus stylo scriberet nimium scabro, & singularis adeo esset in delectu & dispositione vocum, de industria quoque factum videtur. Recte enim dixit Bonaventura Argonenſis *: *Tertullianus stylum assumit Rhetorum antiquorum, quibus solenne erat inauditis sententiis uti, vocabulisque phaleratis, quo argumenta proposita magis auferent, atque amplificarent.* Idem dudum ante Adrianus Turnebus *Libr. VII. Adversarior. c. 20.* animadvertit, his verbis: *Septimius Florens erat ille quidem omni liberali eruditione imbutus, verum de industria orationem asperat, & horridum quiddam afficit, & consecatur. Perinde quasi parum virilem eam eloquentiam putaret, quæ concinnior esset, ac elegantior.*

Verum optime ille fecerit, qui id Tertulliani ingenio potissimum tribuat. Severissimo enim & vita, & morum genere sequebatur innatos illos impetus acerrimæ simul, & acutissimæ mentis. Qualis enim vir, talis oratio ejus. Recte Joannes de Bussiēres in *Floſcul. Historiar. p. 2.* Tertullianus, inquit, *animo, ingenio, styloque aser, & igneus.* Non ergo sibi, nec linguæ suæ temperat in dicendo, maxime quando concitatur animus ejus, & proprium velut campum nanciscitur. Istuc ex ipsomet Tertulliano *Libr. de Pallio ad finem* clarissime patet. Cum enim præmisset se adigere caute-rem, immergere scalpellum, præcisurum gulam, daturum catharticum, addit sine fuco: *Has purulentias civitatis quis eliciet, & exvaporabit ni sermo palliatus?*

A 5

Ite-

* De optima methodo legendi Ecclesiæ Patres, Parte I. cap. 9.

Iterum alii obscuritatis causam in eruditionem quoque viri conjiciunt. Et certe singularis ea, & vastissima fuerit necesse est, qua parem ex antiquioribus nullum habuit. Clarissimus vir Caspar Barthius *Adversar. Libr. XIII. c. 16. Patrem eruditionis* appellat. *Libr. vero 19. c. 1. Scriptorum*, ait, *quantum ad nos venit, eruditior nemo est, & ex quo plura condiscere possis, quam Tertullianus. Nullus in eo apex est, non cum cura positus, ut quo pacto alii inopia, hic abundantia literarum peccare nonnunquam videatur.* Unde Rigaltius eos, qui eruditione careant, penitus arcet ab ejus lectione. *Afer iste*, ait *loco dato, lectorem non admittit, nisi jam eruditum.*

Sed neque illud negare volumus, græcæ linguæ studium plurimum ad obscuritatem eam, & novitatem dicendi contulisse. Atque in hoc ostendendo longus est Renatus Laurentius de la Barre *: „ De-
 „prehendimus etiam, inquit, sæpe græcissare, si-
 „gurisque, & constructionibus Græcorum delecta-
 „ri, ut pene de eo verum sit, quod aliqui de Ire-
 „næo recentiores ** dixerunt, & ante divus Hie-
 „ronymus de Victorino, græce melius, quam la-
 „tine scivisse. Apparet sane, nostrum auctorem in
 „lectione Græcorum veterum, qui plurimi id tem-
 „poris erant, solique inter sacros interpretes ha-
 „bebantur, abunde versatum: ut puta in scriptis
 „Ignatii, Polycarpi, Papiæ, Quadrati, Aristidis,
 „Agrippæ, Egesippi, Justini, Melitonis, Theo-
 „phili Antiocheni, Appollinaris, Dionysii Corin-
 „thii, Tatiani, Pynti, & Philippi Cretensium,
 „Musani, Modesti, Bardefanis, Irenæi, Pantæni,
 „Clementis Alexandrini, Miltiadis, Appollonii
 „Martyris, Serapionis, Theophili Cæsariensis,
 „Bachili, Polycratis, Heracliti, Maximi, Candi-
 „di,

* In vita Editioni suæ præfixa.

** Nunc nemo fere in ea opinione est, Irenæum Latine scripsisse.

„ di, Appionis, Sexti, Brabiani, & similium,
„ quorum ex assidua lectione adeo græcas loquen-
„ di formulas imbiberat, ut etiam latine scribens il-
„ larum interoblivisci nequiret: non quod negem
„ auctorum, quos recensui, monumenta latine
„ fuisse verba; sed fortassis non omnia. Imo maluit
„ græce doctus ab auctoribus ipsis majori fide mu-
„ tuari, quam fidem sequi interpretis. Maluit, in-
„ quam, ex fontibus bibere, quam ex lacunis, &
„ relinquere, quæ translata erant, nimia religione,
„ & fortassis cum imminutione auctoris.

Denique ne quid omittamus, quod Tertulliano
objici possit, illud quoque fatemur, etsi pondus,
& acrimonia sententiarum utramque paginam im-
pleant in ejusdem operibus, videri tamen eandem
hanc dotem magna ex parte ab ipsa duritie verbo-
rum, insolentia dictionis, & ferrato stylo repeti
subin oportere.

Verum & ipsa argumenta majorem subin, quam
pro re ipsa speciem gerunt. Quod ex recentioribus
Criticis plures adverterunt haud semel. Nobis suf-
ficit Nicolaus le Nourry, qui *Tom. II. Dissertat. 4.*
c. I. a. 5. ita loquitur: *Alii vero reprehendunt inæ-*
quabilem eorum, quibus ille utitur, argumentorum va-
rietatem. Gravissimis siquidem, & invidissimis, in-
quiunt, argumentationibus plures alias rapidioris in-
genii acumine excogitatas quandoque intermiscet, quæ
levissimi, aut nullius plane sunt momenti *. Quid
vero de naso, & scurrilitate, quam in eo passim
Erasmus deprehendit? Mira enimvero accusatio ab
eo homine! Tantopere ergo scurras persecutus Eras-
mus est, ut vel inter Ecclesiæ doctores deprehendere
aliquem posse putaret, qui sibi omnino dissimilis
non esset? Verum apage istuc. Tertulliani sales au-
steri-

* Erasmus *Tom. V. in Psalm. 2.* ad scripturarum quoque
applicationem præposteram hoc extendit.

steritatem hominis temperant, non tollunt. Atque utinam nasum non magis Erasmus corrugasset, quam afer hic fecit, sic enim nunquam erat futurum, ut novi *Luciani* nomen inde referret.

Non ergo quidquam dissimulamus eorum, quæ in eloquentiam Tertullianus peccavit: sed nec valde excusamus, eadem usi libertate, quam Theologi in dijudicanda doctrina ejus adhibere solent. Quemadmodum autem sincere agentibus nobis prætercunda illa non erant, ita neque hoc tacendum, vitia hæc a summis viri virtutibus non tegi solum, sed plane sepeliri. Tantus est in ceteris, tamque excellens, eos lacertos habet, iis viribus exultat, ut non dico superari, sed nec exæquari quidem ab alio quocunque possit. Nourryus paulo ante laudatus ibidem addit: *At plerique omnes fatentur, illud sive dicendi sive argumentandi genus, sicubi occurrat, micanti prorsus sententiarum gravitate, summaque aliorum argumentorum vi, ac pondere, quasi mira quadam compensatione leniri, & resarciri &c.* Maxime vero eminet Tertullianus perspicacia, vehementia, sale, densitate item, & copia tam sententiarum, quam argumentorum, uti scilicet viri eruditi, & ardentis, quem Hieronymus vocat *, ingenium ipsum, & natura ferebat. A Joanne Laurentio Mosheim laudatissimo oratore *Disquisit. Chronologico-Critica de vera ætate Apologetici* vocatur *ingeniosissimus Patrum Tertullianus*. Alexander vero Natalis *Sæculo II. c. 4. a. 8.* *Stylus ejus, ait. grandis est, generosus, sententiosus.* Erasmus *Libr. XVII. Epist. 22. ad Nicolaum Buscidenensem: Habet ille quidem suum quoddam orationis genus, quod haud scio, an eo sæculo plausibile fuerit apud Afros, tametsi nobis subdurnum videtur. Id quod non dissimulavit noster Hieronymus, qui tribuit illi densitatem in sententiis, sed adjungit difficultatem in elo-*
quen-

* Epist. 65. nunc 84. ad Pammachium.

quando. Ceterum quis non admiretur pectus illud semper ardens, tam exactam scripturarum cognitionem, tamque promptam memoriam, idque priscis illis temporibus, cum nulla adhuc esset solennis Theologicæ professio, nullæ scholæ, nullæ diatribæ, nulli fere sacrorum Voluminum interpretes. Hæc cum contempler, mi Nicolae, dispudet me nostrorum temporum! Iterum Tom. V. in Psalm. 2. Tertullianus ei dicitur sacrarum scripturarum sine controversia peritissimus.

Quid Tertulliani porro vim, ac lacertos commemorem? verba sunt Danielis Heinsii Orat. III. Nullus est omnium antiquorum, qui christianos undique appetitos tam valide scriptorum velut aggeribus quibusdam & invictis propugnaculis contra hostium incursus communiret. Terrori enim erat homo ad pugnam semper comparatus, qui quodvis argumentum buccis sonantibus inflabat, ut Augustinus loquitur *. Sane invictum athletam Ecclesia habuit, & fortissimum propugnatorem veritatis, qui nisi extitisset, haud scio, an aliquis ceterorum subtilissimas hæreticorum fraudes tam facile detecturus erat, & tam feliciter profligatus. Ipse enim, ut erat homo omnium literarum, & ad id, quodcunque primo arripuisset, acerrime incumberebat, non solum Physicam, Ethicam, Metaphysicam, Historiam, Jurisprudentiam, sed Rhetoricam quoque militarem illam, ac ferream exprompsit, ut vinceret ubique Christi causa, atque inter ipsas oppressiones triumpharet. Sed hæc non meis, non alterius cuiusquam, verum Vincentii Lirinensis calamo reddenda sunt. Jam porro, inquit, orationis suæ laudes quis exequi valeat, quæ tanta, nescio qua, rationum densitate ** conferta est, ut ad consensum sui quos suadere non potuerit, impellat. Cujus quot verba, tot sen-

* Libro de bono Viduit. c. 4.

** Alii legunt necessitate.

sententiæ sunt, quot sensus, tot victoriæ. Sciunt hoc Marciones, Appelles, Praxeæ, Hermogenes, Judæi, Gentiles, Gnostici, ceterique, quorum ille blasphemias multis, ac magnis voluminum suorum molibus velut quibusdam fulminibus evertit.

Cum vero Moralia Tertullianus attigit, plane effigiavit genium suum austerum illum, qui nihil gratiæ, nihil consuetudini, nihil infirmitati daret. Itaque & stylus est atrox, ac ferreus, qui frangere omnia, & perrumpere velle videri possit. Emicat animus ille censorius, liber, imperterritus, atque in perversorum reprehensionem ita incumbens, ut impetum ferre non possint, & nec effugio quidem locum inveniant. Est nempe in eo ardor quidam insitus, nec imitabilis, acor styli a natura profluens: unde densitas sensuum, unde sublimissimæ cogitationes paucorum verborum ambitu inclusæ, unde vis in disputando infracta, quæ in omnem partem premit, urget, & stringit *, quemcunque sit nactus adversarium. Neque tamen putes, nullas in austero homine phaleras, nulla Rhetorum lenocinia reperiri. Est, ubi temperat rigori illi suo, & ludit, & renidet toto vultu. Id cum alii complues, tum Nicolaus Caussin^{us} ** eleganter observavit. „Perge, inquit, ad sæculum tertium, in cujus stat limine, quem merito latinorum scriptorum (de christianis loquor) Antesignanum dixeris, Tertullianus. Qui vir, & quantus! Non specto leviculus orationis flosculos, quos ipse aut non habuit, aut contempsit: sed miror in eo torrentis ingenii vim quamdam redundantem, & pondus acer-

„ rimæ

* Anonymus quidam apud Pamelium in vita, eloquentiam maxime Auctori invidiam conlasse dicit apud Clerum Romanum, id quod facile captu est attendenti hunc characterem, ubi in reprehensiones effundebatur.

** Libr. XV. ante medium.

„rimæ mentis, quam majoris eloquentiæ sedem
 „possis appellare. Quamquam si quando ab he-
 „roica illa ingenii austeritate stylum frangit in Rhe-
 „torum delicias, non est inconcinnus &c. „ Bre-
 vius Guil. Cave ad an. 192. *Habet tamen Tertulliani
 stylus majestatem quamdam sibi propriam & grandem
 eloquentiam, sale & acumine plurimum conditam, quæ
 simul legentis ingenium exercet, & animum suaviter de-
 lectat.*

Verum de charactere Tertulliani plus quam satis.
 Novimus virum velut de facie, & tam certo, tam
 clare novimus, uti facile a ceteris omnibus digno-
 scatur. Itaque ne longius excurram, velut breviam-
 rii loco Thomæ Campanellæ verbis, quæ dicta sunt,
 contrahere juvat. Ait autem * quam audacter, tam
 splendide. *Tertullianus denique ut Theologorum Ma-
 gister plus probat duobus verbis, quam ceteri mille ar-
 gumentis. gravis, arduus, acer, efficax, brevis, con-
 cinnus, Philosophicæ; Grammaticæ, non autem civilis
 cultor, & suo africanismo homines velut ad peregrinas
 merces alliciens.*

C A P U T III.

*Quibus in scriptiõibus eloquentiæ vires maxime
 Tertullianus exprompserit?*

Præcipuum semper inter opera Tertulliani Apolo-
 geticus habitus est, quem adversus Gentiles sane
 copiosum, ac luculentum conscripsit. Ad hunc
 elapso sæculo accesserunt libri duo ad Nationes ex
 Codice Agobardi Archiepiscopi Lugdunensis, quos
 primus omnium edidit Jacobus Godefredus J. C. &
 Professor Genevensis. Argumentum nihil differt ab
 Apologetico. Eadem enim argumenta, quæ ibi de-
 lineauit.

* Libello de libris propriis, & recta ratione studendi
 c. 9.

lineaverat, hic uberius tractanda resumpsit, idque haud paulo pressius, atque accuratius. Dolendum profecto, & inter ceteras orbis literarii jacturas de-
flendum, opus istuc præstantissimum, ut Priorius vocat*, injuria temporum ita plurimis in locis exesum esse, ac vitiatum, ut parum jam sui studiosis possit afferre emolumentum. Utrumque opus summopere laudat idoneus censor Lactantius; ait enim *Libr. V. Institut. divin. c. 4.* Tertullianum hanc causam plene perorasse. Hieronymus magis adhuc in librorum istorum laudes effunditur. Nam *epistola 84. nunc 70.* ad Magnum Oratorem Romanum: *Apologeticus ejus*, exclamat, *& contra Gentes libri cunctam sæculi continent disciplinam*: eruditionem scilicet, doctrinam, & eloquentiam universam. Tantis auctoribus accedunt reliquorum eruditorum judicia, qui omnes his ipsis lucubrationibus palmam adjudicarunt. Ex plurimis paucos seligo. Quid, quærit Stephanus Baluzius, in *Notis ad epistolam 1. S. Cypriani*, Quid eruditius, aut acutius *Apologetico Tertulliani*? Antonius Pagius ad annum 199. n. *V.* eundem præstantissimum illud opus appellat. Beatus Rhenanus in *Epist. cit. Apologeticus*, inquit, *scriptus ad Gentes pro christianorum expurgatione, quas non & eloquentiæ, & eximie eruditionis opes ostentat?* Angelus vero Politianus *Enchiridii Epistolar. Libr. IV. epist. 5.* ita habet: *Ceteros ejus libros cave putes cum Apologetico conferendos, ob eruditionis copiam, vim argumentorum, ipsiusque etiam dictionis ardorem singularem.* Nicolaus le Nourry præstans ille Criticus *Dissertat. IV. c. 2. a. 4.* Apparatus sui: Summo fere omnium, inquit, cum græcorum, tum latinorum christianorum applausu, communique approbatione susceptus, lectusque fuit hic liber, Neque ad id probandum alio opus habemus teste, quam Eusebio, qui memoriæ prodidit, illum tanto apud Græ-

* In *Argumento.*

Græcos fuisse in pretio, ut ab eis vernaculam suam in linguam conversus fuerit &c. Equidem ratio ipsa

scribendi, & phrasis parum recedit ab ea, quam reliquis in operibus tenet: verum quod desiderari in verbis potest, tanto plus rebus ipsis hic compen-

satur. „ Qui hunc librum, pergit idem celeberrimus auctor, primariis, ut ajunt, labris attigerit,

„ putamus esse neminem, quin statim fateatur, illum frequentibus verborum a bona latinitate alienorum spinis, salebris, asperitatibusque respergi,

„ & magna involvi sæpius obscuritate: at nullum quoque esse credimus, qui non fatebitur, Tertullianum, si hoc in libro lectores suos verborum

„ leporibus, venustate sermonis, & politæ, elegantisque orationis suavitate non deliniat, ac delectet, miro tamen styli acumine, sententiarum-

„ que gravitate eos concutere, ac pleraque omnia illius argumenta tanti esse momenti, ac ponderis,

„ ut iis aut convincantur æquiores, aut pertinaciores conterantur, atque obruantur. Neque tamen dissimulare possumus, eum asperioris ingenii impetu nonnunquam raptum quædam adhibuisse argumenta, quæ aut infirma, atque etiam falsa pluribus videntur. Verum infra docebimus, eos non satis diligenter attendisse, quantum ille hoc in libro brevitati consuluerit, & plura quæ falsa putant, vera profecto deprehendi, si cum aliis, quæ ipse alibi fusius enarrat, attento animo componantur. Non jure autem proorsus immerito potest in hoc libro desiderari melior argumentorum dispositio, & ordo, qui majus toti operi lumen attulisset, & quo Tertullianus sibi facilius conciliasset lectoris benevolentiam, & approbationem. „

Equidem & alii complures ex Scriptoribus nostris cum græca, tum latina ex Ecclesia magnam ex eodem argumento laudem sunt consecuti: & infra

Minutium, Cyprianum, Lactantium, Clementem, Origenem, Athenagoram, Tatianum, Theophilum, Athanasium hac de causa celebrabimus: verum Afer iste omnes & acumine, & impetu facile superavit. Tam audacter in adversarios insurgit, tam arcte eos stringit, tanto robore cædit, & solo affligit: recteque Pamelius præter alia notavit, vel unicum hunc librum (certe non magnum) ad convincendam gentium pertinaciam satis esse potuisse.

Eximie Jacob. Pontanus *Philocal. L. 3. c. 22.*
 „ Præclarissimus, Deus bone! & omni prædicatione efferendus est hic Tertulliani Apologeticus,
 „ id est Christianismi christianissima defensio, longeque quam S. Martyris Justini (quam tamen pro exemplo intuetur) & Philosophi Aristidis, qua ingenio, qua doctrina excellentior. *Quem sese ore ferens, quam forti pectore, & armis? Ut de Ænea magnanimo heroë Dido in 4. & de eodem Diomedes respondens Legatis in 11. Æneid.*
 „ - - *experto credite, quantus in clypeum assurgat, quo turbine torqueat hastam.* Qualia, quam arguta Enthymemata vibrat! quam valide premit! quantum ubique nervorum, roboris, ossium? quid ille literarum ignorat? quos libros non legit? non auro contra charus hic apologeticus nobis sit oportet, cujus rationibus, & argumentis instructi quemvis quantumcunque hujus mundi sapientem, & a christiana Philosophia alienum, ac Deos commenticios venerantem lethalibus plagis ad terram dare, & occidione occidere possumus. „ Legi etiam potest Joannes Costerius in *Notis ad Vincent. Lirinens.*

Alterum locum inter scripta Tertulliani *Præscriptiones adversus Hæreticos* sibi vendicant; nam & istæ admirabiles sunt, merisque nervis constant. Renatus Laurentius de la Barre ita de hoc libro: *In quo*

quo mirum est, ait, quantis rationibus catholicæ Ecclesiæ legitimam successionem, auctoritatem primariam, & in causis fidei jurisdictionem asserat, probet, & confirmet.

His solis hæreses universæ, quotquot hætenus ab inferis extitere, vel futuris etiam temporibus inde efferent caput, ita contrivit, ut ante pugnam debellatum sit, & quoties stylo manum admovet, plura simul opinionum monstra velut confixa procumbant. Pamelius, & alii plures *vere aureum opus*, Dumesnil *opus Tertulliani præstantissimum* appellant; & maxime illi quadrat, quod Trithemius de libris ejus generatim ait, *hæreticorum errores fortiter contrivisse*. Est autem multo jucundissimum audire, quomodo ex ipsis *Protestantibus*, quos dicunt, non pauci hoc opusculum dilaudent, & admirentur. Ecce enim id illi faciant? Ego quidem minime video, nisi quia virtus vel in hoste laudatur, & devicti solatium quoddam est ostentare vires, & arma tollere, quibus succumbendum fuit. Mirificus autem, & singulari artificio præditus in eo noster est, quod mores hæreticorum & vitam, & effugia omnia brevissime quidem, verum ita describit, ut accuratius, magisque ad vivum nullus pictor coloribus exprimeret. Cum ergo id genus hominum eadem semper chorda soleat oberrare, in illis primæ ætatis depravatoribus hodiernos quoque velut in antecessum Tertullianus jugulavit. Vide editionem hujus opusculi Bruxellensem 1675, a Christiano Lupo curatam.

Post hos vero libros mihi quidem quam maxime probantur, & sapiunt duo illi *de Carne Christi*, & *de Resurrectione Carnis*, ubi quidem luculenter Tertulliani character emicat, modusque arguendi quam acutus, tam densus, stringens, & copiosus. Ait autem de istis Beatus Rhenanus loc. cit. *In Libro de carne Christi, & de Resurrectione carnis quantus in*

Philosophia fuerit aperte commonstrat, dum tantum argumentorum illic profert, tam apposite, tam dense, tam acute, ut nihil apud nos exstet in hac re. quod cum illo conferri possit. Superfunt Libri Morales præcipue, uti ad *Martyras*, ad *Uxorem*, de *Speâculis*, de *Patientia*, de *Pænitentia*, de *Habitu muliebri*, de *Cultu sæminarum*, de *Velandis virginibus*, de *Oratione* *. Hi enim ceteros, quos adducere adhuc possem, facile antecellunt, locosque habent eximios, & tam communes, ut sacris oratoribus latissimum præbeant campum, in quo non facile solum, sed longius etiam exspatiuntur. Certe eo minus prætermitti eos velim, quo breviores sunt, & citius legendo absolvuntur. Quamquam & de singulis aliquid dicendum est.

Ille ad *Martyras* excelsæ mentis partus est, fortitudinem, ac robur tantum non inspirat, ostenditque velut in speculo, quam essent ea ætate christiani rebus omnibus humanis superiores. Idem in alio genere de Libris ad *Uxorem*, & de *Speâculis* dicas. Ut enim in prioribus contemnuntur molestiæ, & cruciatus, ita in his voluptates, ac deliciæ omnes calcantur. Ejusdem spiritus Librum de *Patientia* multi admodum extollunt. Tarquinius Gallucius *Orat. V. magnificam, ornatissimamque orationem* appellat: Petrus vero Priorius in *argumento* hoc opus, ait, *mira esse elegantia concinnatum.*

Liber de *Pænitentia* tam est accuratus, & elegans præ aliis plerisque, ut hac maxime de causa & Erasmus, & Rhenanus alterius cujusdam styli illum esse putarent.

De *Habitu muliebri*, & de *Cultu sæminarum* libri studiose volvendi sunt, multumque conducere ad temporum nostrorum emendationem possunt. *Libri*

* Quem nuper Muratorius ex codice nescio quo redintegravit.

bri sunt, ait Rigaltius in primis utiles, altioris sapientiae, sententiis graves, dictionis artificio grati, sed lectoris attentissimi iudicium quaerunt. Secundo autem, addit ibidem, multa de primo tractantur uberius, nova etiam non pauca proferuntur utilius, plena omnia spiritus christiani sublimioris. Idem fere iudicium de illo quoque libello, qui de *Velandis Virginibus* inscribitur.

De *Oratione Dominica* liber singularem quoque & apud antiquos, & apud recentiores laudem habet. Rigaltius hoc, ait, caelestis gratiae pignus * *Patres antiqui certatim praedicavere, nemo Tertulliano doctius explicavit, nemo sanctiore cultu posteris colendum demonstravit.* Certe jam D. Hilarius *Canone 5. in Matth. Volumen aptissimum* vocavit. Post hoc *Scorpiacum* quoque, seu *Scorpiacen* volvere Lector debet, opusculum sane elegans, ut Rigaltius, *insigne volumen, ut Hieronymus dicit **.* Porro in Libris, quos contra Ecclesiam Tertullianus scripsit, multa praeciosa insunt, eodemque quo cetera ardore, ac ingenio profusa. *Montanista factus, ait Cave, sectam hanc viriliter propugnavit editis quamplurimis doctissimis pariter, atque eloquentissimis libris, quibus disciplinae suae rigorem a contemptu vindicavit, aliisque, quibus in Ecclesiam Catholicam, sub nomine Psychicorum invehit est.* Verum uti facundiam hominis laudamus, ita perfidiam non possumus non execrari. Valet ergo de his ejus libris, quod dudum Vincentius Lirinensis admonuit, *disertiores multo in iis, quam fideiorem Tertullianum esse.*

Libri *adversus Hermogenem, & Valentinianos*; item Liber *de anima* sunt maxime philosophici, & quam multum speculationis habent, tam parum ad Rhetoricam sacram conferre possunt. Sed & Libri

B 3

adver-

* Orationem scilicet Dominicam.

** Libro *adversus Vigilantium.*

adversus Marcionem, etsi ibi insanum illud caput ita premit undequaque, & contundit, ut quo se ver-
tat, non inveniatur, nostra tamen ætate tam parum
pro nobis faciunt, ac ceteri, quos priore loco no-
minabam.

Pluribus Dissertationem hanc illustrare possunt Petrus
Alixius in *Dissertat. de Tertulliani vita, & scriptis*
Parisiis 1679. Petrus Thomas du Fosse, qui & ipse *vi-
tam Tertulliani* scripsit *. D. de Giri in Dissertatione
Critica apud Trivultenses anno 1702. D. de Fayolle in
opere: *Genie de Tertullien Parisiis* 1662. Nicolaus le
Nourry *Dissertat. IV. c. 4. artic. 3.* Jacobus Pontanus
Philocalia Libr. I. cap. 2. Joannes Laurent. Mosheim
supra citatus promittit se in vitam, fataque Tertullia-
ni diligentius, quam hucusque factum, peculiari libro
inquisitum, cui & Dissertationes quasdam in opera
ipsa adjecturus esset. An id præstiterit reapse, an ve-
ro, uti Henricus Dodwellus, solum molitus sit, haud
scio; certe necdum vidi.

Editionem Ludovici de la Cerda, quæ, quod anim-
adversiones spectat, non habet parem, ob notam viri
sapientiam & reconditas literas multum quidem perve-
stigavi; sed incassum. Mirari autem hodieque subit,
in amplissima urbe, & tot aliis bibliothecis ne unum
quidem celeberrimi operis exemplar potuisse reperiri.
Sed & illa editione Georgii Ambianensis carebam, mi-
nori utique incommodo; quare nec multum operæ im-
pendi, ut illa potirer.



APPEN-

* Ultimo editam Lugduni ann. 1691. Texit autem nomen suum hic
auctor, & sub alieno Domini de la Motte comparere voluit. Quæ
res, & mihi initio & aliis compluribus imposuit.

De Eloquentia MINUTII FELICIS.

In elegantissimo hoc Auctore ornando breviores erimus, quam ejus fortasse merita, & lectoris expectatio postulent; ne quod pronum est, citius ipsum ejus scriptum, quam elogium legendo absolvatur. Itaque aliud fere non dico, quam quod proprie, & strictissimo sensu huc pertineat. Et ex antiquis quidem Scriptoribus neminem scio, qui de Minutii eloquentia commemoret, præter Lactantium, Hieronymum, & Eucherium. Nam Sanctus Cyprianus, etsi illum legit diligenter, nec pauca ex eo mutuatus est, uti infra dicetur, nunquam tamen hominis mentionem facit.

Sic autem de Minutio LACTANTIUS *Libr. V. Institut. div. c. 1.* ait: *Ex his, qui mihi sunt noti, Minutius Felix non ignobilis inter causidicos loci fuit. Hujus Liber, cui Octavio titulus est, declarat, quam idoneus veritatis assertor esse potuisset, si se totum ad id studium contulisset.*

Atque hanc tu laudem dicis, interpellat me aliquis? Non vides Lactantium, intimum illum eloquentiæ cognitorem, minus contentum Minutii scriptione? Nonne ex his Evangelii propugnatoribus unum esse dicit, *qui defensionis ejus non suffecerunt?* Lege totum illud caput, & inficiari jam non poteris, aperte significari, argumentum hoc christianæ defensionis levius, quam oportuisset pertractatum eo dialogo, aut certe animi causa potius, quam studio & contentione susceptum esse. Responsio prima fronte non tam facilis videtur, eaque fateor initio haud parum curæ mihi iniecit: scrupulus enim in ipsis Lactantii verbis semper hærebat. Denique re diligentius ponderata, atque discussa vidi plane, nullam inesse difficultatem. — Id enim solum-

modo indicare Lactantius voluit, argumentum non tam fuse, quam ipse vellet, nec plenissime pertractatum; quod scilicet Minutius assumere argumenta quædam contentus, cetera, quæ nemo tum requirebat, intacta dimisisset. Gavissus sum autem haud parum, cum in Nicolao le Nourry * hanc ipsam quæstionem agitatam reperi, eamque ex mea plane sententia decisam. Audiamus verba doctissimi hominis.

„ Nihil itaque aliud sibi Lactantius vo-
 „ luisse videtur, nisi christianæ Religionis defen-
 „ sionem hoc Minutii in libro totam, integram,
 „ atque omni, qua poterat, parte perfectam, & ab-
 „ solutam non exhiberi. Christianæ enimvero Re-
 „ ligionis veritas variis, ut jam monuimus, &
 „ omnes ultro fatentur, argumentis, quæ sola, se-
 „ parataque sufficiunt, demonstrari potest. Minu-
 „ tio itaque nullus vitio unquam jure merito ver-
 „ terit, quod ad funditus evertendos gentilium er-
 „ rores, ad propulsandas illorum in christianos fal-
 „ sissimas criminationes, ac stabiliendam christia-
 „ næ Religionis veritatem ex pluribus argumentis
 „ ea selegerit, quibus hæc satis, superque demon-
 „ strantur. Ita sane aliqui haud plane ignobiles
 „ christianæ Religionis defensores illius veritatem
 „ demonstrarunt ex adimpletis divinorum Prophe-
 „ tarum oraculis: alii ex Christi Discipulorumque
 „ ejus miraculis, alii vero aliis argumentis, quæ
 „ hic dinumerare nihil necesse est. Quis tamen
 „ illos suo defensoris munere non rite perfunctos
 „ dicere unquam ausus est? „

Alii eo quoque sensu commode accipi posse Lactantii verba existimabunt, quod Minutius, ut defensionem veritatis melius susciperet, causis profanis nuntium remittere debuisset, ne illis distractus to-
 tum

* *Tom. II. Appar. ad Biblioth. Veter. PP. Dissertat. I. §. 2. a. 2.*

tum se transferre non posset ad primariam illam causam pervincendam. Utut sit, mea parum refert, salvaque Minutio manet laus sua, imo augeatur hac ratione quam plurimum. Sic enim clarum est, summum Christianorum Oratorem, nihil in eo auctore præter otium, aut plura potius opuscula desiderasse, quod ipsum quantæ laudis sit, nulli etiam minus æquo æstimatori potest esse obscurum.

Alter Minutii laudator est HIERONYMUS, qui in *Catalogo cap. 58.* hunc in modum de eo scribit: *Minutius Felix, Romæ insignis Causidicus, scripsit Dialogum Christiani & Ethnici disputantium, qui Octavius inscribitur. Sed & alius sub nomine ejus fertur de fato, vel contra Mathematicos, qui cum sit & ipse disertus hominis, non mihi videtur cum superioris libri stylo convenire. Et iterum Epistola 84. nunc 70. ad Magnum: Minutius Felix Causidicus Romani fori, in libro, cui titulus Octavius est, & in altero contra Mathematicos, si tamen inscriptio non mentitur auctorem, quid gentilium scripturarum dimisit intactum?*

S. vero Eucherius vir disertissimus, & qui præcipuos illos Patres, qui ante ejus tempora floruisent, omnes legerat, *Epist. ad Valerianum* cognatum suum, Minutium non dubitavit inter clarissimos facundia numerare.

Præterea, quanti ab aliis fieret Minutius, & quo loco scriptum ejus in Ecclesia esset haud obscure divus Cyprianus prodidit, qui *de Idolorum vanitate*, item *ad Donatum*, & *Demetrianum*, & alibi non senfa ejus solum insecutus est pluribus locis, verum verba quoque ipsa non raro adoptavit. Plures credo, quam triginta loci sunt, quos Sanctus Doctor e tenui hoc opusculo vel servatis iisdem vocibus transcripsit, vel immutatis tantisper, ac suis interjectis usurpavit. Id quod mirum haud dubie videri debet in tanto, tamque facundo Præsule, nisi clarissimo nomine Minutius fuisset, & quam maxime

ad oratorium Cypriani genium fecisset. Non enim, ut in Tertulliano, ipsam rem, sed phrasin quoque, sed verba Minutii alia mente retinuit, quam quod intelligeret, elegantiora invenire se vix posse, quam ille perscripserat.

Sed & Lactantius ex Octavio plura desumpsit, & suis opportune locis immiscuit, id quod clarissimus le Nourry cum de utroque hoc scriptore ageret, advertit solerter, & accurate adnotavit.

Quod post antiquiores hos nemo Minutium laudavit, minime mirum eruditis esse debet. Latuit enim diutissime, & cum (qui unus superest) codex Manuscriptus * Romæ in Vaticana Bibliotheca repertus esset, non proprio, sed Arnobii nomine comparuit, hujus septem libris velut *octavus* additus; quem in errorem homines, talium rerum satis adhuc rudes, haud dubie nominum affinitas pertraxit. Cum vero magno Reipublicæ literariæ commodo agnitus est tandem, atque a Francisco Balduino Jurisconsulto Heidelbergensi e rudibus, in quibus tot jam sæculis delituerat, protractus in lucem, certarunt scilicet eruditi, disertique homines, uter alteri palmam in ornando, celebrandoque pulcherrimo Scriptore præriperet. Non ergo multos tantum, sed magnos quoque laudatores nactus est Minutius, & vix aliquem legere me memini, qui nominatum illum sine elogio aliquo præteriret. BALDUINO tamen pro meritis dandum est, uti ante alios omnes ipse audiatur. Ita autem de eo ad Fredericum Electorem Palatinum scribit. *Cum antiqua quædam monumenta pervolutarem, ecce cum suo Octavio commode mihi occurrit Minutius Felix, quem ego quidem tam agnovi lubenter, tamque magna cum lætitia statim sum complexus, quam multis jam sæculis latuisse*

* Est ille etsi Eruditorum judicio satis mendosus, tamen nongentorum fere annorum.

tuisse dolebam. Ejus itaque Dialogum, qui mirifice me recreavit, lectissimum dico libellum, quem cæca posteritas non agnitum prope suppressit, putavi cum aliis communicandum. Et in Præfatione Minutium magnum & excellentem oratorem salutatur, qui prioribus Jureconsultis non solum abs religione alienis, sed & ejus acerrimis adversariis succedens sive forum, sive collegium Romanæ togæ, atque advocacionis, quod tot jam annis aspersum fuerat sanguine, & cineribus piorum hominum, tandem aliquando voce, & vestigiis christiani Jurisperiti expiasset, atque consecrasset.

CAROLUS SIGONIUS in *Histor. occidental. Imper.* Cum de Romana eloquentia Sæculo tertio loqueretur, sic habet: Non prætereundum illud etiam, eloquentiam per hæc tempora summo studio Romæ, & in Italia celebratam. Testis est divus Hieronymus, qui ad Rusticum scripsit: Mater post studia Galliarum, quæ florentissima sunt, misit te Romam, ut ubertatem, nitoremque gallici sermonis gravitas Romana condiret. Floruere autem hac laude Romæ Nazarius, qui Rhetoricam docuit, & Minutius Felix, qui causas oravit, & Lampridius Spartianus, Capitolinus, & Vopiscus, qui vitas superiorum Imperatorum literis mandaverunt. Qui quanta dicendi facultate valuerint, ex scriptis eorum perspicere potest.

JOANNES MEURSIUS in *Hypocritico Minutiano* ad initium Octavium Minutii scriptum sane perelegans,

CARDINALIS VERO BARONIUS ad annum 211. Aureum plane Commentariolum vocat, addens, & quæ objectari solerent, & quibus objectata confutarentur, scitissime ibi proponi.

MICHAEL VASQUEZ de Padilla de Augustiss. Mysterio SS. Trinit. pag. mihi 109. Disertissimus, inquit, Christianorum Advocatus Minutius Felix.

NICOLAUS CAUSSINUS *Libr. XV. de Eloquentia sacra, & humana* propius initium: christiani nominis acerrimum, eundemque disertissimum propugnatorem
Minu-

Minutium dicit. Idem fere ait HIEREMIAS DREXELIUS in *Prodro-mo* cap. 3. §. 30. & Eminentissimus BONA in *Notitia Auctorum*, quam Tractatui de divina Psalmodia subjunxit.

JACOBUS TIRINUS in *Indice Auctorum* de Minutio Felice: *Scriptit eleganter Dialogum Christiani & Ethnici, cui titulus OCTAVIUS.*

CASPAR BARTHIUS Libro XLIII. *Adversar. c. 25. Elegantissimus Dialogus est MINUTIUS FELIX CONTRA GENTES, qui cum in omnium manibus versetur, quantulacunque in eum merita nostra erunt tam utilia in commune. Quod si neque hoc assequemur, certe nobis bene erit tam jucundæ animæ vel tantillam operam navasse.*

PHILIPPUS BRIETIUS *Sæculo III. cap. 1. Eodem tempore, ait, edidit præstantissimum opus, quod inscribitur Octavius, Minutius Felix Romæ Causidicus insignis . . . hoc opus diu Arnobio adscriptum, cujus conficiebat librum octavum, tandem redditum est auctori suo, indigno propter excellentiam ingenii, cujus opus & liber tamdiu lateret.*

NATALIS ALEXANDER *Sæculo III. cap. 4. Octavium insignem Apologiam nominat.*

GUILLIELMUS CAVE ad annum 220. *In quo sane libello totum gentilium cultum, Deorumque prosapiam non minus erudite, quam venuste, & ingeniose convellit, & Christianos, eorumque sacra ab omnibus Cæcilii calumniis, atque objectionibus eleganter, & nervose vindicat.*

RENATUS RAPINUS *de Elog. Sacr. considerat. II. cum docuisset, ornatum, atque amoenitatem minime abesse a concionibus nostris debere, inter Latinos Patres Minutium primum ponit, qui siccitatem, & asperitatem, ceteris adeo familiarem, effugere in scribendo potuisset.*

STEPHANUS BALUZIUS in *Notis ad Epistolam 1. S. Cypriani*: Quid elegantius, exclamat, Octavio Minutii Felicis?

JO. GOTTL. HEINECCIUS bonæ latinitatis studiosissimus in *Fundamentis styli cultioris Parte III. cap. 1.* vult Minutium Felicem non secus, ac Terentium, Ciceronis epistolas, & libros aliquot Philosophicos, nec non Julium Cæsarem, diurna, nocturnaue manu versari a Tirone, postquam omnium facillimos illos Phœdrum, Pomponium Melam, Eutropium, & Cornelium Nepotem jam legit. Et certe ea de causa editus sæpe est in usum scholarum a Christophoro Cellario. Prima editio, ni fallor, curata est Halæ 1699. ubi lectionem ejus valde commendat humaniorum literarum studiosis, qui sic in Scriptore purioris latinitatis proficere, styloque nitorem, & elegantiam addere sic possent, ut simul fidei fundamentis, sanctitate morum, ac historia ecclesiastica imbuerentur. Probat idipsum Clarissimus le Nourry Dissertationis laudatæ cap. 2, art. 4. *

CLAU-

* Ego ut ingenue fatear, quam ægre a tantis viris dissentio, judicium hoc eorum comprobare nullatenus possum. Non quod Minutium eloquentia deficiat, qua classicis auctoribus annumeretur, sed quod loci in eo quidam sint, teneris mentibus omnino fugiendi, ne audiant, quæ tutius multo ignorent. Quod si ergo seu domesticus præceptor, seu publicus ad ejusmodi locum explicando devenerit, quid agat ita deprehensus? omittat illum, atque prætereat? verum id sciendi cupiditatem acuet in discipulis, & in hujus facti rationem diligentius etiam inquirent. Ergo audacter, uti cetera explicet, castisque omnia casta putet? hoc vero sine pudore vix fiet a præceptore; juvenes vero sine offensione, & periculo manifesto nequaquam audituri sunt. Itaque differatur lectio ad eos annos, ubi securius per se ipsi incidere in sordes Ethnicorum possint, obfirmato jam animo, & noscendis ejusmodi rebus paulatim assuesfacto.

CLAUDIUS FLEURY *Histor. Ecclesiast. Libro V.* §. 39. opusculum Minutii nostri præcellentem *Dialogum* appellat.

JO. MATTHIAS GESNERUS Commentator Heinæccii animadversione in locum illius supra datum: *Minutium*, ait, & elegantiae. & concinnitatis esse studiosissimum, ex quo nostræ religionis principia, ac mysteria stylo elegantiore exprimere discamus.

SIGEBERTUS HAVERCAMPUS, magnum inter suos nomen, *Præfat. in Apologeticum Tertulliani* recens editum, Minutium asserit uno etiam libello multum veræ gloriæ meruisse.

JOSEPHUS BINDER *Parte XI. Apparat. pag. 40.* ita habet: *Minutius Felix Afer; Romanus Causidicus*, qui elegantissimum *Dialogum* scripsit inter Cæcilium Gentilem & Octavium Christianum.

BERNARDUS MARECHAL in *Concord PP. Minutii Felicis* eloquentia, ait, ac rerum profanarum eruditio optime e *Dialogo* ejus colliguntur. Meritum, & præstantia Scriptoris hujus cuique id opus percurrenti facile perspecta fient. Si styli nitorem spectes, verborum delectum, concinnitatem, vim ingenii, subtilitatem argumentorum: si his omnibus amœnissimas item, quæ passim occurrunt, descriptiones, imagines, ac figuras non varias minus quam nobiles addas, habes in *Minutio* pene dixi elegantissimum Scriptorem totius antiquitatis. &c.

ABBAS LADVOCAT, in *Lexico Historico portatili*, celebris hujus Oratoris Octavium excellentem & amœnum *Dialogum* appellat.

Superest, ut meam quoque opinionem aliorum sententiis adjungam. Hanc si quis roget, fidenter pronuntio, tanti me opusculum hoc tenuissimum facere, ut malim plurimos, spississimosque eloquentiæ tractatores, quam Octavium hunc nostrum sacris oratoribus deperire. Tam immensa vis rerum hic latet, tam aptis argumentis, exemplis, & aucto-

auctoritatibus pugnat, atque aduersarios iisdem, quibus armati sunt, telis retundit: tam felix ingenium, tam vividus sermo, tam nitens eloquium inde promanat, ut omnem ejus elegantiam, ac leporem sentire sit multo facilius, quam enarrare. Nec mirum, Cæcilium, cum paulo ante despumaret convitia, & efflaret minas, & ampullas horribiles projiceret, denique Christo ipsi insultaret, continuo orationis hujus velut fulmine percussum victas manus dedisse, & arbitri, judicisque constituti sententiam prævertisse. Felix orator, qui disputationem tam seriam, tamque gravem ita suscipit! Et quot sunt hodieque ejuscemodi, qui summo licet studio simile quid vel in genere morum procedentes, auditores, qui nihil minus ante cogitaverant, immutent penitus, atque ita commoveant, ut persuasos se penitus, imo ad vitium fugiendum, virtutemque amplexandam adauctos palam profiteantur?

Verum & de charactere Minutii aliquid dicendum. Mirum profecto, viros doctos & Minutium ab Arnobio distinguere tamdiu non potuisse *. Nempe attentio eos, ac diligentia defecit; secus debebant advertere discrimen, quod sane ingens est inter Afri illius difficilem, confusam, inæqualem, & hujus Romani felicissimam ac politissimam dictionem. Equidem le Nourry ibid. cap. 1. art. 2. quosdam ait ex ipso stylo in Africa natum suspicatos;

* Miratur doctissimus le Nourry, Erasmo quoque ipsi in legendis Patribus tam exercitato hac in re impositum fuisse. Verum quod pace ejus dixerim, Erasmus jam ante obierat diem suum, quam prima editio Fausti Sabæi Brixiani 1542. prodiret in lucem. Imo Erasmus in Nuncupatoria crediti Arnobii in Psalmos disertis verbis docet intercidisse illos laudatos libros, quibus idem, ut putabat, Arnobius *adversus gentes* pugnasset. Est autem nuncupatoria ea ad Hadrianum VI. Pontificem anno 1522. data.

tos : sed recte respondet, hos nec probare, nec probare posse, aliquid durioris africani sermonis in eo deprehendi. Quod si paucula in eo sunt, in quibus offendit oratio, atque obscurior fit : id non auctori, tanta perspicuitate, tanta facilitate ubique loquenti tribuendum, verum vitio librariorum, aut certe inopiæ MS. Codicum, ad quos loci illi exigui, castigarique possent. Paulo ante laudatus le Nourry *ib. c. 2. a. c.* plures ostendit ejusmodi locos corruptos, aut corruptionis suspectos, quos post tot jam factas Minutii editiones sanari etiamnum deberet.

Porro omnes fere, qui Minutii eloquentiam obiter descripserunt (neque enim fuisse id facere solent) nitorem ejus laudant cum densitate quadam rationum admirabili conjunctum. Et certe in hoc præcipue excellit ejus genus dicendi, quod tam multa, tamque grandia brevi, tersa, & facili oratione comprehendat. Sex plus minus majoribus foliis comprehenditur Octavius & nihil fere accusationum illarum præterit, quas alii sive ut Religionem nostram tuerentur, sive etiam propugnarent, prolixissimis disputationibus complexi sunt. Hoc est, quod lectori primum occurrit, quod intentum semper ejus animum tenet, quod admiratione defigit, quod vel in celeberrimis hujus ævi oratoribus frustra requiritur. Caussin operis laudati *Libr. III. c. 14.* Minutium *summa ait dictionis facilitate præditum.* Havercampus quoque loco cit. *rotundum ejus, & lene fluent eloquium* in ea brevitate admiratur.

Balduinus ait : *Genus dicendi est argutum, acre vehemens, est pressum, densum, nervosum, crebris sententiis compactum, omniumque antiquitatum, atque historiarum memoria refertum, in quo plures sententias, quam periodos numerare possis.* Quo sane ipso admirandus splendor exsurgat, necesse est. Etsi autem flumen illud, & perpetuam Ciceronis jucunditatem

tatem non est plene assecutus (quis enim eam assequatur?) Senecam tamen, cujus ingenium imitari videtur, meo judicio post se longissime relinquit. Provoco ad cujusque alterius sententiam, neque dubito fore, ut quod mihi contigit iterato illum legenti, etiam ipse de se continuo fateatur, Minutium ob rerum & sententiarum copiam incredibilem, nexibus & conversionibus gratissimis confertam, dictionem denique ipsam lepore, siliis, & omni genere elegantiarum conditam, novum sibi identidem, atque aliam apparuisse. Ecce quem haustæ eruditionis usum facere vir disertus possit! Legit Minutius Philosophos, legit Poëtas, & Oratores, id quod pluribus ostendere possem, si mei foret instituti: sed neque legit tantum, verum imitatus quoque est, & excerptit. Atque hoc dum facit, dum omnia Ethnicorum convertit in rem suam, & apiculæ in morem comportat, nec hiulca, nec inæqualis, nec obscura fit oratio ejus. Sed & Tertulliani vestigia sicubi terit, qua claritate, quo ordine, quâ connexionem id exequitur? ita sententiam retinet, ac vigorem sectatur, ut verborum spinas penitus omittat, nec quidquam obscuritatis, sordium & scabritiei ejus contrahat.

Joannes Fridericus Gronovius *Libr. Observator. in Scriptor. Eccl. cap. 7.* „Minutius Felix, inquit, „Dialogum contra Paganos scripsit, lactea sermone ubertate Lactantio nihil cedentem; mirabili „ubique perspicuitate, etiam in acute dictis; nihil argutiarum obscuritate molestum; nihil in- „tempeltiva eruditionis ostentatione insolens, aut „arcessitum: nihil verborum novitate, aut trans- „ferendi improbitate, aut compositionis scabitudine durum, horrens, abruptum. Omnia certe „ejus, in quibus, quomodo legendum sit, non „ambigitur, has habent virtutes. Argumentum „ingens, illa quoque, quæ labem contraxerunt,
Vol. II. C „ita

„ ita esse curanda, ut non in Minutio Minutium
 „ quæras, Tertullianum, aut quemvis durissimum
 „ Afrorum invenias. „

Sed & Nourryum quoque audire debemus, qui
cap. 2. art. 3. omnia fere ista sic confirmat, ut ta-
men nova quædam superaddat. Sic autem ait.
Omnes porro magno plane consensu unaque voce saten-
tur, Minutii in hoc dialogo dicendi genus esse grave,
argutum, elegans, politum, acre, vehemens, pres-
sum, concisum, præclaris, gravibusque sententiis pas-
sim ubique repletum. In eo etiam elegantes quædam,
concinne, & ipsa sua brevitate gratissimæ descrip-
tiones occurrunt, atque ea in primis cunctorum ore cele-
brata, quæ puerorum sese testarum in mare jaculationi-
bus oblectantium ludus describitur.

Qui quam brevissime rem absolvere velit, ne-
 que complurium præterea auctorum verba transcri-
 bere, is mea opinione rectissime faciet, si dicat, in
 Minutio omnes se aliorum virtutes, nullum vero
 vitium reperisse. Atque hoc ipsum solari nos quam
 maxime debet, si quando dolemus, tantum ora-
 torem non etiam alia ingenii sui monumenta reli-
 quisse. Nam in hoc veluti breviario plura ille con-
 clusit, quam sperare possemus. Itaque illud ipsum
 cuivis lectorum meorum dictum velim, quod sæpe
 memoratus Balduinus Principem suum in *Nuncupa-*
toria admonuit. *Verba non numerabis, sed appen-*
des, & rerum, atque sententiarum pondus æstimabis,
quorum quidem maximam vim, & copiam in summa
verborum brevitate hic admiraberis.

De Minutii Felicis eloquentia præter Dupinum, Tille-
 montium, Ceillierium &c. fusius commemorant Edi-
 tores ejus sane quam plurimi, Franciscus Balduinus,
 Fulvius Ursinus, Joannes Wouwerius, Gebhardus El-
 menhorstius, Desiderius Heraldus, Nicolaus Rigal-
 tius,

tius, Jacobus Ouzelius, Christophorus Cellarius, Jacobus Gronovius, Jacobus Davies & novissime Joann. Gottlieb Lindnerus. Sed & Ignatius Weitenauer *Subsidior. Libro XI.* & Joann. Georgius Walchius in *Historia Critica Linguae latinae, praesertim cap. XI.* & Ignat. Hyacint. Amat. de Graveson *Histor. Eccl. Libro I. pag. mihi 49.* demum fusissime Petrus Antonius Burchardus in *Differtat. de Minutio, Kilonii 1685.* egregie de ea atque accurate differunt *. Quos omnes intactos ego dimisi, ut superesset avidioribus, quod per se ipsi evolverent: Ceteri vero, qui breves esse nos volunt, nihil haberent, quod de tractationis longitudine conquerantur.

DISSERTATIO II.

De Eloquentia S. CYPRIANI.

CAPUT I.

Laudes ejus, & judicia Auctorum.

Cyprianus, qui & Thascius, Carthagine natus est, civitate Africae primaria, habuitque parentes Senatorii ordinis, qui ut genere sic opibus, & potentia clari essent. Quare institutio ejus, si quae alia, liberalis fuit, capaxque ingenium brevi artibus graecis, atque latinis egregie imbutum. Maxime vero (ut iis temporibus) Eloquentiam ille adamavit, qua ita inter aequales excellere adolescens coepit, ut eandem deinceps in luce civitatis doceret publice, & summum sibi inter oratores nomen compararet. Causarum quoque Patronum egisse videri potest, tum quod disciplinae hujus proprium id esset, cum quod verbis legum medio e foro petitis utitur non semel. Ita exercitatus studiis literarum, & praesidiis omnibus ad dicendum

C 2

instru-

* Iste tamen non tam sua, quam Cavei verba videtur exhibere.

instructus ad Ecclesiam accessit, non sine ingenti gratulatione fidelium, qui a tali homine nonnisi summa quoque poterant expectare. Distractis opibus, & baptismo suscepto, etsi studiis divinarum literarum involutus esset, tamen ex veteri consuetudine nonnihil & eloquentiæ dandum adhuc putavit, atque ad Donatum, & alios forte familiares (neque enim ejus omnia extant) splendide, & graviter de divinis rebus scripsit. Dein per omnia Ecclesiæ munia ad Presbyterium promotus, eum se ostendit, ut Episcopo Carthaginis demortuo e fuga, qua honores declinabat, retractus communi flagitatione, aut vi potius facta, ad supremum sacerdotium raperetur. Hac in provincia administranda & studio sanctitatis, & mole negotiorum, & persecutionibus impiorum perpetuo distentus, neque stylium ultra exercuit, neque pompa verborum, & apparatu sermonis, quo ante, usus est: verum scripturæ, & Tertulliani, quem Magistrum suum dicebat, legendis, quoad licuit, se deinceps impendit. Itaque factum, ut quidquid habebat ingenii, & profanarum literarum ad sacra transferret, & eloquentiam graviolem secutus, quæ Episcopum decebat, formam nobis, & exemplar perfectum relinqueret dicendi ad populum, & gravissimis de rebus christiano more disserendi. His in eorum gratiam, qui initiorum Cypriani ignari sunt, obiter præmissis, oratorum, aliorumque sententias de eodem latas, asserre jam oportet.

Præ omnibus magistrum dicendi, quo nemo ad Tullium propius accessit, LACTANTIUM videlicet, audiamus. Hic *Libr. V. Institut. div. c. I.* ad christianos scriptores forte delapsus, Cypriani quoque mentionem facit, sed ita honorificam, ac luculentam, ut nihil supra. Sic autem loquitur: „Unus
„ igitur præcipuus, & clarus exitit Cyprianus;
„ quoniam & magnam sibi gloriam ex artis oratoriæ
„ pro-

„ professione quæsierat, & admodum multa con-
 „ scripsit in suo genere miranda. Erat enim inge-
 „ nio facili, copioso, suavi, & quæ sermonis ma-
 „ xima est virtus, aperto, ut discernere nequeas,
 „ utrumne ornatio in eloquendo, an faciliior in
 „ explicando, an potentior in persuadendo fuerit. „
 Addit autem *ibidem* capite sequenti, vel apud Ethni-
 cos, eosque disertos celebritatem esse consecutum,
 qui, quantumcunque ejus jam christiani doctrinam
 odissent, atque irriderent, eloquentiam tamen haud
 desissent admirari.

S. GREGORIUS NAZIANZENSUS *Orat.* 18. quæ to-
 ta in laudem Cypriani est, scriptis beati viri insigne
 elogium textit, atque inter alia non dubitat dicere,
 Cyprianum doctrina & eloquentia tanto reliquos
 mortales anteivisse, quanto nos brutis animantibus
 præstamus.

S. HIERONYMUS nunquam nominare Cypria-
 num simpliciter potest, quin eloquentiæ ejus lau-
 dem adjiciat. Sic *Epistola* 84. *ad Magnum oratorem*
Romanum nunc 70. *Eloquentia pollentem vocat.* In
Catalogo Scriptorum ait, *glorioso Rhetoricam docuisse,*
& sole clariora esse ejus opera. *Libr. XVII. Com-*
mentar. in cap. 60. Isaïæ dicit virum sanctum, & elo-
quentissimum Martyrem, qui velut excelsa quondam in
sæculo arbor ædificavit Ecclesiam Dei. Denique
Commentar. in Jonam c. 3. elegantem tropologiam
 prosequens inquit: „ Proponamus nobis beatum
 „ Cyprianum, qui prius Idololatriæ assertor fuit,
 „ & in tantam gloriam venit eloquentiæ, ut ora-
 „ toriam quoque doceret Carthagini, audiisse tan-
 „ dem sermonem Jonæ, & ad poenitentiam con-
 „ versum in tantam venisse virtutem, ut Christum
 „ publice prædicaret, & pro illo cervicem gladio
 „ flecteret. Profecto intelligimus, Regem Ninive
 „ descendisse de folio suo, & purpuram sacco,

„ unguenta luto, munditias fordibus commutasse:
„ non fordibus sensuum, sed verborum. „

PRUDENTIUS *Hymno XIII.* quem in laudem
divi Cypriani prolixum panxit, ita canit:

Punica terra tulit, quo splendeat omne,
quidquid usquam est,

Inde domo Cyprianum: sed decus orbis, &
magistrum.

Est proprius patriæ Martyr: sed amore, &
ore noster;

Incubat in Lybia sanguis, sed ubique lin-
gua pollet;

Sola superstes agit de corpore, sola obire
nescit,

Dum genus esse hominum Christus finet,
& vigere mundum,

Dum liber ullus erit, dum scrinia sacra li-
terarum,

Te leget omnis amans Christum, tua Cy-
priane discet.

Et *infra.*

Flevit obire virum mœsta Africa, quo do-
cente facta est

Cultior, eloquio cujus sibi docta gloriatur.
Mox tumulum lacrimans struxit, cineres-
que consecravit.

Define flere bonum tantum; tenet ille re-
gna cœli,

Nec minus involitat terris, nec ab hoc re-
cedit orbe.

Differit, eloquitur, tractat, docet, instruit,
prophetat.

Nec Lybiæ populos tantum regit, exit us-
que in ortum

Solis, & usque obitum. Gallos fovet, im-
buit Britannos,

Præsi-

Præsidet Hesperiaë, Christum ferit ultimis
Hiberis.

Denique Doctor humi est, idem quoque
Martyr in supernis,

Instruit hic homines, illic pia dona dat Pa-
tronus.

S. AUGUSTINUS mirum, quantum erga Cypria-
ni libros, & stylum afficeretur. Recteque Scholia-
stes ipsius, infra nominandus dixit. *Inter ceteros
vero (Patres) beatus Augustinus singularis fuit ingenii
doctrinaeque ejus (Cypriani) & amator & prædica-
tor**. Sic *Libro II. de prædestinat. SS. qui de perse-
verantia inscribitur c. 19.* Cyprianum vocat *Docto-
rem lucidissimum. Libr. IV. contra duas Epistolas Pe-
lagianorum c. 8.* ait, *etiam in orientalibus Ecclesiis sa-
ma prædicante, & scripta ejus longe lateque diffun-
dente, notissimum. Tractat. 7. in Joann. Magnus in-
quit, Cyprianus Orator. Libr. IV. de doctrina Chri-
stiana ex eodem plura dicendi specimina exhibet
Concionatoribus, quibus demonstret, nullam elo-
quentiæ partem in christianis Scriptoribus desiderari.
Confert autem illum subin cum Ambrosio, quem-
admodum Fabius Tullium cum Demosthene com-
mittit. Eodem opere Libr. 2. c. 39. Nonne vide-
mus, inquit, quanto auro, & argento, & veste sus-
farcinatus exierit de Egypto Cyprianus Doctor suavis-
simus, & Martyr beatissimus. Iterum Serm. 312.
alias 116. de diversis. divinum in eo consilium agno-
scit, ut sanctam Ecclesiam tanto cum eruditionis,
& eloquentiæ apparatu ingrederetur, ut per illam
linguam stultitia gentium nudata feriretur, per quam*

C 4

prius

* *Atque utinam, ait Erasmus Præfat. in Cyprian. Divus
Augustinus, ut Afer Afrum, Episcopus Episcopum nu-
mero voluminum præcurrit, ita dictionis elegantia po-
tuisset assequi! utinamque linguam hujus tam feliciter
esset amulatus, quam candide miratur, ac prædicat &c.*

prius testā atque velata pulchra prudentibus videbatur. Demum L. II contra Cresconium Grammatic. c. 32. cum de Cypriano sermo esset, ita virum extollit: Cujus laudem consequi non vāleo, cujus multis literis mea scripta non comparo, cujus ingenium diligo, cujus ore delector, cujus charitatem miror, cujus martyrium veneror.

EUDOXIA quoque Imperatrix, bonis literis intime imbuta foemina, eximiis versibus Cyprianum celebravit. Quod testatur Photius *Cod. 184.* quo maxime firmatur illud saepe ab Augustino indicatum, versa in Græcum ejus opera, & propter splendorem ac efficaciam in omnium manus venisse. Quod si latine Eudoxia scivit (neque enim inquirere mihi vacat) id nihilo minus facit in rem nostram.

S. EUCHERIUS *Parænesi ad Valerianum, Clarissimum sacundia* Cyprianum appellat.

MAXIMUS TAURINENSIS *Serm. 1. de Cypriano: Eloquentiam ejus, ait, inspiratam divinitus & Ecclesias docuisse, & Sæculum confutasse.*

GELASIUS Papa in *Concil. Romano*, & CASSIODORUS *Institut. divin. liter. cap. 19.* inter Patres Latinos primas eloquentiæ Cypriano deferunt. Ubi posterior etiam *declamatorem insignem, doctoremque mirabilem* vocat: addens, impossibile esse omnino complecti *, quantum inter alios Scriptores conferat.

FLORUS LUGDUNENSIS Ecclesiæ Diaconus Sæculi IX. Scriptor apud Mabillon. *Tom. I. Veter. analect.* de Cypriani Reliquiis.

Hac locuples Christi Thesaurus conditur arca
Purior argento, fulvo pretiosior auro,
Clarior & cuncta gemmarum luce micantum:
Hic

* An potius animo complecti?

Hic nempe insigni Doctor suavissimus ore,
 Eximius Præsul, Martyr celeberrimus idem,
 Lucifer ut nitidus, magna Carthagine missus
 Emicat, & pulchra Cyprianus sorte quiescit.

Ex Recentioribus ROBERTUS FORTUNATUS Ma-
 clonienſis *Epistola* editioni Remboltinæ præfixa,
 Cypriano nominato, *quo vix nobiliorem*, ait, *san-*
ctiorem, copiosorem, subtiliorem, divinioremve com-
perias scriptorem &c.

ERASMUS ROTERODAMUS *Epist. ad Laurentium*
Puccium Cardinalem, qua Basileensem illi hujus Pa-
 tris editionem commendat, & inscribit, ita de elo-
 quentia Cypriani præclare omnino, & granditer lo-
 quitur. „ In tam vasta, inquit, rei literariæ cla-
 „ de, quæ non solum tot egregia veterum monu-
 „ menta, verum etiam innumeros scriptores im-
 „ mortali memoria dignos, totos absorbit, for-
 „ tassineptius videatur, Reverendissime Pater, unius,
 „ aut alterius interitum deplorare, ni Cyprianus
 „ unus esset multorum instar habendus, sive spe-
 „ ctes eloquentiam, sive doctrinam, sive Pastoris
 „ dignitatem, sive pectus, apostolici spiritus vigo-
 „ rem ubique fragrans, sive martyrii gloriam.
 „ Hanc autem jacturam haud scio an hoc modera-
 „ tius ferremus, si totus nobis interisset. Nunc
 „ quoniam ex his fragmentis, quæ nobis nescio
 „ quis casus superesse voluit, conjicimus, qualia
 „ fuerint illa, quæ perierunt: gravius etiam ani-
 „ mo discruciamur, quicumque thesaurorum hujus-
 „ modi sumus avari. Porro ut nunc in obscuro sit,
 „ quæ & quam multa vir ille scripserit, operum
 „ claritas in causa fuit, quæ Hieronymo persuasit,
 „ ut non duceret operæ pretium, lucubrationum il-
 „ lius indicem texere, cum ipsius ætate & sole cla-
 „ riores haberentur, & publicitus omnium mani-
 „ bus tererentur, non existimans fieri posse, ut

„ tantam lucem ac celebritatem ullus casus oblivio-
 „ nis tenebris obscuraret. „

Et rursus :

„ Non possum equidem inficias ire, quin olim
 „ inter orthodoxos Scriptores primas tribuerim Hie-
 „ ronymo : verum ubi Cyprianum, quem prius &
 „ carptim, & oscitans legeram, propius sum con-
 „ templatus, prorsus animi dubius reddor, utrum
 „ utri præferam ; adeo suis uterque virtutibus sum-
 „ mus occurrit. „

Dein :

„ Talem Ecclesiæ Doctorem, talem christianæ
 „ pietatis athletam nobis dedit Rhetorum schola,
 „ ne quis sibi stolide placeat, quod nihil rhetorices
 „ attigerit. Efferant alii, quantum libet, eos, quos
 „ nobis ediderunt Dialecticorum, ac Peripatetico-
 „ rum scholæ, quos nec nos sane improbamus :
 „ certe primas inter orthodoxos Patres Cypriano
 „ tribuit Papa Gelasius. „

Denique :

„ Celebris est apud Romanos Hannibal Pœnus,
 „ qui cum Italis de Romano certavit imperio :
 „ hunc æquum est haberi celebriorem, qui cum
 „ Romanis orthodoxis felicius, quam Hannibal, de
 „ Romana certavit eloquentia. Ille cum Scipione
 „ conflavit armis : hic cum Cornelio Romano Pon-
 „ tifice sic suscepisse pietatis certamen videtur, ut
 „ ambos virtutibus pares eodem die, licet anno non
 „ eodem, similis martyrii palma decorarit, eloquen-
 „ tiæ gloria vicerit Cyprianus. „

PAULUS MANUTIUS *ad S. Carolum Borromæum*,
 qui ejus in edendo Cypriano operam expetierat, ita
 eleganter scribit : „ Extant de eo prodita literis,
 „ æternæque consignata memoriæ præclara sancto-
 „ rum hominum testimonia, sed in re nota, atque
 „ ante oculos posita testibus non egemus. Vitæ
 „ illius prope animatam imaginem in libris, quos
 „ reli-

„reliquit, verissimis expressam lineamentis intue-
„mur. Quantus est in tuenda Ecclesiæ Catholicæ
„dignitate? quam severus in retinenda vetere di-
„sciplina? quam acer in condemnandis novarum
„opinionum auctoribus: in contumacia insectan-
„da, libidine comprimenda? Quæ sententiarum
„gravitas, verborum vis, doctrinæ præstantia?
„Nemo ita languet, aut ita friget in cupiditate
„summi boni, qui non excitetur, & quasi facibus
„admotis incendatur, cum ejus epistolas legit.
„Jam reliqua ejus doctrina quos fructus affert,
„quam uberes, quam salutares! Docemur, exoriri
„calamitates omisso veri Dei cultu, hæreses gigni
„Pontificis auctoritate contempta: qui virginita-
„tem & pudicitiam colat, ei proposita esse maxi-
„ma in coelo præmia: qui Ecclesiæ præsit, aperto
„animo, ac simplici esse oportere, prudentia ta-
„men ita tectum, ut insidiis minime pateat com-
„munis inimici. Plane omnes veterum Philoso-
„phorum libri præceptis referti comparandæ vir-
„tutis, si cum Cypriani sermonibus conferantur,
„inanes, & pene pueriles videbuntur. Sumantur
„in manus, quæ de Eleemosyna, ac benignitate
„literis mandavit: statim omnes, si quæ resident
„in mentibus nostris, avaritiæ sordes exhauriri, &
„infundi eximium erga pauperes amorem sentie-
„mus. Gravis est, & late patet invidiæ morbus?
„at hic rationibus egregie curatur, ex intima Theo-
„logia depromptis. Vexamur calamitatibus, &
„ærumnis, quibus proposita est humana vita?
„præclaram audiamus Cypriani vocem ad poeni-
„tentiam cohortantis, exemplo multorum allato,
„qui nihil acerbum, aut malum præter culpam
„unquam duxerunt, & cum illo immenso sempi-
„ternæ vitæ lucro libenter omnes hujus exiguæ vi-
„tæ fructus commutaverunt. Extat etiam ad Mar-
„tyres, ut cum dolore pugnent, acerbissimisque
„Cru-

„ cruciatibus forti animo resistent, prudens, &
 „ pia cohortatio: deinde quod morte vitam quæsie-
 „ rint, & ex hostibus Dei victoriam reportaverint,
 „ amoris, & gaudii plena gratulatio. Neque vero
 „ aliter sensit, aut sui dissimilem se præbuit in ex-
 „ tremo vitæ die: sed cum ita semper vixisset, ut
 „ obscure inglorieque decedere non posset, ita de-
 „ cessit, ut hoc uno vel obscurissimam vitam illu-
 „ strare posset. Multa prætereo, nec sane perfe-
 „ qui conor omnia, ne suscepisse hoc videar, ut
 „ Cyprianum debitis ornem laudibus, quod, ut
 „ ego sentio, pro ejus dignitate nemo, vel solus
 „ ipse præstare posset. „

SIXTUS SENENSIS in *Biblioth. Sanct.* ait, Cypria-
 num, *postquam gloriose Rhetoricam docuisset, post non*
multum in presbyterum, & Episcopum Carthagini
electum, multa piissima opuscula, elegantissimæ phra-
seos, & Ciceroniano candori proximæ, ad ædificatio-
nem Ecclesiæ scripssisse.

CARDINALIS BELLARMINUS de *Scriptorib. Eccle-*
siast. Cyprianum *virum eloquentissimum, & sanctissi-*
imum vocat.

CARDINALIS BARONIUS ad annum 250. hæc de
 sancti Doctoris eloquentia animadvertit. *Licet ejus-*
modi in dicendo, atque scribendo inierit rationem, ut
non excrescentem modo facundiam circumcideret, ac re-
secaret, sed solo tenuis demeteret; tamen tam latini,
quam græci ejusdem facultatis omnium disertissimi eam
sunt vehementer admirati. Quod cum allatis testimo-
niis Lactantii, & Nazianzeni confirmasset, subdit;
Quod si post messem tanti æstimatæ sunt paucae humi
inhærentes spicæ residuæ; quanti faciendâ erat prima
illa florentissima eloquentiæ seges, quam humanæ glo-
riæ spirans aura jucundissime agitabat? &c.

JOANNES DE RUSSIERES in *Flosculis Historiarum*
 Cyprianum *Christi Rhetorem* appellat, qui, *cum*
Plotinus celeberrimus Platonicus, & auditor Origenis
Romæ

Romæ doceret, ingenti mortalium plausu, longe melius Carthagine vera Christi doctrina suos imbuisset.

JOANN. FRIDER. GRONOVIVS Libr. *Observator. in Scriptor. Eccles. c. 3.* Mirifice, ait, se semper delectatum beatissimi Martyris Cypriani scriptis.

NATALIS ARGONENSIS *Part. III. cap. 2.* Cyprianus, ait, eleganter, atque etiam ingeniose, acuteque scribit.

NICOLAUS LE NOURRY * Nemini, inquit, quantumvis parum erudito incompertum esse putamus, quis fuerit sanctissimus ille vir, qui Ecclesiam non solum vitæ sanctimonia, & effuso sanguine, sed suis etiam scriptis mirum plane in modum illustravit.

ANSELMUS DESING ** & FRANCISCUS MANNHART *** Cyprianum eloquentia Ciceroni haud longe imparem audent dicere.

JOSEPHUS BINDER *Part. XI. Appar. pag. 41.* Cyprianum oratorem summum appellat.

Taceo alia innumera facundiae ejus elogia; nam qui his contentus non est, adire eos poterit, quos magna copia, atque delectu infra ad calcem nominabimus.

C A P U T II.

*Notæ peculiares.**

De Cypriano Augustinus *Epistol. 48. nunc 93.* recte admonuit. *Stylus ejus habet quamdam propriam faciem, qua possit agnosci.* Etli enim nec ipse omnino nihil africanum habet, uti Erasmus in *Hilarium* dicit, **** tamen ceteris Afris ingenti sane intervallo præ-

* In *Apparatu ad Bibliothecam Patrum Tom. II. Dissertat. 5. cap. 1. art. 2.*

** In *compendio eruditionis Libr. 2.*

*** *Dissertatione 7. Theologica, & §. 6. de Antiquitatib. christianor.*

**** Vide præterea Morhofium de *Patavinitate Liviana cap. 9. & seq. Daumium Libr. de causis amissæ eloquentiæ. Jacob. Pontanum Philocaliæ Libr. 1. c. 23. Dupinum in Biblioth. nov. Dodwellum in Dissertationib. Cyprianic. & Fellum in Annotationib.*

præcurrit ejus ratio differendi, & enuntiandi. Porro characterem Cypriani ipse Augustinus *Libr. V. de Baptismo contra Donatistas cap. 17.* non infeliciter ita expressit: *Sed jam ad illa eloquia pacifica, Cypriani, hoc est ad epistolæ finem omnibus consideratis, pertractatisque perventum est: quæ me legentem, & sæpe repetentem non satiant. Tanta ex eis jucunditas fraterni amoris exhalat, tanta dulcedo charitatis exuberat. Accedit sententiæ Hieronymus Epist. 13. nunc 58. ad Paulinum: Beatus Cyprianus, ait, instar fontis purissimi, dulcis incedit, & placidus. Item Cassiodorus Loc. cit. quando ait, eum velut oleum decurrere in omnem suavitatem lingua composita. Sed & Prudentius laudato Carmine, captus plane ea suada sic exclamat:*

Spiritus ille Dei, qui fluxerat auctor in
Prophetas,

Fontibus eloquii te cœlitus actus irrigavit.
O nive candidius linguæ genus! o novum
saporem!

Ut liquor ambrosius cor mitigat, imbuit
palatum,

Sedem animæ penetrat, mentem fovet, &
pererrat artus:

Sic Deus interius sentitur, & inditur me-
dullis.

Denique ex nostris Nicolaus Caussin *Libro XIV. de Eloquent. Sacr. & hum. cap. 23.* mellitissimum Doctorem Cyprianum appellat. Et iterum *Libro XV.* Jam martyrii purpura decorus orator Cyprianus, & quod de eodem dixit divus Augustinus, totus auro, & margaritis Egyptiorum, hoc est exterarum disciplinarum nitens, quas non habet eloquentiæ suavitates! Hæc omnia de suavitate, & unctione incredibili, quæ deprehenditur in Cypriano, sunt verissima quidem, neque dubio locum relinquunt: verum partem duntaxat eloquentiæ ejus conficiunt.

Alia

Alia præterea Sanctus orator habet, claritatem dico, gravitatem, soliditatem, densitatem, ac efficaciam prorsus singularem.

Et de claritate quidem pulchre Joann. Franc. Picus Mirandulæ Comes *Libro III. Epist. 10.* In Cypriano Plinii lenimina, Apulejanæque illecebræ, & Ciceronis non filius, sed perspicuitas. Hæc vero perspicuitas tanto majorem juxta Erasmum * laudem habet, quod est Afrorum minime propria, ut dictum alias, & deinceps diceudum. Licet ergo Tertullianum non imitaretur tantum Cyprianus, sed legeret quotidie, tantum abest, ut aliquid obscuritatis ejus contraheret, ut potius lumen tenebris illis quam maximum inferret. Notarunt hoc plurimi, & ex merito commendarunt. Nobis hoc loco sufficit Cardinalis Bona, qui in *Notitia auctorum* Cyprianum non floridum modo, suavem, doctum, & efficacem ad persuadendum agnoscit, sed addit præterea, quod Tertullianum sic sit in quibusdam opusculis imitatus, ut stylo clariore, & elegantiore uteretur. Verum de hoc fusius, quando, qua ratione Patres imitandi sint, *Libro IX.* ostendemus.

Quod vero gravitatem, densitatem, & soliditatem, quamque ab his consequi necesse est, efficaciam spectat, non est obiter a nobis, vel jejune pertractandum. Hieronymus Platus in Patribus legendis diligentissimus præter dulcedinem illam puritati & copię confertam, orationem Cypriano tribuit plenam dignitatis, & ponderis **.

Abbas Ladvoat in *Lexico histor.* Cyprianum, inquit, unum esse ex Patribus, qui latinus scripserunt. Stylum ejus masculinum vocat, eloquentem, gravem, sublimem, dignumque christiana majestate: præterea ait, accedere ad naturam, nihilque habere declamatorium.

Con-

* In *Præfatione* sæpius allegata.

** *Libr. III. de bono status Religiosi cap. II.*

„ Nihil in hoc reperies, quod ad ostentationem
 „ ingenii videri possit adscitum, aut quod ullo pa-
 „ cto vafritiem sapiat, quæ non abest Hieronymo.
 „ Talis ubique sermonis habitus est, ut loqui sen-
 „ tias christianum Episcopum, ac martyrio destina-
 „ tum. Pectus ardet evangelica pietate, & pietati
 „ respondet oratio: loquitur disertâ, sed magis
 „ fortis, quam disertâ, neque tam loquitur fortis,
 „ quam vivit, ut ipse meminit alicubi. Huic nimi-
 „ rum personæ magis congruebat dignitas, quam
 „ lepos; etiamsi locis aliquot declarat, sibi non de-
 „ fuisse nasum, sicubi res ita postulasset, velut ubi
 „ falsissime ridet hæreticum quemdam, qui nega-
 „ bat, Cyprianum habendum pro Episcopo: deinde
 „ cum refellit eos, qui non meritos, sed aspersio-
 „ ne aquæ baptizatos in periculosis morbis non
 „ Christianos, sed *Clinicos* censebant appellandos.
 „ Nam hic præter perpetuam illam jucunditatem,
 „ sanguinis in morem per omne corpus sparsam,
 „ jocis etiam, ac dicteriis utitur. In una duntaxat
 „ Epistola, cujus initium est: *Bene admones Do-*
 „ *nate*, non nihil ludit apparatu, pompæque ser-
 „ monis. Unde & Augustinus comptæ, jucundæ,
 „ splendidæque dictionis depromit exemplum. „
 „ At nempe, quod huc omnes se referunt, Augusti-
 „ num ipsum, ubi ea de re loquitur, audire debemus.
 „ Sanctus Doctor Cypriani, ut dicebam, studiosissi-
 „ mus *Libr. IV. de doctrina christiana c. 14.* admonens,
 „ in populo gravi nec illam suavitatem delectabilem esse,
 „ quæ exigua, & fragilia bona spumæ verborum ambitu
 „ ornantur, quali nec magna, atque stabilia decenter,
 „ & graviter ornarentur, hæc subdit: „ Est tale ali-
 „ quid in epistola beati Cypriani, quod ideo puto
 „ vel accidisse, vel consulto factum esse, ut scire-
 „ tur a posteris, quam linguam doctrinæ christia-
 „ næ sanitas ab ista redundantia revocaverit, & ad
 „ eloquentiam graviolem, modestioremque restrin-

„ xerit, qualis in ejus consequentibus literis se-
 „ cure amatur, religiose appetitur, sed difficillime
 „ impletur. At ergo quodam loco: *Petamus*
 „ *hanc sedem; dant secessum vicina secreta, ubi dum er-*
 „ *ratici palmitum lapsus pendulis nexibus per arundines*
 „ *bajulas repunt, viteam porticum frondea tecta sece-*
 „ *runt* *. Non dicuntur ista, nisi mirabiliter af-
 „ fluentissima fecunditate facundiæ, sed profusione
 „ nimia gravitati displicent. Qui vero hæc amant,
 „ profecto eos, qui non ita dicunt, sed castigatius
 „ eloquuntur, non posse ita eloqui existimant,
 „ non judicio ista devitare. Quapropter ille vir
 „ sanctus & posse se ostendit sic dicere; quia di-
 „ xit alicubi: & nolle, quoniam postmodum nus-
 „ quam. „ Itaque video passim velut exemplum
 „ proponi Cyprianum, quando de gravitate, & ef-
 „ ficacia sermonis præcepta dantur a dicendi Magi-
 „ stris. Nicolaus Caussin^{us} **: *Inter Latinos, ait,*
magnam habet dicendi gravitatem sanctus Cyprianus,
qui profecto mihi videtur post illam ad Donatum epi-
stolam mollioribus adhuc luxuriantem cincinnulis om-
nes dicendi videres abjecisse, totumque se ad severius
dicendi genus elimasse. Dein specimina ex eo petit
 cum illo ipso, tum sexto capite, qualia maxime
 vellem ut alias quoque eodem delectu adduxisset.
 Quærit dein, ista cujus spiritus sint? videri enim
 sibi quot verba, tot spargi fulmina, sensus esse gra-
 ves, & heroicos; nihil Cyprianum admittere, quod
 dicendi gravitatem atterat, & ex Episcopo faciat
 Sophistam: generosas esse ejus insectationes, &
 si quæ sint figuræ dictionis, fluere sine ulla affecta-
 tione: verba esse gravius anhelata, orationem ada-
 mantinam, quæ perrumpere amet saxa potentius
 idu

* Loquitur de vitibus tempore autumnii.

** *Libr. XVI. c. 23.*

istū fulmineo: præcludere eum fulmini, mox erumpere &c.

Atque ista sufficere hic possunt; satis enim ostendunt, nihil eorum Cypriano defuisse, in quibus characterem scriptionum ejus situm dicebamus. Jure autem repetimus postrema verba Lactantii, primo capite inter elogia allegati, ubi ait: *Discerni non posse, utrumne Cyprianus ornatior in eloquendo, an facilius in explicando, an potentior in persuadendo fuerit.* Quod si ille discernere nequivit, & pronuntiare, qua maxime harum dotum sanctus Doctor excelleret, tanto magis mihi danda est venia, si ob rei difficultatem non ita plene, cumulateque id præstiti, quam aut lector expectasset, aut ipse etiam voluissem.

Superest, ut cum Cardinali Federico Borromeo * concludamus. Hic enim, qui Patres non minus, quam ævi sui concionatores nosset, characterem Cypriani ita expingendum sibi sumit, uti eundem sanctissimum virum gravibus simul verbis velut exemplar sustollat, quod omnes, maxime juniores, cum dicunt ad populum, respicerent perpetuo, & contemplarentur. Verba illius hæc sunt: *Orator est succosus, brevis, abundans varietate pulcherrimarum rerum, & sæpe vivax, nervosus, acutus, ac denique talis, ut si quis hunc sibi proponeret imitandum, summam facile laudem in suggestu posset invenire. Certe licet admirari, quid sit causæ, quamobrem in tanta copia, tot exemplis ornandæ graviter orationis malint homines eligere data opera, veluti per aberrandi dulcedinem, nova quædam, & a consuetudine communis sensus aliena, penitusque vitiosa, & absurda. Et infra iterum: Si quis erit igitur amplificandæ orationis incuriosus, atque tardior ad inveniendum, & rerum, atque verborum inops, nec ea fecunditate, quæ cernitur*

in multis, poterit ille meo iudicio diligenter, & attente pervolutare Cyprianum, atque ita nativam ingenii firmitatem evincet.

CAPUT III.

Ubi potissimum illa eloquentia resplendeat?

Eloquentissima haud dubie, maximeque elaborata, & oratoriis omnibus luminibus ornata est *Epistola 1. alias 2. ad Donatum*, de qua jam supra fuit mentio injecta. Etsi vero nemo negat, esse ibi paucula, quæ gravius aliquanto dici potuissent, facile tamen, imo splendide excusata sunt. Diximus enim, phaleras adhibuisse Cyprianum conversionis initio, ubi & ipse nondum omnes potuerat, & Donatus familiaris ejus eloquentiæ perquam studiosus pro veteri amicitia etiam expectabat. Ita plerique Epistolam hanc ceteris omnibus quemadmodum tempore, sic facundia præponunt. Maranus in *Vita §. III.* ait: „Summa quidem elucet eloquentia in „aliis operibus Cypriani: inest gravitas sententiarum, ac verborum splendor, sed epistola ad „Donatum tanto artificio composita est, & tam „elegantibus ornata picturis, ut ea tempora minime redoleat, cum Cyprianus in maximis rebus „gerendis, & differendis occupatus jam non exquisitas venustates elaboraret, sed orationis divitias sine fuco, sine pigmentis funderet. „

A qua sententia recedendum mihi tantisper video. Ut enim ingenue fatear, quantumcunque delectet me, & vix non fascinet ea epistola: nihilominus, quod eandem cum aliis contuli sæpissime, tantum tamen abest, ut omnibus Cypriani opusculis superiorem aulam dicere, ut potius inter ipsas adeo epistolas inveniam, quæ istam haud parum antecellit. Est autem nunc LV. ad Cornelium Papam notissima illa quidem, sed de cujus facundia

tam

tam pauci commemorant, ut non possim fatis admirari. Me cum primum legissem, neque putarem, melius quid illa ad Donatum inveniri posse, sic rapuit, tanque augustam sui imaginem in animo reliquit, ut repeterem eam identidem, prælegerem aliis, & pluribus post diebus necdum a jucundissimæ rei sensu me plene colligerem. Hic enim vero videas Christianum Demosthenem, uti jam alias Libro primo ex Rollini sententia dicebam: hic apparet, qualis, & quanta sit eloquentia Patrum, humanis juxta, ac divinis præfidiis instructa, & adornata. Recte de illa Epistola Suyskenus ait, hic *invictæ præsertim constantiæ, animique magnitudinis indicia reliquisse Cyprianum, & ipsum sacerdotales dotes, ac virtutes suas in ea graphice depinxisse.* Addere debebat, nihil simile in hoc genere legi apud antiquos, ne profanos quidem.

Quoniam vero nunc de *Epistolis* loquimur, ut ordine res agatur, non est recedendum ab illis, atque alio dilabendum. Inter has ergo præterea eminent

Quinquagesima secunda.

Quadragesima.

Trigesima quarta.

Decima sexta.

Nona.

Quinquagesima sexta.

Sexagesima secunda.

Sexagesima quarta.

Sexagesima quinta.

Sexagesima Nona.

D 3

Unde-

-
- * Hæc Satyrica est, pungitque acerrime, ac Ironiam mordacissimam ita dextre urget, ut in arrogantis illius viri genium non posset magis convenire. Atque hæc una cum illa, quæ proxime antecedit sunt duæ illæ, quas supra a sale, & acrimonia Erasmus laudavit.

Undecima.

Septuagesima septima.

Octogesima prima.

Quinquagesima septima.

Ex Libris anceps iterum electio est, uter utri præferendus videatur. Mihi præplacet *Liber de Lapsis*, apud veteres identidem laudatus. Ruffinus *Histor. Eccl. L. VI. c. 34.* ait, *Cyprianum de his (Lapsis) Librum magnificentissime scriptum edidisse, in quo & lapsos ad pœnitentiam cohortandos, & contradicentes alienos esse a Christi visceribus statuat.* Ludovicus Granatensis *Libr. VI. de ratione concionandi c. 10. n. 3.* „ Legat, qui volet, inquit, divi Cypriani „ sermonem de Lapsis, & dubitare nemo poterit, „ quid in eo magis mirari debeat, an summam elo- „ quentiæ vim, an flagrantissimum charitatis, & „ pii doloris affectum, quo miserandum lapsorum „ casum & ruinam mœstissima oratione lamentatur. „ Ars enim diuturna consuetudine in naturam quo- „ dammodo versa, & intellectus jam pridem artis „ præceptis imbutus non tam ex arte, quam ex „ se ipso, quæ dicenda sunt, arte inconsulta pro- „ videt, ideoque non modo divino spiritui men- „ tem hominis agenti, atque inflammanti non ob- „ sistit, sed & illi ministerium vocis accommodat, „ ut flammæ suas verborum copia suffragante fo- „ ras emittat. „ Gaspar Barthius *Libro XLVI. cap. 17.* opusculum hoc *aureum Librum* vocat. Mitto ceteros laudatores. Stylus liber ille habet si quis alius elegantem, ac oratorium, gravitatem vero spirat paternam, & constantiam pastorem, ex qua simul flagrantissima charitas, & piæ commiserationis affectus eluceant.

Secundo loco ponendus est *Liber de Mortalitate*, luculenta plane oratio, in qua suos in exitiali lue, strageque corporum sic Cyprianus animat, ac erigit, eam in differendo vim, cum delectum sententiarum

tiarum expromit, ut nihil majus præstare in eo argumento vel principes oratorum possint *Præstantissimum librum* vocat Maranus. Suyskenus vero, cum dixisset, docere illum, nec mortem aliorum defendendam, nec suam timendam, sed desiderandam, addit: *Id autem eo argumentorum pondere, ea sermonis gravitate simul, & suavitate, iisque sententiis executus est, ut nihil præterea in hoc genere merito desideres, nec minus viri eloquentiam, quam pietatem, ac religionem mireris.* Denique infra, cum locos ex eo quosdam recensuisset, ita concludit. *Æquo longior essem, si singula Sanctissimi Præsulis hujusmodi eximia sensa prosequerer.*

Atque utinam priorem illum sermonem haberemus, quo Cyprianus suos hortatus est, uti in eadem calamitate Ethnicos a suis desertos ipsi ne desererent. Pontius enim, qui & compendium ejus aliquod dat, multa & quidem magna præterire se ait, *de quibus hoc tantum dixisse satis sit, quod si illa gentiles pro rostris audire potuissent, forsitan statim crederent.* Addit autem effectus ejus publicos, & salutares apud omnes ordines continuo apparuisse: distributis inter se charitatis officiis nec pauperes quidem cessasse; verum quod facultatibus deerat, compensasse laboribus: & cum Tobias necatos a Rege, & projectos sui tantum generis colligeret, fideles, tanto doctore, id hostibus quoque suis, & persecutoribus impendisse. Quam stupenda sermonis efficacia, qua Sanctus Orator id perfecit, ut Christiani, quantum in ipsis erat, spreto etiam præsentissimo discrimine, illis vitam conservarent, per quos minime steterat, quo minus Christiani omnes non siccam tantum mortem obirent, verum torti crudelissime, & excarnificati necarentur!

Sequitur *Tertius* meo judicio *Liber de Disciplina, & habitu Virginum.* Hunc Suyskenus dicit *insigne opus, auctore suo dignissimum*; sed & ipse Hieronymus

mus *Epist.* 8. nunc 130. ad *Demetriadem* & iterum 22. ad *Euslochium* vocat volumen egregium. Recitavit ex eo locum etiam Augustinus *Libr. IV. de Doctrin. christ.* c. 21. Imitatur autem S. Doctor Tertullianum *Libris de Virginih. velandis*, de habitu muliebri, & præsertim de cultu sæminarum; idque præstat tam egregie, ut optandum summopere esset, illum loco libellorum precatoriorum hodieque in Virginum manibus perpetuo versari. Neque id meum, sed divi Hieronymi consilium est, qui opusculum hoc præ ceteris omnibus quam commendatissimum illis cupit. Ait enim *Epist.* 7. nunc 107. ad *Latam*, cui præcepta dat ad filiolum recte educandam: *Cypriani opuscula semper in manu teneat.*

Quartus non minus celebrandus Liber de opere, & *Eleemosynis*, qui locos sane admirabiles habet, & vel tenacissimum lectorem ad foenerandum Domino, & stirpem pauperibus largiendam emollire potest.

Quinto loco laudandus venit *Trañatus de Oratione Dominica*. Maranus vocat præstantissimum Cypriani opus. Suyskenus opus præclarum, & Sixtus Senensis supra relatus sanctæ, ac venustæ brevitatis explanationem. Gaspar Barthius *Libro LVIII. c. 4. de eo loquens*: Quo libro, inquit, nobiliorem non habet tota Latina Christiana antiquitas. Et jam Cassiodorus de *Instit. Div. Lit.* c. 19. Inter alia, ait de Cypriano, quæ nobis facundiæ suæ clara monimenta dereliquit, in expositione orationis Dominicæ, quæ contra subrepentia vitia velut invictus clypeus semper opponitur, libellum declamatoria venustate conscripsit. Sanctus vero Hilarius *Can. 5. in Matth.* ita æstimabat hanc scriptionem, ut nihil porro addendum ei existimaret. Verissima sunt hæc elogia, verum illud Marani & Barthii non tam de facundiæ eminentiâ, quam aliis prærogativis intelligendum est.

Summam quoque laudem merentur Libelli duo contra Gentiles, quorum unus de *Idolorum Vanitate*; alter ad *Demetrianum* inscribitur. Et de primo quidem Hieronymus *Epist.* 84. ad *Magnum Oratorem Roman.* nunc 70. exclamât: *Cyprianus, quod Idola Dii non sint, qua brevitate, qua historiarum, omnium scientia, quo verborum, & sensuum splendore perstrinxit!* Fulius de eo Gaspar Barthius *Libr. XLIII. Adversar. cap. 24.* Maranus, & ante ipsum Pamelius, aliique adverterunt, compendium quoddam Tertulliani, & Minutii Felicis illud esse. In quo (verba Marani sunt) multa imitatione expressa, nonnulla etiam totidem verbis translata occurrunt ex *Libris Tertulliani adversus Ethnicos, & ex Dialogo Minutii Felicis.* Sed hæc ipsa causa est, cur aliis præponere illum nequaquam licet; laudis enim non minima pars in eum, cujus inventio est, derivatur. Atque istuc etiam in *Librum de Bono patientiæ*, & in *Librum ad Demetrianum* dictum velim. Verum alia præterea causa est, cur hujus opusculi mentio a nobis instituatur. Hoc enim multi non solum in postremis habent, sed aperte etiam calumniari solent. Equidem acerbitas quædam in eo se prodit, non nego, verum ab homine blasphemus, & effrænis maledicentiæ sæpissime provocata. Adde, quod minime compertum est, quis *Demetrianus* ille, adversum quem Sanctus Præsul id conscripsit. Nisi enim Præfectus vel ex Magistratibus quispiam ille fuerit, nihil jam obstabat, quo minus acrius scribere vir sanctus posset, & scelestum illum gravissimis etiam verbis a maledicendo abstergere. Quod vero Lactantius *Libro V. divinar. Institut. c. 4.* dicit, Cyprianum in eo non uti argumentis, quæ ad hominem essent (quod & Hieronymus *Epist.* superiore ad Magnum refert, & in medio relinquit) facilem, neque incommodam admittit responsionem. Quid enim prohibet dicere-

D 5 Cypria-

Cyprianum in communi calamitate firmare potius christianos voluisse, hominis intemperie perculsos, quam ipsum ad fidem pertrahere? Hac vero ratione rectissime ex Vaticanis ostendit, famem, & pestem a sceleribus, non vero ab Evangelio provenire *.

Supereft de *Zelo*, & *Livore* libellus. Augustinus fortitudinem in eo, & gravitatem commendat; sed & populis notum fuisse dicit **. Hieronymus quoque in *cap. V. Epistolæ ad Galatas Librum valde optimum* appellat. Et profecto argumentum ad eam diem novum egregie Cyprianus pertractat, atque diducit. Verum, ut candide loquar, stylus ipse neque tam lucidus est, ac lenis, ut alias solet, neque numeros, & sonitum illum oratorium Cypriano proprium semper habet.

De supposititiis, aut dubiis agere non est mei instituti, id tamen monuisse nunquam poenitebit, vel inter ea, quæ Cypriani perperam dicuntur, esse nonnulla sane eleganter, & egregie scripta. Apposite Erasmus, ubi mentionem de illis facit, in Præfatione toties laudata ita habet: *Ut Cypriano cum ceteris scriptoribus est commune, quod ipsius lucubrationibus multa sint aliorum admixta: ita hoc fuit Hieronymo felicior, quod hujus voluminibus multa sint inspersa prorsus indigna lectu, Cypriano nihil adscriptum nisi doctum, & a magnis viris profectum.*

Qui propius Sancti Doctoris genium & stylum attigerunt, sunt *Liber de Spectaculis*, & *Liber de Pudicitia*. Et hunc quidem Pamelius & Bellarminus genuinum putant Cypriani foetum: nec indignum ceteri censent, qui ei tribuatur; ex styli tamen

* Vide Baronium ad annum 256, qui censuram Lactantii gravibus argumentis revincit. Sed neque alii defunt ex recentioribus quoque Criticis, qui idem faciant.

** *Libr. IV. de Baptismo contra Donatistas cap. 8.*

men diversitate quadam alteri cuidam, antiquo tamen auctori, adscriptum volunt. Ille quoque de Spectaculis germanus Pamelio visus est. Suyskenus, qui *librum insignem* dicit, vero ita pronuntiat: *Sed & stylus libri ad Cyprianicum non parum accedit, ut nonnullis nonnisi perparum ab illo discrepare videatur. Fatendum tamen, hanc styli differentiam minime dubiam esse Cyprianum legere assueto. Neque enim reperire hic est eam dicendi vim, & efficaciam ipsi tam propriam, nec sacrorum textuum usum, quo in operibus suis mirum in modum excelluit.* Dudum ex gustu, ac falliva idem iudicium tulit Theophilus Raynaudus, & quidem, nisi memoria me fallit, de utroque libello. Maranus ait: *Non indignum opus Cypriano liber de spectaculis, siue eloquentiam spectes, siue evangelicum vigorem . . . Et quamvis ex his, qui inter Cypriani opera editi fuerunt, nullus ad sancti Martyris stylum propius accedat: inest tamen quædam dissimilitudo, quam aures legendo Cypriano assuetæ, & contritæ facile percipiant.* Paucis dicam, vix quisquam est hodie, qui hac in parte cum Pamelio sentiat, vel solo etiam stylo considerato: sed neque legisse me quemquam memini, qui neget, hunc & superiorem librum ejusmodi esse, ut juyari inde eloquentia sacra possit, & cui ipse Cyprianus nomen illud suum quam libentissime commodaret.

Librum de *Singularitate Clericorum*, si paulo latinius scriptus esset, inter præcipua eloquentiæ specimina ego reponerem. Laudant eum passim auctores, estque factus ad eas conciones, quibus occasiones peccandi propiores insectari debemus.

Expositio Symboli, quam Maranus *eximium opus* vocat, Ruffini est juxta omnes, & caput operum ejus; adeo ut miratus sim haud semel, auctorem illum scribere ita potuisse. Theophilus Raynaudus *Tom. XI. de just. & injust. confix. libror.* ait: *Explicationem Symboli Apostolorum sua concinnitate, & elegan-*

elegantia se commendare. Imo ea de causa dubitare videtur, num alterius cujusdam Ruffini sit, quam Aquilejensis. Pamelius in argumento: *Expositionem*, ait, *Symboli Apostolorum a nominis definitione auspicatus Ruffinus latissime singulos illius articulos explicat, ac utriusque Testamenti Prophetiis, scripturisque pulcherrime confirmat.* Addit, non immerito sibi videri Gennadium * primas illi hac in re tribuere. Mōnet tamen, errare eum in Canone Scripturarum recensendo. Verba Gennadii sunt: *Proprio autem labore, imo gratiæ Dei dono exposuit idem Ruffinus Symbolum, ut in ejus comparatione alii non exposuisse videantur.* Etsi vero Ruffini partiarius est Gennadius, totusque ab eo stat, & miris hominem laudibus cumulat, de hoc tamen illius opere recte censuit. Sentit cum eo Erasmus ipse *Præfat. in Catechismum suum Tom. V. pag. 944.* Ipse eo afficior quam maxime, neque satis commendare eundem catechistis possum, imo & ceteris concionatoribus, quoties fidei mysteria populo explicare aggrediuntur.

In Sermonibus quoque de *Cardinalibus Christi operibus*, qui Arnoldi bonæ vallis sunt, locos sæpe invenire est, qui gratiam, & facundiam spirent singularem. Id quod ante me plures, & idonei sane testes adverterunt. Placuerunt maxime Theophilo Raynaudo, qui & auctorem detexit, & allegavit frequentissime. Quod præcipuam in illis laudem meretur, est sapientia quædam minime obvia, Theologiæ intima cognitio sensuum vero sublimitas singularis, imo & verborum: etsi stylus ipse scaber dici debet, tumidus, nec raro ambiguus, atque obscurus.

Liber

De Viris illustribus.

Liber contra Novatianos non habet quidem phrasin Cypriani, sed contemni plane non debet, etiam ab eloquentiæ studiosis.

Sed quid Liber de laude Martyrii? Erasmus, Dupinus, & Fellus pro otiosi declamatoris foetu habuerunt. At profecto, ait Maranus, æquius judicandum erat de eximio opere, ad cohortandos Confessores composito non sine vivido quodam pietatis ardore, quem frigidus verborum artifex non facile imitetur &c. Suyskenus præclarum opus vocat, stylo oratorio magisque elaborato, quam indubitata Sancti opuscula, si EPISTOLAM AD DONATUM excipias. Pamelius subline dicendi genus, pulchras item similitudines, & poeticum quemdam modum in eo agnoscit. Verum etsi ob phrasin operosam, & implicatiorem Cypriani non esset hic liber, habet ille alia sane ejus argumenti, præsertim in epistolis, multo præstantiora, uti 2. 81. 9. &c. De numero Sanctorum Patrum, ait Jacobus Pontanus Philocaliæ Libro III. cap. 11. nullus est præter Cyprianum, cujus de Martyrio & Martyribus tam crebra, tam honorifica, tam inflammata oratio. Ut carceribus propter Christi confessionem inclusos celebrat! ut variis casibus, & ærumnis ejusdem causa jactatos deprædicat! ut ad quævis supplicia animo prompto perpetiunda excuscat! ut cruciamenta, & carnificinas constanter expertos dilaudat! ut huic sacro certamini nihil confert! ut huic cælesti triumpho nihil anteposit!

Hæc de Cypriano profanæ olim eloquentiæ Magistro, nunc sacræ & Patrono, & Doctore, qui postquam plurimos mortales velut incentivo tubæ cœlestis animaverat, totque ante se Martyres præmiserat, demum præclara illa, atque eximia scripta sanguine etiam suo obliquavit. Plura dabunt ad hæc illustranda cum illi, qui de Scriptoribus Ecclesiasticis ex professo agunt, tum editores ejus Remboltus, Morellius, Pamelius, Rigaltius, Fellus, Baluzius, seu potius Maranus, & qui gallice vertit Lombertus. Accedunt ex veteribus Pon-

Pontius Diaconus vitæ Scriptor num. 3. 13. & 14. Augustinus Sermonibus nunc 310. 312. & 313. alias 113. 116. & 114. de diversis. S. Maximus hom. 2. in Natali beati Cypriani. S. Ennodius in hymno de S. Cypriano. Ex Recentioribus Scholiastes Augustini in Librum ejus IV. contr. duas Epist. Pelag. ad cap. 8. Gervalius Abbas Trappensis in vita, Dodwellus in Dissertationib. Cyprianic. Bailletus in vitis SS. Suykenus in actis SS. Quo magis miranda est Petri Criniti impudentia, in tanto oratore, quem omnia Sæcula, quem oriens, & occidens admirati sunt, in quo ipse Lactantius tantum facundiz, & lenitatis reperit, quem Græci transfuderunt in linguam suam, cujus editiones inde a typorum incunabulis ingenti numero repetitæ sunt, in hoc, inquam, sermonis duritiem, & quæ non alia? criminantis. Equidem sistendus tantisper is Auctor fuit, neque permittendum, uti impune abiret hoc loco, atque inultam auferret dicacitatem suam. Et jam paraveram lixivium, acre illud, & calens, nec ei absumile, quo hominem aliquando Erasmus prolixè perfudit. Venerat Crinito in mentem, uti contra Hieronymi latinitatem quædam mussitaret. Istuc vero Erasmo, qui censoriam melius callere se existimabat, intolerabile visum, quare ut dixi, probe tinctum, lautumque depexuit ad vivum. Ego vero, quod operæ pretium nullum viderem, aliter apud me decrevi. Nempe non erat iis moribus Crinitus, eoque genio, uti magnis viris accedere semper, & sentire cum iis posset, minus vellet. Dein tantum non est nomen ejus, ut vel minimum Cypriani luminibus officiat: donique lectores dudum amisit. Prætereamus ergo illum, neque respiciamus, quemadmodum facere catellis consuevimus, si qui forte vehementius latrare occiperint. Stabit Cypriani fama, & tamdiu in pretio erit, donec græculi & fugillatores non dico meliorem proferant, sed vel paria duntaxat ausi sint.



DISSERTATIO III.

De Eloquentia LACTANTII.

CAPUT I.

Quid de ea viri eloquentes senserint?

Lucius Cœlius (seu Cæcilius) Lactantius Firmianus Arnobii Rhetoris discipulus fuit: tantumque eo Doctore profecit, ut & ipse adhibitus ad docendum, magnam in eo munere celebritatem inveniret. Causas vero, quas aliqui egisse eum dicunt, nunquam attigit, neque litibus, & contentione illa forensi involvi se est passus. Cujus rei ipsummet, idoneum utique testem habemus. Nicomediam, quæ Diocletiano regnante Imperii sedes fuit, ad Rhetoricam tradendam accitus, domicilium ibi fixit. Verum ob paucitatem discipulorum, qui in Græcia * latinum præceptorem minus requirebant, posita docendi provincia ad scribendum se contulit. Postea (neque enim latere vir tantus poterat) in Galliam a Constantino Magno evocatus est, ut Crispi Cæsaris primam ætatem moderaretur, eumque & latinis literis, & nobilioribus aliis scientiis informaret. Atque ibi verisimile est, libros eum suos edidisse, tam nitide, pure, & æquabiliter scriptos, ut non ab Afro, non ab ærea illa ætate, sed media ex urbe, ipsoque Augusti ævo profecti videri possint. Certe nihil simile Ecclesiastica Bibliotheca haberet, si vel posterioribus sæculis scripsisset Lactantius, vel ætatis suæ errores evitare potuisset. Verum de hoc suo loco infra dicetur:

* Non quod græcam nesciret Lactantius, sed quod latinam profiteretur. Græce enim doctissimum fuisse, atque auctores linguæ hujus legisse studiose, ex libris ejus omnibus ubique elucet.

cetur: nunc magnorum hominum testimonia recensenda sunt, ex quibus, qua eloquentiæ fama, qua apud omnes existimatione Lactantius fuerit, plenius, faciliusque cognosci a lectoribus nostris possit.

EUSEBIUS CÆSARIENSIS in *Chronico ad annum 318. Crispum*, ait, *Lactantius latinis literis erudit, vir omnium suo tempore eloquentissimus.*

S. HIERONYMO, ut alia hic præteream, *Epist. 13. nunc 58. ad Paulinum* Lactantius dicitur *quasi quidam fluuius eloquentiæ Tullianæ.*

S. AUGUSTINUS *Libro II. de doctrina christiana cap. 39. digito in Lactantium* intento ostentat spolia, opesque ingèntes literarum, quibus onustus ille ex Egypto exierit, ad tabernaculum novi fœderis exornandum.

S. EUCHERIUS *Parænesi ad Valerianum* inter clarissimos facundia Doctores primo loco Firmianum ponit.

Ex Recentioribus, siue illis, qui post restauratas bonas literas scripserunt, FRANCISCUS PETRARCHA Lactantii singularis, & æquissimus æstimator fuit. Nam *Inuelliua in Medicos Libro 1. ad finem* Lactantium virum vocat & Poëtarum, & Philosophorum notitia, & Ciceroniana facundia, & quod cuncta transcendit, catholica religione clarissimum. Item *Libro 2. de otio Religiosorum, magnum virum, & exundantem lacteo torrente* appellat.

ANTONIUS RAUDENSIS Minorita, vir non indoctus, & si quis alius latinus, verum Lactantii juratus hostis, in *Proæmio Dialogor. ad Eugenium VI. Papam*, quibus Lactantium proscribi cupiebat, „ Lactantii, inquit, Firmiani divinas Institutiones, „ Beatissime! cum propter dicendi summam elegantiam illam, summamque suauitatem suam: „ ubi nulla prorsus affectata eloquentia, nulla sermonis præparatio inesse perspicitur, tum impri-

„ mis

„ mis ob illius doctrinam gravissimam, qua Christi
 „ Jesu veri Dei nostri causam adversus Gentes pro
 „ sua virili portione tutari conatus est, & sæpe, &
 „ lubenter lectito. Pascuntur enim mirum in mo-
 „ dum legentium aures, nutritur & animus, dum
 „ orationis splendorem, & ornatum, summamque
 „ simul gravitatem animadvertentes intelligunt.
 „ Tanta est enim apud illum virum loquendi faci-
 „ litas, tanta humanarum, divinarumque rerum
 „ & disciplina, & eruditio, ut plerique omnes ex
 „ his, qui tempestate hac nostra eloquentiam pro-
 „ fitentur, novique Cicerones quidam prædicari
 „ gettiunt, cum illum degustaverint, sese ineptis-
 „ simos homines quosdam judicent, & ab eloquen-
 „ tia exules omnino esse se sentiant, orationem
 „ suam, utpote plebeiam, ac pene infantem dani-
 „ nent, illam vero summe probent, summe ad-
 „ mirentur, ac summis laudibus ad coelum tol-
 „ lant &c.,

NICOLAUS ARCIMBOLDUS Jurisconsultus, & Du-
 cis Mediolanensis Consiliarius *eodem opere pag. 24.*
 defendens Lactantium, & cum Raudensi, quem di-
 ximus, tum Candido Decembri Grammatico con-
 tradicens: „ Firmianus noster, inquit, seu pace,
 „ seu bello dixerim eloquentissimorum virorum,
 „ si Arpinatem unum & Patavinum * excepero,
 „ semper mihi visus est facile princeps. „ Et infra.
 „ Habesne Candide, quem Lactantio aut oratio-
 „ nis cultu, aut sententiarum copia præficere possis?
 „ Ciceronem certe scio, statim asciveris? cedam.
 „ Non tamen Lactantius statim pusillus est, si Ci-
 „ cerone maximo non multo minor est. Livium
 „ attuleris? fatebor. Vide tamen, quam multis,
 „ qui antea, & post illum floruerunt, ipse unus
 „ ex-

* Ciceronem & Livium.

„ excellat, qui a duobus duntaxat eloquentissimis
 „ vincitur. „ Denique brevi post: „ Parum dixi,
 „ & pro laude tanti viri omnis mea laus inferior.
 „ Itaque hoc unum mihi persuadeo, ita credo,
 „ & sentio, Lactantii gloriam eam esse, quæ ne-
 „ que meis laudibus crescat, neque tua, aut alio-
 „ rum impugnatione minuatur. „

LEONARDUS ARETINUS *Epist. ad Constantiam Sfortiam*: Maxime vero, ait, inter omnes, qui de christiana veritate scripserunt, longe eminet, & excellentiore quodam ac copia Lactantius Firmianus, vir omnium christianorum procul dubio eloquentissimus, cujus libros lege quæso, si literas amas.

FRANCISCUS PHILELPHUS *Libro V. Epist. 20.* Lactantium virum doctissimum, atque disertissimum dicit.

JOANNES TRITHEMIUS *Libr. de Scriptorib. Ecclesiast.* Firmianum Lactantium virum affirmat in secularibus literis abundanter doctum, divinis Scripturis nobiliter institutum, ita ut in arte dicendi post Ciceronem facile obtinuerit principatum: Addit, Rhetoricen primum Nicomedicæ, deinde Romæ sub Diocletiano, ab eodem vocatum, docuisse, multaque præclara volumina scripisse.

JOANN. BAPT. PLATINA in *Eusebio I.* Quæ in re (in scribendo scilicet) tantum valuit, ut post tempora Ciceronis ab eo secundus habeatur.

JOANNES FRANC. PICUS MIRANDULANUS *Libro I. de stud. div. & hum. Philos. cap. 7.* Quis, inquit, apud nos non videat esse Ciceronem, sed christianum, hoc est aliquem, qui cum ad lineam, unguemque expresserit? quis enim non advertit Lactantium Firmianum æquasse ipsum, & forte præcelluisse in eloquendo?

LUDOV. CÆL. RHODIGINUS *Antiq. Lect. Libr. VI. cap. 18.* Lactantius, inquit, inter christianæ veritatis assertores eloquentia maxime illustris. Rursum

Libr.

Libr. IX. cap. 12. virum doctissimum, & de christiana veritate optime meritum vocat.

JOANNES BAPTISTA PIUS *Annotat. cap. 98.* Lactantium Firmianum illustri vocabulo *maximum religionis veræ propugnatorem* appellat.

FRANCISCUS FLORIDUS *Subseciv. lect. Libr. II. cap. 4.* ita fuse, sed eleganter loquitur: „Lactantius Firmianus Arnobii auditor, Latinorum omnium, qui Theologica tractarunt, citra controversiam eloquentissimus, nostræque religionis assertor acerrimus, celeberrimi, dum viveret, nominis, propter singularem excellentiam a christianæ pietatis cultoribus habitus est, editisque non paucis elegantissimis, magnæque eruditione refertis lucubrationibus, quarum bona pars doctorum manibus teritur, pars vero commune cum ceteris Romanorum scriptis naufragium passa est, sic in omnium ore versatur, quali qui unice cuncta Philosophorum dogmata christianis ex diametro adversantia optimis rationibus pervertens, & gravissimis sententiis, & ityli candore unice sit commendandus. Quamobrem fuerint licet, qui alias Theologiæ partes facilius, quam ille, atque etiam argutius excoluerint, in iis tamen, quæ ad confutanda Gentium (sic enim vocabantur, quicumque ante Christi adventum legem a Moyle traditam non amplecterentur) placita spectant, nemo ad hanc diem extitit, quantum quidem ipse judicare valeo, qui cum Lactantio longo intervallo sit conferendus; vel quia rerum, verborumque pondere, ac efficaci quadam naturæ vi susceptum contra munitissimas Ethnicorum sententias munus egregie obit, vel quia paucis verbis plurima complectitur, semper, quod de Thucydide perhibet M. Tullius, sibi instans, nullasque sordes, ut alii complures faciunt, secum trahens. Quod nisi tam eximius

„ auctor plurima scripisset, in quibus vix credas,
 „ virum tam curiose in sacris, profanisque literis
 „ versatum labi potuisse, eum unum ex omnibus
 „ latinis scriptoribus maxime deligendum cense-
 „ rem, qui pueris in manibus semper esset, ut eo-
 „ dem tempore illi ex unius lectione & christianæ
 „ fidei rudimenta, & Romani sermonis puritatem
 „ discerent. „

JOANNES BAPTISTA EONATIUS *Epistola ad Antonium Trivultium, Manutianæ Lactantii editioni præfixa eundem disertissimum christianorum virum appellat.*

LIL. GREGOR. GYRALDUS *Dialog. V. de Historia Poëtarum Lactantium Firmianum unum dicit eloquentiæ Ciceronianæ inter christianos præcipuum æmulatorem.*

JOANN. LUDOVICUS VIVES *Commentar. in cap. 29. Libri XVIII. S. August. de Civit. cum septem volumina Lactantii contra gentes elegantissima vocasset, & acutissima, addit: Nec est ullus inter christianos scriptores tam vicinus dictioni Tullianæ. Idem Libr. III. de tradend. disciplinis ad finem. Christianorum omnium facundissimus est Lactantius: sonum habet plene Ciceronianum, præterquam in paucis. Denique Libr. V. ad iudicium eliminandum, & excolendum inter eos auctores, qui plurimum bono illo valuerunt, etiam Lactantium ponit.*

GUILLIELMUS CANTERUS *Libr. III. novarum Lectionum cap. 30. Quem, inquit, inter græcos Theologos locum Nazianzenus Gregorius obtinet, eum inter Latinos fere Firmianum Lactantium tenere non immerito quis iudicet.*

SIXTUS SENENSIS *in Bibl. Sanct. Verbo: ARNOBIUS, Lactantium Firmianum magno excellentique ingenio & eloquio fuisse affirmat.*

MICHAEL THOMASIVS, qui primus fere antiquiores Lactantii editiones castigavit, iisque notas sub-

subjecit, de eloquentia hominis ita in *Dedicatione operum* habet: *Omnia tanta sermonis elegantia tractat, ut si solam in eo elegantiam spectaremus, propter eam unam a nobis maxime legendus esse videretur.*

CLAUDIUS VERDERIUS *Censura in Auctores, elegantissimum* nuncupat *Christianorum Lactantium.*

CAROLUS SIGONIUS *Historiar. de Occidental. Imper. Libr. III. n. 315.* Quorum unus (qui Crispum in omnibus liberalibus artibus erudirent) fuit *Lactantius Firmianus, vir disertissimus.*

CARD. BARONIUS *ad ann. 250. Latinorum, inquit, Rhetorum Culmen Lactantius.*

ROBERTUS BELLARMINUS *de Scriptoris. Ecclesiast. Opera omnia . . . ad eloquentiam Tullianam proxime accedunt.*

DANIEL HEINSIUS *Orat. III. Quid diffusam, exclamat, & cum solo Cicerone conferendam Firmiani eloquentiam commemorem?*

ANDREAS SCHOTTUS in *Idea Roman. Histor. Lactantii Cæliorum cognomen est. Hic disertus ille Scriptor, Christianorum Cicero.*

LUDOVICUS CRESOLLIUS *Theatri rhetor. Lib. V. cap 8. Lactantium virum in dicendo summum nominat. Et Libr. I. C. 2. Os veluti, ac tubam Religionis, qui sanctos ritus singulari judicio, & eloquentia confirmaret. . . . Stylo divinum, atque doctrina.*

JOSEPHUS ISÆUS *Præfat. in Lactant.* „ Gravissimum, ait, inter Ecclesiasticos Scriptores semper „ habitum a veteribus Lactantium Firmianum, qui „ paulisper modo in literis sit versatus, jure negaverit nemo. Cujus si libros accuratius examinamus, profecto reperiemus illorum, qui eisdem de rebus scribere, Lactantium nemini cedere, quam plurimos longe antecire. Nam cum ejus oratio multum habet roboris, atque nervorum, tum vero ita ubique præclarissimis facundiæ

„ luminibus illustratur, ut vix unquam satis digno
 „ præconio a quoquam laudari posse videatur.

JANUS BROVKHUSIUS in *Propertii Librum IV. Eleg. 1. v. 11.* Lactantium christianorum disertissimum dicit.

GUILIELMUS CAVE in *Cypriano* Lactantium christianæ eloquentiæ principem vocat. Et infra in ipsomet Lactantio: *Christianæ Religionis causam adversus importunos, gravissimis rationum momentis, omnibusque eloquentiæ nervis vindicavit. Item ibid. Scriptor est sane mire elegans, & disertus, christianorum omnium sine controversia facundissimus, unde Cicero christianus vulgo audit. Nec desunt, qui eum Ciceronem non æquasse modo sed & præcelluisse volunt. It. citra invidiam dici potest, illum ab ipso Ciceronis quo dictionis nitore vix ullum habuisse parem, neminem superiorem.*

CHRISTOPHORUS CELLARIUS in *Præfat. operum Lactantii.* Lactantium Firmianum ait Scriptorem & rerum nobilitate, & nitore, ac cultu dictionis præstantissimum. In *Nuncupatoria* vero ad Paulum Fuchsum, *Christianorum Ciceronem* appellat, qui summus eloquentia inter priscos christianos, summique oratoris, quem Roma coluit, perpetuus imitator fuisset. Idem indicem formularum latinitatis Lactantianæ editioni adjecit, ut elegantissimus Scriptor (sic enim loquitur) & cum Cicerone comparandus majore cum fructu legi, & imitando exprimi ab adolescentibus possit.

STEPHANUS BALUZIUS in *Notis ad Epist. 1. S. Cypriani*, ait, Lactantii libros divinarum institutionum omnes consentiunt Tullianam eloquentiam redolere.

NICOLAUS LE NOURRY in *Apparat. ad Biblioth. PP. Dissert. III. cap. 2. art. 3.* Quod porro, inquit, ad idit Hieronymus, Lactantium esse quemdam fluvium eloquentiæ Tullianæ, id sane verum esse, facile omnes concedunt, & Hieronymo suffragantur.

NICOLAUS LENGLET DU FRESNOY in elegantissimam Lactantii editionem sic inter cetera præfatur: *Tanta facundia, nitore tanto, tanta etiam gravitate de rebus maxime in religione necessariis sublime disputat, atque differit, ut nostris temporibus æque gratus sit, ac prioribus Ecclesiæ sæculis.*

EDUARDUS A S. XAVERIO, qui ultimam editionem curavit, in fine Isagoges ad Benedictum XIV: *Tuto, ait, & cum fiducia profero, magni semper a cordatis viris æstimata fuisse Lactantii opera, in quibus plurima ne dicam omnia, quæ in aliis variorum generum scriptis voluminibus eruditionis acquisita lumina dispartita sunt, tam concinne, tam eleganter adunata reperiuntur, ut neque ad pietatem, neque ad morum compositionem, neque ad robustum oratorem christianum instituendum iisdem arbitrer reperiri posse aliquod aptius exemplar adolescentibus studiosis proponendum.*

ABBAS LADVOCAT in nitidissimo Lexico historico portatili, ut vocat: *Uno verbo, inquit, Lactantius omnium veterum latinæ Ecclesiæ auctorum eloquentissimus & excepto fors Sulpitio Severo latinissimus.*

Hæc mihi elogiâ plus quam fatis sunt. Recte enim Lengletus supra laudatus, cum multa fane attulisset, ita concludit: *Non e re putavimus ultra progredi: sat est monuisse, neminem inter nostrorum temporum scriptores esse, qui Lactantii nostri cum laude non meminerit, quamvis eum non inculpatum omnino habeant eruditi, ejus tamen multiplicem doctrinam, variam in re profana eruditionem, summam tandem ejus eloquentiam prædicant omnes. Quod si qui nihilominus plures ejusdem laudes cumulare velint, habent Editores Joannem Andream Episcopum Aleriensem, Andream Cratandrum doctum Typogra-*

phum *, Erasmus **, Xistum Betulejum ***, Josephum Isæum supra laudatum ****: item Servatum Galleum in *vita Lactantii*, Stephanum Baluzium, & Christophorum Pfaffium, quorum illi *librum de mortibus persecutorum*, isti integram *Epitomen* debemus: Jacobum Bruckerum in *Histor. Phil. Tom. III. a pag. 465.* maxime vero Ludovicum Goldnerum ad *Librum de opificio Dei*, cui vitam Lactantii, & judicia Eruditorum adjunxit (*Geræ 1714.*) Matthiam Kortholdum, aut potius discipulum ejus aliquem *Dissertat. de Cicerone christiano*: Walchium in *Diatriba de Lactantio*, & in *Historia Critica Linguae Latinae* sæpius. Joann. Ludolphum Bünemann, qui Lactantium cum linguae latinae principibus æque contulit, ut persuasum sit omnibus, Lactantium auctores inter ecclesiasticos disertissimum fuisse, quemadmodum Lengletus loquitur *****. Denique Joannem Augustum Krebs *Dissertat. de stylo Lactantii*: Joann. Ge. Geret. *Dissertat. de variorum de Lactantio judiciis* (*Witebergæ 1723.*) Eduardum a S. Xaverio cum alias passim, tum *Dissertat. 19. Decad. II.* Taceo Fabritium *Biblioth. Lat. Volum. II. & III. & Biblioth. med. & infim. Latinit. XI.* Caveum, Dupinum, Tillemontium, Ceillierium &c.

Accedunt MSS. infinito numero, editionesque tot, & tam variae, ut vix ullus sit ex omni genere Scriptorum, non dico ecclesiasticorum, sed quorumcunque, qui toties, vel transcriptus a librariis, vel

* In *editione Basileens.* 521. De illa Andreae sermo infra redibit.

** *Præfat. ad Librum de opificio Dei.*

*** In *Commentar. & Disputatione*: utrum Lactantiana scripta recte in scholis juventuti prælegi, & enarrari conveniat contra Lactantio-Mastigas?

**** In *Prolegom. ad Lactantium.*

***** Vide secundam Bünemanni editionem.

vel a Typothetis excusus, vel ab eruditis emendatus sit, quemadmodum Lactantius. Aut da mihi aliquem, cui simile quid contigisset! Lengletus certe in sola urbe Parisina septem & triginta manuscriptos codices vidisse se testatur. Editiones quod spectat, mox ab inventa Typographica, cum in squallore, ac tenebris relinquerentur auctores ceteri, ante omnes Lactantius protractus est in lucem, atque eodem adhuc sæculo decies septies prælo subjectus. Quod profecto manifeste ostendit, quibus omnium studiis expetitur, quo numero distractum, qua sui commendatione lectum fuisse oporteat. Post non raro bis, aliquando ter eodem anno diversis in locis acatholicis aequæ, ac catholicis editus, denique plus quam centenis vicibus novo cultu, curisque novis publici juris est factus. Quid notas, quid scholia memorem, quid indices, & formulas latinitatis, ceteraque ejus generis, quibus unum hunc auctorem Itali, Germani, Galli, Belgæ, Angli, Hispani certatim expoliendum, illustrandumque susceperunt? Ipse summus Pontifex Paulus II. Joanni Andreæ, qui tum maxime literarum gloria florebat, negotium dedit, uti medicam manum adhiberet Lactantio, eumque emendatius editum sibi nuncuparet. Christina * Suecorum Regina literis magis, quam regno nata Lactantii eloquentiam quam maxime in deliciis habuit, versavitque identidem, ac regustavit. Præterea Lactantius omni tempore magni nominis imitatores habuit. Exprimere enim eum imitando conati sunt Sulpitius Severus in Historia **: Joannes Sarisberiensis in Polycratico: M. Antonius Flaminus in Psalmos: Joannes Aventinus in Annalibus Bojorum, aliique complures. Multi denique in scholis prælegerunt adole-

E 5

fcent-

* *Miscella. Lipsiens. Tom. III.*
 ** *Libr. I. cap. 13.*

scientibus, pro classico, & præcipuo auctore venditantes: quod cum fecissent, ea re, velut optime gesta, palam gloriati sunt. atque ut alii idem facerent, auctores magnopere fuerunt. Quo magis mirandum, fuisse, qui voces ejus quasdam, ipsamque compositionem, semel, iterumque reprehendere auderent. Sed quinam tandem illi fuerunt? Latiales scilicet viri de fursure antiquariorum, qui sacculo eo grammaticali sexto, & decimo ita pares corrugabant, ut nihil sacrum, nihil satis elimatum, nihil denique dignum assensu suo putarent. Ab his vero jure quodam nostro exigimus, ac postulamus, uti quam curiose alios, ita & se, ipsumque adeo Ciceronem inspiciant, nova haud dubie reperturi non semel, id quod hic persequi longum, atque nonnullis oppido molestum foret. Sed & istuc sufficit ad homines hos confutandos, quod, ut vidimus, contra torrentem nituntur, illudque vi facta convulsus eunt, quod sæculorum consensu summo firmatum, atque stabilitum est. Quod si Erasmus quoque Lactantium alicubi vellicat, ac *Ciceronis Simium* dicit, id non ita accipiendum, quasi eloquentiæ hominis derogare quid vellet. Intererat enim Erasmo id loci, ut quavis ratione ægre illis faceret, quos paulo ante dicebam nihil, quod Ciceronis non esset, latinum duxisse. Quod si cavillum moramur, Tullium ipsum debemus abjicere, eadem de causa; ibidem enim plura in scriptis ejus, & quædam fors haud immerito ille carpsit. Sed & alios Erasmi locos consulat lector, ubi summam ille Lactantii existimationem præfert, planeque contrarium asserit. Sic *Antibarbarorum Libro I. Lactantium* ait *Firmianum Ciceroniana facilitate fluere, nec a declamatoria illa palæstra, in qua fuerat multos annos versatus, abhorrere.* Et *Libr. XXVII. Epist. 37. ad Damianum a Coës: Nihil eo nitidius, dicas christianum Ciceronem loqui.* Item *Libr. XXVI. Epist. 33. ad*

ad Georgium Saxoniae Ducem, Quem Basilio, inquit, conseram nondum inuenio. nisi si quis scripturarum cognitionem, quam habuit Hieronymus, cum Lactantii felici facilitate copulet. Hæc sola evidentè ostendunt, Lactantium Ciceronis Simium minime fuisse. Nam quæ imitatores, *seruum* illud *pecus*, anxie extundunt, nec feliciter plerumque, nec facile fluant, necesse est. Itaque ipsummet Erasmus Erasmo opponimus, non alios auctores, non nubem illam testium superius adductorum. Ostendat per se, quo loco esse nobis debeant gerræ illæ, quibus Ciceronianum suum infarsit, eo minus deinceps curanda, quod dudum non ab aliis tantum, verum ab ipsonmet confutatas videmus.

CAPUT II.

Notes hujus Eloquentiæ,

De nullius Scriptoris charactere facilius statui posse videtur, atque illo Lactantii Firmiani. Tam multi, tamque idonei auctores, neque obiter tantum, sed fuscè, & ex instituto, argumentum istuc pertractarunt. Scribit enim de Lactantii stylo Betulejus in Prolegom. Walchius altera parte Diatribes, Joannes Augustus Krebs iusto tractatu, & novissime Eduardus a S. Xaverio integrè pariter Dissertatione. Verum enim vero id ipsum, quod laborem levare videtur, anget, atque exaggerat ultra modum. Tam varia, tam multa legenda secernendaque sunt in ea turba scriptorum, illi præsertim, qui cum accuratus esse velit, non minus tamen brevitati studere, lectorumque genio servire debet. Ipsa nempe copia inopes facit, rerumque speciebus perperam in mente confusis obscuritatem inducere magnam solet. Itaque non nisi optima, atque utilissima seligentes operam dabimus, ut velut ex imagine quadam sui Lactantius noster agnoscat.

Vel

Vel ex iis, quæ superiori capite diximus, patet, quem Lactantius tenorem in scribendo servaret. Ciceronianus nempe est, & Tullium quantum argumenti conditio patitur, quam proxime imitari studens æquavit in pluribus, in aliquibus etiam superavit. Certe dictione ipsa proxime ad Ciceronis phrasin, ac numeros accessit, hancque palmam non plurimis solum præripuit, verum universis. Itaque si Gesnero fides, exemplar est perfectæ imitationis, neque eum hac in parte tam facile alius quispiam assequetur. *Eo duce, inquit *, facile discemus, quæ optima sit imitandi ratio; nam Ciceronis dictionem, atque ubertatem tam accurate expressit, ut non temere quisquam paria illi ea in re fecerit.* Quanta autem hæc laus sit in disertio homine, illi æstimabunt, qui norint, quo ambitu, qua contentione, XV. & XVI. sæculo magna ingenia huc incubuerint, uti Principis Oratorum dictionem vel in epistolis saltem redolerent, quantumque placuerint sibi, ubi id affectu sibi videbantur, veluti felicitatis scilicet partem non minimam consecuti.

Quotquot ergo mentionem de Lactantio injiciunt sive antiqui, sive recentiores, sive Catholici, sive Protestantes, uno ore nomen hoc *Ciceronis christiani* eidem tribuerunt, quod ex parte quadam jam vidimus & ex innumeris aliis locis ostendi adhuc prolixius posset. Sufficit vidisse laudatam dissertationem de *Cicerone christiano, seu eloquentia Lactantii Ciceroniana* auspicio Matthiæ Kortholdi Giffiæ 1711. vulgata.

Neque nomine solo contenti sunt Critici, sed postquam illud Lactantio communi sententia asseruerunt, rem ipsam quoque tribuunt, atque in Ciceronis imitatione ita sitam ostendunt hujus scriptoris

* *Animadvers. ad Heineccii fundamenta styli cultior. Parte III. c. 1.*

ris peculiarem notam, ut vel sola hac ab oratoribus ceteris sive veteribus sive novis quam clarissime discernatur. Quæ causa Lengleto fuit, ut in Præfatione ab hac quæstione velut inutili, & extra dubitationem posita, quam brevissime se expediret. Ait enim. „ Dictu inutile putavi de stylo Lactantii „ longius differere. Sat est observasse cum S. Hieronymo, aliisque viris doctissimis, scriptorem „ hunc disertissimum Ciceronis eloquentiam referre. Nusquam enim turget, raro assurgit oratio, „ sed cum lenitate quadam æquabiliter profluit, non „ tamen sine nervis & viribus. Tam est accurata, „ tam fortis, ut nulla sit aptior ad persuadendum, „ sed sine judiciali asperitate, & sine sententiarum forensium aculeis. Puro studet eloquio, perspicuo, atque eleganti, sequiturque hanc Ciceronis „ ipsius normam: *pacatiorem Philosophorum orationem esse, oratorum vero pugnaciorem.* In vocum „ dispositione tantam sectatur suavitatem, ut etiam „ apud eloquio potentes Cicero christianus audire mereatur, & Romani Oratoris ingenium omnino „ sapiat. „

Quod si quis minutim, & singularibus in rebus videre cupit, is sane quam optime fecerit, si Joannem Augustum Krebs supra laudatum adeat. Is enim *Dissertatione* anno 1702. *Halæ* in lucem emissa ex instituto ostendendum hoc suscepit, sollicitè Ciceronis inter se, & Lactantii varios locos, omnemque styli rationem conferens. Ita autem eleganter, atque accurate comparisonem illam suam exequitur, ut vix quidquam desiderari in ea posse videatur. Certe *Diaria Trivultiensis* anno 1706. pag. 1069. dignum judicarunt hoc opusculum, quod futuris Lactantii editionibus semper adjungeretur. Quod utinam factum esset; rarior enim fit in dies, & vix jam haberi exemplar ejus aliquod potest.

Ceterum ne gloriam hanc moderni auctores soli sibi usurparent, haud abs re fuerit, admonere. colationem hanc inter se Ciceronis, atque Lactantii minime novam esse, verum a Majoribus nostris, etsi non editam in lucem, sapius tamen, nec indiligenter dudum institutam. Certe Joannes Franciscus Picus satis aperte significat, se eo fine utrumque legisse, uti committeret inter se ambos, atque censoriis notationibus adhibitis virtutes utriusque, aut vitia solícite admodum, & singillatim examinaret. *Lactantius*, inquit *Libr. III. Epist. 10. Ciceronis sty- lum effigavit*, aut, ut quibusdam placet, *supergressus est. Mihi videtur rebus, & sententiis uberior, nec numeris injucundior, nec fide æquabilitate, & candore posterior. Has quippe virtutes maximis viribus & æmulatus, & affectus est. Hunc nec æquales, nec posteri momorderunt, nemo elumbem, & fractum, asianum, & redundantem nemo causatus est* *.

An ergo, dices, in omnibus plane conveniunt, unusque ac idem utriusque character est? Minime id quidem: sed varia habent, quibus differant, etiam simili, id est Philosophico in argumento; nam aliud Lactantius, qui ut dictum in foro versatus non est, nequaquam attigit. „ In eo, inquit Eduardus a S. Xaverio *Dissert. XVIII. c. 2. art. 1.* maximopere differunt, quod Cicero superior est, & verbis potius, quam rebus adversarios suos aggreditur, exagitat, vexat, amicos vero blande demulcet, adulatur, & laudat: Philosophorum dogmata more Academicorum nunc adstruit, nunc destruit, & quacunque potest arte se supra ceteros extollere gestit, ita ut propriam gloriam potius, quam alienam utilitatem

que-

* Istuc ut intelligatur, notandum est, apud Quintilianum hæc & alia a suorum temporum hominibus Tullio objecta.

„ quæſiſſe ſumma aſtutia videatur. Non eſt pro-
 „ pterea mirandum, ſi eloquentia ejus maxima eſt,
 „ & omnino incomparabilis; ad hanc enim oſten-
 „ tandam omnibus viribus velitatus eſt, nulli ſectæ
 „ addictus, omnibus pro libitu abutens: ſed hinc
 „ illa eadem formidabilis eloquentia ſæpe arrogans,
 „ interdum & ambitioſa, callida, & prolixa facta
 „ eſt, ſcivolis conjecturis, falſisque aſſumptioni-
 „ bus plerumque ſuffulta. At non ita Lactantius,
 „ qui eum propterea jure redarguit, ac ſæpe effica-
 „ citer refellit, contrariis uſus argumentis, & mo-
 „ do frontem, modo latus ejus transverberans.
 „ Ipſe autem uni ſemper veritati litat, & quoties
 „ aut ambigue, aut ſimulate loquitur, tum id fa-
 „ cit maxime, ut ex propriis adverſariorum placitis
 „ eos adigat ad illam repudiatis erroribus amplexan-
 „ dam. Non ipſe, ut Cicero, tempori & eloquen-
 „ tiæ ſervit, ſed eloquentiam veritati, & religioni
 „ ſubordinat, eaque ſumma prudentia utitur ad fer-
 „ rea pectora, ac ænea corda expugnanda, non
 „ violenta, non verſuta, non verbosa garrulitate,
 „ ſed robuſta, prudenti, ingenua, atque diſerta elo-
 „ cutione. „

Hæc ille veriſſime quidem, ſed quibus id non-
 dum repræſentat, quod quærimus. Ipſe enim mox
 ſubjungit: *Quæ proſecto non artis oratoriæ diverſitas
 eſt, ſed potius oratoris, proveniens a varietate profes-
 ſionis, fidei, ac judicii, quibus cum diverſimode eſſent
 imbuti, varie etiam ideas & effata accommodabant ad
 id, quod utile eſſe ſibi quiſque perſuaſerat.* Nos ta-
 men afferenda vel ideo putabamus, quod non di-
 ctionem tantum, & veluti veſtem orationis, ſed
 ipſum characterem noſſe volentes quam maxime ju-
 vat animos eorum inſpicere, ut qui ex ſcriptione
 ipſa velut ex ſpeculo elucent. Arcimboldus Jan-
 memoratus Lactantii characterem ita pulchre ex-
 pinxit. „ Illi viro mira in oratione ſuavitas eſt,

„ mi-

„ mirum ingenium , excelsum , sublime , dulce ,
„ facile , eruditum , quo loquente , qui literas cal-
„ lent , Musas latine loqui propemodum credant .
„ Præditus enim est omnibus ornamentis , nec
„ cadit , sed in illo semper summa sunt omnia .
„ Nam quantum mihi cernere datum , singula sic
„ in illo eminent , & lucent , ut ea non medio-
„ criter quoque doctos impellant , avocent , deti-
„ neant , afficiant . Disputat ille subtiliter , gra-
„ viter , ornatè , ubi frequenter illum Ciceronis ar-
„ gutiam , subtilitatem , amplitudinem effingere ,
„ nos , qui ab studiis humanitatis non omnino se-
„ clusi sumus , aut alieni , animadvertimus . Sermo
„ quidem illius copiosus est , varius , dulcis in pri-
„ mis , & qui reluctantes nos ducat pro arbitrato
„ suo , aut pertrahat : & si aliquando in dicendo
„ severum nimis judicamus , sese statim condire
„ pari jucunditate percipimus . Experimur quidem
„ non minus difficile , quam magnum esse summæ
„ gravitati multum comitatis adjungere ; id La-
„ ctantius nolter cum incredibili quadam suavita-
„ te , tum vel præcipue stylo ipso suo assequitur .
„ Nam ex illo mella profluere , dum legimus , &
„ quæ scribit complere apes floribus , & innectere
„ videntur . Quis enim supercoelestes , quæ de
„ Deo summo prædicantur , occultissimas doctri-
„ nas , & traditiones in lucem tam aperte , tam
„ clare , tam floride , nisi ipse unus notus nobis
„ sit , efferre potuisset ? „ Eduardus vero , ubi ad
„ stylum ipsum delatus est , ita *Art. II.* ait : „ Ut
„ primum se illi occasio præbet , eidem apte ac
„ concinne orationem accommodat , ita , ut si
„ quantitatem spectes , nunc circumductus , nunc
„ medius , nunc concisus appareat : si vero ad qua-
„ litatem attendas , modo attollitur ut sublimis ,
„ aliquando fit placide humilis , ut plurimum me-
„ dioeris incedit . Semper tamen cætus , ubique
„ per-

„ perspicuus, undique mirificam spirans suavita-
 „ tem, tantaque venustate, atque elegantia ab uno
 „ ad aliud argumentum transit, ut vel peritissimus
 „ lector decipi possit, cum de hujusmodi transi-
 „ tu judicare voluerit. Hinc jure, meritoque S.
 „ Hieronymus quasi fluvium quemdam Tullianæ
 „ eloquentiæ illum appellat. Non enim rivulo-
 „ rum instar hæret aliquando minutus, & exilis,
 „ sed alto simillimus flumini, sive in sublime sese
 „ erigat, sive ad ima descendat, plenus tamen
 „ semper majestate fluit, omniumque aures quan-
 „ tumvis avidas, & capaces citra satietatem implet,
 „ & animum blanda, perennique oratione per-
 „ fundit. Stylus ejus Atticum inter & Rhodium
 „ apte collocari potest, ac Romano insigniri vo-
 „ cabulo. „ Et infra *Art. III.* „ Character ejus
 „ medius incedit grandem inter & tenuem, quem
 „ æqualem semper retinet, in latinitate castus, in
 „ concinnitate elegans, in ornatu sobrius, in cla-
 „ ritate perspicuus, in modo sibi, & iis, cum
 „ quibus loquitur. semper congruens. Oratio
 „ ejus nusquam redundat, figuris, tropis, meta-
 „ phoris, sententiisque aptissime adhibitis. Erudi-
 „ tio ejus ampla, judicium prudens, ingenium
 „ eminens, majestas blanda, decor amabilis, sub-
 „ tilitatis, & acuminis usus pene incredibilis do-
 „ tes sunt ejus eloquentiæ peculiares, & cum quæ-
 „ dam interdum repetat. in his maxime copia ap-
 „ paret, atque uberrima dicendi facultas, qua non
 „ solum Ciceronem æquasse quibusdam visus est,
 „ sed etiam superasse.

„ His paulo diffusius dictis breviora quædam sub-
 „ jungamus. Et primo quidem magnopere me affi-
 „ cit, quod Bünemannus in *Præfat.* ex *Editione* an-
 „ tiquissima *Rostockensi* anno 1476. recitat. Est enim
 „ elogium præclarum, & quod plane accedat ad vivum:
 „ Lactantius vel solus inter christianæ professionis Scri-

ptores supereminet nitore quodam, & copia, vel nulum eorum sequitur facundia simul, & lenitate sermonum. Joannes Adelphus Mulingus, qui anno 1508. Gregorii Naz. quædam edidit, in *Præfat.* Quis, interrogat, *dulcior, tersiorque Lactantio?* Iſæus quoque *loc. cit.* *beatam Lactantio tribuit suavitatem orationis, majestatem, ac pulcritudinem.* Cave *loc. item cit.* *Stylus illi tersus, nitidus, facilis, fonte quodam eloquentiæ nativo sponte fluens.* Abbas Ladvocat *loc. itidem cit.* *Stylus ejus, inquit, purus est, clarus, & naturalis, phrasēs nobiles, atque elegantes.*

Quod si ad singularia descendere sit animus, *Rotunditas* Lactantii, atque fluiditas ea est, nihil ut illi a Cicerone ipso videatur, adjici potuisse. Dictio enim eundem fere tenorem sequens terſa, lenis, perspicua, cui nihil insit asperum, vel hiulcum, scabrum nihil, durumve, aut hyperbatis impeditum: plana sunt omnia, & quam acuta, tam æquabilia. Verba omnia veluti mollem ceram tractat hic scriptor, & quamlibet imaginem nullo nisu imprimit. Paucis dicam, quilibet palpare sibi videtur felicem illam facilitatem, fluxumque Tullianum, quem supra tributum ipsi ab Erasmo dicebamus. Ex hac ipsa autem facilitate nascitur dulcedo quædam, quam in Lactantio degustarunt quam plurimi, & deprædicarunt. Quid quod non pauci sunt, iique celebratiores Critici, qui *Lactantii* nomen non primitus inditum, sed postea propter eminentem illam suavitatem, candorem, dulcoremque orationis tributum illi existiment?

Dos altera est *vis occulta, ac facultas nescio quæ, qua sensim absque tumultu omnia sibi obstantia propellit, atque e medio tollit.* Equidem in eo ipso inferior est Cicerone, quando vel ad populum, vel ad Senatum ille dicit. Verum cum paria sunt cetera, idemque argumentum, nec minimum quidem illi concedit. Nam & ad oratoriam usque

maje-

majestatem vehementiamque summam assurgit, & motus ejus tam tempestive adhibiti ubique sunt, ut nec langueat aliquando oratio, neque concite-
tur ultra decorum. Quoties vero gentilium erro-
res aggreditur, quanto potest robore ipsam causæ
arcem invadens non ante desistit, aut quieti se
dat, dum ejus convulserit omnia, uno impetu,
atque everterit. Laudavit id jam Petrarcha *Seni-
lium IV. ad Boccacium*, quod tam valide peregrin-
arum superstitionum fundamenta convelleret. Ludo-
vicus quoque Vives *Libr. IV. de tradend. disciplin.*
Ad efficacem, inquit, *rationem argumentandi Aristoteles*,
ad civilem Ciceronis dialogi, & *Lactantius*
primas partes feret. Celeberrimum vero est illud
S. Sidonii Apollinaris *Libr. IV. Epist. 3. Instruit*
ut Hieronymus, *destruit ut Lactantius*, *adstruit ut*
Augustinus &c. Nihil ergo exaggeravit, nihil
vero majus jactavit Eduardus a S. Xaverio, quan-
do *ead. Dissert. 18.* asseverantius etiam dixit: *Et*
quidem in hoc adeo Lactantius excelluit, *ut etsi alii*
plerique ex nostris desuissent ad impia Ethnicorum
Philosophorum placita destruenda, *atque ad Christia-*
nas virtutes propugnandas, *ipse solus sufficeret.*

Tertio advertere in Lactantio ubique debemus,
quam mira dexteritate, ac perspicacia propositiones
alias ex aliis creberrime eruat, non sine perpetua
sententiarum gravitate, mistioneque figurarum, qui-
bus, ut usus tulerit, res jam elevat, jam extollit,
lumina vero orationis, vivacitatem scilicet, orna-
tumque multiplicem cum exprimit, qui non de-
ceat solum causas, verum etiam illustret quam plu-
rimum. Testis est *Anthologia Thomæ Beconi ex*
præcipuis Lactantii sententiis Lugduni anno 1558.
edita. Crebris, ait Eduardus, & quidem gravissimis
orationem suam sententiis locupletat, & ornat, qui-
bus impetrare credas, quod vi suavissima etiam ab
invitis & reluctantibus extorquet, tunc maxime, cum

*animi affectus excitare gestit. Adeo enim vehementer sive ad iram sive ad amorem, sed potissimum ad misericordiam & admirationem incitat, ut placide eum sequi potius videaris, quam violentiam pati. Nicolaus vero Arcimboldus, loco supra laudato, Profecto, ait, nemo est illo viro gravior, luculentior, doctior, cujus ornatissima semper oratio ingentibus plena sententiis, quæ etsi effusa, non tamen violenta, nec horrens est. Huc pertinet quod in Christiano hoc Cicerone sum vehementer admiratus, quod pulcherrimo semper ordine argumenta disponderet, atque connecteret inter se, haud secus ac peritissimus Imperator faciat, ubi prælium iuiturus, conficturusque cum hostibus aciem disponit. Atque istuc optime iterum Eduardus, quem dicebam, explicavit. Nam *Articulo 3.* ita præclare loquitur:*

„ Illud imprimis sese nobis considerandum offert,
 „ quod in operibus Lactantii ceu indelebilis in-
 „ dex est suarum elucubrationum, nempe perspi-
 „ cuus rerum dicendarum ordo, quo eas rite di-
 „ spositas lectorum mentibus exhibet, tam con-
 „ cinne accomodatas, ut quamvis summa, & ex-
 „ quisita arte veterani oratoris partes perfectissime
 „ adimpleat, semper tamen nativa quadam suæ
 „ eloquentiæ suavitate artificium omne sapienter
 „ abscondit, & oratio ejus, tanquam ex vivo gur-
 „ gite profluens nullo labore exundare videtur.
 „ Hinc lectorum animos statim sibi in procemio de-
 „ vincit, tantamque existimationem, atque au-
 „ ctoritatem sibi in propositione conciliat, ut jam
 „ dissentire pudeat, cum rem simpliciter narrat,
 „ vel contradicere, cum assumptum exponit, aut
 „ confirmat. . . . A causa, quam agit, raro ad-
 „ modum digreditur, sed novis semper instat ar-
 „ gumentis, urget exemplis, similitudinibus il-
 „ lustrat. Interdum utitur enthymemate, rarius
 „ Syllogismis, Inductione frequenter. Quoties ab
 „ aucto-

„ auctoritate a Sacris nostris aliena argumentum
 „ desumit, id ab illis depromit, a quibus fas non
 „ est adversariis vel tantillum recedere, quamquam
 „ si introspiciantur, ut plurimum nec vim ha-
 „ beant, nec veritatem in se contineant. Quod
 „ ab eodem factum esse noscitur, ut eos ad ho-
 „ minem, ut ajunt, refelleret, suisque armis con-
 „ foderet. Et idcirco quemadmodum illi ex pro-
 „ babilibus, ex apparentibus, vel etiam ex falsis
 „ falsa deducebant, sic ipse, aut eorum effata
 „ assumens, aut ad manifeste repugnans aliquod
 „ admittendum eos ex propriis placitis compellit.
 Hoc autem ordinis, atque dispositionis varium ar-
 tificium statim in oculos incurrit, quamprimum
 quis editionem illius *Parisinam* in manus sumpse-
 rit. In hac enim ingenti lectorum commodo cui-
 libet libro *analysis*, est adjuncta, in qua, quem di-
 cimus, nexum, seriemque rationum non sine vo-
 luptate mirari licet, & uno velut obtutu emetiri.

Accedunt argumentandi schemata illa a Cice-
 rone mutuata, formulæ item amplificandi, quæ
 omnia quam varie expromit, tam ad propositum,
 atque naturam ita adhibet, ut res per se obscu-
 rissimæ artificio singulari sic in apicem protrahan-
 tur, ut nec adolescentium captum excedant. De-
 nique & vafritiem quamdam a Cicerone Lactantius
 traxit, & cum callide quædam adversariis largia-
 tur, id ita præstat, ut obtineat multo plura: in
 illudendis adversariis mire festivus, nec minus sub-
 tilis, atque ingeniosus in eludendis. *Illos*, ait
 idem Eduardus, *aliquando Plautino sale perfricat,*
moderate ridet, vehementer increpat, & semper de iis
sine fastu, aut ostentatione triumphat.

Sed & de puritate aliquid dicendum. Hanc
 quod attinet, singularis illa, atque ea ætate (ma-
 xime si Afer Lactantius fuit) sane admiranda est.
 Janus Brovkhuisius delicatus Cenfor in *Propertii Li-*

brum II. Eleg. 14. v. 31. purissimum Scriptorem Lactantium dicit. Et certe si puritas spectatur, nihil sunt præcipui quique Patrum, ne Cypriano quidem, ac Hieronymo dempto, ut primum cum Lactantio conferuntur. Solus forte Sulpitius Severus est, ut supra ex Ladvoat audivimus, qui æquiparari cum eo possit. Lengletus Præfat. cit. „Habet tamen, inquit, verba quædam peregrina, sed ea vel sunt illius sæculi, quo vixit Lactantius, vel Africanæ terræ solum redolent. Sic Tertullianus, sic Sancti Cyprianus, Augustinus, & Fulgentius æque ac Lactantius Africanis verbis quibusdam utuntur insolitis, & barbaris. Ea porro in rerum Indice diverso, id est Italico charactere, edi curavimus. „

Ita Lengletus. Sed vereor, ut ex pauculis illis, quæ vitio auctori nostro dantur, omnia peregrina, ne dicam barbara sint. Est quædam latinitas falso suspecta, & de hac nemo, nisi qui ipse latinissimus sit, incorrupte, exploreteque judicare potest. Eduardus a S. Xaverio *Dissertatio XXI.* ostendit, longe a peregrinitate omni Lactantium abesse, nullumque Ecclesiæ scriptorem ad Cæsarem, Ciceronem, & Cornelium Nepotem propius accessisse. Nec spernenda sunt momenta illa rationum, quibus id evicisse sibi vir diligens, & eruditus persuadet.

Verum de charactere Lactantii plus, quam satis sit, diximus. Illud unum addo, præclaram Krebsii Dissertationem, eorum omnium loco esse posse, quæcunque sive ex nostro, sive ex alieno addere præterea capiti huic vellemus. Quod vero Auctoris hujus verba nunquam repræsentare, sane idonea est causa, quod pauca ex eo transcribere ob præstantiam minus dignum, multa autem ob prolixitatem & copiam nimis longum foret.

CAPUT III.

Ubi ea excellat præcipue?

Extra omnem controversiam est, Lactantium, quoties contra Philosophos & Gentiles insurgit, se ipso esse superiorem, paremque alium non habere in eo genere confutandi. Unde merito Hieronymus *Epist.* 65. nunc 84. ad Pammach. & Ocean. post med. dicit, eum contra gentes scripsisse fortissime. Cui Paulus Manutius *Nuncup. ad Germanum Minadomum* addit: *Flagitiosas veterum superstitiones tanto eloquentiæ flumine ab eo confutari, quantum in alio nemine, qui eandem materiam tractaverit, reperitur.* Ita nimirum veritas adversus superba illa, & calamistrata sophismata hic triumphat, ut non aliorum modo sapientum, sed ipsius maxime Ciceronis argumenta vi summa retundantur, atque ad oculum demonstretur, sapientiam eorum universam inanem verborum strepitum, & garrulitatem extitisse, nihil aliud. Verum hæc laus Lactantii, quæ sane summa est, ansam quam plurimis præbuit, uti eundem alia ex parte deprimerent magis, si non omnino aspernarentur. Melior est, inquiunt, in refutandis falsis, quam in veris asserendis. Destruere autem quilibet potest, ædificare non nisi paucissimis concessum. Cavillatio hæc antiquissima est, & ad quam ipse divus Hieronymus præivit. Hic enim cum Firmianum ceteroqui in oculis ferret, nihilominus *cit. ad Paulinum Epist.* ubi maxime illum dilaudaverat, utinam, exclamat, tam nostra confirmare potuisset, quam facile aliena destruxit! Quod ea mente S. Doctor dicebat, ut eum in Philosophia melius, quam in Scripturis versatum ostenderet, quo subsidio destitutus dogmata nostra non solidis adeo argumentis munire, quæ, ut admodum superstitionem profligare

potuit. Hoc ergo ambabus illi manibus arripiunt continuo, neque ulla ratione oratori nostro putant ignoscendum. Verum meminisse tales oportet, cui viro, cujus ætatis, qua in re tam severos, & implacabiles se præbeant. Homo profanus erat Lactantius, fors adulta primum ætate ad Ecclesiam accesserat, jam Gymnasia, jam aulam sequebatur, nunc in Africa, nunc in Bythinia, nunc in Galliis versatus. Unde ergo illi intima ea Theologia affluerit, quæ non nisi diuturno usu, & sacrarum Literarum tractatione perpetua combibitur? ubi otium? ubi magistri, qui cognitionem haberent ampliorem, nec sancti solum, verum & literati essent? Idem fere dixeris, cum errores, nec paucos illos, nec parvos, objicere illi solent. Non est fateor literati & boni viri illos obtegere: negare vero ut maxime quis vellet, nec posset quidem. Plus dico, ejusmodi sæpe doctrinas affert Lactantius, quæ piorum aures offendere debent, & tanto capitaliore periculo hauriuntur, quanto dulciore suada propinquantur: non tamen ideo summum hominem inculandum mihi existimo; cum plane manifestum sit mihi, quo tempore homo laicus, & in Theologia hospes, literis ista mandabat, nihil dum decretum fuisse de pluribus capitibus, de quibus postea & Concilia, & Patres diserte statuerunt. Unde turbidis iis sæculis, atque cruentis veritas, quæ hæreticorum insuper ac Judæorum sordibus perpetuo inficiebatur, sinceritatem profecto, & candorem illum hodiernum nisi apud doctissimos vix poterat retinere. Itaque accidit, ut fere nunquam Lactantius erraret, quin multos erroris sive comites, sive duces habe et. Temporum ergo ea culpa, non eloquentissimi viri fuit, qui ut bona fide in aliquibus lapsus est, ut plerique: at certe in aliis tam strenuum se præbuit, sic gentiles æque, ac hæreticos depexus, sic mores

res christianos informavit, ut vel hodiernum in diem quam paucissimi præstiterunt. Sed de hoc ab innumeris seu Editoribus ejus, seu Criticis, copiose, & diligenter est actum. Ne ergo crambem illam recoquamus. Id saltem meritis est a nobis Lactantius, ut cujus virtutes non possumus exæquare, vitia leniamus saltem, & utcumque excusemus, præsertim ubi ad eloquentiam, de qua sola hic loquimur, nulla ratione videmus ea pertinere. Quod vero dictum est, minori negotio refutari externa, quam domestica confirmari, haud est sine exceptione aliqua concedendum. Secus se rem habere, fors ille solus negabit, qui nesciat ex Platone, eum demum recte opus aliquod dissolvere, qui id ipse construxisset. Verum in literis, & in his præcipue, defendere multo est minus, quam impugnare; quod non tantum ingenii, & contentionis assertio requirat, totaque in eo sit, ut locos suos, & materiem in promptu habeat, modosque sciat, quibus connecti argumenta, & ordine digeri debent. Qui vero convincere alios cupit, ac dedocere, regulas analyseos, remque ipsam profundissime teneat, & omnia in antecessum prospiciat, atque examinet, necesse est. Quod quam difficile, quamque implexum sit, nemo est, qui ignoret. At, ut hæc mittamus aliquando, ipsa viri opera singulatim percurrenta sunt, & quæ præ aliis ad eloquentiam faciant, candide, nec indiligenter declarandum.

Recte Eduardus a S. Xaverio *Dissertat. XVIII. c. 2. a. 2.* Si vero ad singula, ait, descendamus ejusdem Scriptoris perscripta opera, inter omnia eminent divinarum Institutionum Libri, quibus septemgeminis instar Nili profluentibus, occupata Egypto, solis aliquando superstitionibus, ac vanis fictorum Numinum religionibus devota, illam tanta abundantia, ac vi irrigat, ut errorum sentibus dumisque fabularum

eradicatis, atque dispersis, ad ferenda Evangelicæ veritatis semina mollitos, & oblimatos agros præparet, ac disponat.

Porro in his, ut dixi, maxime placere, atque afficere debent, quæ contra falsam Ethnicorum sapientiam, & religionem disputavit, uti *Liber I. II. & III. Virtus* vero eo magis notandus est, quod Christianæ vitæ officia præclare describit, atque inculcat: & hunc maxime Hieronymus respiciebat, quando *Comentar. in cap. 10. Eccles. præclarum* dixit Institutionum divinarum opus, in quo Lactantius de vitiis, ac virtutibus plenissime disputavit.

Institutionibus proximus est *Liber de Ira Dei*, quem, etsi doctrina ejus non est omnino accurata, propter præstantiam tamen locorum quorundam, & styli felicitatem pulcherrimum S. Hieronymus appellavit. * De eodem ait *Coment. in c. 4. ad Ephes. Firmianus noster librum de Ira Dei docto pariter, & eloquenti sermone conscripsit, quem qui legerit, puto ei ad iræ intellectum satis abunde posse sufficere.*

Tertio loco venit *Liber de Opificio Dei*, in quo, & proxime dicto, ut idem Hieronymus *Epist. 84. nunc 70. ad Magnum.* ait, dialogos Ciceronis expressos reperimus, insignis prorsus, purus, & elegans, quem Erasmus commendavit summopere, & cui eruditi omnes quam plurimum deferre merito solent. Nicolaus le Nourry de eo differens *c. 1. a. 3.* Quamvis, inquit, vir modestissimus hunc librum a se rudibus pene verbis, obscurius, & pro ingenii mediocritate compositum fuisse aperte profiteatur, quisquis tamen illum, & alios ejus libros vel tenuissime legerit, eos omnes eadem sermonis elegantia, quam peritiores in illis agnoverit, scriptos esse, confestim deprehendet. Porro stylum quod attinet, id

* In Catalogo.

id pro argumenti conditione habet peculiare, quod minime diffunditur, sed concisior, atque gracilior est, amœnus tamen, tersusque, ac omnino talis, ut Lactantium in eo ubique agnoscas. Recte *Lenglet in Vita: Elegantissimum librum scripsit de opificio Dei, stylo tamen mere philosophico.* Philosophorum enim hac ratio scribendi semper fuit, sapienter quidem, ac necessario suscepta, ne vagarentur longius, sed se cum argumento, tum dicentium studiis accomodarent. Hoc vero tam præclare Lactantius præstitit, ut hic ejus liber omnibus ut exemplar absolutissimum proponi possit, quicumque in ejusmodi materiis tractandis versari aliquando debebunt.

De *Epitome divinarum Institutionum*, quam Christophorus Pfaffius in Bibliotheca regia Taurinensi integram reperit, idem fere dicendum, quod de priore libro paulo ante dicebamus, nisi quod, ut denuo argumenti ratio ferebat, est multo adhuc gracilior. Pollicetur in Proœmio Lactantius: *Enitar, quantum res finit & diffusa substringere, & prolixa brevare; sic tamen, ut neque res ad copiam, neque claritas ad intelligentiam deesse videatur in opere, quo in lucem veritas protrahenda est.* Id quod sane cumulate, atque ita implevit, ut opusculi hujus sive puritati, sive eloquentiæ nec minimum quid incommodaret. Le Nourry *ib. c. 5. a. 4.* Ab omnibus, ait, etiam in ea facillimeprehenditur eadem prorsus Lactantii dictio elegans, clara, polita parique semper orationis nitore concinna. Eduardus a S. Xaverio *l. c.* hunc & illum de mortibus Persecutorum libellum conjungens ita pronuntiat: „Quamquam non eadem prorsus dicere „possim de Epitome, ac de libello, qui de mortibus persecutorum inscribitur, utpote qui stylo „plerumque conciso perscripti sunt, hoc tamen „apertissime mihi persuasum est, eos propria quadam

„ dam venustate atque elegantia ita esse compo-
 „ sitos, ut quilibet illorum in suo genere exem-
 „ plar esse possit ad imitandum non in congrue
 „ proponendum. Si quis enim paucis multa non
 „ obscure complecti voluerit, nullus est profe-
 „ cto liber Lactantiana *Epitome* brevior, clarior,
 „ plenior, qui tanta sit concinnitate, ac perspi-
 „ cuitate perscriptus. „ Suæ huic sententiæ Joan-
 „ nis Davilii * judicium adjungit, quod ita habet:
Tantus est in eo sermonis nitor cum grata brevitate
conjunctus, ut me operam, atque oleum perdidisse lu-
bens sim salsurus, nisi peritis, & æquis rerum æstima-
toribus maxime placuerit.

Porro Liber de *Mortibus Persecutorum*, quem
 aliqui magno studio adimunt Lactantio, alii as-
 ferunt, peculiarem a nobis diligentiam exposcit.
 Sunt vero plurimi, qui ab ipsa Lactantii facundia
 rationem petunt, ejus auctoris non esse. Quibus
 (quod nos solum tangit) illud respondere possu-
 mus, non tam elegantem esse, quemadmodum
 ejus cetera, verum Lactantio minime indignum,
 in hoc præsertim Instituto, ubi vix erat eloquen-
 tiæ aliquis locus. Guilielmus Caveus ad annum
 303. *Inter omnia, inquit, quæ post se reliquit, opu-*
scula eminet Libellus de Mortibus Persecutorum, mole
quidem exiguus, pretio inæstimabilis. Verum hæc verba
non sunt ad eloquentiam, vel stylum referenda, etsi
& illum minime contemnendum. „ Ille autem de
 „ *Mortibus Persecutorum Liber* (recte *ibidem*
 „ *Eduardus*) quodammodo historicus non perfe-
 „ ctum opus est, & expoliturum, sed potius com-
 „ mentarius memoriæ tantum, non plenæ & or-
 „ natæ narrationis causa, currenti exaratus cala-
 „ mo, ut ipse auctor professus est, cum ait: quæ
 „ omnia secundum fidem (scienti enim loquor)
 „ ita

* Præfat. *Editionis suæ Cantabrigiænsis.* 1718.

„ ita ut gesta sunt, mandanda literis credidi, ne
 „ aut memoria tantarum rerum interiret, aut si
 „ quis historiam scribere voluisset, non corrumpere
 „ veritatem, vel peccata illorum adversus
 „ Deum, vel iudicium Dei adversus illos reticen-
 „ do. Quoniam vero ab homine eloquenti factus,
 „ ideo non omnino incultus, & rudis, ut plerum-
 „ que esse solent huiusmodi scripta, quæ ad illud
 „ dicendi genus proprie pertinent, quod Hypom-
 „ nematicum esse diximus: sed suis scatet lumini-
 „ bus, & inelaborata quidem, ac naturali, non
 „ autem arida, aut acerba elocutione compositus:
 „ Cæsariis profecto puritate, & candore compa-
 „ randus, si sub barbaris Imperatoribus castè lo-
 „ qui Romanis Civibus licuisset. Sed cum illi re-
 „ bus quibusdam nova quædam vocabula dedissent,
 „ eis uti necesse erat scriptoribus, si intelligi a
 „ lectoribus optabant. Non idcirco tamen adeo
 „ frequentia, aut impura sunt verba ab eo adhi-
 „ bita, ut longe dictio ejus non distet a ceteris
 „ omnibus, qui eodem sæculo scripserunt. Quan-
 „ tum enim ipse a Cæsare, tantum ceteri omnes
 „ christiani Scriptores ab eodem in puritate ser-
 „ monis distare noscuntur, & si quæ nove ab ipso
 „ dicta sunt, tanta id moderatione, ac prudentia
 „ factum est, ut laude potius, quam vituperatio-
 „ ne ob id dignus censendus sit. Oratori siqui-
 „ dem sobrie novare licet, & verba ex verbis de-
 „ rivare, ut in *Oratore*, & in *Bruto* Tullius do-
 „ cuit, qui in philosophicis præsertim libris vo-
 „ ces plurimas latinis auribus, & linguis antea
 „ ignotas non sine laude accomodavit. „

Quod autem de puritate libri huius Eduardus
 dicit, adeo exaggeratum non est, ut minus, quam
 potuisset, dictum ab eo videatur. Janus enim
 Brovkhuisius in *Propertii Lib. II. Eleg. 14. v. 31.*
 de hoc ipso opere loquens puritatem Lactantii
 com-

commendat, atque *aureolum Libellum* dicit. Christophorus vero Cellarius *Præfat. operum ad Lectorem* non *necessarium* solum & *arcana historia refer- tum*, sed *elegantem* quoque appellat.

De Libris duobus *Epistolarum*, de quibus Hieronymus duobus locis, * nihil dico, cui enim bono id facerem? nam etsi reperti illi sunt ab Hadriano Junio, ** nihilominus damnable incuria interciderunt, si tamen in utroque fides est ei homini adhibenda.

De *Poëmaticis* quoque præstat filere, quod huc proprie non pertinent, & tempore, materia, metro, genere ipso diversa parum faciunt ad Lactantii eloquentiam illustrandam. Multi elegantem in iis sermonem, suavissimam phrasin, numerosque facillimos laudant: alii vituperant, nec patiuntur Lactantio adscribi: quorum iudicio si meum interponere ego deberem, neutri protecto parti facile, aut omnino assentirer. Carmen vero de *Passione Domini* mordicus ego Lactantianum assero, quodcunque in eo spectes, sed & quam maxime doleo, inter Hymnos Ecclesiasticos insertum non esse: laudo vero Eduardum a S. Xaverio, qui ita de illo pronuntiat: *Carmen de Passione Domini nostri Jesu Christi semper mihi visum est non solum grave, & ad excitandos cordis affectus aptissimum; verum etiam purum, elegans, & quod magis mirandum est, poëticam phrasin, ac verborum nitorem servans, quod in antiquioribus christianis Vatribus, sanctissimæ fidei nostræ mysteria canentibus plane desideratur.*

Addo itaque, si, quod nolim, suppositum hoc carmen est, utinam plura ejusmodi supponerentur! magna inde sacræ Poësi accessio fieret, nihil-
que

* *Epist. Damasi 124. inter Hieronymianas: & in Catalogo.*

** *In Histor. Bataviæ, Lugduni Batavor. 1582. in 4to. pag. 311.*

que præsentius esset ad hymnodiam Ecclesiasticam reformandam : quod pulcherrimum opus et si Recentiorum plurimi sunt aggressi, expedire tamen nemo unus potuit; credo, quod ea in re antiquitati plus deferendum est, quam elegantiae. Hanc autem cum illi solam habent, Lactantio neutrum deesset; atque ita uti prosa, sic vorla oratione Princeps nostrorum haberetur.

Augeri magis hoc Caput potest cum ex Apparatu Nicolai le Nourry, tum ex *Editione* Eduardi a S. Xaverio, quorum ille amplissimo opere, hic undecim, si recte memini, minoribus Dissertationibus non generatim solum, sed de singulis etiam Lactantii libris agunt.

Totam Dissertationem illustrabunt iidem ipsi auctores, quos jam ante ad calcem primi capituli numero plurimos recitavi.

DISSERTATIO IV.

De Eloquentia S. PACIANI.

CAPUT I.

Laus ejus.

S Pacianus Barcinonensis in Catalaunia Episcopus, antea, quam Ecclesiae suae præficeretur, vir erat, nobilitate, opibus, potentia non magnus solum, sed maximus. Natalium beneficio institutionem nactus liberalem, atque ab ineunte ætate literis imbutus, ob ingenii præstantiam ingentes fecit progressus, & cum aliis scientiis, tum vero præcipue eloquentia excelluit. Quare magistratibus admotus, & pares conditioni suae nuptias fortitus Flavium Lucium Dextrum sustulit, Prætorio post Præfectum, cui suum *de Scriptoribus Ecclesiasticis Catalogum* beatus Hieronymus nuncupavit, qui-

quique ipse inter literatos non infimo loco fuit. Chronographus enim illustris, ex Hieronymi * Paulique Orosii amicitia majorem, quam ex titulis suis celebritatem invenit. Porro Pacianus demortua, vel certe ad continentiam adducta conjuge, ad Ecclesiam se contulit, & vacante tum Barcinonensi Sede omnium votis ad Sacerdotium illud est expetitus. Qua suscepta provincia (uti ipse *Epistol. 1. ad Sympronianum* innuit) Marcionitis, Apollinaristis, Cataphrygibus, Novatianis, aliisque hæreticis infesta omnia reperit. Itaque bellum iis movere coactus est. Quod & fecit strenue sermonibus ad populum, Epistolis, maxime vero inculpatae vitæ exemplo, quam ad summam ætatem perduxit. Nullus est autem latinorum Doctorum, sanctitate, literisque celebrium, de quo pauciora extent veterum monumenta. Neque aliud ejus ad nos pervenit, quam opuscula, & ne ipsa quidem omnia, satisque salva. Unum superest Hieronymi testimonium, qui in *Catalogo*, quem dixi, ita habet: *Pacianus in Pyrenæi jugis Barcinone Episcopus, castigata eloquentia,** Et tam vita, quam sermone clarus scripsit varia opuscula, de quibus est respos. Et contra Novatianos. Sub Theodosio principe jam ultima senectute mortuus est.* Alium, qui plura de tanto homine afferret, plane neminem scio. Quare non immerito Antonius Vincentius Domenecus in *Histor. Sanctor. Catalon. Libro I. pag. 25.* acriter de antiquis Scriptoribus queritur, ignaviæ eos, atque fœcordiæ postulans, quod eximii Scriptoris Acta vel non collegerint, vel jam collecta non

* Hieronymo *Chronographiam* suam Dexter inscripsit jam antea, quam ille *Catalogum* ipsi suum inscriberet.

** Sic pro eo, quod alii legunt *castitate*, & *eloquentia*, Codex Gemblacensis, Codex Bollandianorum, Possevinus, & alii plures.

non conservarint. Sed neque ipse excusandus, dum accusat alios, qui enim de insigni Antistitis hujus doctrina sermonem loco non uno instituit, stylum, atque facundiam ejus omnino prætermisit.

Ego interea, dum tanto plures bibliothecas excutio, & libros, quotquot huc facerent, undique corrogo, insanum scilicet, sed irritum in me laborem suscepi; quod alii ne mentionem quidem de Sancto injicerent, alii verba Hieronymi seu exscribere, seu paulum immutare contenti essent. Certe viginti, & amplius auctores, unde spei aliquid affullerat, abjicere coactus, denique ad R. P. Cornelium Byeum Hagiographum Antwerpiensem confugi. Rogavi autem, uti ex instructissima Bibliotheca Auctorum, quos maxime desiderabam, locos quosdam transcriberet. Et sane insignis humanitas tantum otii fecit occupatissimo viro, ut lustratis omnibus, quam pauci eorum eloquentiæ Paciani meminissent, verbis quam accurate tam operose adjectis illico significaret. Hic ergo, quas decet, summas grates publicè repensas illi volo. Atque utinam studium ejus gratificandi valeret ad expugnandum eos, qui morositate incredibili, dum jam negant, jam causificantur, moras sæpe molestissimas Scriptori injiciunt.

Quod si ergo minore numero, quam lector vellet, testimonia afferimus, cogitare is debet, hanc ipsam penuriam duplo plus negotii, quam aliorum copiam nobis facessivisse. Opinor autem Scriptio- num ejus tenuitate factum, uti omitterent illum plerique, & hi ipsi, qui sequuntur, non nisi obiter, & quam paucissimis de eo commemorarent.

CARDINALIS BARONIUS ad annum 388. ita habet: *Pacianus quoque tunc floruit, Barcelonensis Episcopus, castitate & eloquentia commendatus, cujus est inter alia nobilis illa lucubratio adversus Novatianos.*

JOANNES FRIDERICUS GRONOVIVS *Libro Observatorum in Scriptores Ecclesiasticos cap. 18. S. Paciani*, inquit, *Barcinone Episcopi pauca extant, sed gravissimis scripta verbis, ac sententiis, & diligenti veterum literarum imitatione.*

NICOLAUS ANTONIUS *In Bibliotheca Hispana vetere* hæc de eloquentia S. Præsulis cursim advertit: *Castigati sermonis, quo utitur, laudem agnoscunt noviores Critici.* Ubi nominatim eum, cujus paulo ante verba audivimus, Joannem Fridericum Gronovium appellat. Sed majorem utique gratiam initurus erat a nobis Antonius, si præter Gronovium ceteros quoque voluisset indicare. Nuperos certe, uti Dupinum, Tillemontium, & Ceillierium &c. ipse non vidit, ut qui primum a morte ipsius lucem publicam aspexerunt. Quinam ergo, & ubi tandem illi sunt? Si Hispanos intelligit, equidem illi non sunt nobis ad manus, verum hac maxime de causa nominare, imo præcipuis locis etiam exscribere eos oportebat.

CARDINALIS D' AGUIRRE *Tomo II. Concilior. Hispaniæ in Notis ad Epistolam Paciani III. num. CXLV.* Denique omnia hæc, ait, *Paciani scripta dignissima sunt ob insignem pietatem, eruditionem, & eloquentiam præclaro aliquo Commentatore, & illustratore, non minus, quam aliæ lucubrationes Patrum præcedentium, aut sequentium, quibus enucleandis, & exornandis tot præstantes viri suum studium & operam contulerunt.* Et infra in *Notis ad Paranesin num. CLXXXVII.* ita rursus Pacianum extollit: *Cujus hæc scripta aurea quo magis lego, eo magis exosculor, & admiror: nec invenio in ullo alio ex Patribus Ecclesiæ solidiorem eruditionem, spiritum præstantiorem, aut eloquentiam magis ad movendum, & persuadendum accomodatam.* Sane qui scripsit hæc, putandus est plura alia æque pretiosa scripsisse, quæ temporum injuria perierint, aut rixentur adhuc
cum

cum blattis, & tineis. Si quando detecta fuerint, moneo posteros, ut ea publici juris faciant simul cum hisce opusculis, & iusto aliquo commentario illustranda, aut exornanda curent, in honorem tanti Præfultis, & communem Ecclesie utilitatem.

JOANNES FERRERAS in *Historia Hispaniæ Tomo I. Sæculo IV.* eloquentiam Paciani, quam *singulari* dicit, eo ex capite commendat, quod testimonio, & approbatione divi Hieronymi fulciretur.

Hæc de Paciani laudibus, quæ eloquentiam spectant, sane non minus propterea æstimandam, quod tam paucos, tamque seros præcones habet. Ut enim dicam, quod sentio, præcipuis quibusque Latinorum nihil concedit Pacianus, nullusque est, qui cum ejus aliquid legerit, iusturam reliquorum non ferat quam mollissime. Et tamen, quod hic minime erat prætereundum, viro negotiis distento, & annis valde provecto limare vix quidquam licebat lucubrationum suarum; sed quidquid scripsit, velut tumultuario opere, ut usus in præsentiarum poscebat, in chartam ei fuit effundendum. Testem habeo locum luculentum ex *Epistola 1. ad Sympronianum Novatianum: Plura, ait: scriberem frater, ni & celeritate pueri revertentis urgerer, & vel præsentis tibi, vel de omni proposito contentis copiosiora servarem.* Et alium ex *Epistola 2. ad eundem: Vacare tibi scribis; & ideo te contentiosa delectant. Mihi vero Catholicis negotiis occupato post triginta ferme dies literæ tuæ traditæ sunt, post alios quadraginta repetitæ.* Accedit, quod temporum injuriis exemplaria admodum rara extant, & hæc ipsa vitium labemque passa; ut non raro sententiam ejus divinare liceat potius, quam intelligere. Ipsi adeo tam lusciosi nonnulla deprehendimus, quæ evidenter erant castiganda, ut lenius reciperent commodiorem; semel etiam, iterumque id tandem conjectando assecuti sumus,

quo decipi se passa erat sive incuria, sive incitia librariorum. Grates superis, quod Eminentissimus d'Aguirre unum tandem codicem nongentorum circiter annorum, qui Reginae Sueciae fuerat, Vaticana e Bibliotheca protraxit. Ex hoc enim, quod eleganter erat perscriptus ducenti & amplius loci commendati feliciter, ac restituti sunt.

CAPUT II.

Notiones Styli.

Eloquentia Paciani, siqua alia, Patrem Ecclesiae exhibet, cujus oratio verecunda sit, gravis, seria, quæque vigorem sane insolitum præferat, plenum disciplinæ, ac severitatis antiquæ. Ignatius Weitenauer *Libro XI. Subsidiarum: Pacianus*, ait, *Barcinonensis Episcopus, veræ penitentiae normam posteritati reliquit. Incitata illi, & gravis, & vehemens oratio; quippe quem non ingenii tantum vis, sed fratrum pereuntium amor, ac cælestis quidam dolor scribentem incendit.*

Nec minus mirari subit, quantam ille suapte sponte ad causas ingenii vim afferret, & eruditionis omnigenæ confertissimam ubertatem. *Stylus satis ostendit*, ait Aguirrius * *quam versatus ille esset in lectione veterum Scriptorum Ecclesiae, præsertim Tertulliani, ac Cypriani.* Et sacram quidem eruditionem singuli versus loquuntur: de profana autem Gaspar Barthius, & Joannes Fridericus Gronovius testantur. Ac ille quidem cum sæpius eam prædicasset, *Libro XLIII. Adversarior. cap. 15.* ita scribit: *Paciani hujus stylus quam sit probus, docent multa singularia,*

* In *Notis ad Epist. III.* Repete hoc loco soliditatem eruditionis, spiritus præsentiam, motum & persuasionem, quæ singula capite præcedenti in Paciano prædicavit.

laria, multæ allusiones locorum ex Poëtis veteribus, ut de Virgilio in Epistolis mentio est, multa itidem proverbialiter posita. Gronovius vero *Libr. & cap. citat.* facta semel ejus mentione, *pergit*, ut verbis Antonii utar, *colligere elegantiae flores e latinæ linguæ Coryphæorum hortis ab eo decryptos*; scilicet ex Virgilio, ex Horatio, ex Propertio, ex Petronio, ex Seneca, ex Jurisconsultis, ex rei rusticæ Scriptoribus, demum ipso etiam M. T. Cicerone. Atque id ipsum, licet minus operose, jam ante Gronovium Barthius ante laudatus alicubi annotavit.

Plurimum etiam aculeos videtur, & acrimoniam quamdam adamasse: non illam Satyricorum; sed modestam, & quæ virum præ aliis perspicacem, ac maximi usus fuisse ostendat. Haud parum tamen ex Tertulliano profecit, cujus energia cum ex *Parænesi*, tum alias ita patet delectari eum consueisse, uti abstergeret tamen fuliginem, & scabritiem Afri illius omnem lævigaret. Verum ex ipsiusmet verbis, non meis, non aliorum, viri characterem videamus. Utenim alibi, cum magna est copia materiæ vel invito dimittenda exempla sunt, ita hic, ubi ex testium inopia jejuniior fit tractatio, spatium videlicet nasci sumus ad locos quosdam dandos, ex quibus conjectura fieri de ceteris, ipsæque Paciani dotes dignosci facilius possint.

Epistola 1. ad Sympronianum, quem diximus, hæreticum Novatianum; vafre admodum de Religione percunctantem ita hortatur ad opinionem subtilitatis, quam de se conceperat, deponendam:

„ Si quid scire plenius de nostro voles, oportet, ut de tuo proficere simplicitas; ne obscurius consulendo, nescire nos facias, utrum interroges, an læcessas. Interea, quod ad præsentem literas pertinebit, ante omnia te rogatum volo, ne ob hoc ipsum auctoritatem mutueris errori; quod, sicut ais, per orbem totum nullus in-

„ ventus sit, qui te revinceret, aut persuadere tibi
 „ posset, contra quam crederes. Nam etsi nos im-
 „ periti, peritissimus Dei spiritus: etsi nos infide-
 „ les, fidelis Deus, qui se negare non potest. Tum
 „ porro, quod obnitendo Sacerdotibus Dei diu
 „ contendere non licebat: *Nos*, inquit Apostolus,
 „ *talem consuetudinem non habemus, nec Ecclesia Dei.*
 „ Post unam correptionem, sicut scis ipse, con-
 „ tentiosus omittitur. Persuadere autem quis ali-
 „ quid possit invito? Tua ergo Frater, non illo-
 „ rum culpa est, si tibi, quod erat optimum, ne-
 „ mo persuasit. Nam & hodie in potestate tua est,
 „ ut nostra etiam scripta contemnas, si ea mavis
 „ vincere, quam probare. Ceterum & ipsi Domi-
 „ no, & Apostolis ejus plurimi restiterunt, nec
 „ persuaderi veritas cuiquam potuit, nisi, qui ei
 „ propria religione consensit. Itaque Domine! &
 „ nos non ea fiducia scripsimus, qua repugnanti
 „ aliquid persuadere possimus; sed ea fide, qua vo-
 „ lenti bonæ pacis aditum non negemus. „ Qui-
 „ bus præmissis ad causam ipsam accedit.

Epistol. 2. ad eundem, cum populum S. Cypri-
 ani, id est catholicum, loco apostolici *Apostolicum*
 ille vocasset, ita respondet:

„ Convitiaris: & ecce! non moveor. Horum-
 „ ne aliquid appellati sumus? Interroga sæculum
 „ frater, totosque ex ordine annos, an nobis no-
 „ men hoc hæserit, an Cypriani populus aliud;
 „ quam catholicus nominatus sit? nunquam no-
 „ men ullum ex his audiui. Jam vide, si vocari
 „ aliquis eo nomine potuit, quod sibi nescit im-
 „ positum. Quid ergo? Maledicta sunt ista, non no-
 „ mina, & maledicta irascentium, maledicta petu-
 „ lantium. Quotvis & ego vos possum appellare
 „ nominibus, si liceat irasci. Cyprianum * San-
 „ ctum

* Per Ironiam videlicet.

„ cum vocas, & populum ejus apostaticum? quo-
 „ modo? *Si triticum Sanctum **, & farina: & si
 „ radix sancta, & rami. Egone Apostaticus, an
 „ Novatus? Novatus, inquam, patre prodito, Ec-
 „ clesia derelicta, partu uxoris effuso? egone apo-
 „ staticus, an Novatianus, quem absentem epistola
 „ episcopum finxit, quem consecrante nullo lintea-
 „ ta sedes accepit? verum ista posterius. Interim
 „ ipsi vos dicite, quid vocemini. Negatisne No-
 „ vatianos a Novatiano vocari? Quod libet illis
 „ nomen imponas, semper istud hærebit. Scr-
 „ tare totos, si videtur, annales, & crede tot sæ-
 „ culis. Respondebis Christianum; inquirente me
 „ genus Sectæ: Novatianum non inficiaberis. Nec
 „ tamen ego Novatiani tui nomen accuso, quod
 „ toties requisitum circumloquentibus lineis, &
 „ operto quodam sinu claudis. Fatere simpliciter,
 „ nihil est sceleris in nomine. Quid te toties in-
 „ terrogatus abscondis? quid causam nominis eru-
 „ bescis? Cum primum scripseras, cataphrygem
 „ putabam: tu ne secundis quidem literis confiteris?
 „ Meo invides nomini, & tuum vitas? Vide, quid
 „ sit pudoris in causa, quæ refugit, quod vo-
 „ catur. „

Epist. 3. ad eundem.

„ Tractatus omnis Novatianorum, quem ad me
 „ confertis undique propositionibus destinasti Sym-
 „ proniane frater, hoc continet: *quod post ba-*
 „ *ptismum pænitere non liceat, quod mortale pecca-*
 „ *tum Ecclesia donare non possit, imo quod ipsa per-*
 „ *eat recipiendo peccantes.* Præclarus honor, singu-
 „ laris auctoritas, magna constantia rejicere nocen-

G 4

„ ter,

* Ita primum est legere, & quidam reipsa sic legerunt.
 Sed usurpat Apostolum Rom. 11. 16. & initium juxta
 editiones & MSS. legi debet. Id quod hic *primitias*,
 uti *farina* reliquum *aservum* significat.

„ tes, attactus peccantium fugere, innocentiae suae
 „ male confidere. Quis hoc vindicat frater? Moy-
 „ ses, Paulus, an Christus? at Moyses deleri e li-
 „ bro pro blasphematoribus optat, & Paulus ana-
 „ thema esse pro fratribus, & ipse Dominus pro
 „ injustis pati vult. Nullus horum, inquires. Quis
 „ ergo? Novatianus hoc præcepit. Immaculatus
 „ aliquis, & purus, qui Novatum non audierit*,
 „ qui nunquam ecclesiam deseruerit, qui ab Epi-
 „ scopis Episcopus factus sit; qui jure ordinario
 „ consecratus, qui vacantem cathedram in Ecclesia
 „ consecutus? Quid ad te, inquires? Novatianus
 „ hoc docuit. At vel quando frater, quibusve tem-
 „ poribus? statim post Domini passionem? post
 „ Decii principatum, id est post trecentos prope
 „ annos Dominicæ passionis. Quid ergo tunc?
 „ Prophetas secutus est, ut Cataphryges, an Phi-
 „ lumenen aliquam, ut Apelles? an ipse tantum
 „ auctoritatis accepit? linguis locutus est? prophe-
 „ tavit? suscitare mortuos potuit? horum enim
 „ aliquid habere debuerat, ut Evangelium novi
 „ moris induceret. Et si contra clamat Apostolus,
 „ *Licet nos, aut angelus de cælo evangelizaverit,*
 „ *præterquam quod evangelizavimus vobis, anathema*
 „ *sit?* Novatianus sic intellexit, inquires; sed Chri-
 „ stus hoc docuit. Ergo a Christi (tempore) us-
 „ que ad Decii principatum nullus intelligens?
 „ post Decium denique omnis episcopatus impa-
 „ tiens, omnes alii dissoluti, qui se miscere perdi-
 „ tis mallent, qui perire cum miseris, qui alieno
 „ vulnere vulnerari? Novatiano vindice justitia li-
 „ beratur, Novatiano auctore corrigitur, quid-
 „ quid erravit?

Et

* Novatus a Novatiano distinguendus. Huius hæresis originem, isti incrementum debet.

Et iterum.

„ At etiam in nos severus censor inveheris. Di-
 „ cis, ex lege cœlesti unum ex mandatis solvere non
 „ licet, nec communicare lupis agnos; & quod
 „ omnis consensus in crimine sit. Ideo qui picem
 „ tetigerit, inquinetur, nec sit ulla societas lucis
 „ ad tenebras, aut templo Dei cum idolis, aut con-
 „ ventio Christi ad Belial. Idemque David dicit:
 „ *Furem videbas, & currebas cum eo, & cum adulte-*
 „ *ris portionem tuam ponebas.* Ain' tandem, nos
 „ Domini mandata rescindimus, nos unum apicem
 „ legis inflectimus; aut Novatiani, qui tota Eccle-
 „ siæ, tota concordia jura violarunt? qui post tot
 „ pacis annos, tot fœdera sanctitatis, novas sibi
 „ leges, nova instituta, novos ritus pepererunt,
 „ arcanum justitiæ inexorabili fronte simulantes?
 „ Nos in Ecclesiam lupos recipimus, qui hæretico-
 „ rum ora vitamus: an potius Novatiani, qui cum
 „ ipsi sint rapaces lupi, paulo miseres oviculas
 „ reformidant? Nos consentimus malis, nos picem
 „ tangimus, nos tenebris cohæremus, nos idolo,
 „ & Belial jungimur: an illi, qui Evaristum,
 „ qui Nicostratum receperunt, ceterosque ab eccle-
 „ sia recedentes, lingua, manu, moribus inquina-
 „ tos? Nos cum adulteris, & furibus conveni-
 „ mus: an illi qui Novatum vitæ suæ, & capiti
 „ prætulērunt, post interceptam pecuniam pupil-
 „ lorum, atque viduarum, miseri parentis, & par-
 „ tus uxoris parricidam, non modo non pœniten-
 „ tem, verum etiam gloriantem? Verum Paulus
 „ Apostolus dixit: *Manus cito nemini imponas?* do-
 „ cet idem vel tarde, vel post pœnitentiam non
 „ negandas. Sed perdita Hierico Achan filius
 „ Charmi propter furtum vestis occisus est? Age,
 „ vos totos fures interficite pecuniarum nostrarum,
 „ atque librorum, & in Novati ossa sævite. Ju-
 „ gum illud rursus accipite, quod neque nos, ne-

„ que patres nostri portare potuerunt. Quid ces-
 „ satis Novatiani? oculum pro oculo, dentem pro
 „ dente deponere, animam postulare, circumci-
 „ sionis, & sabbathi redintegrare commercium.
 „ Necate fures, lapidate præulantes? nolite in Evan-
 „ gelio legere, quod pepercerit Dominus etiam ad-
 „ ulteræ confitenti, quam nemo damnavit: quod
 „ peccatricem, quæ lacrimis pedes ejus lavabat,
 „ absolverit: quod Raab apud ipsam Hierico * ur-
 „ bem Phœnicum liberarit: quod Thamarem sen-
 „ tentia Patriarchæ absolverit; quod Sodomis quo-
 „ que pereuntibus Lothi filias non extinxerit, libe-
 „ raturus & generos, si futurum excidium credi-
 „ dissent. Age, non tenes dicere apud David Do-
 „ minum: *cum his qui oderunt pacem, eram pacifi-*
 „ *cus?* Salomonis quoque sententiam tacete: *frater*
 „ *fratrem adjuvans exaltabitur.* Quid Apostolus?
 „ *Fratres, & si præoccupatus fuerit homo in aliquo*
 „ *delicto, vos, qui spirituales estis, instruite hujus-*
 „ *modi in spiritu mansuetudinis, considerantes vosmet-*
 „ *ipsos, ne tentemini. Invicem onera vestra portate,*
 „ *& sic adimplebitis legem Christi.* Et illud, quod
 „ ante jam retuli: *opto enim anathema esse in Christo*
 „ *pro fratribus meis cognatis secundum carnem.* Et
 „ iterum: *omnibus omnia factus sum, ut omnes lucrifacerem.* Hoc est cum vulneratis gemitus, cum
 „ ægrotantibus laborem, mortem cum moriente
 „ partiri, casum fratrum cum statu suo posse mi-
 „ scere, aliquid de sua sanitate decidere, & defi-
 „ cientibus adhibere medicinam. Quid vobis pro-
 „ dest superba, & aspera fronte durari, altis rigere
 „ cervicibus, vultus torquere, a miseris auditus,
 „ oculosque præcludere? Nunquam vos, oro, ce-
 „ cidistis? nulla in vestris mentibus macula est,
 „ nul-

* Achanum supra objectum sibi respicit, id quod satis
 est lepidum, & quam maxime ad hominem.

„ nulla in oculis, oro, festuca? quis gloriabitur
 „ castum se habere cor, ut mundum se esse a
 „ peccatis? Credo, vos iusti, benevoli, tempe-
 „ rantes, quibus membra omnia sana sunt, quibus
 „ omne corpus intactum, quibus medicus necessa-
 „ rius non est, nec medicina languorum. Intrate
 „ jam coelum, paradisi aditus romphæa cedente
 „ penetrate, tot nostrorum populis, Deum uni-
 „ cum confitentibus bona vestra præcludite. Quæ
 „ si se longe aliter habent, quam implacabilis ri-
 „ gor, verum* & immanitas vestra mentitur, jam
 „ intelligitis Novatiani, Deum posse misereri, jam
 „ miseris fratribus, de præterito confitentibus,
 „ vel feram patere medicinam, jam vulneratum
 „ illum a levita, & sacerdote præteritum per Chri-
 „ stum posse curari, jam Ecclesiæ preces humili-
 „ bus non negandas, jam manus Sacerdotum mise-
 „ randis fratribus exhibendas. „

Et in *Parænesi ad Pœnitentiam*, quam ardens illa exclamatio ad eos, qui indigne ad mensam Domini accedebant!

„ Sed antiquum sit istud, quod ad mensam
 „ Dei** accedere non licuit immundis: evolvite
 „ Apostolos, & novella cognoscite. In prima
 „ Corinthiorum Paulus hæc intulit: *Quicumque man-*
 „ *ducaverit, aut biberit calicem Domini indigne, reus*
 „ *erit corporis, & sanguinis Domini*; item infra:
 „ *Qui enim manducat, & bibit indigne, judicium*
 „ *sibi manducat, & bibit, non discernens corpus Do-*
 „ *mini. Propterea, inquit, inter vos multi infirmi,*
 „ *& ægri, & dormiunt multi. Quod si nos ipsos*
 „ *judicaremus, non utique judicaremur, cum judica-*
 „ *mur autem, a Domino corripimur, ut non cum hoc*
 „ *mun-*

* Ita veterem Lectionem satis turbatam, quæ habet *rigor rerum*, facilius, quam hætenus factum, corrigere possis.

** Loquitur de lege Mosaica.

„ *mundo damnemur. Intremuistis, an non? Reus*
 „ *erit, inquit, corporis, & sanguinis Domini! hu-*
 „ *manæ animæ reus non posset absolvi: Dominici*
 „ *Corporis violator evadit? Qui manducat, in-*
 „ *quit, & bibit indigne iudicium sibi manducat, &*
 „ *bibit. Evigila peccator! time in visceribus tuis*
 „ *præsens iudicium, si quid tale fecisti. Propte-*
 „ *rea, inquit, inter vos multi infirmi, & ægri, &*
 „ *dormiunt multi: Jam si quis futura non metuit,*
 „ *vel præsentem ægritudinem, præsentemque obi-*
 „ *tum reformidet. Cum iudicamur, inquit, a Do-*
 „ *mino corripimur, ut non cum hoc mundo damnemur.*
 „ *Lætare peccator, si in hoc sæculo aut morte in-*
 „ *terciperis, aut languore consumeris, ne punia-*
 „ *ris post sæculum. Intellige quantum sceleris ad-*
 „ *mittat; qui ad altare venit indignus, cui pro*
 „ *remedio computatur, cum aut morbis laborat,*
 „ *aut morte dissolvitur. Quod si vestra vilis est*
 „ *anima, parcite populo, parcite Sacerdotibus.*
 „ *Clamat Apostolus: Exiguum fermentum totam*
 „ *massam fermentat. Quid facies tu, propter quem*
 „ *omnis massa corrumpitur, propter quem labo-*
 „ *ratura est omnis fraternitas? Vives tot anima-*
 „ *rum reus? excusaberis, cum tibi communionem*
 „ *suam imputaverint innocentes, ** cum te ec-*
 „ *clesia dixerit suæ cladis auctorem? Ecce iterum*
 „ *Apostolus ad Sacerdotem: Manus cito nulli im-*
 „ *ponas, ne communices peccatis alienis. Quid fa-*
 „ *ciēs tu, qui decipis Sacerdotem? qui aut igno-*
 „ *rantem fallis, aut non ad plenum scientem,*
 „ *probandi difficultate confiscedis? Rogo ergo vos*
 „ *fratres, etiam pro periculo meo, per illum Do-*
 „ *minum, quem occulta non fallunt, desinite vul-*
 „ *neratam tegere conscientiam &c.* „

Hæc

* Communione poenæ intelligit.

Hæc ad characterem Paciani dignoscendum sufficere possunt, nunc inter ipsa opuscula delendum faciamus.

CAPUT III.

Ubi placeat præcipue?

Ex Scriptis Paciani non nisi tria nobis temporum injuriæ reliquerunt; videlicet *Epistolas ad Sympronianum* contra Novatianam hæresin scriptas: *Parænesin*, seu exhortationem ad pœnitentiam; & de *Baptismo* sermonem ad Catechumenos habitum. Cervulus intercidit penitus; certe in hunc diem frustra semper perquisitus est. Quam vero petulantiam vir sanctissimus castigandam ibi sumat, mirum, quantum dissentiant Eruditi. Plures, qui rem propius videantur tetigisse, collectos dat Fabritius *Tomo II. Biblioth. Latin. pag. mihi 310.* Recte vero Eminentiss. d'Aguirre in *Notis ad Parænesin. num. CLXXXVII.* Quidquid sit de varia ejus nominis interpretatione, id certum, ac maxime dolendum est, eum librum interiisse cum ingenti Reipublicæ Literariæ jactura.

Ut de *Epistolis* primo dicam, magnos illæ, multosque habent laudatores. Et Baronium quidem supra audivimus. Alphonsus Garcias Matamoros *Opusculo de Academiis, & claris Hispaniæ Scriptoribus: Pacianus*, inquit, *qui Theodosii tempore in Pyrenæi jugis impiis Novatianis acerrime profligatis magnam quidem, & immortalem gloriam Ecclesiæ Barcinonensem comparavit.* Petrus Galefinius in *Martyrologio* suo Pacianum vocat *acerrimum Catholicæ fidei contra Novatianos defensorem.* Pluribus etiam iisque elegantibus verbis de debellatis a Paciano oppressisque his hæreticis Jacobus Sirmondus in *Histor. pœnitentiæ publicæ cap. 11.* Dionysius Petavius *Libr. VI. de Pœnitent. cap. 7. §. 2.*
Paci-

Pacianum ait *hæresin Novatianorum acriter confutasse*. Joannes Tamayus de Salazar in *Martyrolog. Hispan. ad diem IX. Martii*: *Scriptit, inquit, contra Novatianos epistolas tres, quibus illorum blasphemam proterviam validissimis oppugnat rationibus, & doctrinis*. Honoratus Tournely *Tomo IV. de Sacrament. pœnitent. Quæst. 2. Art. 1.* ceteris summis licet Patribus, qui iisdem impiis bellum moverunt, præponere Pacianum videtur. Ait enim, quod *Pacianus imprimis data opera scriptis suis omnia hujus hærescos capita, effugia, diverticula egregie confutavit, ac represserit*. Sed plura in earum eloquentiam, pulchritudinem, sapientiam Card. d'Aguirre in *Notis ad Epistolam III.* cujus est illa sane nova, & memoranda sententia: *Evolve omnia illa quæso Lector erudite; & fatebere nihil præstantius hisce epistolis inveniri in scriptis veterum Ecclesiæ Doctorum*.

Porro ex tribus iis Epistolis præcipuas puto I, & III, quas quicunque legerit, ingemiscet sat scio, quod deformes adeo, ac vitiatæ ad nos pervenerunt. Ex Aguirrii Sententia III. Epistola facile aliis præferenda esset; nam & *pulcherrimam, & disertissimam* vocat: Et insuper ita habet in *iisdem Notis*: *Eam impietatem, & insaniam (de unitate Pœnitentiæ) tam sapienter, & fortiter impugnat S. Pacianus hoc loco, ut Novatianis, adhuc suo ævo eandem hæresiarchæ sui crambem recoquentibus, & in iis Symproniano mutis esse licuerit*. Digna certe lectu est, elegans, erudita, & nervosa *S. Præsulis* invektiva: & *cujus stylus satis ostendit, quam versatus ille esset in lectione veterum Scriptorum Ecclesiæ, præsertim Tertulliani, ac Cypriani*. Et mox: *Omnes vero Symproniani objectiones, cavillos, tricas, & effugia proponit Pacianus decursu totius epistolæ, eaque præcludit ineluctabilibus argumentis ex Scriptura sacra desumptis, & ea methodo, ac vi, ut nihil illi reponendum, aut excipiendum relinquere videatur &c.* Sed
nem-

nempe vir doctissimus non eloquentiam solum propositam hic habuit, sed simul, firmitatem, ac copiam doctrinæ spectavit, quæ utique duo in ista ceteris prolixiori longe clarius elucescunt. Mihi, ut nihil exaggerem, epistola tertia exemplar aliquod absolutissimum est visum, in quod omnes intueantur, quicunque scribunt contra hæreticos.

Inter *Sermones*, quos dixi, longe præstantior est ille, ad poenitentiam exstimulans; imo caput est operum omnium, de quo jure dicas, vix proponi aliud posse specimen præstantius, quodque ad modum, quo sermones hodie solent institui, propius accedat. *Exordium* e re nata: *Propositio* & *Divisio* clara, ac naturalis: *Argumenta* delecta: *Commotiones voluntatis* breves quidem, sed vel maxime vehementes: perpetua *Varietas* omnibus in rebus, & denique ad finem *Peroratio* cum *Anacephaleosi*, non abrupta illa, verum opportuna, splendens, & quam maxime salutaris. De concione hac Gaspar Barthius *Adversarior. Libr. XLIV. cap. 30.* Omnino scholam sapit, siue *Rhetorica progymnasmata tota scriptio hujus doctissimi auctoris.* Sane tanti eam fecit Barthius, ut non contentus *Adversarior. Libr. XLIII. cap. 15. Libr. XLIV. cap. 30. Libr. XLV. cap. 8. Libr. CLIV. cap. 1.* emaculare & illustrare: eandem anno 1655. *Cygnæ* in lucem emitteret. De ipsa etiam Nicolaus Antonius in *Biblioth. Hispan. veter. Ingeniosa est, & elegans; ut inde potissimum agnoscas: quantum sermone valuerit Pacianus.* Sed & Cardinalis d'Aguirre præter illa priora passim alia inspergit in commendationem gravitatis, lenitatis, & elegantiae ejus, imo huc maxime respicit in Elogio capitis nostri primi.

Quod vero Tillemontius *Tomo VIII. Monument. Eccles.* Parænesin hanc excellens opusculum, plenumque pietatis & eloquentiae dicit, quod multum accederet ad rationem dicendi Cyprianicam: recte istuc & ratio-

ratione vir eruditus; cujus tamen judicio illud debemus adjicere, abruptiorem multo esse Pacianum, minusque diffusum atque intantem, quam Cyprianus est.

Sermo de *Baptismo* haud parum distat a vi, & reliqua etiam eloquentia S. Paciani. Cum enim Catechumenos instruere vellet, de industria stylum dejecit. Id quod ipse statim initio confitetur. Ait enim: *Aperire desidero, qualiter in baptismo nascamur, & qualiter innovemur. Verbis sane obviis loquar Fratres; ne forte me ob nitorem sententiarum stylo exultasse credatis: & ut rem mysticam intelligere possitis. Atque utinam inculcare possim: gloriam non requiro; Dei enim solius gloria est. Vestri me tantum cura sollicitat &c.* Hæc tamen ipsa est causa, cur dubitarint quidam, num sermo iste genuinus sancti Præsulis foetus esset. Quibuscum nos minime sentimus; quando hæc ratione, quidquid magni oratores planius subinde conscripserunt, abjudicandum illis continuo foret, negandumque, catechesin ejusdem esse opus, cujus aliquando disertam quandam concionem audivisses. Atqui *Parænesis* Paciani, & *Sermonis de Baptismo* non tanta est differentia, quanta sit illa, quæ inter elaboratum Sermonem, & familiarem aliquam instructionem intercedit.

Hæc habui, quæ de facundia Paciani commemorarem, Dissertatione brevissima quidem, sed quæ deficientibus initio subsidiis omnibus maximo labore stetit. Qui plura cupit, ante omnia Editionem ejus primam *Parisiis* anno 1538. a Joanne Tilio curatam, & Latini Latini *Bibliothecam Sacro-Profanam* pag. 165. debet adire. Dein Scriptores rerum Hispanicarum: uti Ambrosium de Morales *Libro X. Histor. Hispan. cap.*
22: Ste-

-
- * Editiones legunt *ipsius*, quod est manifeste vitiosum. Aut cujus ipsius? baptismi? Utinam Aguirrus hoc quoque opusculum ex M.S. illo Vaticano emendasset!

22: Stephanum de Garibay *Libro VII. cap. 7. Compend. Historic. Reg. Hisp.* Laurentium de Padill *Histor. Eccles. Hisp. Tomo I. Centur. 4. c. 65.* Joann. Marietam *Libro V. Sanctor. Hispan. cap. 5:* Franciscum Diago *Histor. Comitum Barcinonens. Libr. I. cap. 12.* Hieronymum Pujades *Histor. Catalon. Libr. V. cap. 9. & 17.* Item Franciscum Biuarium, Rodericum Caro, & ceteros omnes, qui in spurium illud *Chronicon LEXTRI* commentati sunt. Hi enim atque his plures allegari huc solent. Num vero, ubi agunt de Paciano, eloquentiam quoque ejus attingant, dicere haud possumus; neque enim hactenus videre eos licuit. Ultimo loco adde Dupinum, Ceillierium, & similes alios, quorum hoc proprium est *Scriptiones Patrum* dijudicare.

DISSERTATIO V.

De Eloquentia S. AMBROSII.

CAPUT I.

Encomia illius.

Tanti Præfulis facundia miro omine præmonstrata est, quando ad ejus adhuc infantuli labia examen apum confedit. Pueritiam egressus adolescentiam inter bonarum artium disciplinas transegit. Præ ceteris autem in oratoria palæstra exercitatus, atque ad omnem humanitatem græce, ac latine excultus, literis Jurisprudentiæ quoque intimam cognitionem adjecit. Post hæc scholæ exercitia, & umbratiles declamationes continuo in forum descendit, causisque in auditorio Præfetti Prætorii agendis admotus est. Qua in luce tantisper versatus brevi ostendit, quantum eloquentia promovisset. Ob copiam enim, & suavitatem orationis omnium in se oculos, omnium studia convertit: sed & Anicii Probi, Symmachii Consularis, aliorumque illustres amicitias est consecutus. Commodum accidit, ut Probus ea ipsa tem-

pestate prætorio præficeretur, quæ post Imperatoriam erat dignitas omnium amplissima. Ab hoc ergo Ambrosius continuo in Liguriam Æmiliamque provincias cum potestate, & consularibus insignibus missus, & quod Mediolani omnia tumultum spectarent, primo ad pacandam urbem ire iussus est. Demortuus erat Episcopus, & alium Orthodoxi, alium Ariani successorem volebant. Quare pro officii munere Ecclesiam ingressus Ambrosius ad Episcopatum, quæ una causa cives turbaverat, voce primum exclamantis parvuli, dein communi conspiratione, ipsemet vocatur.

In hac mutatione rerum suarum imbutus sacris literis, eloquentiam eo retinendam sibi putavit, ut jam orator sacer, non profanus esset, vimque dicendi, quam hauserat in Scholis, & in foro etiam expoliverat, ad templum transferret, graviores jam causas declamaturus, ac judicaturus. Quod quam feliciter plurimis deinceps annis jam voce, jam stylo ille præstaret, more nostro non nisi ab illis audiamus, qui & ipsi eloquentes cum essent, præ alijs in hoc negotio idonei testes adhibentur.

S. BASILIUS MAGNUS *Epist.* 197. *alias* 55. ad ipsummet Ambrosium data cum alijs rebus, tum etiam *dicendi facultate*, *omnibus in sæculo degentibus conspicuum* vocat, atque eo nomine eundem quoad vixit, inter principes amicorum numeravit.

THEODOSIUS MAGNUS hominum summus cognitor, & excelsissimo animo Princeps ita Ambrosii cum virtutum splendore, tum vi eloquentiæ captus erat, ut quoties ille vellet, in potestate ejus esset, ac publice in summa æde Constantino-
poli exclamare auditus sit: *Ambrosium novi unum, qui digne vocetur Episcopus.*

RUFFINUS *Invectiva* 2. in Hieronymum Ambrosium virum vocat omni admiratione dignum, qui non solum Mediolanensis Ecclesiæ, verum etiam omnium
Eccle-

Ecclesiarum columna quædam, & turris inexpugnabilis fuerit, qui ad Ecclesiarum Dei gloriam electus a Deo sit, qui in conspectu domini locutus sit, in conspectu persecutorum Regum, & non sit confusus.

S. AUGUSTINUS *Libr. II. contra Julian. c. 5.* Ambrosium eloquentiæ lucidum, ac perspicuum flumen fundere ait. Et *Libr. I. contra eundem c. 3.* ejus sermonem cum magnitudine operum, gratia item constantia, laboribus, & periculis a tanto viro pro Ecclesia susceptis ex æquo componit. Quo quid dici illustrius possit, non video. Quis enim nescit, Ambrosium non Mediolanensem modo Ecclesiam pacasse, sed compescuisse Tyrannos, Aulam Cæsaream ad Religionem instituisse, Ecclesiæ auctoritatem contra Gentiles, Hæreticos, Schismaticos, Senatum, Præfectos, Augustos ipsos defendisse, ea existimatione, & Pontificia maiestate, ut quod Scriptores multi, & graves perhibeat, Imperator minime censeretur, quem Ambrosius non agnovisset. Sed non est hic locus res ejus gestas percensendi, utut cum eloquentia connectuntur non raro, & ejus maxime subsidio sunt perfectæ. Redeo ad Augustinum, suo etiam exemplo vim faciendi Ambrosianæ expertum. Nam *Libr. V. Confess. c. 13.* ubi ejus conciones accessisse se narrat, ait: *Delectabar suavitate sermonis, quamquam eruditioris, minus tamen hilarescentis, atque mulcentis, quam Fausti erat, quod attinet ad dicendi modum. Ceterum rerum ipsarum nulla comparatio; nam ille per Manichæas fallacias aberrabat, iste autem saluberrime docebat salutem. Et mox: Cum non saterem discere, quæ dicebat, sed tantum quemadmodum dicebat, audire: veniebant in animum meum simul cum verbis, quæ diligebam, res etiam, quas negligebam. Neque enim ea dirimere poteram. Et dum cor aperirem ad excipiendum, quam diserte diceret, pariter intrabat, & quam vere diceret &c.*

Quis triumphus eloquentiæ hujus, quæ ad Augustini conversionem veluti viam divinis impulsibus debuit aperire. * Non ergo mirum, quod veluti præceptorem eloquentiæ deinceps adhibuit, eaque etiam de causa legit diligenter. Certe *Libro IV. de Doctr. Christ. cap. 21.* ex Ambrosio non minus, quam Cypriano pro quovis genere dicendi exempla decerpit, & ut varia eloquentiæ exempla proponit.

Quod autem, ut debeo, maximi soleo facere, est PELAGII hæresiarchæ, eloquentissimi viri judicium, cujus, uti ipse Augustinus *Libro I. de nuptiis cap. ult.* & alibi sæpe refert, hæc sunt ipsissima verba: in *Beati Ambrosii Episcopi præcipue libris Romanam elucere fidem, qui Scriptorum inter Latinos flos quidam speciosus enitisset.*

S. EUCHERIUS in *Parænesi ad Valerian.* inter clarissimos facundia viros Ambrosium quoque recenset.

S. PROSPER in *Chronico Coss. Grat. V. & Theodos. I.* ait, pro catholica fide multa sublimiter Ambrosium Episcopum scripsisse.

THEODORETUS, qui in Syria scripsit, tanto licet intervallo ab Ambrosio remotus *Libro V. histor. Eccles. cap. 4.* eundem vocalissimum veritatis præconem appellat. Et in *Polymorpho Dialog. 1.* ait: *Audio Ambrosium, qui Mediolani sedem Episcopalem ornavit, & contra omnes hæreses præclare decertasse, & pulcherrima, Apostolorumque doctrinæ congruentia scripsisse.*

S. EN-

* Editores Maurini in *Præfat. oper. initio.* Sed nec aliud quidquam, inquit, magis declarat, quantæ doctrinæ, ac eloquentiæ vis fuerit in Ambrosio, quam Augustinus, ab errore ad veram fidem Doctoris nostri opera, & concionibus revocatus. Hac quippe una victoriæ sibi trophæum, ac monumentum ære perennius erexit Sanctus hic Præsul. Idem Joannes Croiset, & alii plures adverterunt.

S. ENNODIUS in *Epigrammatis de Episcopis & Libr. II. Epist. 5. ad Armenium* obiter quidem, verum honorifice de Ambrosii facundia commemorat. Illud præterire non possum, quod *Libr. I. Carm. Hymn. 6.* inter alia dicit, eum ore suo prædam de fauce serpentis feri sustulisse, bellaque Christi militantem nudum inter enses timori fuisse.

CASSIODORUS, cui ad eloquentiam nihil præter latinitatem defuit, *Libro de div. lectionib. cap. 20.* Ambrosio ait fuisse æqualem doctrinam cum vita.

S. ANASTASIUS SINAITA *Libro Hexameron* Ambrosium ut ceteris rebus, ita & eloquentia divinum virum facit.

NICOLAUS I. PAPA *Epist. 6. ad Photium* Ambrosium clarissimam, & splendidissimam Lucernam Ecclesiæ vocat.

DURANDUS TROAMENSIS *Libr. contra Berengar. Part. 4.* S. Ambrosium allegans, addit: Cujus in Ecclesia Catholica post Apostolos auctoritas habetur præcipua, cujus eloquentiæ affluens facundia latinæ linguæ decus est, & forma.

JOANNES TRITHEMIUS *Libro de Scriptorib. Ecclesiast.* „ Ambrosius, inquit, in sæcularibus literis omnium facile doctissimus, græco, atque „ latino sermone ad perfectum instructus, in exponendis declarandisque divinis Scripturis omnes „ doctores vicit. Cujus fidem nulla unquam potestas terrena infringere potuit: ita ut multis „ Episcopis pro fide relegatis exilio, Ambrosium „ nullus unquam auderet contingere. Fuit enim „ velut malleus, hæreticorum constantissimus impugnator, cujus linguæ in fide Christi loquenti „ nulla potuit unquam auctoritas humana indicare „ silentium. Pro fide semper paratus quælibet subire pericula, domino protegente liber ubique, „ & illæsus evasit. Scripsit multa præclara opuscula. „

CONRADUS LEONTORIUS in *Epistol. Prooemiali* ad Edit. *Basileens.* 1506. vocat nunc *latinissimum*, nunc *crebrum sententiis*, & *quasi quibusdam imperatoris edictis brevissimum quidem*, sed *abundantissimum*, & *gravissimum*, jam *majestate dicendi ornatissimum* & *eloquentissimum*, qui nihil ad humanæ vitæ informationem & salutem pertinens prætermiserit, nullumque non vitium detestationis, ac reprehensionis gladio vulneraverit, vel ullam virtutem pro sua dignitate debitis laudibus non extulerit &c.

JOAN. BAPT. PLATINA in *Anastasio I. Cujus* (Ambrosii) *doctrina*, & *sanctitas quanta fuerit*, *ejus vita ac opera doctissime*, & *elegantissime scripta ostendunt*.

ERASMUS ROTERODAMUS *Præfat. in opera S. Doctoris*. „ Inter priscos autem, inquit, Ecclesiæ „ doctores latinos vix alium arbitror esse dignior „ rem, cujus extent integræ lucubrationes, quam „ divum Ambrosium. Hoc & ex animo dictum „ videri velim, & citra cujusquam contumeliam. „ Sit linguarum, ac Scripturarum peritior Hieronymus: sit elaborationis phraseos * Hilarius: „ sit in quæstionum nodis explicandis argutior „ Augustinus: aliis item dotibus excelluerint alii: „ sed quem mihi dabis, qui pari sinceritate tractet „ sacras Literas, qui cautius vitarit suspecta „ dogmata, qui sic ubique gerat christianum Episcopum, „ qui sic spiraret paterna viscera, qui summam „ Præfulis auctoritatem cum summa mansuetudine „ conjunxerit? Ubique sentias illum hoc „ affici, quod loquitur. Et adest dictioni modesta „ quædam, ac pia jucunditas, grataque civilitas. Est, quem non omnino sine causa doctorem

* Id est, operosioris, & profundiori cogitatione conceptæ.

„*ctorem Mellifluum vocant: * at hic juxta no-*
 „*men suum vere coelesti manat ambrosia, di-*
 „*gnus, qui sit, quod dicitur, Ambrosius, hoc*
 „*est, immortalis, non solum apud Christum ve-*
 „*rum etiam apud homines.* „

Mox extemporalem quoque viri eloquentiam laudans, ait, facundam illam Ambrosii linguam præcipue in sedandis tumultibus, sarciendaque concordia valuisse, ostendens fusius, quam dextre, quamque feliciter in negotiis, quam constanter in periculis, quam graviter in muniis omnibus subsidio hoc eloquentiæ, pietati conjunctæ, versatus ille esset, summis, infinisque, suis, atque externis æque gratus semper, & venerandus.

Modernorum elogiis, quod priora ultra modum jam excreverunt, satius supersedendum existimo. Nihil enim jam deest ad laudem præstantissimi hujus oratoris, cui si summorum hominum studia, si complures, & operosæ editiones, si in plerasque Europæ linguas translationes factæ accedant, nemo non videt, dignissimum esse Ambrosium, qui in Ecclesiasticorum omnium ore, & manibus hodieque versetur. Quare abrumpamus hoc caput, & ad ea, quæ reliqua sunt, progrediamur.

C A P U T II.

Quid Eloquentiæ illi maxime proprium?

Et si (quod maxime princeps Oratorum sæcularium Tullius exigebat) pro rerum varietate, ac dignitate aliter, atque aliter scribit Ambrosius, arguta tamen adamavit plurimum, & succinctam brevium sententiarum copiam est secutus, quibus orationem suam per se concinnam, ac suavem perpetuo

H 4

petuo

* Bernardum significat.

petuo distinguere solet, ac velut flosculis quibusdam exornare. Ita presse informat, atque in moralibus ejus sententia sententiam excipit continenter; ipsæ vero sententiæ, quod jam Theodoretus *Libro IV cap. 6.* notavit, velut ad regulam dimensæ sunt, mentem videlicet scriptoris omni regula, & perpendiculo rectiorem. Ubi vero se locus offert ad scelera increpanda, animi lenitatem natura insitam ita gravitate temperat, ut cum reos percellat summopere, non deficiat tamen, minus objurgatione laceffit, atque irritet magis. Scripturas, ubi quidem literam sequitur, ea sinceritate, perspicacia, atque etiam facilitate pertractat, ut haud sciam aliquem hac in re, quoquo modo illi præferendum. Nam quod stylum, & scribendi elegantiam attinet; tæmetsi in eam incidit ætatem, quæ nativum leporem pene attriverat, est tamen ejus sermo nunquam ingratus, sed facilis, vividus, ac tantæ volubilitatis, ut in morem rotundorum corporum absque strepitu, & sine salebris decurrat, & sicubi impingit, ac vehementior existit, non strideat tamen, verum continuo ad naturalem quasi placiditatem revertatur. Atque ideo Veteres æque, ac Recentiores dulcedinem maxime, & mel, & ambrosiam in scriptis ejus celebrarunt. Et Cassiodorus quidem *loc. cit. Lactei sermonis emanatorem* & *perviolenta persuasione dulcissimum vocat.* Item *cap. 2. & 8. ibidem de eadem eloquii dulcedine & suavitate meminit.* Anselmus vero *Libro de Laudibus Virginit. cap. 12.* Ambrosium, inquit, *superni nectaris ambrosia redolere, ejusque mellis suam dogmatum dulcedinem celebrat.* Franciscus quoque Petrarcha *Libro II. de Vit. Solitar. Libr. II. Tractat. 3. c. 2. Librorum,* ait, *mellis suos flores sparsit, quorum hodie per omnes tractus Ecclesiæ gustus suavissimus, & fragrantissimus est odor.* Sed & primæ ejus editioni ann. 1474, quæ in Bibliotheca Ambro-

brofiana fervatur, hoc tetrastichon adscriptum legitur :

Nectar, & ambrosiam, cœlestia munera, quæris?

Hoc sanctum Ambrosii perspice lector opus.

Arida qui tali compleverit ora sapore,

Non sitiet, nullam sentiet inde famem.*

Porro ex Recentioribus innumeri sunt, qui saporem hunc, & explicandi sui miram dulcedinem prædicent, eaque de causa mellifluum doctorem appellent. Eleganter Caussin *Libro III. de eloq. sacr. & hum. cap. 14.* Jam vero Ambrosius num videtur nectare, & ambrosia innutritus? tam suaves habet, tam argutas plerumque orationis delicias, ut apes, quæ infantuli cunas, & os circumfederunt, credas adhuc in ejus labellis sessitare. Et Auctor compendii chronologici ad *histor. eccles.* Gallice scripti an. 397. In omnibus ejus scriptis dulcedinem significationum reperire est, quæ plane fascinat.

Denique Ambrosio & illud peculiare est, atque ab omnibus notari debet, quod sententiam semel arreptam, tam facile non dimittit, verum volvere solet, ac versare identidem, & jam hac, jam illa ex parte ostentare, conversionibus gratissimis, & admirabili quadam varietate. Hanc dotem unico licet verbulo ad unguem, quod ajunt, S. Sidonius Apollinaris expressit; cum enim complurium Patrum characteres velut in pugnum constringeret, ad hunc nostrum delapsus: *Ambrosius*, inquit, *perseverat.* **

Hæc præcipua in Characterè Ambrosii: sed alia multa supersunt, quibus illustrari superiora magis possint. Sæpius de Ambrosii characterè Erasmus. Sic

H 5

in

* Apud Philippum Argelatum *Tom. I. in Catalogo libror. Mediolani editor. pag. DLX.*

** *Libro IV. epist. 3.*

in Ciceroniano : *Gaudet*, inquit, *argutis allusionibus*, nec præter sententias quidquam loquitur. *Membris*, incisus, comparibus numerosus, ac modulatus suum quoddam dicendi genus habet, aliis inimitabile.

Uberrime autem, quæ huc spectare possint, in *Præfatione* operum complexus est, ubi ita habet : „ Porro dicendi character nec flaccidus est, nec humilis, quo nomine taxare videtur libellos de Spiritu Sancto Hieronymus, excusante Augustino, quod rem licet grandem, tamen subtilem docenti, non laudanti, conveniret oratio demissior. Sed habet interim suos aculeos, ubi res postulat; propius tamen accedens ad argutam jucunditatem, quam ad *δελωσι* illam, & affectus peno tragicos, in quos interdum exardescit Hieronymus, & Hilarius. Ac plerumque totus fere sermo ex variis sententiarum generibus velut ex tessellis contextus est, quo dicendi genere supra modum delectatus videtur Seneca. Hoc non minus creber est Ambrosius : sed tamen mollior, ut frustra reclamante Fabio, qui vult orationem esse veluti luminibus distinctam, non veluti emblematicis compactam, frequenter & divisionem, & argumentum, & transitum, & conclusionem, five clausulam argumentationis per sententiam efferat. Interdum totus apparatus collectionis, hoc est, propositio, assumptio, ratio, confirmatio, expositio meris constat sententiis. Passim accinuntur epiphonemata, vixque alius crebrius, aut frequentius utitur sententiarum genere, quas appellant *νοήματα*, in quibus latet aliquid arguti sensus; quod cum non exprimitur, intelligitur, ob hoc ipsum gratius, quia dictum obscurius. Porro densitatis satietatem, ac tædium excludit varietas tam felix, ut naturæ rem esse dicas, non affectationis; quod hoc dicendi genus a puero imbiberat. Nonnunquam eandem „ sen-

sententiam aliter, atque aliter variatam repetens
 „ velut infigit animis, quod elabi non vult. In-
 „ terim plurimum addit jucunditatis illa paucis ver-
 „ bis modulata brevitās. Nusquam enim sermo,
 „ longis ambagibus vix tandem absolvens perio-
 „ dum, obscuritate molestus est, quod in Augu-
 „ stini scriptis offendit Hieronymum; sed comma-
 „ tibus, & colis, concentu nonnunquam, nume-
 „ ro plerumque jucundus, tinnulus, & compo-
 „ tus incedit. Horum omnium non pigeret ex
 „ ipsius libris exempla proferre, nisi non solum
 „ perlongum videretur, verum etiam hic intempe-
 „ stivum. Augustinus in Libris de doctrina chri-
 „ stiana quædam hujus generis monstravit. In
 „ summa hæc rhetorices imperitis frustra diceren-
 „ tur, peritis in proclivi fuerit animadvertere, præ-
 „ fertim si legant hujus librum de Virginibus, &
 „ Viduis. „ Sed & illud ad Ambrosii characterem
 „ pertinet, mirifice ab eodem Erasmo laudatum;
 „ quod cum tanta esset constantia, perpetuam tamen
 „ quandam in scriptis omnibus ostenderit moderatio-
 „ nem, quæ nec in redarguendis hominum vitiis ob-
 „ liviscitur christianæ mansuetudinis. Dicas, cum do-
 „ lere, non irasci, nec usquam excurrit in levitatis,
 „ aut ostentationis speciem, ut ubique pectus vere
 „ Romanum, imo Christianum agnoscas. Atque huic
 „ temperantiæ tribuit dentatus ille Hollandus, quod
 „ scripta ejus latius ceteris inclaruerint, & minus,
 „ quam reliquorum quorundam Patrum obnoxia fue-
 „ rint invidiæ.

Brevius Anonymus, qui in *Milleloquium Ambro-
 sianum* * præfatus est, Ambrosii stylum expinxit,
 hunc in modum: „ Nam quod ad stylum attinet,
 „ tanetsi in ea inciderit tempora, quibus lingua
 „ latina propter assidua bella, civilia dissidia, bar-
 „ „ ba-

* Edition. Lugdun. 1555.

„ barorumque gravissimas incurfiones ornatum illum
 „ suum, & nitorem pristinum pene amiserat: est
 „ tamen ejus sermo tanta puritatis, elegantiaque
 „ venustate refertus, ut sine ullis salebris quasi se-
 „ datus amnis fluere videatur; atque, quod illi de
 „ suo Pericle dixere gentiles, de nostro hoc inter
 „ Doctores ecclesiasticos videatur dicendum, sua-
 „ dam illam in ejus labris sessitasse. Ac non sine
 „ ratione, quod ille de Xenophonte dixit, de Am-
 „ brofio dixerimus, sermonem ejus melle dulcio-
 „ rem videri. Denique ambrosiam, id est omnis
 „ generis suavitatem vere spirat Ambrosius, ita enim
 „ docet aperte, instituit amanter, mores format pru-
 „ denter, ut singulae sententiae singula moralia do-
 „ cumenta contineant. „

Sixtus Senensis in *Biblioth. Sanct.* „ Dicendi
 „ genus, inquit, prout rerum varietas expostulare
 „ videtur, varium est, sed ubique lucidum, ac
 „ perspicuum eloquentiae flumen effundens, ut ait
 „ Augustinus; qui etiam in quarto de doctrina chri-
 „ stiana volumine profert ex operibus Ambrosii
 „ pulcherrima quaedam exempla triplicis Ambro-
 „ sianae elocutionis, hoc est, submissae, tempera-
 „ tae, & grandis, ex quibus ostendit, eum de hu-
 „ milibus submisso, de mediocribus temperate, de
 „ magnis sublimiter pro rerum diversitate, ac di-
 „ gnitate dixisse. Adamavit tamen peculiari, ac
 „ naturali quodam affectu gravem, & argutam bre-
 „ vium sententiarum copiam, delectatus mirum in
 „ modum oratione commatis, & colis interdum
 „ numerosis distincta, & flosculis picturata. „

Hieronymus Platus noster *Libro III. de bono stat. religios. cap. II.* Ambrosius, ait, suum ipse quoque
 „ habet dicendi genus, sententiarum ubertate refertum,
 „ verbis fluens lectissimis, ac praeterea numeris suis aptis-
 „ simis adstrictum, ut plane vel Theologum oratorie, vel
 „ oratorem Theologice dicentem audire videaris. De cu-
 „ jur

jus dulcedine, quid majus dici possit, quam quod ab ipso Deo grandi prodigio præsignificata sit jam tum, ut accepimus, cum infantis in ore apum examen confedit?

Monachi S. Mauri *Præfat. in opera Ambrosii.*

„ Ac primo, dicunt, Ambrosianum styllum contat
 „ grandem, nobilem, & copiosum esse, qualis
 „ videlicet patricii ordinis virum decebat, ac di-
 „ ligenter in urbana, forensique eloquentia exerci-
 „ tatum. Sed nihil in ejus sublimitate turgidum
 „ inest, nihil turbidum in ubertate, cum utraque
 „ res suavitate quadam, ac modestia temperetur.
 „ Neque tamen putes, eum vi sua, vehementiaque
 „ destitui. Habet siquidem affectus suos, atque
 „ aculeos; sed tanta conditos festivitate, ut nul-
 „ lam morosioris, agrestiorisve ingenii speciem præ-
 „ se ferant. Observant quoque in ejusdem elocu-
 „ tione adeo miram sententiarum densitatem, ut
 „ non facile majorem apud alium ullum reperire
 „ sit. Huc adde brevitatem periodi concinnam,
 „ ac modulatam, sed in primis tam felici varietate
 „ distinctam, ut nullum tædio relinquant locum. „

Quamquam si verum fateri volumus, non est
 nihil in Ambrosii stylo culpandum. Hoc ipso enim,
 quod sententias conglomerat, & compressione re-
 rum affectat brevitatem, evitare non potuit, quin
 obscurus fieret quamplurimis locis, sitque in asse-
 quendo eo mentis acies hæud parum lectori inten-
 denda. Unde alio loco * Erasmus characterem Am-
 brosii cum illo Gregorii Nazianzeni componit, ait-
 que ob dictionis argutiam, & rerum subtilitatem,
 allusionesque subobscuras, uti ipse a vertendo Gre-
 gorio deterritus sit semper, ita & Ambrosium, si
 græce scripsisset, interpreti cuicunque negotii sane
 quam plurimum fuisse exhibiturum. In *epistola* vero
 ad

* *Libro XXVI. epist. 33. ad Georg. Duc. Saxon.*

ad *Ducem Clivensem*, cui duos sancti Doctoris libellos nuncupat, quamquam ibidem denuo inter virtutes illius ponit apte pariter, denseque adducta testimonia Scripturarum, sententiarum pietatem, allusionum gratiam, & acrimoniam aculeorum: tamen clarius etiam desiderat in Ambrosio, quod se subin nec satis explicet, & ubi rem aliquam tetigerit, continuo eam dimittat, atque alio digrediat. Quod ultimum profecto, ut me legentem male subin habuit, sic quemlibet non obesum continuo advertere debet. Scilicet Ambrosius, qui, si voluisset, eloquentia parem neminem erat habiturus, cum negotiis distraheretur perpetuo, curasque non in suam solum, sed universam Ecclesiam exporrigeret, multa non revocavit ad incudem. Et recte Muratorius, Criticus acer, nec inamoenus censuit, Ambrosium non ita plerumque, uti scripserat, etiam dicere consueisse *. Quod conciones suas postmodum in formam librorum contraheret; a quibus utique abesse multa oportet, quæ sunt propria dicentibus; indeque factum, ut prima illa species eloquentiæ popularis & clarior tantum non disparuerit.

Alter Ambrosii nævus est genus ipsum interpretationis, qua toties explicandos sumpsit locos Scripturarum. Mysticis enim sensibus abundat præ omnibus aliis, & sæpe exuberat etiam. Non ita quidem hoc facit, ut abutatur litera, sensumque naturalem invertat: nihil minus; sed quod relicto eo ad remotiores sæpe, & peregrinas etiam allegorias confugiat. Contigit id tanto viro non tam ex inopia linguæ hebraicæ, quæ & alios subin adigit ad mysteria amplectenda: sed imitationi potissimum Philonis, atque Origenis tribuendum est, quos sanctus Præsul præsertim initio pontificatus identidem

* *De dignitat. Elog. popular. cap. 8.*

dem lectitabat. Hi duo labem eam Ambrosio affricuerunt: labem dico; hoc enim genus interpretandi ævo nostro minime placet; sed nec solidum est, idemque eo accidit, ac si plantam, aut arbusculum inflexione immodica unam in partem trahas. Non enim confirmabis, sed franges potius, aut quod pronius est, etiam in diversam, & contrariam formam deduces, quæ est Sixti V. sapientissimi Pontificis comparatio, & quidem in causa ejusdem Ambrosii; quando illum adhuc Cardinalis castigatum locis plurimis in lucem emittebat. Quamquam nec illud tacendum est, Maurinos Monachos in *præfat. citat.* plura afferre, eaque minime contemnenda, ut ostendant, ne hoc quidem, quod hanc interpretandi rationem tenet Ambrosius, vitio eidem verti posse ab æquis rerum æstimatoribus. Quod ideo monemus, ut cujus interest, adire eos per se possit, nec novæ tractationis necessitatem nobis imponat.

Quid porro illis faciam, qui præterea Ambrosium aperti in scribendo criminis, plagii videlicet, solent insimulare? qui mutuatam, aut entendicatam ejus eloquentiam asserunt, qui expilatorem vocant, Origenem, Didymum, Hyppolitum Martyrem, Basilium ita exprimentem, ut transcripsisse potius, vel latinos fecisse videri possit. Nempe hæc ipsa causa est iudice Baronio, cur Hieronymus in *Catalogo* quidem suam de Ambrosio sententiam premat: aliis vero quam plurimis locis aperte eum vellicet, ac tantum non disertis verbis proclamet, in alienos labores scriptorem istum intrasse. Quæ de re, quod difficultatem habere non minimam videtur, a pluribus candide, diligenterque est pertractatum; ex quibus ego Erasmus in *Nuncupatoria*, Costerium in *vita*, Galestinum *Præfat. Homiliar. Ambrosii ad S. Carolum*, Baronium ad ann. 397. Raynaudum de *confixione librorum*, Maurinos Monachos

chos in *Præfatione* legere me memini. Itaque neque novum, neque laboriosum est, nota ea Ambrosium liberare. Quis enim id non condonet homini e tribunalibus repente ad Sacerdotium non vocato, sed raptò? Audiamus candidissimam, quam ipse initio Officiorum affert purgationem. *Homines, inquit, discunt prius, quod doceant, & ab alio accipiunt, quod aliis tradant. Quod ne ipsum quidem mihi accidit. Ego enim raptus de tribunalibus, atque administrationis insula ad Sacerdotium, docere vos capi, quod ipse non didici. Itaque factum est, ut prius docere inciperem, quam discere. Discendum igitur mihi simul, & docendum est, quoniam non vacavit ante discere.* Adde infinitas eas curas, planeque decumanos labores, quibus pro religione distentus perpetuo fuit tantus Præful; adde conciones, quas teste Augustino * Dominico quovis die habebat ad populum: adde ex eod. ** catervas hominum, qui solatii & salutis causa domum ejus ita obsidebant, ut vacare sibi vix unquam posset. In hac conditione rerum suarum, ubicunque aliorum labores usurpavit, nonnisi homilias effingebat, ut Sixtus Senensis monet, de quibus in lucem emittendis quamparum ipse cogitavit, tam anxii, ac impatientes notarii fuerunt. Existimat autem Galestinus *Hexameron Basilii*, tum recentissimum opus, nondum pervenire Mediolanum potuisse, nisi pro jure amicitiae ipse auctor Ambrosio submisisset. Quod si factum est, multo etiam liberius ei licuit, rem amicis communem in suorum commoda usurpare. Hieronymum quod attinet, etsi succensere Ambrosio visus est aliena compilanti, tamen ingentem præfert ejus viri existimationem, & *Apologia* 1. *adv. Rufinum*
Am-

* *Libro VI. Confess. cap. 2.*

** *Ibidem.*

Ambrosium quasi columnam Ecclesiæ dicit, cui ipse collatus pulex, & nihili homo esset.

Quid quod ita occupatus, ac velut in plures partes distractus Ambrosius vel sic tamen, cum alienis uteretur, quam plurimum præstitit? Et certe mirum est, quantum ex propriis ornamentis conferat, quantum addat splendoris, quam apte suo quævis loco reponat, quantum curæ ostendat, ut lolio suppresso solos flores, fructusque decerpit*. Denique multa suo Marte conscripsit foecundissimi pariter, & amoenissimi ingenii monumenta. Ex quibus ipsis pulcherrima quædam, magisque elaborata penitus interciderunt: summa utique jactura, quam dolentius ac pretiosi cujusque thesauri debemus deplorare; recte enim Baronius ad ann. 397 inæstimabilem eam dicit. Deest autem *Institutio ad christianam fidem* Fritigildi Marcomannorum Reginae inscripta, & *Liber* alius de puerorum *Institutione ad Pan sophium parvulum*, quem vir sanctus insigni portento a mortuis revocaverat. Nam utriusque operis non qualemcunque testem habemus, verum ipsummet vitæ scriptorem Paulinum, qui disertam eorum mentionem facit & primum *præclaram Epistolam* vocat. Desiderantur item *libri de Philosophia*, sive de Sacramento regenerationis in eos, qui Christum Platonis libros expilasse dicunt: atque hos Augustinus *Libro II. contra Julianum cap. 5.* allegavit, *epistola vero 31. alias 14.* a diligentia & copia extulit. Deficiunt nos denique *Commentarii in omnes Prophetas***, *Homiliæ in Sapientiam*, *Liber de judi-*

* Certe Hexameron merito ornatissimum inter opera ejus ab Eruditis appellatur.

** In *Isaiam* certe sæpissime allegat Augustinus contra hæresin Pelagianam: & ipse adeo Ambrosius eorum meminit *Libr. II. in Lucam*.

judicio Salomonis, Commentarius in Paulum *; horum quippe omnium in *divinis lectionibus* diserte meminit Cassiodorus **.

Absolvamus hoc caput Joannis Costerii. quam non fucatis tam elegantibus verbis, qui in vita verus finem ita in rem nostram pronuntiavit. „ Sed „ qua facilitate, ac orationis nitore hic græca expressit? quid hic non est insignis artificii? dixerint alii esse furtum, dixerint corniculam alienis „ pennis vestitam. Utinam pium hoc sanctissimi „ viri furtum in multis aliis deprehendere daretur! „ utinam e latinis scriptoribus hujusmodi corniculæ complures fuissent, multorum sane Græcorum „ eloquentissimos libros Romana saltem lingua loquentes haberemus, quorum ne vestigium quidem superesse studiosi deplorant. Nam quis „ nunc vel fragmentum Hyppoliti proferat, e cujus libris Ambrosium multa sublegisse Hieronymus scribit, & cujus ipse doctrinam, ac eloquentiam tantopere prædicat? scripsit Basilus in Esaiam „ Prophetam, scripsit, & Ambrosius. At cum ego „ in eo opere divum Basilium eum secutum fuisse „ putem, quem thesaurum, quas haberemus opes, „ si hoc Ambrosianum opus prodiret in lucem. „ Quod autem eorum nomen suppressit, quorum „ opera in scribendo est usus, id laudatissimo consilio factum est, quod nullam aut offendiculi, „ aut dissidii causam simplicioribus dare vellet, qui „ eorum audito nomine, qui ob prava dogmata improbat, ac suspecti essent, statim ceu conspecto Basileisco resilientes, nullum ex lectione perciperent fructum. Quod ergo eorum subsidio „ usus est, diligentiae fuit, quod nomina pressit, „ prudentiae. Quamquam sane quidquid vel suum, „ vel

* Diverfus ab eo suppositio, qui nunc extat.

** Maurini denique *Præfat. in Tom. II.* contra Apollinarem quoque scripsisse suspicantur.

„ vel alienum est, non potest non placere, non
„ summa laude dignum judicari; tantum est in
„ ipsius sermone eloquentiæ, tantum amoenitatis,
„ tantum nitoris, etiam in iis, quæ obscura sunt,
„ & non ita facile splendescunt, nec sermonis le-
„ nocinia, pigmentaque admittunt. Neque enim
„ ita magnæ est difficultatis, in festivo, & plausi-
„ bili, ac veluti theatro argumento eruditionis,
„ ac eloquentiæ divitias ostentare: ceterum res per
„ se incultas, ac retrusas expolire, ac proferre
„ posse in lucem hominis est & eximie docti, &
„ maxime ingeniosi, & qui in dicendo, scribendo-
„ que probe sit exercitatus. . . . Ceterum, quan-
„ do ejusmodi argumentum tractabat, quod non
„ solum admitteret, sed ultro quoque tanquam jure
„ suo elaboratiorem, ac floridiorem dictionem ef-
„ flagitaret, hic pia quadam ambitione opes suas
„ mira arte ostentat, hic congestum olim ex Egy-
„ ptiis, atque exoticis opibus thesaurum in Eccle-
„ siæ gloriam, atque ornamentum depromit. „

CAPUT III.

Ubi emineat Patris hujus facundia?

Ut ordine pergamus, universi operis partitionem
sequimur, prout discreta singula a Maurinis
sunt, & in classes suas redacta. Itaque ab iis, quæ
ad scripturæ expositionem referuntur, initio facto,
convenit inter Auctores, etiam in Ambrosium qua-
drare, quod ipse de Origene alicubi admonet,
scilicet majorem in veteri, quam novo Testamento
apparere. Verum quoniam paucâ ejus in novum
Testamentum habemus, critica hæc animadversio
non potest esse multi usus. Et certe aliqui eo ab
illa deduci se sunt passi, uti libros Sancti Doctoris,
quos in *Lucam* exaravit, minoris multo facerent,
ac oportebat. Forte autem & Ruffinus *Libr. 2.*

Invectivarum iis imposuit, ubi ait, Hieronymum, ta-
cito licet Ambrosii nomine, scripsisse, auctorem Li-
brorum in Lucam *ludere in verbis, & dormire in*
sensibus, denique Græcorum plumis se venditare. Quid
ergo ipse Hieronymus ad eam expositionem lecto-
res suos aliquando remittit? quare toties ab Augu-
stino, Cassiodoro, & aliis laudem illa tulit? unum
audiamus Accam Episcopum Cantabrigiensem, cui
multos ex libris suis Beda inscriplit. Hic enim *Epist.*
ad eundem Bedam * ita habet: „ Sunt quædam in
„ expositione beati Ambrosii in Lucam tam diserta
„ simul, & excelsa, quod tuam quoque sanctita-
„ tem vidisse non ambigo, ut a doctioribus solum
„ intelligi queant, a rudibus vero, fastidiosive le-
„ ctoribus, quales in præsentî ævo plures invenies,
„ præ difficultate assequendi, quæ diserta sunt, vel
„ capiendi, quæ alta, ne quærenda quidem quasi
„ celsiora, nec quasi se fortiora putentur esse scru-
„ tanda. Nec parum dedit iudicii doctissimus Pa-
„ ter Augustinus, qui ad Paulinam Dei famulam de
„ videndo Deo scribens, non aliis magis, quam ex
„ hoc opere sumptis beati Ambrosii testimoniis uten-
„ dum putavit, & ea pariter non solum ponenda
„ simpliciter, sed etiam exponenda iudicavit: adeo
„ ut ex paucissimis memorati tractatoris sententiis
„ non parvum volumen retractando confecerit.
„ Quædam tamen S. Ambrosius in hoc opere in-
„ discussa præterit, quæ illi quasi summæ eruditio-
„ nis viro, nec quæsitu digna videbantur. „ Hæc
antiquissimus Præsul de libris in Lucam, quæ, quod
momenti haud parum habent, ad vindicandos eos
sunt plus quam satis **.

Sed

* Quod & inter opera hujus reperire est.

** Vide de tota hac re Maurinos cum in *Præfatione* tum
in *admonitione* ad hos ipsos libros.

Sed ut inde redeamus, quo tantisper digressi sumus, plerique commentarios Ambrosii in Psalmos ceteris, quæ in vetus Testamentum scriptis, facile anteposunt. Et est ejus sententiæ ratio satis idonea, si universa spectentur. „ Quid in his est non eruditum, exclamat Costerius, non varium, non ornatum? Davidicam lyram suavissimo linguæ plectro attingat, & Psalterium, quod demulcendis piorum mentibus Regius Propheta cantavit, ea ipse quoque sermonis suavitate, ac modulatione decantat, ut, si viveret David, non posset non felicem, ac beatum sese existimare, qui carminis sui tam præclarum, atque insignem nactus esset interpretem. Quæ hic non mytheria profert in lucem? quam hic excutit omnia? quam nihil negligit? quam pie docet? quantos excitat ignes? quantos relinquit aculeos? rapit, trahit, impellit hominem, quo velit; tanta est & in dicendo suavitas, & efficacia in persuadendo. Sic delectat, ut id solum affectasse videatur: sic docet, ut meliorem te fieri sentias: sic movet, ut sequi etiam cogaris invitus: sic objurgat, ut tamen non possis irasci. Artificiosa plane apud vos construens, omni suavitate, deliciisque differtos, quorum vitali paltu animæ sanctæ mirum in modum saginantur. „

Præcipue vero ea laus debetur *Expositioni in Psalmum 118.* ut longissimum, sic pulcherrimum, plerumque saluberrimis documentis. Cum tam nobile argumentum propositum haberet Sanctus doctor, ut ajunt Maurini *, omnem ingenii vim, omnem sibi divinitus concessam facultatem eidem illustrando adhibuit. Quidquid in eo fuit eloquentiæ, quidquid ardoris, modestiæ, humilitatis, scientiæ, id omne tanto cum splendore in hac commentatione elucet, ut ex communi

* In admonitione.

doctissimorum virorum, atque etiam heterodoxorum suffragio inter præstantiora Ambrosii nostri opera numeretur. Eminet autem hic præcipue in sensu morali, in ducendis ad perfectionem christianis, in increpandis vitiis, nulla status, aut dignitatis habita ratione, id quod præter alia iidem Monachi * præclare ostendunt. Quod vero ante alia me afficit, est superbissimi hominis, & Patrum mastigis Dallæi de hoc scripto iudicium. Neque enim dubitat vocare opus præstans, & eloquentia, sanæque doctrina refertum, lectuque adeo dignissimum.

Ex ceteris commentariis maxime oratorii sunt *Libri duo de Cain, & Abel, Libri de Jacob, & vita beata* **, *Liber de Elia, & Jejunio, Liber de Nabuthe, Liber de Tobia, secunda Davidis Apologia* (siquidem ejus sit) priore multo præstantior. Sed & in *Libro de bono mortis* multa copiose, sublimiter, & ornatè dicta sunt. Inter mystica plane excelsit *Liber de Isaac & anima*. Hæc de iis, quæ in Scripturas sanctus Doctor commentatus est.

Inter Moralia cum multa sint, quæ singularem habent elegantiam, commendari merentur universa. Et libros quidem *de Officiis* sunt, qui illis Panætii, Hecatonis, & Tullii plurimum anteferant: nec defuit, qui Ambrosium & Ciceronem eodem volumine, respondentibus sibi e regione paginis, ut comparationi locus esset, comprehenderet ***. Ego qui Panætium, & Hecatonem non vidi (neque enim extant amplius) de Cicerone illud ipsum jure hic usurpem, quod ex Augustino, ubi Faustum cum Ambrosio composuit, paulo ante memorabam, videli-

* Eodem loco.

** Maxime *sub finem*, ubi de Machabæis, ut jam Cassiodorus in *Institut. divinarum literarum* animadvertit.

*** *Moguntia* nimirum 1602. ad usum juventutis literariæ.

delicet verba minus hilarescere, ceterum rerum ipsarum nullam esse comparisonem. Utilitas est evidens, dudum ab eodem Augustino * notata, usuque omnium sæculorum, quem manuscripta innumera, & excerpta, & breviaria testantur, manifeste comprobata. Quare non est opus, ut in commendationem eorum locos etiam, atque elogia auctorum cumulemus.

Quantumcunque autem in Officiis Ambrosius excellat, mihi magis adhuc placent libri de *Virginibus*. Hieronymus *Epist.* 22. ad *Eustochium* hoc de illis tulit iudicium. *Lege Ambrosii nostri, quæ nuper scripsit ad sororem opuscula, in quibus tanto se effundit eloquio, ut quidquid ad laudes virginum pertinet, exquisierit, expresse, ordinavit.* Certe hæ, aliæque ejus argumenti scriptiones tantam adhuc viventi famam confecerunt, atque ita ad exteras gentes pervagatæ sunt, ut ab ultima usque Mauritania Virgines Mediolanum venirent, ad sacrum velum, insigne virginitatis, ab Ambrosio accipiendum. Quare Maurini in *Admonit.* tantum his sermonibus eloquentiæ, & vehementiæ tribuunt, ut maria ipsa pervaderent. Sed & Matres Mediolani prohibebant filias, ne hoc de argumento dicentem audirent, imo quod memorabilius, domi includebant. Quod utrumque ex ipso hoc opere habemus, & scriptores varii nunquam satis admirari potuerunt. Addunt autem & illud, mirum omnibus esse debere, hominem vixdum a provinciæ administratione, sæcularibusque tribunalibus abductum Sacris Literis, & christiana facundia tam præclare, tam excellenter instructum comparuisse. Certe Erasmus tot facundissimis Patribus argumentum hoc versantibus præponere eum videtur, quando in *Præfat. Virginitatis*

* *Epist.* 82. ad Hieronymum nunc 21. Iterum eos laudat in *Apologia advers. Jovinian.*

præconem facundissimum appellat. Costerius vero, in eo opere, quærit, quid est non limatum, non expolitum, non excultum! Et mox. Ornatus enim cum primis hic studiosissimus est, perinde, ac si cerussa, ac purpurisso virginitatis ora depingat, quo spectatoribus speciosior, gratiorque haberi posset. Nactus hic erat campum, in quo ingenii sui fræna laxaret. Quin & alibi quoque data opportunitate virginitatis est facundissimus, & locupletissimus præco: ut verisimile sit, pudicitie decus incoluæ illi conservatum fuisse, quam & tantopere amavit, & tam facundo ore ab eo laudatam fuisse videmus. Hæc si cogitantur, quæ addere adhuc possumus, & Marcellinam scilicet sororem, eorum fama Romæ excitam descriptos poposcisse, & Augustinum, aliosque laudasse sæpius ac allegasse, minora jam sunt, & admirationem amittunt. Istuc omittendum minime fuit, ipsummet sanctum Doctorem in fine Libri II. suam fors nimiam artem, & facundiam, quam in oratione exprompserat, hac idonea sane causa excusare, quod sic majore vi, & suavitate teneras mentes attraheret; uti reipsa factum est, & fit hodieque, quando resistere vix possunt, qui mellita ejus facundia semel fuerint illecti.

Porro in primo libro eminent quæ de S. Agnete, de Vestalibus, de malis mulierum, de virgine aram complexa memorat. In secundo Deiparam Virginem, Theclam, & puellam Antiochenam in lupanar abductam præcipue floribus illis suis exornat. In tertio nihil simile digressioni, qua Sancti Præcursoris cædem describit, atque exaggerat.

Pott libros de Virginibus uti ordine sic eloquentia proximus est liber de Viduis, in quo sæpe vis, & elegantia quasi de palma decertant. Erasmus in Vidua tua christiana breve quidem, verum insigne illi elogium textit. Venio, inquit, nunc ad viduas, a quibus divinæ literæ perfectius quiddam videntur exigere. Nec in hoc sumam operam, ut viduitatis digni-

dignitatem oratione celebrem. Fecit hoc jam olim ille mellitus orator Ambrosius tam ornate, tam copiose, ut nihilo possit accedere. Sed & Galestinus verborum lumine illustrem, & sententiarum pondere gravem eum librum dicit.

Sequentem, qui nunc de *Virginitate* inscribitur, olim libro III. de *Virginibus* assutum, maxime commendat prudentia oratoria, qua argumentum hoc suum defendit.

Qui sequitur *liber de institutione Virginis*, & ipse pie, graviter, florideque scriptus est, & maxime placet, ubi Mariæ integritatem perpetuam defendendam sumit.

Exhortatio ad Virginitatem varia habet argumenta, sed virginitatis præconium hic quoque præstare ceteris videtur.

Hactenus de iis, quæ virgines, & viduas spectant, ubi iudice Erasmo * *velut in argumento plausibili magis expromit, ne dicam ostentat dictionis ornamenta.* Quibus merito subjungas Librum de *lapsu Virginis consecratæ*, qui dignissimus quidem Ambrosio, non tamen indubius est foetus. Maurini in *admonitione* jam *vehementissimam increpationem*, jam *acerrimam, densisque, ac brevibus incisissimè concitatum orationem* vocant. Habet ejusdem argumenti Epistolam divus Basilius sane gravissimam, cui tamen nemo est, qui librum hunc non aperte prætulerit. Caussin'us qui illam valde laudat, isti majorem longe vehementiam, atque acrimoniam tribuit.

Sed qui *Moralia* præmisimus, *controversa* non omittamus. Equidem negare haud possum, ceteris esse multo inferiora. Sic enim fere sunt libri dogmatici, ut minus faciant pro eloquentiæ studiosis; quod cum congerie testimoniorum, tum ipsa sub-

* In *Præfat. operum*. Quo puto etiam Costerius, ad finem prioris capituli laudatus, respexit.

tilitate argumenti jejunitatem habent, nec facile admittunt delicias, & ornamenta dictionis. Nihilominus in Libris de *Pœnitentia* contra Novatianos, & de *Spiritu Sancto* contra Macedonium * neque copiam puto, neque ardorem lector desiderabit. Sed & in ceteris de *fide*, & *Incarnationis Dominicæ Sacramento* non raro afficit tractandi dexteritate, atque industria, recteque Maurini ostendunt **, præcipue in objectionibus neſtendis, proponendis, ſolvendisque Ambroſium eminere. Legat exempli cauſa lector *cap. 8. & ſeq.* poſtremi operis, & mirabitur, qua ſoliditate, quibuſque nervis præcipuum Arianæ hæreſis cardinem ille convellat. Coſterius ad hos de *fide*, ut illos de *Spiritu Sancto*: *Deum immortalem, exclamat, quanta luce, quanta eloquentia, quanta pietate! Putes eum in mediis campis ſolutis habenis excurriſſe, non inter prærupta, & aſpera loca deſudaſſe. Ita nuſquam hæret, nuſquam ſe torquet, nuſquam a cæpta via ceu feſſus viator declinat.*

Inter Epiſtolas longiſſime præcellunt illæ, quas ad Imperatores, & Marcellinam ſororem dedit. In iſtis duabus, quod ſermonem contra Auxentium continent, ita, teſte Gaſefinio, exaggerat, & amplificat divino ſpiritu concitatus orationem, ut nihil dici quidquam poſſit vel excelsius, vel magnificentius. De illa contra *Symmachum* jam dixi libro I. Sufficit cum Croiſeto *** ſuper reſponſo tam opportuno, tam energico, tam convincente iſtud hic admonuiſſe, quod Eccleſia ultimam contra Gentiles victoriam relataſi his maxime literis debeat in acceptis ferre.

Quid porro de duabus ad *Theodoſium* in cauſa Synagogæ, & in cauſa cædis Theſſalonicenſis dicam?

* Cavillo, quo Hieronymus *Præfat. in Didymum de Spiritu Sancto* hoc opus petiſſe viſus eſt, egregie, ſuſeque reſpondent Maurini in *admonitione*.

** *Admonitione ad libros de fide.*

*** In *Exercit. pietat. VII. Decembris.*

cam? Illud videlicet, Ambrosium in iis expressam, spirantemque magnitudinis suæ imaginem reliquisse, qua sane sola Episcoporum omnium exemplar absolutissimum habeatur. Age, versemus tantum, inspiciamus, contemplemur velut effectum in ære, solidumque hoc signum, in quo quasi redivivum tantum Antistitem videamus.

Superfunt orationes funebres duæ in *fratrem Satyrum*, duæ in *obitum Valentiniani*, & *Theodosii Augustorum*. Tempus non permittit, uti eas elaboraret, locos nihilominus sublimes, grandesque amoris affectus habent. Secunda in *Satyrum* præterea locos communes, eosque egregios de malis hujus vitæ, de luctu in funeribus carorum, de solatio mortis, & resurrectionis suppeditat. In iis, quas in *fratris Satyri morte descripsit*, ait Costerius, *quæ non variarum, ac insignium rerum sæcunditas! quæ non verborum lautities!* Præter hos nullum alium agnoscimus Ambrosii sermonem; & eos, qui hucusque ejus nomine ferebantur, plus quam certum est, ab ingenio, styloque Ambrosii nimium quantum dissidere.

Atque ita & hæc Dissertatio absoluta est a nobis. Qui plura desiderant, habent sane alia, quibus sanctissimi viri facundiam ornare adhuc possint. Præter eos enim, qui de Auctoribus ecclesiasticis scripserunt, serviunt hic *Prolegomena editionis Gillotianæ*. Petrus Galefinius *Præfatione ad sermones S. Ambrosii*. Joannes Baptista Masculus, qui opera S. Doctoris unum in Tomum contraxit, viamque ad Conciones inde formandas ostendit. Cardinal. Baronius in *Vita*. Theophilus Raynaudus in *Hagiologio Lugdunensi*. Godefridus Hermant in *vita Gallice edita forma quarta ann. 1679*. Franciscus Girus, & Hadrianus Bailletus in *Vitis SS. ad diem VII. Decembr.* Editores Maurini, qui cum in *Præfatione*, & *admonitionibus* ad singula opuscula, tum in *appendice* plurima, quæ huc faciant, diligenter, & enucleate expendunt. Vita a Candido Decembri, seu Decembrio eleganti & puro scriptore composita nusquam comparet, & quoniam typis non prodiit, verius omnino deper-

deperdita est. Addi etiam ad ceteros possunt, qui de Rebus, de Sanctis, & de Scriptoribus Mediolanensium egerunt. Denique ea, quæ libro nostro I. Dissertat. ultim. ipsimet de Ambrosio perscripsimus.

DISSERTATIO VI.

De Eloquentia Sulpitii Severi.

CAPUT I.

Encomia hujus eloquentiæ.

Severus Sulpitius doctissimo natus sæculo, sed quo eloquentia, & latini sermonis puritas in barbariem paulatim vergeret, omni tamen ætatis ejus vitio superior fuit. Claudianum certe Poëtam, & ex nostris Hieronymum si excipias, nemo illi tum bonarum literarum gloria comparandus. Ut enim erat ingenio nobili, & amœno, generisque beneficio subsidia habebat omnia, difficile ei non fuit, artes omnes arripere, quibus ad humanitatem informamur. Quare factum est, ut ætate non magna scribendi felicitate non æquales modo anteiret, sed in ipso mundi Theatro, ac fori celebritate versatus facundiæ palmam teneret, nuptiasque consequeretur splendidas, & consulares. Verum uxore paucis post annis morte sublata, cum tædio rerum humanarum, tum maxime amicissimi Paulini exemplo sæculi res omnes valere jussit, & ingenii laudem inanemque gloriam aspernatus, Piscatorum prædicationes Tullianis & suis literis omnibus præposuit, linguamque profana oratione pollutam Christi laudibus expiavit. Deinceps beato Martino, cujus intimas virtutes cognoverat, & admiratus erat, discipuli instar adhæsit. Tali autem Magistro formatus, mirum non est, quod studiis, & artibus humanitatis solennius etiam nuntium remitteret. & earum veluti reliquias unice ad pietatem, & usum Eccle-

Ecclesiæ transferret *. Itaque vel ejusdem B. Martini & Sanctorum Monachorum res gestas stylo prosecutus est, vel epistolas de rebus ad pietatem spectantibus scripsit, quarum paucissimæ supersunt, vel denique historiam sacram inde ab orbe condito retexit: contempta quidem, ut plane constat, elegantia, nec tamen, cum occasio se offerret, intermissa. Identidem enim, quidquid contra causetur, ex prioribus illi studiis aliquid adhæsit. Sed ipsummet audiamus, cum neglectum orationis cultum excusat. *Præfatione enim in vitam beati Martini ad Desiderium* cum dixisset, se libellum de Sancto illo scriptum scheda sua premere, & intra domesticos parietes cohibere decrevisse, hanc dat rationem: „ Ut sum natura infirmus, judicia humana
 „ vitabam, ne, quod fore arbitror, sermo incul-
 „ tior legentibus displiceret, omniumque repre-
 „ hensione dignissimus judicaret, qui materiam
 „ disertis merito scriptoribus reservandam impu-
 „ dens occupassem. Sed petenti tibi sæpius, ne-
 „ gare non potui. Quid enim esset, quod non
 „ amor tuo, vel cum detrimento mei pudoris im-
 „ penderem? Verumtamen ea tibi fiducia libellum
 „ edidi, qua nulli a te prodendum reor; quia id
 „ spondidisti. Sed vereor, ne tu ei janua sis futu-
 „ rus, & emissus semel non queat revocari. Quod
 „ si acciderit, & ab aliquibus eum legi videris, bo-
 „ na id venia a lectoribus postulabis, ut res po-
 „ tius, quam verba perpendant, & æquo animo
 „ ferant, si aures eorum vitiosus forsitan sermo
 „ perculerit; quia regnum Dei non in eloquentia,
 „ sed in fide constat. Meminerint etiam, salutem
 „ sæculo non ab oratoribus, sed a piscatoribus præ-
 „ dicatam; cum utique, si utile fuisset, id quoque
 „ Dominus præstare potuisset. Ego enim cum
 „ pri-

* Vide Epistolam I. S. Paulini, nunc 5.

„ primum animum ad scribendum appuli; quia ne-
 „ fas putarem, tanti viri latere virtutes, apud me
 „ ipse decidi, ut solœcismis non erubescerem; quia
 „ nec magnam istarum unquam rerum scientiam
 „ contigissem: & si quid ex his studiis olim for-
 „ tasse libassem, totum id desuetudine tanti tempo-
 „ ris perdidissem. Sed tamen, ne nos maneat tam
 „ molesta defensio, suppresso, si tibi videretur, no-
 „ mine libellus edatur: quod ut fieri valeat, titu-
 „ lum frontis erade, ut muta sit pagina: aut, quod
 „ sufficit, loquatur materiam, non loquatur au-
 „ ctorem. „

Sed tanta demissione nihil ille minus consecutus est, quam ut infans, & indifertus in dicendo haberetur. Neque de veteribus solum loquor, sed posteriorum quoque temporum literatis hominibus; adeo ut jucundum sit audire, quas ei certatim laudes tribuerent, quæ præconia deferrent. Et

S. PAULINUS quidem * ut superiora non repeta-
 mus, *eloquia ejus tam facunda, quam sancta appellat.*

PAULINUS alter divi Ambrosii Notarius, & vitæ scriptor ** *Eloquentiæ fontem* dicit.

PAULINUS tertius *Petrocoriensis* dictus, qui vitam beati Martini versibus expressit *Libr. V. v. 193.* ait: *Testis adest docto mirabilis ore Severus.*

GENNADIUS in *Catalogo de Viris Illustrib. Virum* genere, & *literatura nobilem* asserit, qui *scripserit opuscula non contemnenda.* Gennadium pro more sequuntur Addo Viennensis, Honorius Augustodunensis, Joannes Trithemius, Guilielmus Pastrengus.

AUCTOR ANTIQVVS COLLECTIONIS HISTORIÆ CHRONOGRAPHICÆ EX IDACIO, de scriptis Severi loquens, *Virum summum* dicit.

HER-

* *Epist. II. alias 5.*

** *Initio vitæ S. Ambrosii, S. Augustino dicata.*

HERMANNUS CONTRACTUS in *Chronico* non dubitat summis Doctoribus Ambrosio, Hieronymo, Joanni Chrysostomo, Augustino, qui hoc tempore claruerunt, Severum annumerare.

B. PETRO DAMIANI *Serm. de S. Martino* Severus insignis orator nominatur.

GUIBERTUS MARTINUS Abbas Gemblacensis in *Apologia Severi*, tam disciplinis liberalium artium, quam generis nobilitate clarum extitisse, ait, gemina simul & prosapiæ, & sapientiæ, ac scientiæ præpotentem gloria.

CHRONICUM TURONENSE apud Edmundum Martene Tom. V. *Veter. Scriptor.* p. 925. librorum haud dubie causa, Sulpitio Maximi cognomentum tribuit.

ANONYMUS in *Prologo operum Paulini* apud Le Brun, Editorem ejus, Severum Sulpitium æque nobilem & literatum virum vocat.

CAROLUS SIGONIUS *Commentar. in Sacram Historiam Severi*, hominem dicit ut sanctum, sic disertum imprimis, & eruditum. Mox ad Studiosam Juventutem conversus: Hortor omnes, ait, qui se aut sacris, aut profanis studiis dediderunt adolescentes, ut Severum hunc eo animo legant, ut plurimum se non tam in prudentiæ *, quam in Religionis, & innocentiae studio profecturos esse confidant, addo etiam latinæ eloquentiæ, quam ille tanta industria coluit &c.

PETRUS PITHOEUS vir multæ Lectionis, cui plura Patrum opera tunc erepta debemus *Præfat. in Salvianum*, loquens de viris summis probitate, atque eruditione admirandis, quos Gallia tulisset, inter alios Severum nominat, quo digniorem (sic enim

* Fateor, offendit me tantisper hæc loquendi ratio, sed Hieronymus de Prato familiare id Sigonio ostendens, ut non tam idem quod tum, vel non minus illi significet, scrupulum exemi. V. ejus *Præfat. in Tom. II. pag. VIII.*

enim ait) Sallustio, Tacitoque æmulum ne inter Romanos quidem ullum video.

CASPAR BARTHIUS eruditissimus Scriptor *Libr. III. adversar. c. 5.* quanti apud se Severus esset, luculenter testatum facit. *Incomparabili quapiam voluptate nos afficiunt*, inquit, *apud Latinos ii Scriptores, qui christianæ nostræ Religionis mysteria eloquentiæ floribus ornare voluerunt. Nimum vero pauci hujus generis supersunt, & ii fere sequiorum sæculorum tritu contaminatiores. Quod in Sulpitio Severo, talium citra controversiam principe, his diebus experti sumus.*

JACOBUS TIRINUS in *Indice Auctorum* ait: *Severus Sulpitius Aquitanus, genere, & literis nobilis Presbyter &c. libros duos scripsit eleganter de sacra Historia &c.*

CLAUDIUS FLEURIUS *Libr. XXI. Histor. Eccles. §. 50.* jam antea quam vivendi rationem mutasset, eloquentiæ laude celebrem Severum fuisse affirmat.

LUDOV. ANTON. MURATOR. *Dissert. III. in Vit. S. Paulini* operibus subnexa. *Jure quidem merito*, inquit, *virum venerari par est, cujus non modo conversione, vita, singulari pœnitentia, silentio, & pietate, quam summis laudibus viri sanctissimi celebrarunt, Ecclesia Gallicana illustrata est, verum etiam scriptis, quæ ut ceteris fidelibus ædificationi, ita & doctissimis admirationi exsistere.*

ABBAS LADVOCAT in *Lexico Historic. portatili.* Hic præ omnibus antiquis Latine Ecclesiæ Auctoribus, solo fors Lactantio excepto, purissime, & elegantissime scripsit.

Fuse etiam latinitatem & eloquentiam Severi commendat JO. GEORGIUS WALCHIUS in *Histor. Critic. linguæ latinæ*, maxime cap. XI.

His uberius fortasse quam petebatur, aut necesse erat, enumeratis ad alterum Caput transgredimur,

dimur, & quæ singularia in scribendo Severus habeat, non minus solícite examinamus.

CAPUT II.

Notæ Severi peculiares.

Quinque dotes observare me memini in scriptis Severi volvendis, illi plane proprias, ac peculiares. Prima est *facilitas*, secunda *æquabilitas*, tertia brevitas, quarta *puritas*, quinta *venustas*. De singulis porro dicendum est.

Facilem esse Severum quivis deprehendet, modo vel a fronte salutaverit. *Collectio Historica chronographica ex Idacio*, quam supra retulimus, de Sulpitio univérse ait, *apertissime scripsisse*.

Sed & auctor recens LAURENTIUS BERTI in *Eccles. Histor. Breviario Sæcul. V. c. 4. Stylum Severi facilem*, & supra *genium sæculi tersum* laudat.

ANONYMUS Gallus, qui *Compendium Chronologicum Ecclesiasticæ Historiæ* edidit, *Tabula IV. Sulpitius Severus*, inquit, *hic scripsit tersissima latinitate breviarium Historiæ suæ a creatione mundi usque ad annum Christi 400. ; vitam præterea S. Martini Turo-nensis cum aliis quibusdam opusculis*. Equidem nihil in eo asperum, turgidum nihil, nihil obscurum, aut affectatum.

Sed æquabilis quoque est. Fluit olei adinstar, pari semper tractu, & sui nunquam dissimilis. Atque hæc ipsa æquabilitas novum suppeditat argumentum facilitatis ejus. Quæ enim arte potius & studio exprimuntur verius, quam profunduntur, differre a se ipsis ubique oportet, & jam hanc jam illam faciem sumere, quod non tam ex proprio sint, quam veniant ex alieno. Hic vero discernitur statim, quid Severi sit, quid non. Id quod in Epistolis quibusdam repertis, aut reperiendis deinceps magno usui erit. Laudat hunc tenorem & commo-

da inde existentia Clar. Barthius *. Qui scriptor, ait, cum sibi sit perpetuo similis, mirum quam pulchre ex se ipso possit illustrari: quod genus pene nemo secutus est in enarrandis elegantissimis auctoribus, etiam ceteris, si qui tractatione non plane indigni visi sunt, nobis vero magnopere præ omnibus arridet.

Dos tertia Severi brevis est. Eleganter nuper scriptor Philippus Argelatus Sigonii editor ** Historiam Severi *stricto calamo* conscriptam ait. Paucissimis nempe Sulpitius dicit, quod alii multis, imo plurimis tam feliciter, tam clare nunquam exprimerent. Imitatur enim Sallustium, sed ita, ut quæ minus placere in eo possunt, evitet perquam diligenter. Brevis est, atque concisus, quin tamen cesset perspicuus esse, unde recte a plurimis *Sallustii Christiani* nomen tulit. Neque novus est hic titulus. Nam datus illi est, cum vix prælo commissus, lucem plene aspexisset. Sic enim Sigonius vocavit; sic deinceps Giselinus, Barthius, Vossius, Vorstius, du Mesnil, de Prato, & alii complures, qui modo non occurrunt, constanter vocaverunt. Sed Giselinus ante omnes audiendus est, qui & fusius in hoc argumento versatur. Cum enim Severum ceteris Annalium scriptoribus etiam brevissimis prætulisset, „ Hanc vero palmam, addit, sola ut mi-
„ hi videtur Crispi Sallustii rerum Romanarum Au-
„ ctoris florentissimi imitatione consecutus est. In
„ quo cum multa virtutis locum obtinere videret,
„ quæ tamen sub imitationem vix caderent, abru-
„ ptum dico sermonis genus, quod audientem le-
„ ctorem transvolat, nec, dum repetatur, expe-
„ ctat, sive ut loquitur Seneca, amputatas senten-
„ tias, & verba ante expectatum cadentia, eas vir-
„ tu-

* Libr. 3. *Adversar.* c. 5.

** Tom. IV. *ad Commentarium ejus in Sulpitii Severi Historiam Sacram.*

tutes, utpote Sallustio suas integras reliquit. A
 „ verbis autem antiquis ex Catonis, ut volebat Au-
 „ gustus, originibus excerptis, consulto se absti-
 „ nuit. At concinnam illam brevitatem, lectissi-
 „ mis, ac significantibus verbis temperatam suo in-
 „ stituto cum primis accommodatam, tanta arte
 „ expressit, ut propemodum quis dicat non imita-
 „ tum eum, sed æmulatum. Neque enim satis ha-
 „ buit eodem, quo ille modo orationem ducere,
 „ secare, circumscribere, colligare, ac denique
 „ a re una ad aliam transire, nisi & principiis iisdem
 „ libros suos ordiretur, ita tamen, ut quæ ille teste
 „ Fabio nihil voluit ad Historiam pertinere, hic
 „ paulo propius ad rem accomodarit. Quæ omnia
 „ in sacra saltem historia præclare elucere vel primo
 „ oculorum injectu quivis animadvertit. „ Ita Gi-
 „ felinus si quis alius præclare de hoc Scriptore meri-
 „ tus. Superiorem alii Sallustio faciunt, quod illo
 „ felicius hanc, de qua dicimus, brevitatem cum cla-
 „ ritate, & facilitate conjungat. Vide Dupinum
 Tom. 3. Bibl. nov.

Quarta Sulpitii nota *Puritas*. De qua Josephi
 Scaligeri judicium ante omnia audire debemus.
 Ait enim *: *Iste Sulpitius Ecclesiasticorum purissimus*
*Scriptor. Dignus sane ** qui vel eo nomine legatur,*
quod supra sæculi sui captum loquitur latine. Quod
 testimonium studiose monui me primo loco afferre
 debere. Est enim acerrimi Critici, qui morosus &
 intemperans in alienis judicandis fuit. Et laudem
 ego ab eo homine profectam aliorum elogiis, utut
 maximis longe puto præferendam. Nolim tamen
 Severi puritatem sic accipi, ac si nihil prorsus macu-
 læ ab ævo suo ille traxisset. Barthius supra relatus
 Lib. II. *Adversar. c. 4.* ait: *Non postremus eorum au-*
thorum

K 2

æthorum

* In Prolegomenis ad Libros de Emendatione Temporum.

** Ut addit Epist. 305.

*florum est, in quos ab omni ævo plura, quam quisquam adhuc alius notavimus, Sulpitius Severus; quippe in quo maxime laudabilis sit styli gravitas, quoad quidem ejus fieri potuit suo sæculo, quo nemo latinus scribere potuit. Pari candore Hieronymus de Prato Editor Severi. Si, quid ego, inquit, de his sentiam requirat, quamvis elegantiae singularis laudem Severo nemo jure negaverit, ut sunt tamen aliqui etiam in egregio corpore nati, ita non potuit ille a scriptis suis omnem ætatis, qua vixit, & latinitatis, quæ ipsi vernacula erat, rubiginem abstergere; adeo ut in hoc etiam Historiæ Sacræ Breviario ad imitationem Sallustii conscripto offendant aliquando, & a puritate latini sermonis declinet. Quod diligenter adnotatum singulatim fuit a Joanne Vorstio, multum in his studiis versato, utpote qui duos antea libros ediderit, quorum primo de LATINITATE FALSO SUSPECTA, alteri de LATINITATE MERITO SUSPECTA titulum fecit *.*

Quod demique *Venusiatem*, & cetera, quæ inde sequuntur, attinet, multi multa scripserunt: *Venantius Fortunatus* Pictaviensis postea Episcopus in *vita Martini Libr. III. vers. 11. & 12.* de Sulpitio loquens, os ejus *venustum*, & *dulcem stylum* laudat. *Gerardus Joannes Voisius Libr. II. de Historicis Latin. c. 12.* breviter de Severo, nec obiter tamen. *Didione*, inquit, *utitur tersa, & eleganti.* Eodem absque dubio *Wolfgangus Lazius *** jam respexit, *nectaream* vocans Severi *elocutionem*. Similia alii habent, quotquot de Severo commemorant. Omnes enim rapit stylus nitens, perpetua jucunditate aspersus, & quod caput est supra ætatem cultus quidem, masculus tamen, gravis, nec sine emphasi, & decente Laconismo. Præclare dictum a Barthio *Libr. XII. advers. c. 18. Elegantia Romani sermonis vix quis-*

* *Præfat. in Tom. II. pag. 9.*

** *Præfat. in Vitam S. Martini.*

quisquam christianus auctor extat præferendus Severo Sulpitio, ut eum legens videatur stantis Reipublicæ Senatorem aliquem de divinis rebus differentem audire. Atque ista causa est, cur Hieronymus de Prato Presbyter Oratorii Neriani in præstanti, atque eruditissima Severi editione * queratur summopere, Auctorem suum ab acatholicis Hornio, Vorstio, Clerico editum manibus circumferri. Hoc scilicet, inquit, perpetuum fere a Gisellini ætate ad hanc diem Severi factum, ut ita loquar, fuit, ut impuris hæreticorum hominum commentariis impune infarciretur, & contaminaretur. Nimirum, ut quo elegantior, & suavior ejus dictio fluit, quoque avidius a multis, præcipue a junioribus lætatur, eo incautius imbibitur, eoque latius, citiusque serpere, & grassari pestis illa possit. Sic delicatioribus quibusdam epulis, & dulcioribus pomis, ficibus, moris, fragis mortiferum plerumque immisceri, inspergigue solet toxicum.

Sed quid Erasmo faciemus haud obscure obloquenti. Sic enim in Ciceroniano ait: Sulpitius mollior quidem, & jucundior, & dilucidior, & illaborator Hilario. Sed phrasis gallum fuisse declarat. Non deest pietas, sed abest vis, & gravitas, & est floridum dicendi genus magis, quam nervosum. Ut fatear, quod res est, Erasmo in re humaniori dijudicanda multum tribuere alias soleo, quod his ipsis libris non semel, atque iterum, sed sæpissime ostendi. Verum Ciceroniani ejus perexigua, ut debet, apud me existimatio est; ut in quo adversandi studio longius, quam decebat, proventus est. Ea autem animi comparatio non est apta ad judicandum his de rebus, apud illos præsertim, qui alias præcipiti consilio sunt, facileque ad extremum aliquod feruntur. Accedit istuc quoque, magnopere a nobis considerandum, propositum id loci Erasmo esse,

K 3

esse,

esse, uti deprimat alios quosvis auctores, quo certius scilicet obtineret, quod tum quidem apud animum suum constituerat. Denique cum hæc pro domo sua ille scriberet, nihil adhuc Severi præter vitam Martini lucem aspexerat. Itaque vel solam illi Sacram Historiam opponendo iterum convellitur sententia ejus.

Quamquam, quid vel in vita, quam dixi, offendere potest? in qua tam luculenti, tam admirabiles sunt loci, ut summam apud omnes habeant commendationem. *Phrasis gallum fuisse declarat?* Verum est: sed Romanum multo etiam magis ostendit. *Est floridum dicendi genus magis, quam nervosum?* Flores habere non nego, imo in virtutibus ejus hoc pono: verum nec fructibus destituitur, quodque res grandes, uti sunt, ob oculos statuit, affectusque tenerrimos habet, haud parum in eo roboris est, atque nervorum. *Non deest pietas, sed abest vis, & gravitas?* Atqui grandiloquentiam Gallorum ingeniis peculiarem illi tribuit Præfat. in Hilarium. Næ ego vehementer suspicor, hæc non tam stylum Severi, quam argumentum & narrationes respicere, quæ nasuto homini non minus displicuerint, ac postea nepoti ejus Clerico, & heterodoxis pluribus displicuerunt. Quidquid sit, Erasmus non moramur hac in parte, sui persæpe judicii hominem, atque in comparationibus præsertim, quales ibi instituit, alias haud satis felicem. Et longe plus nobis aliquid arrogamus in eo saltem, quod vidimus ipsi, & solicite perlegimus: aliis deferimus, maxime cum magno numero sunt, & pedibus eunt in eandem sententiam. Quot autem laudatores vita beati Martini habeat, infra suo loco non sine admiratione audiemus. Sed satis jam de Severi ratione scribendi. Brevissime omnia complexus est Ignat. Hyacinth. Amat de Graveson *Hist. Eccl. Libro II. pag. mihi 44. cum ejus opera, stylo* elegan-

eleganti, terso, polito, facili, & claro elaborata affirmat. Videri etiam possunt de Severi stylo Trivultientes ad annum 1714.

CAPUT III.

Elegantiora ex Scriptis Severi.

Claudius Fleurius * inter opera Severi præcipuum ponit Historiam Sacram, quæ in duobus libris Religionis seriem totam inde a mundi exordio ad quintum usque sæculum complectitur. Et consentiunt illi ex superioribus, quotquot de Severo accuratius aliquanto scripserunt. Sic Victor Giselinus non contentus *elegantissimum* hunc libellum vocare: „ Quo opusculo, inquit, non sane magno aliud „ an ullo unquam sæculo Reipublicæ Christianæ „ utilius, ac præstabilius editum sit, iis, quorum illud est iudicium, judicandum relinquo. De „ elegantiâ vero præstare ausim, & affirmare me „ posse confido, nulli idem omnium Scriptorum „ Ecclesiasticorum quidquam concedere: alia vero „ omnia, quæ in eodem genere versantur, tanto „ intervallo omnimodis superare, ut ne sint quidem „ ad hoc comparanda. Magnum est, quod dico, „ & fortasse plurimis incredibile, sed ejusmodi tamen, quod non tam dicenti mihi, quam testificanti pro me veritati creditum iri confidam, si quibus operæ pretium erit Orosium, Florum, Eutropium, aliosque Epitomatum auctores cum hoc nostro omnibus partibus contendere. Tribuit hoc annis, quibus Historiam eam scripserit Severas: *Confecta est in primo ætatis flore, cum flagrans eloquentiæ studium severa Turonensis contubernii disciplina nonnumquam restrinxisset.* Quæ tamen in re offendit vir egregius. Hodie enim extra dubium est,

K 4

est,

* *Histor. Eccles. Libr. XXI. §. 52.*

est, historiam ultimo loco, & diu ab obitu Martini scriptam ab eo esse. Franc. Vavassor in *Scripto contra Godellum* non dissentit ab eo hac in parte, quod *libros hos perelegantes & thesaurum*, quemdam vocaverat. Jo. Albertus Fabricius in *Biblioth. Latin.* ait: *Duo historiarum libri succincte & eleganter sequuntur res ab orbe condito ad consulatum usque Stiliconis.* Et de Prato ubi supra allegatis Dupini verbis: *Non habemus a quoquam Historiæ Breviarium ita concinne elaboratum, & tam eleganter scriptum, atque ejus est:* istuc subdit: *Hæc itaque doctissimi viri de præstantia & utilitate hujus operis verba.* Quæ sane quemlibet sacris studiis deditum persuadere debent, ut id sibi assidua, & attenta lectione familiare, & intimum esse velit, præsertim cum versetur circa argumentum eximium, scituque dignissimum. His ego laudibus nihil addo, nisi forte istuc præterire non licet, haud levis in rem nostram momenti: quod vir summus Bossuetus *Introduktionem illa sua in generalem Historiam* præ omnibus aliis Severum imitatus videtur. Neque valde timeo, ut deceptus sim in ea opinione.

Nilominus, ut hæc omnia concedamus, materiam illa potius & nitorem respiciunt, quam eloquentiam. Nempe hic Historicum se Severus præbet, non oratorem, & cum facile, breviter, ac venuste scribat, alibi tamen multo magis facundia viri elucet. Nam stylus pro argumenti ratione gracilior, ac tenuior est, moremque eorum omnium Auctor sequitur, qui historias in pugnum contrahunt, & quasi compendio tradunt. Frustra ab his expectes, ut vel assurgant, nisi raro, & obiter, vel ut alia expromant quam tenuiora solum ornamenta. Sane vita S. Martini eadem, qua Historia ejus, puritate scripta, sed modo magis ubere, & magis jucundo. Hieronymus de Prato * *Licet communi*

* *Epist. ad Joan. Franc. Musellum ad calcem Tom. I.*

muni fere, inquit, Scriptorum suffragio Historia seu chronicon in majori pretio habeatur, credo propter majorem elegantiam styli, & argumenti dignitatem: ego tamen secus senserim, & Libellis de S. Martino priores partes dederim, aliis de causis, quas non est hujus loci commemorare.

Et de hac proin vita nunc dicendum est, allatis pro more testimoniis variorum scriptorum: S. Paulinus *Ep.* 29. *alias* 10. Librum hunc Sulpitii *illustrem illum materia, & eloquentia* appellat. Et *Ep.* 11. *alias* 5. eandem laudans & Severum ipsum benedicit, qui historiam eam tam digno sermone, quam justo affectu percensuerit, & beatum vocat Martinum, qui dignum fide, & vita sua historicum meruerit. Alter Paulinus, qui Ambrosii vitam scripsit, *initio hanc Martini vitam luculento sermone contextam* ait. Hugo Archidiaconus Turonensis in *Dialogo quodam apud Mabillon.* * ait: *Martinum habere & ipsum virtutum suarum egregium interpretem Severum, qui illum usque ad extremos mundi cardines velut evangelicus testis diffuderit.* Hermannus Contractus in *chronic.* ad a. 397. Martini virtutes & vitam Sulpitium Severum *egregio edidisse stylo.* S. Uldaricus in *Collection. antiq. Consuetud. Cluniae. Monaster.* Martini vitam cum sit *luculento stylo composita, & de ipsius adeo virtutibus admiranda,* sanctos Patres noluisse, ut in ejus Depositione aliud Evangelium pronuntiaretur, vel alia Homilia, quam ipsa vita legeretur. Quod ipsum diu ante in Ecclesia Turonensi factum Gregorius ejus Antistes auctor est. Chronographus Saxo **: *Severus, ait, vitam Sancti Martini eleganter scribit.* B. Petrus Damiani *Serm.* jam laudato, *Actus ejus, inquit, & vitam ita suo nobilitavit eloquio, ut & historicam relationem plena*

* Tom. II. *Analektorum.*

** a Leibnizio editus ad annum 407.

veritate proponeret, & Rhetoricis legibus multipliciter insigniret. Guiberto Gemblacensi *Apolog. cit.* Sulpitius dicitur nosse iste insignis, & elegans studiorum, & operum beatissimi Martini conscriptor.

Ex Recentioribus Andreas Schottus in *Recens. Oper. S. Paulini de Severo: Vitam* ait, *S. Martini elegantissime descripsit.* Andreas Saussajus Severum doctrinæ ac sanctimonix laude perillustrem vocat, qui Sancti Martini res gestas nitido stylo conscripserit, atque non minus actibus expresse- rit, quam calamo *. Sed ipsum de eo opere Severum audire juvat **. Posthumianus ex Oriente redux virtutes Monachorum Severo, & familiaribus narraverat, quare vices ab eo rependi sibi petiit Martini virtutibus narrandis. Cui hic: „ Quid? tibi de Martino meo li-
„ ber ille non sufficit, quem ipse tu nosti me de il-
„ lius vita, atque virtutibus edidisse. Agnosco id
„ quidem, Posthumianus inquit, neque unquam
„ a dextera mea liber ille discedit; nam si agnoscis
„ (aperit librum, qui sub veste latebat) en ipsum!
„ hic mihi terra, & mari comes, hic in peregrina-
„ tione tota socius, & consolator fuit. Sed refe-
„ ram tibi plane, quo liber iste penetraverit, &
„ quanti nullus fere in orbe terrarum locus sit, ubi
„ non materia tam felicitis historiæ pervulgata te-
„ neatur. Primus eum Romanæ urbi vir studiosissi-
„ mus tui Paulinus invexit. Deinde cum tota cer-
„ ratim urbem raperetur, exultantes librariorum vidi,
„ quod nihil ab his quæstuosius haberetur; siqui-
„ dem nihil illo promptius, nihil carius vendere-
„ tur. Hic navigationis meæ cursus longe ante
„ prægressus. Cum ad Africam venissem, jam per
„ totam Carthaginem legebatur. Solus eum Cyre-
„ nensis Presbyter *** non habebat, sed me lar-
„ gente

* In *Martyrologio Gallicano ad IV. Calend. Septemb.*

** *Dialog. I.*

*** De quo ante sermo illi fuerat.

„ giente descripsit. Nam quid ego de Alexandria
 „ loquar, ubi pene omnibus magis, quam tibi no-
 „ tus est? hic Egyptum, Nitriam, Thebaidem, ac
 „ tota Memphitica regna transivit. Hunc ego in
 „ eremo a quodam sene legi vidi, cui cum me fa-
 „ miliarem tuum esse dixissem, & ab illo, &
 „ a multis fratribus hæc mihi injuncta legatio est,
 „ ut si unquam terras istas te incolumi contigis-
 „ sem, ea te supplere compellerem, quæ in illo
 „ tuo libro de virtutibus beati viri professus es
 „ præterisse. „

Quam grande elogium! tam late, tam cito dif-
 fusam celebritatem vel sæcularium scriptorum vix
 quisquam invenit. Quod si quis eam Martino ma-
 gis, quam Severo datam velit, næ ille parum
 æquus est æstimator rerum. Itaque ex Apologia
 Guiberti supra laudata illi respondendum. Ait enim
 hic, Severum equidem gemmam splendidissimam
 selegisse, verum non qualicunque metallo, nec ob-
 vio, ac parabili ornatu, sed purissimo auro inclu-
 dendam. Quo factum, ut sic polita, & circum-
 vestita illa in medio Ecclesiæ velut speculum quod-
 dam præferret, quo quid facere, quid fugere debe-
 remus, clarissime exhibeatur. *Splendidissimam gem-
 mam aureo luculenti sermonis circumdans eloquio tam
 præclarum tanque politum in medio Ecclesiæ speculari
 portabat, ut omnes boni æmulatores, qui sui solícite
 curam gerentes in veritate salvari cupiunt, in illo quid
 vitandum, quid appetendum, & unde placendum sit
 Deo, limpidissime perspiciant.*

Fuerunt adeo, qui beatissimi Martini meritis
 tribuerent, quod Scriptorem vitæ tantum, tanque
 illustrem sortitus esset. Sic Sanctus Odo Clunia-
 cens * ait: *Deum, qui Sanctum Martinum usque-*
qua-

* *Serm. IV. de combustione Basilicæ B. Martini Tom.
 XVII. Biblioth. PP.*

quaque mirificet, etiam hoc glorificare, quod omnes, qui de illo, & prosaice, & metricæ, sive etiam rhythmicè scripserint, & sancti & periti fuisse, & dulci admodum, & congruo eloquio noscantur, quæ protulerint, edidisse.

Luculentius *Commendatio S. Martini in Codic. Veneto apud Hieronymum de Prato Præfat. pag. LI.* quæ ita loquitur. „ Hujus Sancti viri conversatio „ vita, & mors elegantissimo stylo, non parvo ejus- „ dem sancti miraculo, descriptæ apparent: in qui- „ bus inveniuntur multi diversis temporibus labo- „ rasse, præsertim Severus Sulpitius, qui sanctam „ historiam magno sententiarum, verborumque „ ordine profecutus est. Cujus tanta patet facun- „ dia sermonis, quod audeo dicere, nullum anti- „ quorum Scriptorum sibi in hujusmodi superio- „ rem fore; cum usque hodie nulla alicujus Sancti „ vel Apostoli, Martyris, Confessoris, aut Virgi- „ nis gesta tanta dicendi arte appareant exarata. „ Quod quidem magno mylterio carere non arbi- „ tror, ut sicut ejus opera & virtutes eximia ve- „ neratione fuerunt dignæ, ita pari studio notaren- „ tur, & ut meritis vitæ Deo placuisse creditur, „ ita etiam, si non esset operum excellentia, om- „ nibus solum placere dictaminis facundia proba- „ rentur. „

Post *Librum de vita B. Martini* aliquid etiam de *Dialogis* dicendum est, aureolis scilicet *Libris*, ut eos appellat Gaspar Barthius *. Fateor mihi præter morem arriserunt, multumque superarunt expectationem, quod post illum Minutii Felicis non putarem alium aliquem valde mihi placiturum. Habet sane jucunditatem in hoc genere Severus, & leporem haud facile imitabilem, optandumque summo- pere esset, omnes Patrum Dialogos, qui sunt plu-
rimi,

* Libro III. *Adversarior. cap. 5.*

rimi, hac ratione conscriptos esse. Tanta arte & concinnitate utitur, ut lassari quis nequeat legendo præsertim Dialogum primum, ubi Posthumianus singularia quædam de Monachis Orientalibus refert.

Sed quid jam de *Epistolis* Severi sentiendum? Ego his scribendis non minus, ac ceteris excelluisse eum existimo. Equidem paucae nobis supersunt, quæ tamen sufficiant, uti ex ungue leonem agnoscamus. Quantus lepor est in illa ad Bassulam Socrum suam? „ Si parentes, inquit, vocari in jus
„ liceret, te plane expilationis, furtique ream ad
„ Prætoris tribunal iusto dolore traheremus. Quid
„ enim non conquerar, quam a te patior injuriam?
„ nullam mihi domi chartulam, nullum libellum,
„ nullam epistolam reliquisti: ita furaris omnia, ita
„ universa divulgas. Si quid ad amicum familiari-
„ ter scripsi, si quid forte, dum ludimus, quod
„ velim tamen occultum esse, dictavi, omnia ad te
„ prius pene, quam fuerint scripta, aut dictata, per-
„ veniunt. Nimirum obæratos habes notarios
„ meos, per quos tibi nostræ ineptiæ publicantur.
„ Nec tamen adversum eos possum moveri, si tibi
„ parent, qui in jus nostrum ex tua potissimum li-
„ beralitate venerunt, seque adhuc tuos magis,
„ quam meos esse meminerunt. Tu sola es rea, tu
„ sola culpabilis, quæ & mihi infidiaris, & illos
„ fraude circumvenis, ut sine delectu nullo familiari-
„ ter scripta, aut negligenter emissa, illucubrata
„ tibi penitus, atque impolita tradantur. Nam, ut
„ de reliquis taceam, rogo, quemadmodum tam
„ cito ad te epistola illa potuit pervenire, quam
„ nuper ad Aurelium Diaconum scripseramus? ego
„ enim Tolosæ positus, tu Treveris constituta, &
„ tam longe a patria filio inquietante divulsa, qua
„ tandem familiarem illam epistolam occasione fu-
„ rata es? namque accepi literas tuas, quibus scri-
„ bis, in eadem Epistola, qua de obitu Domini Mar-

„ tini

„tini fecerim mentionem, ipsum beati viri transi-
 „tum exponere debuisse. Quasi vero ego illam
 „epistolam aut legendam alii præterquam ipsi, ad
 „quem missa videtur, ediderim, aut ego tanto sim
 „operi destinatus, ut omnia, quæ de Martino co-
 „gnosci oportet, me potissimum scribente note-
 „scant? Itaque si quæ de obitu Sancti Episcopi au-
 „dire desideras, ab illis potius, qui interfuere, co-
 „gnosce: ego tibi statui nihil scribere, ne ubique
 „me publices. Tamen si das fidem, nulli te esse
 „lecturam, paucis tuæ satisfaciam voluntati, ita-
 „que præstabo te his, quæ mihi sunt comperta,
 „participem. „ Quam urbana, quam familiaris
 ratio cum pia, & sanguine conjuncta foemina jo-
 candi! Da mihi alium quemcunque profanorum,
 qui id præstet facilius, & amcenius exequatur. Idem
 lepos Severi ex aliis quoque locis elucet. Sed mul-
 to magis tenerrima quædam pietas, & Ascesis ge-
 nuina, cujus utinam jactura in tot Epistolis facta
 aliquando sarciretur! Ait *Gennadius L. c. Epistolas*
ad amorem Dei, & contemptum mundi exhortatorias
scripsit sorori suæ multas, quæ & notæ sunt. Scri-
*psit & ad Paulinum prædictum duas **. Porro desi-
 derium earum, quæ ad Paulinum datæ sunt, accen-
 ditur unica illa, quam in manibus habemus; &
 de qua Hieronymus de Prato ita magnifice loqui-
 tur **: *Una hujus generis, & quidem perbrevis, quæ*
ad Paulinum scripta adhuc superest, satis declarat,
quam

* Inde autem meo judicio error duarum tantum ad Paulinum Epistolarum irrepsit, quod notæ numerales mutatae sint. Cum enim Paulini *tredecim ad Severum* habeamus hodieque, & plures perierint, quomodo duas tantum Severus ad Paulinum dederit? Non credo, tam inhumanum fuisse, ut sui amantissimo, ne dicam sancto, & summo viro nihil rescriberet.

** In *Prolegomen. Tom. I. pag. 49.*

quàm & ceteræ dignæ essent, quæ cedro linirentur. Est autem jocus ingeniosus de coquo valde parabili, ad quem serio Paulinus respondet *epist. 23. alias 3. & 4.*

Pauculæ quædam prioræ sæculo inventæ atque ab interitu vindicatæ sunt; quas Vorstius, & deinceps alii ediderunt. Ex quibus ut aliquæ certo tribui Sulpitio debent, sic quædam satis incertæ censentur, quædam nulla probabili causa eidem adscriptæ, diversos habent auctores, saltem nostro plane sunt abjudicandæ. I. & II. ex his *ad Sororem*, plenæ sunt probitatis, elegantiae, & saluberrimorum documentorum.

Quare commodiori aliqua significatione accipiendum, quando Lucas Dacherius* in *Epistolæ Sulpitii Severi recens repertis laudat styli decorem, & sententiarum gravitatem*. Quasi de iis diceret, quæ vere ejus essent, non nudum solummodo nomen præferrent.

Præter jam laudatos Severi eloquentiæ meminerunt Daniel Guilielmus Mollerus in *Dissert. de Sulpitio Severo*: Christianus Breithaupt *Dissert. de stylo Severi*. Item Editores varii: Drusius, Mercerus, Hornius, Gezelius, Hofmeisterus, Weinichius, Schotanus. Adde, si lubet, Dupinum in *Biblioth. nova*: Tillemontium in *Monument. Eccl. Benedictinos in Literaria Galliae Historia*: Clericum in *Biblioth. Selecta*: Ceillierum in *Histor. Auct. Eccles. &c.*



DIS-

* *Præfat. in Tom. V. Spicilegii.*

„tini fecerim mentionem, ipsum beati viri transi-
 „tum exponere debuisse. Quasi vero ego illam
 „epistolam aut legendam alii præterquam ipsi, ad
 „quem missa videtur, ediderim, aut ego tanto sim
 „operi destinatus, ut omnia, quæ de Martino co-
 „gnosci oportet, me potissimum scribente note-
 „scant? Itaque si quæ de obitu Sancti Episcopi au-
 „dire desideras, ab illis potius, qui interfuere, co-
 „gnosce: ego tibi statui nihil scribere, ne ubique
 „me publices. Tamen si das fidem, nulli te esse
 „lecturam, paucis tuæ satisfaciam voluntati, ita-
 „que præstabo te his, quæ mihi sunt comperta,
 „participem. „ Quam urbana, quam familiaris
 ratio cum pia, & sanguine conjuncta foemina jo-
 candi! Da mihi alium quemcunque profanorum,
 qui id præstet facilius, & amœnitus exequatur. Idem
 lepos Severi ex aliis quoque locis elucet. Sed mul-
 to magis tenerrima quædam pietas, & Ascesis ge-
 nuina, cujus utinam jactura in tot Epistolis facta
 aliquando sarciretur! Ait *Gennadius l. c. Epistolas*
ad amorem Dei, & contemptum mundi exhortatorias
scripsit sorori suæ multas, quæ & notæ sunt. Scri-
*psit & ad Paulinum prædictum duas **. Porro desi-
 derium earum, quæ ad Paulinum datæ sunt, accen-
 ditur unica illa, quam in manibus habemus; &
 de qua Hieronymus de Prato ita magnifice loqui-
 tur **: *Una hujus generis, & quidem perbrevis, quæ*
ad Paulinum scripta adhuc supereſt, ſatis declarat,
quædam

* Inde autem meo judicio error duarum tantum ad Paulinum Epistolarum irrepsit, quod notæ numerales mutatae sint. Cum enim Paulini tredecim ad Severum habeamus hodieque, & plures perierint, quomodo duas tantum Severus ad Paulinum dederit? Non credo, tam inhumanum fuisse, ut sui amantissimo, ne dicam sancto, & summo viro nihil rescriberet.

** In *Prolegomen. Tom. I. pag. 49.*

quàm & ceteræ dignæ essent, quæ cedro linirentur. Est autem jocus ingeniolus de coquo valde parabili, ad quem serio Paulinus respondet *epist. 23. alias 3. & 4.*

Pauculæ quædam priore sæculo inventæ atque ab interitu vindicatæ sunt; quas Vorstius, & deinceps alii ediderunt. Ex quibus ut aliquæ certo tribui Sulpitio debent, sic quædam fatis incertæ censentur, quædam nulla probabili causa eidem adscriptæ, diversos habent auctores, saltem nostro plane sunt abjudicandæ. I. & II. ex his *ad Sororem*, plenæ sunt probitatis, elegantiae, & saluberrimorum documentorum.

Quare commodiori aliqua significatione accipiendum, quando Lucas Dacherius* in *Epistolis Sulpitii Severi* recens repertis laudat *styli decorem, & sententiarum gravitatem*. Quasi de iis diceret, quæ vere ejus essent, non nudum solummodo nomen præferrent.

Præter jam laudatos Severi eloquentiæ meminerunt Daniel Guilielmus Mollerus in *Differt. de Sulpitio Severo*: Christianus Breithaupt *Differt. de stylo Severi*. Item Editores varii: Drusius, Mercerus, Hornius, Gezelius, Hofmeisterus, Weinichius, Schotanus. Adde, si lubet, Dupinum in *Biblioth. nova*: Tillemontium in *Monument. Eccl.* Benedictinos in *Literaria Galliae Historia*: Clericum in *Biblioth. Selecta*: Ceillierum in *Histor. Auct. Eccles. &c.*



DIS.

* *Præfat. in Tom. V. Spicilegii.*

DISSERTATIO VII.

De Eloquentia S. Hieronymi.

CAPUT I.

Elogium hujus eloquentiæ.

Equidem celeberrimi hujus Doctoris sola vitæ ratio, si scripta cetera periissent omnia, & testimonia veterum alia nulla extarent, de eloquentia ejus aperte poterat pronuntiare. Vel ex hac sola conficitur, illum omnibus ad eloquentiam præfidiis ita abundasse, ut nemo alius magis. Ingenio erat ardenti, excelso, quodque laborem non ferret tantum, sed accerferet ultro, ac provocaret. Institutionem nactus a præstantissimis Præceptoribus, linguæ patriæ latinam insuper, & græcam puer adjecit, ac deinceps ambarum munditiis omnibus penitissime imbutus est. Accessit industria, & exercitatio quotidiana, qua stylum ita excoluit, ut adolescentulus etiamnum inter oratorum subsellia causas declamaret, & ad vera certamina fictis identidem litibus se exerceret. Quod est autem multo etiam magis mirandum, nullum interea doctrinæ genus reliquit intactum. Nemo alicujus nominis sive Rhetor, sive Poëta, sive Philosophus fuit, quem Hieronymus non evolvisset. Id quod cuilibet, qui vel parum in gestis ab eo rebus versatus sit, non potest non compertissimum esse. Certe cum vel ad solitariam vitam abiret, libros secum comites habere voluit. Cum ante annos plurimos, inquit*, domo, parentibus, sorore, cognatis, & quod his difficilior est, consuetudine lautioris cibi, propter cælorum mæregna castrassem, & Jerosolymam militaturus pergerem, bibliotheca, quam mihi Romæ summo studio, ac labo-

* *Epist. 22. ad Eustechium.*

labore confeceram, carere omnino non poteram. Itaque miser ego lecturus Tullium jejunabam. Post notum crebras vigilias, post lacrimas, quas mihi præteritorum recordatio peccatorum ex imis visceribus eruebat, Plautus sumebatur in manus. Ubi dein fuse somnium narrat, in quo gravissime territus est, & castigatus, quod non tam Christianus, quam Ciceronianus esset, & cor suum nullibi magis, quam inter libros haberet. Ecce eloquentiæ studium quam acre, quam pertinax, quam perpetuum! A quo etsi postmodum cessavit, illam tamen tam alte jam imbiberat, ut in succum veluti, & sanguinem Auctorum verba convertisse videri posset. Cum enim *Librum III. in Paulinam ad Galatas Epistolam* ordiretur, ita de se ingenue in Proœmio est confessus. *Loquar? sed omnem sermonis elegantiam, & latini eloquii venustatem stridor lectionis hebraicæ sordidavit. Nostis enim & ipsi, quod plus quam quindecim anni sunt, ex quo in manus meas nunquam Tullius, nunquam Maro, nunquam gentiliū literarum quilibet auctor ascendit: & si quid forte, inde dum loquimur, obrepit, quasi antiqui per nebulam somnii recordamur. Quid autem profecerim ex linguæ illius insatigabili studio, aliorum judicio derelinquo: ego quid in mea amiserim, scio.* Id quod mihi præcipuum est argumentum improbi ejus laboris, quem in perdiscenda, excolendaque humanitate olim Hieronymus collocavit. Sic autem ad eloquentiam comparatus, ad studia quoque graviora adjecit animum. Ut enim sacras Literas perdiceret, non modo Gallias, sed Græciæ quoque, & Asiæ, imo Egypti provincias varias pervagatus est. Ubi summos in eo genere Magistros cum audivisset, denique ab Hebræis quoque hebraice, syriace, chaldaice voluit edoceri. Quo necdum contentus, omnes scripturæ Interpretes, cujusunque idiomatis illi forent, legit, & ab ea contentione, nec summa in senectute unquam remisit.

misit. Severus Sulpitius *Dialogo I.* sic nobis ex Posthumiani ore laboriosissimum virum describit. *Totus semper in lectione, totus in libris est. Non die, non nocte requiescit. Aut legit aliquid semper, aut scribit.* Quibus utique rebus tantum sibi divinarum rerum cognitionem, famam tantam comparavit, ut in obscurioribus divini verbi quaestionibus SS. Damasus Papa, Augustinus, Paulinus, Chromatius, Alipius item, Heliodorus, Theophilus Alexandrinus, totiusque orbis doctissimi Praesules ad unum hunc Presbyterum confugerent. Legebatur ubique Hieronymus; quod summam doctrinam, & parem doctrinae eloquentiam haberet. Itaque ad specum illam Bethlehemiticam haud secus, atque ad commune oraculum perpetui concursus fiebant. Epistolae, & nuntii huc ex Africa adeo, & ultima Germania, ne dicam Galliis, Hispania, atque Italia commeabant. Nobiles Matronae, virique Principes, & quisquis vel perfectiorem vitam animo destinaret, vel divinis Literis afficeretur, Hieronymum consulebat: Ut adeo haud abs re dictum sit, plures non tam locorum sacrorum religione, quam desiderio visendi viri hujus in Palaestinam pertractos. Dicamus rem iisdem verbis, quae in simili fere causa ipse alicubi adhibuit: ad illum tanto & doctrinae, & eloquentiae fonte manantem de ultimis terris Nobiles venisse, & quos ad sui contemplationem cunctae Servatoris non traxerant, unius hominis famam perduxisse. Habuit ergo ista aetas inauditum omnibus saeculis, celebrandumque miraculum, ut specum Dominicam ingressi aliud extra specum quaerent *. Sed nec quisquam reversus ab eo est, quin vel institutione ejus doctior, vel exemplo, & facundia sanctior evasisset.

Scri-

* *Epist. 103. nunc 53. ad Paulinum loquens de Tiro Livio.*

Scripta ergo, quæ de eo plurima, & gravissima habemus, sunt hominis semper occupati, qui, ut exercitia pietatis fileamus, pene obrutus negotiis, quidquid mente conceperat, raro scribere potuit, rarius etiam, quæ scripserat, perpolire. Scimus ex ejusdem confessione, quod quam plurima, etiam declamatoria imparatus, & urgentibus responsum nuntiis, amanuensi velut ex stapede dictaret*. Quæ res meo quidem judicio divinam viri eloquentiam demonstrat; quod nihilominus vel his ipsis tanta gratia, is nervus, & splendor orationis inest, ut quisquis legerit, morose, atque ad lucernam elaboratum putet. Exemplo sint non Epistolæ, non tractatus, vel loci communes, ubi jactare se etiam ex tempore oratorum facundia potest, sed ipsæ adeo nudæ interpretationes Scripturarum, ubi facilitatem tantam, ac velocitatem ostendit, ut tridui labore *Ecclesiasten*, *Proverbia*, *Cantica canticorum* ex hebraico, *librum Tobiae* vero uno die ex chaldaico latina redderet, ea quidem ratione, ut ubi eloquentiæ nihil licebat, nihil tamen vel verbulo in eam peccatum sit.

Non ergo mirum, si ita Ecclesiam literis suis juvit, si rebus ejus omnibus adfuit, si novam illi veluti lucem eruditionis accendit: si denique agmina hæreticorum stitit solus, atque obtrivit. Eo vivente nulla novitas erupit, quam non ille continuo refelleret. Nunquam Religio & Pietas tantum ducem habuerunt, quem hostibus objicerent; quoniam hi umbrar: & nomen Viri jam formidabant. Deo laudes sint immortales, quod scripta

L 2

ejus

* Vide Præfat. paulo ante laudatam. Epistolam de vitando suspecto contubernio, & ad Julianum: imo ipsum *Librum I. contra Jovinianum ante medium*, ubi veteris Instrumenti locos addensat. Quanta vero distandi difficultas sit, nemo melius docet ipsomet Hieronymo. *Epist. 21. alias 146.*

ejus pleraque habemus. In his enim velut armamentarium quoddam nobis relictum est adversus improbitatem, quod usque in fines sæculorum consistet, telaque pugnantibus, & gladios & galeas ministrabit.

Hæc, quæ partim ex certis atque coævis testibus, partim ex ipsiusmet Hieronymi Opusculis quasi in cumulum coniecimus, luculentissimum sunt eloquentiæ ejus, ac literarum elogium. Sed nempe iis, qui simplici, ut jacet, narrationi minus tribuunt, summos quosque homines sisto, quorum testimoniis fane nemo prudens poterit refragari.

S. AUGUSTINUS cum alias, tum maxime *Libr. I. contra Julian. c. 7.* ita de Hieronymo: *S. Hieronymus Presbyter*, ait, *græco, & latino, insuper & hebræo eruditus eloquio ex occidentali ad orientalem transiens Ecclesiam, in locis sanctis atque in literis sacris usque ad decrepitam vixit ætatem. Cujus nobis eloquium ab oriente usque ad occidentem inslar lampadis resplenduit. Hic omnes, vel pene omnes, qui ante illum ex utraque parte orbis de doctrina Ecclesiastica scripserunt, legerat. Ita Augustinus, qui uti alias candidissimus, ita nihil minus quam Hieronymi, cum quo haud leves ipsi controversiæ intercesserant, partiarius existimandus est.*

PAULINUS S. Ambrosii Notarius, qui & res ejus gestas ad Augustinum perscripsit *: *Beatum virum Hieronymum muram Ecclesiarum esse dicit, & eloquentiæ fontem.*

SULPITIUS SEVERUS *Dialogo I.* ex persona Posthumiani ait: *Vir præter fidei meritum, dotemque virtutum non solum latinis, atque græcis, sed hebræis etiam ita literis institutus est, ut se illi in omni scientia nemo audeat comparare. Miror autem si non & vobis*

* In vita S. Ambrosii, initio.

bis per multa, quæ scripsit, opera compertus est, cum per totum orbem legatur.

S. PROSPER celebri, quod in *Ingratos* panxit, *Carminē* ita Hieronymum celebrat.

Tunc & Bethlæi præclari nominis hospes
Hebræo simul, & græco, latioque venustus
Eloquio, morum exemplum, mundique magister
Hieronymus, libris valde excellentibus hostem
Dissecuit, noscique dedit, quo turbine veram
Vellent exortæ lucem obscurare tenebræ.

JOANNES CASSIANUS *Præfat. ad Libr. de Cænobiorum Institutis* vocat Hieronymum & *vita nobilem, & sermone, scientiaque præclarum &c. Libr. vero VII. de Incarn. cap. 26. Catholicorum Magistrum* dicit, addens scripta ejus per universum mundum quasi divinas lampades rutilare.

CLAUDIANO MAMERTO *Libr. II. de statu anim. cap. 9.* Hieronymus est *potissimus Tractatorum.*

IDACIUS LEMICENSIS a patria dictus Aquilaviensis in Gallæcia Episcopus, sacris historicis notissimus in *Chronico* ad annum XXI. Honorii ita habet: *Hieronymus præcipuus in omnibus, elementorum quoque peritissimus hebræorum, in lege domini, quod scriptum est, diurna, nocturnaue meditatione continuus, studia operis sui reliquit innumera. Ad ultimum Pelagianorum sectam cum ejusdem auctore adamantino veritatis malleo contrivit. Adversum hos, & adversum alios hæreticos extant ejus probatissima monumenta.*

MARCELLINUS COMES in *chronico* ad annum CCCXCII. Hieronymum ait Catholicis quidem esse *inexpugnabilem Ecclesiæ turrin*: hæreticis autem omnibus *infatigabilem hostem tam proposito vitæ suæ, quam librorum a se editorum assertionibus depugnantem.*

S. ENNODIUS Episcopus Ticinensis *Epist. ad Faustum*, Hieronymum non obscure ipsi doctissimo, eloquentissimoque præceptori ejus Gregorio Nazianzeno videtur præponere.

CASSIODORUS multus in Hieronymi laudibus *Libr. 1. de Institut. div. Lit. c. 21.* eum vocat, *Latinae linguae dilatatorem eximium, qui nos facundiae suae multa ubertate satiarit*: moxque inter alia, Bethlehem, in terra illa miraculorum, ad instar solis fuisse, quo & ab oriente ejus nobis eloquentia resplenderet.

JONAS Episcopus AURELIANENSIS in *Opere de cult. Imag. Libr. III.* cum sancti doctoris auctoritatem pro se esset allegaturus, ita præfatur: *Hieronymus sacrae legis interpret, & ut ita dicam bibliotheca matris Ecclesiae.*

RATRAMNUS CORBEIENSIS de *Nativ. Christi cap. 10.* apud Dacherium *Spicileg. Tom. I. Hieronymus*, inquit, *sacrae legis interpret omnium peritissimus disciplinarum, fidei turris inconcussa, sapientiae lampade splendidissimus, eloquio facundissimus, latini, graeci, hebraeique sermonis doctissimus.*

LUPO SERVATO *Libr. de tribus quaestionib. dicitur Hieronymus divina & saculari doctrina præcipuus; & velut quidam parens*:

S. BERNARDO *Serm. 2. de verb. Apost. Non est regnum Dei esca. Tam Eloquentiae quam sapientiae dotibus approbatus*: denique

JOANNI SARISBERIENSI *Polycratici Libr. II. c. 27.* Doctor ille Doctorum, cui se affirmat in sacratio literarum vix aliquem audere comparare.

Atque hæc sunt virorum ab omni retro antiquitate celeberrimorum de Hieronymo testimonia, qui de ea, quam quærimus, hominis eloquentia præclarum sane judicium tulerunt. Ipse adeo Rufinus, antequam cum illo collideretur, eloquentiam viri summo opere extulit, ac *dissertissimum & elo-*
quen-

quentissimum in suis opusculis * prædicavit. Nunc propius ad nostra etiam tempora accedamus.

PETRUS PAULUS VERGERIUS, quem Trithe-
mius virum in divinis scripturis studiosum, in sæcu-
laribus literis eruditissimum, Philosophum, & Rhe-
torem celeberrimum, græco, & latino sermone ad
perfectum instructum vocat, qui scripserit ingenii ex-
cellentis quædam præclara opuscula, quibus memoriam
sui posteris reliquerit: hic, inquam, Orat. de Laudib.

S. Hieronymi affirmat, eum cunctarum bonarum
artium cumulum non perfunctorie, sed ad sum-
mum in se collegisse, ejusque vitam totius sancti-
tatis exemplum, eloquentiæ stuporem, doctrinæ
miraculum extitisse. Et infra fusius, & enuclea-
tius: „Eloquentiam certe jam ejus, ait, laudare
„tentarem. Nisi ipse se multo melius, quam a
„me fieri possit, elegantia sua legentibus commen-
„daret: ad quam digne prædicandam ejus ipsius
„eloquentia opus esset. Nec me deterret, quod
„damnatus fuerit ejus studii aliquando Hierony-
„mus, cum extatica visione tractus ad judicis
„æterni tribunal, & quinam esset interrogatus,
„pro Christiani nomine, quod inter metum, tre-
„pidationemque profitebatur, Ciceroniani sibi no-
„men objici audivit; neque enim res ipsa damna-
„ta est, sed fortassis ejus studium vehementius,
„sine qua profecto vix sacræ Literæ, certe non
„tanta cum voluptate legerentur. „

Vergerio alium jungamus hac in parte pror-
sus diversum, præduræ in alios censuræ, elatum
supercilio, & mordendi impetigine nec Sanctis,
nec Christo ipsi parcentem, LAURENTIUM VAL-
LAM scilicet. Hic in foro humanitatis versatissi-
mus, ac scrupulosus etiam munditiarum omnium
sectator Præfat. ad Libr. IV. Elegantiarum suarum

L 4

ita

ita lectorem interrogat : *Quid Hieronymo ipso eloquentius ? quid magis oratorium ? quid, licet ille sæpe dissimulare velit, bene dicendi sollicitius, studiosius, observantius ?*

JOANNES FRANCISC. PICUS, MIRANDULÆ COMES *Libr. I. de stud. div. & hum. Philosoph. c. 7.* In Hieronymo, ait, quantum facundiæ fuerit, qui ejus lucubrationes non legit, minime sciet.

JOAN. BAPT. PLATINA In Innocentio I. Hieronymus Presbyter, inquit, in Bethlehem habitans, ingenio, ac facundia Christi fidem mirum in modum auxit, quod etiam ejus scripta declarant.

JAC. PHILIPPUS BERGOMENSIS in *Chronico ad annum 429.* inter alia eloquentissimum, atque discretissimum virum dicit.

POLYDORUS VIRGILIUS de rerum inventoribus *Libr. VII. cap. 3.* Romæ, ait, Græcis; latinisque literis egregie institutum &c. in de rebus divinis scribendi onere omnes nervos ætatis; industriæ doctrinæque suæ contendisse.

ERASMUS *Libr. V. Epist. 19.* præter alia, cum virum cœlestem vocasset, omnium Christianorum sine controversia longe tum doctissimum, tum facundissimum : *Quæ phrasis ! exclamat, quod dicendi artificium, quo non Christianos modo omnes longo post se intervallo reliquit, verum etiam cum ipso Cicerone certare videtur ! Ego certe, nisi me sanctissimi viri fallit amor, cum Hieronymianam orationem cum Ciceroniana confero, videor mihi nescio quid in ipso eloquentiæ principe desiderare.*

MELCHIOR CANUS Theologus & orator summus *Libr. II. de Locis Theol. c. 14.* Divum Hieronymum verborum copia, eloquentia sæculari, trium linguarum peritia, rerum multijuga cognitione abunde instructum vocat.

JOANNES ANGELUS Episcopus Ciceſtrenſis *Præfat. in histor. Eccles. græc.* „ Hieronymum, inquit, „ po-

„ ponamus in medio , cuius tanta fuit in scriben-
„ do facultas , ut omnes prope eloquentiæ nume-
„ ros expleverit. Quando in aciem cum hæreti-
„ cis prodit , nemo pugnacior , aut qui plus ha-
„ beat lacertorum. Quando respondet obtrecta-
„ toribus , nemo fervidior , nemo acrior. Quan-
„ do res gestas narrat , nemo elegantior. Quando
„ funebrem orationem instituit , nemo ad conso-
„ landum aptior , ad laudandum copiosior. Quan-
„ do familiariter cum amicis , & necessariis per
„ literas colloquitur , nemo suavior , nemo com-
„ ptior. Mirum est videre , quo pacto in tota ora-
„ tione paria paribus , contraria relata contrariis ,
„ jam verba duplicata , jam iterata , jam breviter
„ commutata sententias perpulcre illuminent. „

Venerabilis PETRUS CANISIUS, vir quantæ le-
ctionis , tanta in scribendo gravitate , ac tempe-
rantia, *Præfat.* ad suam *Epistolarum Hieronymi edi-
tionem* , Academix Dilinganæ inscriptam , sic lo-
quitur de sancto Doctore: „ Sane auctorem com-
„ mendare nec disertissimus queat fatis. Tam spe-
„ ctata Hieronymi fuit , & est eritque semper laus,
„ ac dignitas in Ecclesia Dei , qui sublimem , ac
„ prope inimitabilem doctrinam...cum pari eloquen-
„ tia , sacra studia cum profanis , variasque lin-
„ guas , & artes ita conjunxit , ut veterum vix
„ alius quisquam fecit felicius , admirabiliusque.
„ Loquor autem de solis latinis Patribus , Cypria-
„ no , Hilario , Ambrosio , Augustino , in quorum
„ monumentis apostolicum quidem spiritum , &
„ vere piam doctrinam , doctamque juxta pietatem
„ relucere nullus inficiatur ; Sed parem illorum
„ eloquentiam haud pauci desiderarunt. „ Dein
in Græciam tantisper digressus , cum dixisset eru-
ditam certe , & eloquentiæ studiis mirum in mo-
dum excultam , totiusque orbis Magistram , ut
idcirco vel sola , vel præcipua omnes omnium

gentium literas soleat fastidire, ita præclare sub-
 jungit: „ Quo magis admirari par est, quod hæc
 „ ipsa Scriptorum alioqui Latinorum contemptrix
 „ olim tanti nostrum fecerit Hieronymum, ut ejus
 „ quamvis hominis Dalmatæ commentarios non
 „ legerit modo, & suo approbarit calculo: verum
 „ etiam in suam linguam transferendos curarit. „

SIXTUS SENENSIS, ut est vir summo judicio,
 eruditione & facundia præditus, in *Biblioth. sancta*
 hæc de Hieronymi eloquentia habet: *Vir fuit in*
omni doctrinarum genere absolutissimus; quippe qui
splendore sermonis, & eloquentiæ viribus, in quibus
*sub Donato Grammatico, & Victorino Rhetore, **
clarissimis viris profecit, omnes latinæ Ecclesiæ Scri-
ptores multo post se intervallo reliquit &c.

MARIANUS VICTORIUS Episcopus Amerinus,
 quo nemo ante majorem in legendo, restituendo-
 que Hieronymo operam posuit, in *Vita operibus*
 præfixa sic de Hieronymi eloquentia, & scriben-
 di dotibus pronuntiat: „ Vir, cui nec Græci, nec
 „ Latini, quem comparent, habeant aliquem.
 „ In eum enim doctrinæ omnes, & virtutes ita
 „ cumulate se contulerunt, ut post eum, quem
 „ in aliqua re Gentilibus invidet, Ecclesia nemi-
 „ nem inveniat. Nam etsi multos in Ecclesia præ-
 „ stantissimos, ac doctissimos habuerimus viros,
 „ neminem tamen, qui tot, ac tanta in omni
 „ doctrinarum genere sciverit, & qui tot lingua-
 „ rum habuerit cognitionem, inveniemus. Quod
 „ si in aliqua re ipse ab aliquo vincatur, semper
 „ tamen ei supersint alia, in quibus tandem illi
 „ præstans Hieronymus victor abscedat. „

LEO

* Mirum non est lapsos priores, Victorinum Hierony-
 mi præceptorem faciendo; illud capi vix potest,
 post detectum semel errorem, etiam Recentiores
 eundem rursus erravisse.

LEO CASTRIUS in *Prolegom. Commentar. in Esaiam* eundem *fulgentissimum Ecclesiæ sydus* vocat, eo quod, quantum sol aliis planetis, tantum Hieronymus reliquis Patribus, & Ecclesiæ Doctõibus præluceat, atque præponderet.

DANIEL HEINSIUS Vir doctissimus, adversæ tamen Religionis, *Orat. III.* ita exclamat: „ Nam
 „ quo tandem modo, aut quibus ego verbis tuam
 „ maxime Hieronymæ ingentem simul pietatem,
 „ ac facundiam describam? Quonam modo tot
 „ linguarum simul, & totius prope antiquitatis
 „ ac philosophiæ admirabilem peritiam? Quomo-
 „ do heroicum illum in scribendo, & cœlestem
 „ ardorem tuum, quo imbelles hæreticorum ag-
 „ men, non secus, quam mucrone quodam stri-
 „ cto persecutus es, ac profligasti? Quæ omnia
 „ profanos etiam in admirationem rapiant. Jam
 „ qua ego voluptate vitam tuam meditor, ac co-
 „ gito: quam tot locis nobis descripsisti? qui re-
 „ licto urbis Romanæ splendore, relictis omnibus
 „ amicis, ac propinquis, repudiata omni digni-
 „ tate, Bethlehemum es profectus, ut speluncam il-
 „ lam, in qua vita nostra nata est, incoleres:
 „ casam illam, in qua puellarum sanctissima, &
 „ post partum adhuc virgo, parentem suum pe-
 „ perit, omnium tuarum cogitationum, ac vigi-
 „ liarum receptaculum haberes. Quas tu ibi sæpe
 „ lacrimas divine senex, quæ suspiria, quas vo-
 „ ces sudisti? quanto gaudio, qua voluptate il-
 „ lud solum pressisti, cuius, sicut ipse loqui soles,
 „ totum salutis nostræ vernaculum negotium est?
 „ quanta hilaritate domini ac dei tui patriam, re-
 „ licta tua, incoluisti, ut in civibus illius esses,
 „ quem in cœlos sequebaris? Ullamne ego oble-
 „ ctationem cum hac esse putem conferendam:
 „ & ne ullum aut honorem ego, aut lucrum
 „ cum his meditationibus, ac curis componam? „

Quæ

Quæ ego ultimo loco posita, etsi pertinere non videntur ad eloquentiam, ideo adjeci, uti appareret, auctore Heinſio æque piam, coelestique unctiōe delibutam Hieronymi eloquentiam esse, ac fortis illa, splendida, & erudita est. *

JACOBUS PONTANUS *Philocaliæ Libr. X. c. 26.*
 „ Quem delectabit de vita, & moribus hujus ma-
 „ gni, & disertissimi Doctoris cognoscere, Ma-
 „ rianum Victorium Rheatinum legat. Lingua-
 „ rum scientia, & eloquentia Patres latinos ante-
 „ gressus est omnes. Multa in eo lectio, multæ
 „ literæ. In exponendis sacris voluminibus mira
 „ felicitas. Elucet etiam in illo doctrina, quæ
 „ humanitatis nomine significatur, quæ lectorem
 „ suum non docet modo, verum etiam recreat,
 „ ac delectat. Valet quoque ad commendationem
 „ ejus, quod velut Plato & Democritus, & Py-
 „ thagoras regiones varias discendi causa obivit.
 „ Labor ejus in studiis indefessus, & vix imitatio-
 „ ni locum relinquens. „

NICOLAUS CAUSSINUS *Libr. III. de eloquentia sacr. & hum. c. 14.*: Hieronymus ait, in omni genere summus artifex, quas styli divitias habet, quæ lumina! quos aculeos! Dubites doctumne magis, an eloquentem debeas appellare.

THEOPHILUS RAYNAUDUS, quo nemo in veterum scriptis aut legendis diutius, aut dijudicandis feliciter versatus est, *Tom. XI. in Erotemat. de confixione Librorum §. 58.* hæc scribit: Is fuit Hieronymus, ut ejus in scribendo dotes non dicam assequi, sed ex parte saltem aliqua, etiamsi minima, exprimere posse ad felicitatem in hoc genere sat esse posse videatur. Non illum eruditio, non judicium, & quidem acre, & emundum, non linguarum peritia, non elo-

* Heinſius D. Hieronymo valde addictus fuerit, necesse est, quando *Orat. 6.* denuo in ejus laudes effunditur.

eloquendi copia, non quidlibet evincendi facultas defecit.

ADAMUS TRIBBECHOVIUS in *Edit. Francof. 1684.* ad *Fridericum Saxonem*, loquens de *Scriptorum Hieronymi* celebritate: *In quibus*, inquit, *si styli elegantiam, & πολυμαθείας exemplum quis spectet, plures quod imitarentur, pauci, quod assequerentur sequioribus sæculis invenerunt.*

STEPHANUS BALUZIUS in *Notis ad Epist. 1. S. Cypriani: Lucubrationes S. Hieronymi*, ait, tametsi is in *Epistola ad Pammachium* scribat, dissimulandam, & fugiendam esse eloquii venustatem in interpretatione ecclesiastica, quam ipse vitavit in interpretatione librorum sacrae Scripturae, Rhetoricæ tamen flosculis ubique abundant, & ambitiosa eloquentia.*

Sileo nostræ ætatis summos quosque Criticos, rerumque Ecclesiasticarum scriptores, qui cum omnes judicio, styloque ipsimet valerent, Hieronymo tamen dicenti maxima honoris significatione assurgunt, & quotiescumque licet, in laudem eloquentiæ ejus effunduntur.

Quo magis mirari subit, JOANNEM CLERICUM, incertæ Religionis hominem, quemque ipse gregalis ejus Oudinus ** Bibliopolarum Amstelodamensium mercenarium, & ea ipsa in re insigni cum impostura versatum dicit, hunc, inquam, talem, tantumque virum, reliqua Hieronymi decora obscurasse haud contentum, eloquentiam quoque ejus proscindere. Oratorem enim vocat callidum, ineptum declamatorem, qui inanem eloquentiam incassum profundat, argumenta exprimat puerilia, atque ita jejunos sæpe, frigidusque sit in differendo, ut ratiocinia ejus homines sedato animo præditi

* Ambitiosam dicit sana significatione, quasi studiosam dixisset.

** *Commonitorio de Scriptoris. Ecclesiasticis. anno 1793. edito a volum. 986.*

diti nec febricitantibus condonarent. Novi scilicet Hieronymum passim allatrari, atque id ejusdem adhuc viventis fatum fuit, ut omnibus hæreticis odio esset. Posthumianus apud Severum Sulpitium supra laudatus: *Ego, inquit, apud Hieronymum sex mensibus fui, cui jugis adversus malos pugna, perpetuumque certamen concivit odia perditorum. Oderunt eum hæretici; quia eos impugnare non desinit; oderunt eum Clerici; quia vitam illorum infestatur, & crimina. Sed plane eum boni omnes admirantur, & diligunt.* Novi Claudium Taurinensem, referente Dungalo Diacono, præ ceteris Hieronymo maxime infensum se præbuisse. Novi Lutherum jam temulentum in *Colloquiis Convival. c. de Patrib. & c. de Scholastic.* item *Postilla in die Exalt. S. Crucis. & Libr. de SERVO ARBITRIO* adversus Erasmum: Calvinum in *Jonam*: Theodorum Bezam ad *cap. 24. Actorum* & alias: Brentium in *Apolog. Confession. Witemberg. c. de INVOCAT. SS.* Kemnitium in *Orat. de Lectione PP.* Causæum *Dia-log. 6. 7. & 8.* Junium *Libr. 2. c. 9. n. 9.* Witakerum *Controv. 1. quæst. 2. c. 9. in argumento* 4. Petrum Cunæum in opere de *Repub. hebræorum Libr. 3. c. 5.* Denique recentiores: Caveum de *Scriptoribus Ecclesiasticis*: Czwittingerum in *Specimine Hungariæ literatæ*: Samuelem Bagnagium in *Annalibus politico-ecclesiasticis Tom. 3. & novissime Cramerum Boslueti, si superis placet, continuatorem in Hieronymum deblaterasse varia, atque effutisse: sed hoc minime novi, hoc quam maxime inexpectatum accidit, hoc nusquam legi, sancti Doctoris facundiam fuisse a quoquam, uti a Clerico factum est, seu in dubium, seu in invidiam aliquando vocatam. Supereſt igitur, ut furioso homini primo viros, quos supra allegabam, celeberrimos opponamus: & si omnes pariter contemnit eadem opera; si nihil illi pronuntiare de elo-*

, quen-

quentia potuerunt: producamus testem, in quo ipse Clericus nec partim studium, nec libertatem loquendi, nec eloquentiam desideraverit. * Et quem illum ain? quem ipsum quidem etiam supra inter reliquos audiebamus, Desiderium Erasmus. Hoc, inquam, nemo melius clerico opponi possit, qui cum ultra humanas literas censoriam virgam protendisset, abusus ingenio, nec a sacris quidem se abstinuit, atque in judicandis Patrum scriptis ingenti supercilio se extulit, tantum sibi in eo genere permittens, quantum hactenus nemo utut eruditus, ac sapiens licere sibi arbitrabatur. Jam enim iis largitus est plurima, jam ademit, jam Luciani exemplo non pauca etiam irrisit. Hic tamen tantum Hieronymi calamo tribuit, ut nesciam, an quis alius eo in argumento sit hominem assecutus. „ In optimo Theologiæ genere, inquit **, primas tenet Hieronymus (de Latinis loquor) & ita primas tenet, ut omnes post se longo relinquat intervallo: & adeo neminem habemus, quem ullo pacto cum hoc conferre possimus, ut inter tam innumerabiles Theologos vix quemquam habeat & ipsa docta Græcia, qui nostrum æquet Hieronymum, si modo non unam aliquam laudem, sed universas ejus dotes simul expendas. Tantam in uno homine reperias sæcularium, ut vocant, literarum cognitionem, tantam omnis antiquitatis peritiam, tot linguarum absolutam scientiam, tam admirabilem locorum, & historiarum omnium notitiam, tam non vulgarem mysticorum voluminum eruditionem, tantum inimitabilis eloquentiæ, tam exactum ubique judicium, tam sacrum afflati

„ pe-

* Quantum Clericus Erasmo tribuat, patet ex nova editione omnium ejus operum, quam sane splendide ipsemet adornavit.

** Proæmio Tomi II. Hieronymiani.

„ pectoris ardorem, rerum adeo diversarum tam
 „ digestam, ac præsentem memoriam, tam felicem
 „ juxta ac divitem mixturam, denique tanto le-
 „ pore conditam severitatem, ut quemadmodum
 „ per se facundi, si cum Cicerone conferantur,
 „ protinus videntur obmutescere; ita omnes Do-
 „ ctiores, quos citra collationem suspicimus, cum
 „ Hieronymo compositi vix sapere, vix loqui, vix vi-
 „ vere videantur. Atque id quidem haud in illorum
 „ contemptum, sed in Hieronymi gloriam dictum
 „ videri velim, qui suarum excellentia virtutum
 „ aliorum laudem non minuit, sed admotus ob-
 „ scurat. Reliquos ut limpidos rivos admireris;
 „ hic ceu dives quoddam, & aureum flumen uni-
 „ versas opes secum volvit, ac desert.,

Miracula dein ad illustrandam Hieronymi glo-
 riam requirentibus, eleganter admodum his ver-
 bis respondet: *Quod si cui nihil absque miraculorum*
portentis placere potest, is legat Hieronymianos li-
bror, in quibus tot pene miracula sunt, quot Senten-
tia. Hæc Erasmus, quæ si superlationem sapiunt,
 & auxeses videntur, judicium Erasmi esto, non
 meum. Clerico tamen debet id antiquius esse
 quovis alio. Quid enim? ille in ridendo liberri-
 mus, qui pungere, cavillari, & mordere omnes
 solebat, quotquot minus ipsi arrisissent, hic ipse
 facundiam suam omnem in laudando homine ex-
 promeret, in quo Clericus nihil genuinæ eloquen-
 tiæ deprehendisse se tam dolenter affirmat? Quid
 jam respondet, quid mussitat hypercriticus noster?
 Forte poenituit aliquando Erasmus earum laudum?
 an eas retractavit? Imo toties, quoties licebat,
 profudit, proin ex animi sententia atque ex inti-
 ma persuasione, non studio rhetoricandi. Quæ-
 so enim, quis ea, quæ primo statim ejus Tomo *

præ-

* *Epist. Nuncupatoria I.*

præfixa sunt, nisi ingenue, sine fraude, atque
 assentatione ulla scribere posset? „Cæterorum qui-
 „dem, ait Erasmus, alios aliæ commendant do-
 „les: in hoc uno συλλήβδην, ut ajunt, conjunctum
 „fuit, eximium fuit, quidquid in aliis per par-
 „tes miramur. Et cum in singulis egregium esse
 „magnum sit, ac rarum, hic sic excelluit in omni-
 „bus, ut longe præcurrat in singulis, si illum
 „cum ceteris componas: sin ipsum secum com-
 „ponas, in nullo præemineat; tanta est rerum
 „omnium summarum temperatura. Etenim si na-
 „turæ felicitatem expendas, quid illius ingenio
 „vel ardentius ad discendum, vel acrius ad judi-
 „candum, vel foecundius ad inveniendum! deni-
 „que quid dexterius, aut festivius, si forte res
 „delectationem desideret! Sin eloquentiæ laudem
 „requiras, in hac certe christianos scriptores uni-
 „versos tanto post se relinquit intervallo, ut nec
 „hi cum Hieronymo conferri queant, qui vitam
 „omnem in uno bene dicendi studio contrive-
 „runt: ac prorsus tantum abest, ut quisquam sit
 „nostræ religionis scriptor, quem cum hoc pos-
 „sis componere, ut meo judicio Ciceronem etiam
 „ipsum, suffragiis omnium eloquentiæ Romanæ
 „principem, nonnullis dicendi virtutibus superet.
 „Quod quidem in ipsius vita copiosius demon-
 „strabimus. Mihi sane hoc ipsum solet usuve-
 „nire in Hieronymo, quod olim in M. Tullio,
 „cum quo si quem contulero, per se quantum-
 „vis disertum, repente velut obmutescere vide-
 „tur, & cujus linguam citra contentionem vehe-
 „menter admiror, ad hunc compositus, & ad-
 „motus, elinguis videtur, & balbus. Sin doctri-
 „nam exigas, quæso te, quem habet, vel eru-
 „ditissima Græcia sic absolutum in omni genere
 „doctrinæ, ut cum Hieronymo sit committendus?
 „quis unquam pari felicitate omnes totius erudi-

„ tionis partes conjunxit, & absolvit? quis un-
 „ quam in tot linguis antecelluit unus? cui tan-
 „ ta historiarum, tanta geographiæ, tanta anti-
 „ quitatis notitia contigit unquam? quis unquam
 „ sacrarum, & profanarum omnium literarum
 „ & parem, & absolutam scientiam est assecutus?
 „ Sin memoriam examines; quis auctor seu vetus,
 „ seu novus, quem ille non in promptu habuerit?
 „ quis angulus divinæ Scripturæ, quid tam abdi-
 „ tum, quid tam varium, quod ille non velut in
 „ numero habuerit? Sin industriam: quis un-
 „ quam tantum aut evoluit, aut scripsit volumi-
 „ num? quis sic universam divinam Scripturam
 „ edidicit, imbibit, concoxit, versavit, medita-
 „ tus est! quis æque sudavit in omni doctrinæ ge-
 „ nere? Jam si morum sanctimoniam spectes, quis
 „ Christum spirat vividius? quis docuit ardentius?
 „ denique quis eum vita magis expressit? Poterat
 „ hic unus pro cunctis sufficere Latinis vel ad vi-
 „ tæ pietatem, vel ad Theologicæ rei cognitio-
 „ nem: si modo integer, & incolumis extaret. „
 Denique ibidem ad calcem velut epilogi loco ait:
Aureum flumen habet, locupletissimam Bibliothecam
habet, quisquis unum habet Hieronymum.

Atque ista in Clerici, & similium græculorum
 gratiam dicta sunt. Nunc postquam, quæ de
 eloquentia Hieronymi idoneorum testium sententia
 sit, audivimus, ad notas ejus, & discernicula qua-
 dam transeamus.

C A P U T II.

Quid habeat peculiare?

De Hieronymi Characterē, variū variē, qui si non
 omnia, at aliquid certe dicunt; nam tali in ar-
 gumento singula juvant. Cassiodorus vir sapien-
 tissi-

tissimus, atque eruditissimus, cujus in ferreo licet stylo sensus vigent, & auri quam plurimum continent *, ita Hieronymi characterem describit. „ Planus, doctus, dulcis; parata copia sermonum: „ ad quamcunque partem convertit ingenium: „ modo humilibus suaviter blanditur, modo superbiorum colla confringit, modo derogatoribus suis vicem necessaria mordacitate restituens, modo virginitatem prædicans, modo matrimonia casta defendens, modo virtutum certamina gloriosa collaudans, modo lapsus in Clericis, atque Monachis pravitatis acculans. Sed tamen ubicunque se locus attulit, gentiliū literarum exempla, dulcissima varietate permiscuit, totum explicans, totum exornans, & per diversa disputationum genera disertus semper & æqualis incedens. Nam cum aliquos libros magna ubertate protendat, tamen pro dulcedine dictorum suorum finis ejus semper ingratus est. „ Quibus verbis, illud dicere mihi Cassiodorus voluisse videtur, Hieronymum pro argumenti ratione varium esse, & quemadmodum in omni genere dicendi excelleret, sic & in modo ipso felicissimum extitisse. Quantumcunque enim diversas res tractet, ita tamen illis attemperare calamus novit, ut & argumento quam aptissime serviat, & tamen idem ubique scriptor, clarus, brevis, tersus, & acer appareat, qui obscura collocet in lumine, salutaria altissime animis imprimat, & si quæ occurrunt dubia, velut ad vivum refecet.

Petrus Paulus Vergerius, quem supra laudavimus *ibidem* de Hieronymi stylo perquam accommodatè quidem, sed obiter, ac brevissime ait: *Tanquam rivus limpidissimus leniter defluens & aspectu, & sono delectat.*

M 2

Hie-

Hieronymus Platus *L. III. de bono stat. religios.* c. 11. ait: *Hieronimi sermo doctus, & antiquitatis exemplis abundans, multoque acumine, deinde, quod caput est, ad omnia exprimenda apprime factus, sive Scriptura ad verbum interpretanda, sive præcepta omni vitæ generi præscribenda, sive quidpiam laudandum, aut vituperandum, sive denique aliquis ad virtutem cohortandus. In quibus omnibus ita valet, ut plane illa cælestis eloquentia videatur.*

Fusius, atque accuratius eundem Sixtus Senensis expressit. Cum enim *Loc. cit.* sapienter inter exoterica, & exegetica Hieronymi distinxisset, ita loquitur. „Stylus Hieronymi in quovis horum „ordinum longe diversus est ab eo, quo in ceteris operibus utitur. Nam in exotericis opusculis, „quæcunque ea sint, sive parænetica, quæ vitæ institutionem continent, sive Apologetica, quæ ad „refellendos hæreticorum errores, & malevolorum „calumnias spectant, habet dicendi genus varia „quadam, & admirabili omnium rerum mistura „compositum, & ornamentis, & pigmentis, ex „omni scriptorum varietate undequaque decerptis „excultum, Rhetorum coloribus, Dialecticorum „sententiis, omnigenis omnium artium, ac scientiarum allusionibus pictum, & peregrinarum vortum diversitate, græcis scilicet, hebræis, & chaldæis dictis variegatum instar emblematis, ut Ennius loquitur, vermiculati, ac musei operis „multicoloribus lapillis intertexti. Contra vero „in exegeticis, seu enarrationibus divinæ Scripturæ spreta universa literarum sæcularium pompa, & ab omni eloquentiæ fuco, & ab omni „difficilium quæstionum ambitione abstinet, nolens, ut ipse inquit, sub occasione divinorum „verborum eloquentiam & eruditionem suam „ostentare, & in his a lectoribus laudem, & admirationem aucupari. Utitur autem ubique di-

„dio-

„ tione succincta, simplici, & aperta, verbisque,
 „ ut ipse ait, e trivio desumptis, dictum illud in
 „ omnibus commentariis suis, & in singulis pene
 „ librorum præfationibus repetens, videlicet: Qui
 „ flumina eloquentiæ, & concinnas declamationes
 „ desiderant, ista non legant. Hoc enim solum
 „ mihi propositum est, divinarum Scripturarum
 „ verba declarare, & hæc sola est laus mea, ut
 „ per me lector divinæ Scripturæ verba intelligat.
 „ Cujus propositi ipse rationem reddens in quæstio-
 „ nibus ad Damasum Papam sic scribit: De Scri-
 „ pturis disputantem non decet Aristotelis argumen-
 „ ta conquirere, nec ex flumine Tullianæ eloquen-
 „ tiæ ducendus est rivulus, nec aures Quintiliani
 „ flosculis, & scholari declamatione mulcendæ;
 „ pedestris, & quotidianæ similis, & nullam lucu-
 „ brationem redolens oratio necessaria est, quæ
 „ rem explicet, sensum edisserat, obscura manife-
 „ stet, non quæ verborum compositione fronde-
 „ scat. Sint alii disertī, laudentur, ut volunt, &
 „ inflatis buccis spumantia verba trutinent: mihi
 „ sufficit sic loqui, ut intelligar, ut de Scripturis
 „ loquens, & disputans Scripturarum imiter sim-
 „ plicitatem. „

Idem tamen Sixtus ad *calcem Libri 4. Aliter*,
 inquit, *in Epistolis scribit Hieronymus, aliter in de-*
certationibus adversus Rufinum, & Vigilantium lo-
quitur, & aliter in Commentariis Prophetarum: alio
modo dicebat, cum esset admodum juvenis, & adhuc
Rhetorum exercitatione calens, atque alio modo senex,
cum graviora ac solidiora sectaretur: sed ita tamen sem-
per scribit, ac loquitur, ut ubique eum agnoscas esse
Hieronymum; quemadmodum & familiaris tibi amici
faciem: nunc iratam, nunc mitem, nunc tristem, nunc
alacrem ejusdem semper esse nominis cognoscis.

Optime autem atque eleganter Erasmus *Epistol. I.*
Nuncupatoria: „ Ipsum, inquit, dicendi genus haud-

„ quaquam triviale, sed sententiis variegatum, epi-
 „ phonematis argutum, strophis obliquum, ac va-
 „ frum, argumentis densum, & instans, allusio-
 „ nibus festivum, nonnunquam variis Rhetorum
 „ schematis veluti lasciviens, ubique doctum, &
 „ artificem præferens. . . . Accedit ad hæc varia
 „ quædam, & admirabilis omnium rerum mixtura,
 „ quam affectavit etiam Hieronymus, sed omnino
 „ felicissime, pia nimirum ambitione, & sancta
 „ quadam ostentatione jactans opes suas, quo ma-
 „ gis veterum nobis excutiat, & oscitabundos ad
 „ arcanæ scripturæ studium expergeficiat. Quid
 „ enim est usquam in ullo vel auctorum vel litera-
 „ rum genere, quod ille passim non aspergat, in-
 „ culcet, infulciat? hebraica, græca, latina, chal-
 „ daica, sacra, profana, vetera, nova, quid non?
 „ Sic ille velut apicula per omnia circumvolitans ex
 „ unoquoque, quod esset eximium, ad operis sui
 „ mellificium congeffit, ex variis flosculis hinc
 „ illinc decerptis fecta concinnans, aut velut ex
 „ versicoloribus tessellis musaicum opus contexens.
 „ Et in his, quod maxime retrusum est, id liben-
 „ tissime consuevit intertexere. Quid enim tam ab-
 „ ditum in Prophetarum involucris, in totius in-
 „ strumenti veteris mysteriis, quid in Evangelicis,
 „ aut Apostolicis literis, quod ille non ceu notum
 „ exhibeat? nonnunquam sic alludens, ut nec
 „ animadvertatur, nisi ab eruditis, & attentis.
 „ Quid in Hebræorum, aut Chaldæorum monu-
 „ mentis, quid in Rhetorum, Cosmographorum,
 „ Poëtarum, Medicorum, Philosophorum, deni-
 „ que hæreticorum libris, unde non aliquid atte-
 „ xat volumini? „

Idem in *vita Hieronymi*, quam laudatissimam
 scripsit, *versus finem* non minus præclare. „ Quis
 „ exorditur dexterius? quis proponit absolutius?
 „ quis narrat evidentius? quis expatiatur vel amice-
 „ nius,

„ nius, vel appositius? quis colligit nervosius?
 „ quis telum in adversarium torquet acrius, aut ex-
 „ ceptum retorquet mirabilius? quis illigat tena-
 „ cius? quis in tractandis *ἡδαι* jucundior? quis in
 „ *πρόθεσι* concitandis gravior? quis in schematismis
 „ florulentior, aut picturatio? quis sententias in-
 „ terferit aptius? quis epiphonematibus pungit ar-
 „ gutius? quis hypotyposes effingit rectius? quis
 „ aut attollit magnificentius, aut dejicit humilior?
 „ Quanta ordinis ratio? quod consilium? quæ tran-
 „ sitionum deliciae, quas sæpenumero per senten-
 „ tiam contextit? quam parata latini sermonis co-
 „ pia? quæ vocum emphasis, qui delectus? quan-
 „ ta rerum supellex? quæ auctorum agmina?
 „ quam ubique densus, & instans sibi, quam felici
 „ mixtura contextit, concinnat, ac struit omnia?
 „ Præterea qui nervi, qui lacerti, qui vigor, qui
 „ actus orationis, ac vita? Ut nusquam cessat, nus-
 „ quam dormitat, nusquam jacet, nusquam resi-
 „ stit? ut ubique properans, auditorem secum ra-
 „ pit? ut semper aliud ex alio pendet, & gemma
 „ gemmam trahit? quam modulata, quamque nu-
 „ merosa totius orationis compositio? quam miro
 „ commatis, & colis rotatur, ac volvitur oratio?
 „ Quid dicam de festivitate, qua res tristissimas etiam
 „ ille mirifice condit? Postremo quod pectus, quan-
 „ ta causæ fiduciæ? quis docet apertius? quis de-
 „ lectat urbanius? quis movet efficacius? quis lau-
 „ dat candidius? quis suadet gravius? quis horta-
 „ tur ardentius? quis recenset sublimius? quis in-
 „ stituit sanctius? quis cum amicis fabulatur huma-
 „ nius? Nullum est enim argumenti genus, in quo
 „ non ille luserit; nusquam sui dissimilis. Hæc
 „ non admodum mirentur, qui in hanc palæstram
 „ nunquam descenderint. Ceterum magnarum vi-
 „ rium est, tractare sacra tam splendide, simplicia
 „ tam erudite, inculta tam polite, retrusa tam

„ dilucide, a sensu communi abhorrentia tam po-
 „ pulariter, periculosa tam libere, severa tam plau-
 „ sibiliter? * Brevissime & compendio *Antibarba-*
 „ *rorum Libr. I.* Hieronymi ait *vehementem esse di-*
 „ *ctionem, variam, vafram ***, *acrem, locuple-*
 „ *tem.*

Hæc Erasmus generatim, & confuse. Quod si lector ordine cupit procedere, atque Hieronymum in singulis nosse, ante omnia hæc consideret, necesse est, sanctum Doctorem totum fere esse in his quinque generibus; in instituendo ad officia vitæ, ac status, hortando ad perfectionem, consolando in mœrore, laudando quorundam virtutes, aliorum vero scelera, atque abusus increpando. In *instituendo* evangelicam severitatem præfert, in ea, quæ corpori inimica sunt, maxime propendens. Nunquam byssum ille, nunquam mella loquitur, non mortis spiculum auro illudit, non ei vel in poenitentibus sunt omnia protinus alba, nec una lacrimula ex mulierculæ oculis stillante inferni busta restinguit, non alia habet, quibus hodie & perdunt tam multi, & perduntur. Sed plus fere petit, ut quod minus est, obtineat securius. Præterea singularem ostendit usum rerum, experientiam incredibilem, cognitionem mundi, qualem frustra apud alios requiras. In *hortando* urget, & perurget, premit, ac velut in parietem inclinatum incumbit, ut videas scilicet non destitutum, donec persuadeat. Ardor autem ejus ponit interdum, seu ne gravis fiat, seu ut vires resumere possit: ac tum fere ad Laconismum deflectit. Subito autem de integro insurgit, novam facit

* Brevius *Præfat. in Tom. II.* ad eundem Hieronymi Characterem delapsus alia dat.

** *Vasfrities* Hieronymi pro artibus & prudentia oratoria in causæ commodum, non alterius damnum, accipienda est. De naso vero, quem illi toties Erasmus objicit, diximus alias, quando scilicet de Eloquentia Tertulliani diserebamus.

facit impressionem, ut vix quisquam sit, qui mentis pondus ferat, & splendore sententiarum non percellatur. In *narrando* lepor quidam est natus, ac perpetua iucunditas, quæ ad vitam accedat, faciatque, ut rem videre, non legere te putes. Misceat vero & hic graves sententias, crises interferit non expectatas quidem, sed nec longius accersitas, clausulas vero, & transitiones adhibet, quæ placeant mirifice, & lectoris animum oblectent. In *consolando* vix est quispiam ex optimo genere etiam græcorum Patrum, plus dico, classicorum quoque auctorum, qui tam perite tractet exulceratum animum, tam efficaciter medeatur, tam teneris sit affectibus, & tot argumentis abundet. In *laudando* adulationem fugit maxime, sic tamen, ut amicitia, & affectui tribuat, quantum potest. Ingressus autem semel aream illam ubique flores spargit, & opere maximo dat operam, ut in Elogio neque ingenium, neque varietatem, sed neque splendorem, ac novitatem quis possit desiderare. In *vituperando* contra, ad quod indoles quam maxime fervida, bella item cum hæreticis, & moræ tot negotiis injectæ vehementissime eum inflammas, superat omnes sive sacrarum, sive profanarum rerum scriptores. Hoc illius forum, hic totus exultat, hic & Satyricorum rictus, & Stoicorum bilem, & Comicorum sales, & quidquid uspiam est argutum, acre, vehemens, & pungens, adhibere novit ea facilitate, ut fluminis instar e calamo non profluat magis, quam erumpat.

Atque hæc ipsa est causa, cur apud Juniores haud paucos censuram incurrerit, quasi naturæ in scribendo indulgeret nimium, & laceffitius semel contemptim exciperet adversarios suos, a felle autem & aceto vix unquam sibi temperaret. Ajunt enim data, aut arrepta occasione, etiam brevi effundit stomachum, fremit, minatur, pudore suffundit,

quin posita non raro gravitate maledictorum omne genus, ac plaustra convitiis congerit, velut jure quodam suo, nulla hominum, nulla alterius rei habita ratione. Hanc crisin Scaligero, Caveo, Clerico & ex parte quadam etiam Tillemontio debemus. Superi! ex Italia in Syriam migrare coactus Hieronymus, & nec ibi in monasterio securus, inter invidos, & hypocritas medius, omnesque, qui Christo bellum indixerant, suos quoque hostes expertus, eo ipso tempore, cum Oriens in partes iret, cum arderent omnia, cum scdissima monstra Ecclesiae visceribus incubarent, aliis quidem otiose inspectantibus, aliis sub specie sanctitatis luxuria, atque avaritiae studentibus, aliis denique cohortantibus ipsum, & stimulos identidem admoventibus, miramur scilicet, quod arma corripuit, quod gessit in plagas perditorum, quod nemini pepercit armato. Nescio qua ratione fiat, ut illi ipsi, qui ne tantillum quidem sibi temperant in scribendo, sed alios ultro provocant, nihilominus in gravissime laesis modestiam semper desiderent, quam praestare ipsi nunquam potuerunt. Tamen ipse Erasmus, etsi subin Hieronymi acrimoniam notasse videtur, excusat rursus pro viribus: idque saepius & eleganter etiam facit, maxime vero in *Vita*, *Operibus* praefixa.

Ibi principio purgat virum sanctum ex moribus, quos quidam ex suis aestimantes, tetricum quempiam, & incivilem fuisse somniant; cum eo nihil unquam fuerit nec humanius, nec urbanius. Et verissime istuc Erasmus; patet enim ex scriptis, vitaeque ratione omni pluribus in locis. Dein paulo inferius ad rem ipsam accedens: „Sunt, inquit, „ quos nonnihil offendit sermonis acerbitas, quod „ in scriptis suis acrius nonnunquam videatur incandescere, quam pro christiana mansuetudine, „ planeque veteris comediae quiddam referre, mul-

20 tos mordicus arripiens. In hac sententia fuit
 21 olim Augustinus *, & nostra memoria, si supe-
 22 ris placet, Franciscus Philelphus, vir ille quidem
 23 eruditus, sed nonnunquam plus satis Φιλαυτός.
 24 At hi mihi parum expendere videntur negotii cir-
 25 cumstantias, patriam, ingenium, sui fiduciam,
 26 æmulorum improbitatem, contumeliæ genus
 27 nulli ferendum: postremo nec illud Terentianum:
 28 *Tu si hic, aliter sentias*. Nulli suam contumeliam
 29 ferunt impotentius, quam qui in aliena sunt len-
 30 tissimi. Aculeo invecus est in Ruffinum; sed ille
 31 commeruerat acriora. Hic hæreseos crimen for-
 32 titer depellit; ille carnificem minitatur, & fictis
 33 flagitiis famam incessit. Et nemo sævit gravius,
 34 quam cui non licuit esse mansueto. Atqui si quis
 35 attentius, ac propius inspiciat eos libros, in qui-
 36 bus velis, equisque, quod ajunt, invehitur in ad-
 37 versarios, totaque libertati fræna laxat, mira
 38 deprehendet humanissimi, mitissimique ingenii
 39 vestigia. Ludit sæpenumero, & festivis salibus
 40 agit magis, quam virulentis. Nonnulla dedit
 41 suo sæculo **, & amicorum affectibus, & ita
 42 crimen a se depellit, ut si fieri possit, cupiat ho-
 43 sti parcere. Multa sciens, ac prudens suppressit,
 44 pudori christiano malens obsequi, quam animo
 45 laceffito, velut in Epistola adversus Joannem
 46 Hierosolymitanum quantum tribuit suæ verecun-
 47 diæ! quantum Episcopi titulo! ut se reprimit!
 48 Et si quid incidit odiosius, sæpe nomen suppressit,
 49 nonnunquam fictis utitur vocabulis, velut in ar-
 50 gu-

* Hoc ego in Augustino nunquam legi, neque credo
 alius leget. Potius laudat Hieronymum, quod pro
 injuriarum atrocitate sibi temperet. Lege *Epist.* 93.
nunc 110. inter Hieronymianas. *Ep.* 97. *nunc* 116.

** Nempe ætas illa non erat tam plena ceremoniarum,
 & urbanitatum, quia sincera magis, ac liberi oris.
 Itaque nonnulla acriora nunc videntur, quam ibi
 fortasse sunt visa.

„ gumento de matre, & filia reconciliandis, in
 „ Diaconum impudicum, in Susannam lapsam *.
 „ Quin etiam in Ruffinum, & hujus socios Grun-
 „ nii, Luscii, Lavinii, Calphurnii, Lanarii, Scor-
 „ pii, canis Alpini & id genus aliis, aut fictis, aut
 „ obscuris nominibus stomachatur. „

Egregie sane, & argumentis talibus, quæ ex
 ipsa causa petita sint. Nihilominus argumentum
 reassumens Erasmus non uno loco, maxime cum ad
 scriptiones eas devenit, in quibus acrimonia Hiero-
 nymi plus quam in ceteris videtur elucere. Iterum
 vero locum nefas sit præterire, ubi *Præfat. in Tom.*
III. novis pugnat rationibus, iisque, ut mihi qui-
 dem videtur, non obviis, verum solertissime con-
 quisitis. „ Id facile, inquit, in bonam partem in-
 „ terpretabitur, quisquis perpenderit ardens, &
 „ natura vehemens hominis ingenium, & liberum
 „ verius, quam contumeliosum. Deinde morum
 „ integritatem, vitæque innocentiam, quæ ut ne-
 „ minem afficit injuria, ita impatiens est injuriæ.
 „ Adhæc atrocius esse crimen hæreseos, quam ut
 „ ullius, quantumvis mansuetum ingenium ferre
 „ potuerit: ut ne quid addam de doctrinæ fiducia,
 „ qua sic omnes antecellebat, ut hunc contulisse
 „ cum ullo ceterorum contumelia fuerit. Quid
 „ quod hujus etiam generis, ut cum ceteris in rebus
 „ omnibus tolerantem esse virtus sit, hic dissimi-
 „ lare sit impietas. Jam sæculum hoc omne, quo
 „ divus vixit Hieronymus, incredibile dictu, quan-
 „ to pere tumultibus hæreticorum flagraverit, adeo
 „ ut illis temporibus ingeniosa quoque res fuerit,
 „ esse christianum. — Tot erant hæresiarcharum no-
 „ mina, cognomina, dogmata, ut in his etiam
 „ recensendis sudaverint homines eruditi. Verum
 „ Cata-

* Hæc enim Epistola tum Hieronymo adhuc tribueba-
 tur.

„ Cataphryges, Borboritæ, Ophitæ, Manichæi,
„ & horum similes hæretici, quoniam portentosa
„ quædam sequebantur, & in tantum a divinis ab-
„ horrentia Literis, ut ne cum sensu quidem com-
„ muni concordarent, facile seu suapte sponte con-
„ senserunt. Ceterum Arianorum hæresis com-
„ munita literis, ac divinæ quoque Scripturæ vali-
„ dissimis, ut videbatur, nixa præsidis, insuper
„ Imperatorum, & gentium adjuta studiis, opi-
„ busque, periculosis rerum motibus labefactavit
„ orbem christianum, in tantum, ut in dubio fo-
„ ret, utro se inflecteret Ecclesiæ sinceritas, & fa-
„ ctio, schismaque verius esset, quam hæresis,
„ quod adversarii numero prope pares essent, elo-
„ quentia, doctrinaque superiores. Ea pestis ut-
„ cunque sopita rursus in Origenistis renata est,
„ idem malum, sed mutato nomine. Contra cer-
„ tatum est acriter Synodis, ac decretis, & sym-
„ bolis sexcentis. . . . Admiscebant sese rebus
„ hisce, ita ut sit, privata hominum studia: & sub
„ fidei prætextu similitudines exercebantur. Potissi-
„ mum autem his malis agitabatur Oriens & omnis
„ Græcia, quæ quo magis favebat Origenis inge-
„ nio, hoc ægrius ferebat, illius damnari dogmata.
„ Hisce rebus sic agitata est vir optimus, ut nec
„ sedes quieta daretur usquam, nec studiorum otio
„ frui liceret, jam Ruffini opera in hæreseos etiam
„ suspicionem, & calumniam vocaretur, quod
„ olim Origenis ingenio delectatus, quædam illius
„ tradidisset latinis auribus, nec id sine laude aucto-
„ ris. Quod tam placidum ingenium, ut hujus-
„ modi malis laceffitum non exardescat? Et tamen
„ si quis propius inspiciat, expendatque libros, in
„ quibus tota libertate videtur in quosdam invehiri,
„ velut in Vigilantium, in Ruffinum, in Episco-
„ pum Hierosolymitanum, is animadvertet, multo
„ plus subesse festivitatis, quam virulentæ, & in
„ me-

„mediis illis convitiis sentiet humanissimi ingenii,
„manifesta vestigia. „

Porro studiose hæc, licet sint fusiora, ex Erasmo exscribere placuit, tum quod hominibus, quos dixi, semper aliquis ex eorum grege obijciendus est, tum vero quod Erasmus, uti recte Sultinghus observat, Hieronymum legit accurate, gesta ejus præ superioribus omnibus accuratius collegit, meliusque digessit, denique dignam tanto Doctore imaginem informans animo * æquius judicium tulit. Optime autem facturus erat Erasmus, si, quod in *Argum. Dialogi adversus Luciferian.* obiter cœperat, excusationem acrimoniæ Hieronymianæ a zelo quoque ejus repetiisset, quo flammæ ferventi ingenio subjiciente, difficillimum illi fuit pacate agere. *Licet hydra sibilet*, ait Hieronymus *Præfat. in Esdras*, *victorque Sinon incendia jâdet*, nunquam meum, juvante Christo, silebit eloquium, etiam præcisa lingua balbutiet. Et ad *Pamach. adv. errores Joan. Hierosolymit.* Ego libere dicam, & quamquam torqueatis labia, trahatis capillum, applaudatis pede, Judæorum lapides inquiratis, fidem Ecclesiæ apertissime confitebor. Iterum *Apolog. ult. adv. Rufinum*: In uno tibi consentire non potero, ut percam hæreticis, ut me Catholicum non probem. Si ista est causa discordiæ, mori possum. . . Sit inter nos una fides, & illico pax sequetur.

Quod si quis hic controversiæ, quam ei Augustinus movit, mentionem injicit, omittere non debet, & qua charitate temperata ea sit, & qua indulgentia denuo consopita. Asperior fuit Augustino Hieronymus? Sit sane; neque enim negamus: verum laceratum se vidit, sententia sua gravibus verbis improbata ab eo, cujus neque scientiam,

* Ait Erasmus *Præfat. in Tom. II.* se & olim adolescentem Hieronymi scriptis unice esse delectatum, & nunc hoc magis capi, quo plus accesserit eruditionis.

tiam, neque sanctitatem tum quidem cognitam habebat: dein epistolam contra se scriptam intellexerat in multorum manus venisse, antea quam ipse vidisset. Quæ duo non sunt prætereunda in tali homine, & quæ sat scio nullus eorum concoqueret, qui Hieronymi acrimoniam tantopere exaggerant. Vel sic tamen provocatus Hieronymus silere volebat, non contendendum ratus cum Episcopo Catholico, nec nisi pluribus ipsius Augustini literis ad respondendum potuit impelli. Responsio autem erat ejusmodi, ut acriorem expectasses. Rotunde loquitur, moderate tamen, atque id ipsum, quod scripserat, mox altera epistola excusat, semper deinceps & amans præ cæteris, & laudans adversarium Augustinum. Notari hic merentur verba Baronii, utpote pulcherrima, & sapientissimi hominis *, *Deo dilectos Hieronymum, & Augustinum, filios pacis, Ecclesiæ Magistros eo animo fuisse in altercando, ut inter ipsos verborum ictus, verberibus graviores se mutuo complederentur, peterentque furtivis osculis charitatis,*

Hæc pro instituti mei ratione sufficiunt. Nolo enim in eo labore hærerere diutius, quem sibi alii me doctiores sumpserunt. In excusando enim Hieronymo molam eandem dudum versavit Theophilus Raynaudus, cujus, ut mihi videtur, haud parum intererat, purgare sanctum Doctorem; quod una fidelia & suum pariter, & illius parietem dealbaret **: Natalis item Alexander in *Historia Eccl.* ubi de Hieronymo: Josephus Zwinger in *Apologia divi Hieronymi adversus Joannem Clericum*: nuperrime vero Joannes Stillinghus in *Actis SS. ad diem XXX. Septembr. §§. I. XLV. XLVI. L. LIV. LXXX.* hi aliique omnia jam occuparunt, quæ

* Ad annum 394.

** In *Erotematis supra citatis* præsertim 9. & iterum *Tom. XII. in Hoplotheca contra istum calumniæ sapius.*

quæ adjicere ego ex adversariis meis potuissem; nolo igitur ligna in sylvam inferre, præsertim cum hominibus ejusmodi, quâlis maxime Clericus est. Laconice licet respondere, hanc ipsam Hieronymi summam laudem esse, quod illis displiceat, quod ab illis identidem laceretur. Supra *cap. i.* id diximus, sed repetendum hic est, & quidem ipsius Hieronymi verbis repetendum. Nam in *Proæmio Dialogor. adv. Pelagianos* generose in eam sententiam rescripsit: *Breviter respondebo, nunquam me hæreticis pepercisse, & omni egisse studio, ut hostes Ecclesiæ mei quoque hostes fierent* *. Quod si vero ejus verbis claudere confutationem placet, a quo pleraque mutuati sumus, hunc Erasmus vitæ Hieronymi finem imponit. *Hunc (Hieronymum) omnis sexus, omnis ætas discat, evolvat, imbibat. Nullum doctrinæ genus est, quod hinc non queat adjuvari, nullum vitæ institutum, quod hujus præceptis non formetur. Soli hæretici Hieronymum horreant, & odèrunt, quos ille solos semper acerrimos hostes habuit.*

Quod si vero sunt alii, qui cum acrimoniam in Hieronymo non accusent, sed & ceteras virtutes stylo ejus omnes tribuant, majorem tamen ab eo Latinitatis curam, ac puritatem exigunt: uti in eos non ita stomachari possum, sic judicium eorum maxime demiror. Videntur enim mihi inepte, ne dicam juveniliter de tanto viro pronuntiare. Sic ergo habeant, qui exigunt ab aliis, quod ipsi præstare non possunt. Non decebat Hieronymum, & professionem ejus quasi libra atrepta, quid aureum, quid argenteum, quid æneum esset, ponderate, neque id negotia ejus, & innumerae literæ patiebantur. Presbyter christianus, & Monachus, cum de rebus divinis scriberet, an iisdem verbis uteretur, quibus Cicero, vel Cæsar

uli

* Vide etiam *Epistolam Hieronymi 80. nunc 141. ad Augustinum.*

usi sunt? Nova religio, novi auctores novarunt omnia in scribendo. Itaque qui apte scribere volebant, maxime primo illo tempore plurimum Ecclesiæ consuetudini, plurimum divino Codici, plurimum ipsis mysteriis dare debuerunt. Non ergo, si Gentilium latinitatem non habeat Hieronymus, dicendus est illa christianorum carere: quibus utique sua phrasi, cum de pietate, veraque religione sermonem habent, non minus licet eloquentibus esse, atque illis olim licebat, quando verba omnia studiose superstitionibus suis accomodarunt. Sit ergo Hieronymus ille Cicero, qui verba nobis ecclesiastica subministret: neque pudeat nos ejus verba usurpare, cujus cetera omnia, ipsamque eloquentiam tantopere admiramur. Non hæc sunt sordida nobis, non ferrea, tantumque abest, ut offendere possint, ut ostendant quam maxime candorem, ac puritatem christianam. Ecquis enim scribat de religione, qui non identidem sive sacrorum Librorum, sive vocum ecclesiasticarum meminisse debeat, easque suis immiscere? An vero immutabimus eam phrasin? minime; quia major religionis habenda cura est, quam latinitatis, major rerum, quam verborum, major fructuum, quam foliorum. Videant ergo, qui hæc fastidiunt, quomodo eloquentiam illam suam cum charitate & prudentia christiana concilient, fastidientes illico, nec sine supercilio auscultantes, cum sacræ, cum ecclesiasticæ, cum contritæ quædam voces Hieronymo exciderunt. Videant, plus dico, quomodo cum ipsis Ethnicorum Philosophis sibi conveniat, quibus nunquam probatum est, verbis sibi propriis abstinere, & sic veluti artis suæ instrumenta abjicere. Videant num non potius Cicero, si christianus esse posset, plura Hieronymi imitaretur, & quando, utpote eloquens, ad rem, & ad hominem dicere debuisset, non quam plurimæ

fecus, atque olim fecerat, eloqueretur? De quo iterum Erasmus videndus est, & hac in parte erga Hieronymum æquissimus, qui eum potissimis ævi sui Ciceronianis, & ex parte ipsi Tullio, opponens mastigibus aurum in eo, & argentum requirentibus helleborum porrigit. *In vita* enim sæpe laudata sic loquitur. „ Divus Hieronymus in „ tot linguas cognoscendas partitus operam, & „ oleum, tum in hujusmodi versans argumentis, „ quæ non facile splendescunt, nec recipiunt orationis nitorem, denique permulta dictans, tamen eloquentia tantum præstitit, ut nemo fuerit nostra memoria, quem hac in parte cum eo conferre possimus. Et tamen eximios viros nostra vidit ætas, & qui ne Ciceronis quidem sæculo inter elingues habiti fuissent: quorum præcipui sunt Laurentius Valla, Hermolaus Barbarus, Angelus Politianus, Joannes Picus, & noster Rodolphus Agricola. Sunt & alii, quos haudquaquam contemno: sed ex his, quoniam sunt insignes, res æstimabitur. Hieronymus ex parte contempsit eloquentiam, tam multis distractus est studiis, quæ dicendi politiem rubigine solent obducere: hi per omnem ætatem in his modo versati sunt literis, quæ ad dicendi faciunt ornamenta: & tamen detur idem argumentum, sit eadem christiane loquendi lex: videbimus, nec horum quempiam Hieronymianam eloquentiam assequi. „ Et infra *ibidem*. „ Aliud est „ epistolam scribere ad Ciceronis exemplar, & „ decem selectis voculis Ciceronis simiam agere; „ aliud in gravissimis argumentis tot excudere volumina, Aliud est in ficta controversiola declamare: aliud in seriis fidei negotiis utrisque satisfacere & his, qui nihil requirunt præter Scripturæ divinæ scientiam, & his, qui tantum ingenii vires expectant. Atque, hoc qui præstat, „ pa-

„ parum Ciceronianus est? siquidem quid aliud
„ est esse Ciceronianum, quam optime dicere,
„ etiamsi diverse dicat? quandoquidem ipsi Cice-
„ roni secus dicendum foret, si Hieronymus esset.
„ Alias dicendi virtutes mireris in aliis, in uno
„ Hieronymo tot pariter dotes cumulatae sunt, ut
„ in eo reperire liceat, quod & in M. Tullio de-
„ sideres. Loquitur Cicero: tonat, ac fulminat
„ Hieronymus; illius linguam miramur; hujus
„ etiam pectus.,

Vult igitur insuper habito eo, quod Hierony-
mus non habeat verborum perpetuam illam puri-
tatem & castimoniam, nullum illi similem chris-
tianum oratorem esse. Addit enim, „ Ut juxta
„ Græcorum proverbium non una hirundo ver-
„ efficit, ita non una quæpiam dos facit eloquen-
„ tem. Inter tot egregios auctores, quorum in-
„ genio defensa est, & illustrata Christi religio,
„ aliis defunt sæculares literæ; aliis sacrae Scripturæ
„ cognitio. In hoc ingenium desiderat Hierony-
„ mus, in alio lucem orationis, in hoc nervos,
„ in illo splendorem. Multis defuit linguarum
„ peritia, nonnullis fidei sinceritas, quibusdam vi-
„ tæ integritas. Hieronymus, & unus Hierony-
„ mus sic omnia præstitit, ut si non ad unam ali-
„ quam virtutem, sed ad omnium concentum, &
„ summam respicias, dicam audacter, sed vere;
„ nihil habet vel ipsa Græcia, quod nostro oppo-
„ nat Hieronymo. Proferat si possit, & meæ sen-
„ tentiæ non pigebit palinodiam canere., Ita ibi
præter alia Erasmus. Nam vehementer etiam in
illud Theodori Gazæ concitatur, quem dixisse fe-
runt: *Hieronymum in somnio illo suo præter meritum*
vapulasse, quo ille acumine innuebat, non tam
Ciceronianum illum esse, uti vulgo haberetur.

CAPUT III.

Ubi maxime expromat facundiam suam Hieronymus?

Ex his, quæ supra verbis Sixti Senensis diximus, facile sit colligere, Hieronymi eloquentiam non esse in iis operibus quærendam, quæ tanto numero in divinas literas sive Veteris, sive Novi Instrumenti ille commentatus est. * Nolumus igitur aliqua repetere, etsi ad hoc confirmandum multos præterea locos ex ipso sancto Doctore adducere liceret, maxime ex Præfationibus ab ipso Sixto generatim allegatis, qui majus adhuc lumen causæ nostræ inferrent: tamen quod diuturnam priori capite moram traximus, compensare eam debemus, & quantum licet ad ulteriora aliquando festinare. Istuc unicum omittere non debemus, quod vel in ipsis commentariis ubique scintillæ promicant oratorii ingenii, atque illæ nonnunquam satis luculentæ. Ut adeo recte dixerit doctissimus, atque tersissimus Ribera! noster **: *Hieronymus ubique sui similis etiam in hoc magnus est: præsertim cum relictis hæreticis, quibuscum pro domo Dei perpetuum, & implacabile bellum gessit, ad mores convertitur, aut Christum in Lege, & Propetis nobis ostendit latentem.* Brevius Joann. Bapt. Masculus *Præfat. Hieronymi ad conciones aptati: Solida est, inquit, ejus interpretatio, & robusta. Sententias acres habet, quas quasi amentatas hastas contorquere possis.* Ceterum inter Commentarios in Scripturam, Prophetæ citra controversiam primum occupant locum. Cornelius a Lapide *Proæmio in Prophetas versus finem* ita ait: *Hieronymus Phoenix ille sui ævi, vir*
græce,

* Lege, quæ Joannes Stiltinghus in *Actis Hieronymi* §. 21. solide eam in rem ex ipso Hieronymo disputavit.

** *Proæmio in Malachiam.*

græce, hebraice, latine peritissimus, & Ecclesiæ judicio in exponendis sacris Scripturis Doctor maximus: quippe qui in hisce ad extremam canitiem consenuerit, & teste S. Augustino veteres omnes græcos & latinos Commentatores legerit. Qui sane nisi hic (Prophe-
tias intellige) primus glaciem perfregisset, posteris omnibus Prophetarum invia fuisset via. Sed Dei benefica providentia in hoc toto opere ita labor & doctrina Hieronymi constitit, ut hæc laurea ejus doctoralis & scriptorum gemma præ omnibus emicet; opus dico operum ejus præstantissimum, in quo ipse seipsum vicit.

Itaque ex ceteris, ubi eloquentiæ plusculum licebat, quam in Scripturis, primum genus est Polemicorum, vel Apologeticorum, quæ pertinent ad hæreses, & maledicorum calumnias refellendas. Hic enim, ut jam indicavimus, regnum quodammodo Hieronymi constitutum est, & præter quotidianum vigorem perpetua jucunditate, multoque sale aspergitur Oratio ejus. Eleganter Erasmus Præfat. in Tom. III. Quemadmodum M. Tullius nusquam est admirabilior in dicendo, quam ubi dolor ceu calcar addit eloquentiæ viribus: ita divus Hieronymus, cum nusquam non sit eruditus, nusquam non eloquens, tamen haud alibi dicit melius, quam ubi maledicit hæreticis, aut calumniatoribus: si tamen hoc est maledicere, quod verum est acriter defendere. Præcipui vero sunt in hoc genere Libri contra Jovinianum. Qua de re Augustini locupletissimum testimonium habemus, qui præ ceteris illos dilaudavit, suavissimam, & præclarissimam disputationem appellans, in qua Epicureum illum dilucidissime, & satis evidenter convicisset*. De iisdem Marianus Victorius in argumento ita ait: In ea (disputatione) ita omnes ingenii, & eloquentiæ vires vir sanctus explicuit.

* Epistola 132. nova inter Hieronymianas.

plicuit, ut ex hoc uno tantum opere, quantum ingenio, eloquentia, doctrina, rerumque omnium scientia divus Hieronymus præstiterit, liquido omnibus constare possit. Neque id valde mirum est iis, qui Hieronymum intimius noverunt. Faciebat enim pro eo ipsum argumentum, & genio quam maxime congruebat, continentia causam tueri. *Natus itaque suum campum, ut denuo Erasmi verbis utar, omnes ingenii, & eloquentia vires explicat, ac veluti luxuriat, & ita refellit hominem, ut literarum etiam imperitiam, & prodigiosam sermonis infantiam rideat, & infedetur.**

Ad Libros hos contra Jovinianum pertinet quoque Epistola 50. alias 51. ad Domnionem, qua juvenem Monachum, insolentem illum, & libertime cum matronis versantem acerrime castigat, & punit. De hac ait eruditissimus Stiltinghus in *Actis SS. ad diem XXX. Septemb. S. 31.* „Acri
„ est illa epistola, fateor, viderique posset nimis
„ acerba, si justa defuisset ita scribendi ratio. Verum
„ dubitare nequeo, quin sanctus Hieronymus
„ petulantem Monachum ita tractandum judicaverit,
„ quod vel inani gloria excitatum crederet
„ ad nomen sibi comparandum, vel quod ipsum
„ haberet suspectum, ut occultum Joviniani sectatorem.
„ Sive autem amore hæresis impelleretur, sive inanis gloriæ;
„ ejus obtrusionem non poterant non esse Romanis noxiæ,
„ erantque idoneo fundamento destitutæ: eaque saltem de
„ causa hominem cito compescendum credidit;
„ idque forsan magis effecit acri illa epistola, quam
„ apologia prolixior & moderatior, qua Romanos instruxit. „ In hac Epistola habuit
„ scilicet Erasmus, quod esset in rem suam, & pipere
„ faleque ejus plurimum delectatus inter perpetuos

petuos cachinnos legisse eam videri potest. Ait enim in argumento: *Hunc igitur (Monachum) mordicus arreptum miris jocis sursum, ac deorsum jactat, ac vexat. Sive vere fuit aliquis talis, sive sub hujus persona voluit omnes obtrectatores suos deterere, ut est vaser Hieronymus. Et hunc nescio quem subornavit, ne quid offenderet Dominionem, ut apparet Episcopum, aut certe Abbatem; nam patrem vocat & alias. Est autem tota jocosa epistola a capite usque ad calcem: sed a nomine temperans, quod liberius convitiatur.*

Sed & *Libri contra Helvidium, Vigilantium, Rufinum* editi quam maxime oratorii sunt, & locos plurimos habent, quos desperet aliquis assequi se posse dicendo. Adeo omnia ibi vivunt, ardent, & spectaculum exhibent, in quo ars & ingenium æquatis viribus de palma decertant. Quod tamen ardorem ipsum refutandi spectat, Hieronymus in neminem insurrexit vehementius, neminem majore contemptu tractavit, atque *Vigilantium*, volebat enim superbum animal, & monstrum illud turgens veneno, ut primum crexerat caput, in cunis ipsis præfocare.

Secundo loco ponendæ sunt *Epistolæ*, quas tamen ad nullum certum genus dicendi revocare possis. Aliæ enim *Paræneticæ* sunt: aliæ *Panegyricæ*: aliæ *Invectivæ*, *Jocosæ*, ac *Satyricæ*: aliæ etiam ad *Eruditionem* spectantes. Quid quod una & eadem varia est plerumque, & quædam habet, quæ ad omnia hæc genera pertineant? Ergo quo quis diligentius *Epistolas* legerit, eo majorem fore fatebitur difficultatem illas discernendi, distribuendique in classes suas. Istuc tamen asserere non dubitem, uti eæ, quæ *Scripturas* versant, minus ceteris faciunt ad eloquentiam parandam, sic eas, quæ *elogia*, & *epitaphia* continent præ omnibus eminere. Nihil illis festivius, facilius nihil, sed

nec urbanus, acutiusve reperies. Ejusmodi est *Epist.* 60. alias 3. ad *Heliodorum*, seu *Epitaphium Nepotiani*, quod *Stillingus* §. 32. eloquentissimum vocat. Ipse vero *Hieronymus* *Epist.* 30. nunc 77. fatetur: ad *Heliodorum Episcopum Nepotiani* scribens *Epitaphium*, quidquid habere potui virium, in illo tunc dolore consumpsi. Neque enim amoenitatem solum, & elegantiam habet: sed sententiis quoque refertum est, & in affectibus sive gravibus, sive teneris plane exultat. Talis est etiam *Epistola* 15. nunc 24. ad *Marcellam*: 16. nunc 127. ad *Principiam*: 27. nunc 105. ad *Eustochium*: 30. nunc 77. ad *Oceanum*.

Paræneticas inter excellunt 2. ad *Nepotianum*, nunc 52.

4. ad *Rusticum*, nunc 125.

7. ad *Lætiam*, nunc 107.

8. ad *Demetriadem*, nunc 130.

9. ad *Salvinam*, nunc 79.

10. ad *Furiam*, nunc 54.

11. ad *Ageruchiam*, seu *Gerontiam*, nunc 123. quam *Erasmus* *cumprimis eruditam & eloquentem* dicit, atque ob mirum digressionum artificium valde commendat.

12. ad *Gaudentium*, nunc 128.

13. ad *Paulinum*, nunc 58.

22. ad *Eustochium*.

34. ad *Julianum*, nunc 118.

Consolatorie præstantiores sunt cum omnes, quas supra inter *elogia* recensui, tum

9. ad *Salvinam*, nunc 79.

25. ad *Paulam*, nunc 39.

26. ad

26. ad Pammachium, nunc 66. & hæc
juxta Erasmus, tametsi brevis est,
tamen multum habet & eruditionis,
& eloquentiæ, utpote ad virum eru-
ditum, & eloquentem scripta a viro
omnium doctissimo, & eloquentissimo.
33. ad Castrutium, nunc 68.
34. ad Julianum, nunc 118.

Porro de Epistola 27. ad Eustochium nunc
105. illud adhuc monendum: fatetur
Hieronymus ex iplo dolore profectam,
& in ea sensum pectoris loqui. Falli-
tur tamen quam maxime, quod ideo
dicat incultam orationem absque ulla
elegantia, & verborum lepore esse.

Inter Invektivas, Satyricas, ac pungentes excellunt

47. de vitando suspect. contubernio,
nunc 117.

48. ad Sabinianum, nunc 147.

51. ad Domnionem, nunc 50. de
qua supra diximus, quod ve-
lut catum cum musculo lu-
dentem exhibeat.

83. ad Oceanum, nunc 69.

99. ad Asellam, nunc 45.

100. ad Marcellam de Onaso, nunc
40.

102. ad Marcellam, nunc 27.

Sed & in ceteris, ubi merum mel latere
putes multum sæpe piperis inest, ut infra
dicemus.

Urbanæ, jucundæ, & officiorum plenæ

17. ad Marcellam, nunc 46.

18. ad eandem, nunc 43.

19. ad Eustochium, nunc 31.

37. *ad Julianum, nunc 6.*42. *ad Niceam, nunc 8.*43. *ad Chromatium, Jovin. & Euseb. nunc 7.*44. *ad Chrysogonum nunc 9.*

Ad Epistolas quoque præsertim officiosas multa pertinent ex Procemiis Scripturarum. Et dignissima profecto sunt, quæ inter illas reponantur.

Porro de omnibus universe Epistolis dici potest, eas laudari nunquam satis posse. Tanta est in iis libertas, facundia, amœnitas, & eruditio, ut quotquot eas legerint, admirentur, atque deprædicent. Tam narrat apposite, tam jucunde digreditur, tam acriter torquet, vel repellit, tam dulciter ciet affectus, tam docet sententiose, tam acute fodicat, tam ad vivum mores describit, præsertim cum mensarum, ac mulierum assecclas Clericos, dubias virgines, superbos Monachos cedit, atque flagellat. *Vere fatebor*, ait apud Severum Sulpitium Posthumianus: *pinxisse mihi videtur vitia.* * Et iterum admirans: *Quam vera, quam fortia disputavit!* Adeo nempe Hieronymus instar medici ferro & igne armati prodesse maluit, quam placere sceleratis. Cornelius a Lapide *Prolegom. in Threnos Jeremiæ*: *Epistolæ ejus*, ait, *dicendi libertate, efficacia, acrimonia æque, ac styli elegantia, spiritu & præceptis virtutum, ac perfectionis cuique statui accomodatis superant omnes omnium Patrum, & Doctorem Epistolas, aureæque sunt, ac dignissimæ, quæ ab omnibus assidue legantur, & terantur.* Sunt vero singula, quæ dixi, eo magis miranda, quod, ut jam innuimus, maximam earum, & præcipuam partem dictavit solum, non elaboravit, magis sollicitus, ut brevi absolveret, quam, ut aliquantum exornaret. Certe 47. nunc 117. *de vitando suspecto contubernio*, etsi velocissime dictata, tam est admi-

* *Dialog. I.*

admirabilis, tamque perfecta, ut quidam, ipso referente *, confictum ab eo argumentum dicerent, in quo libere indulgeret sibi, ac per otium rhetoricaretur. Sed & 34. nunc 118. ad *Julianum* non integra hora dictatam, in qua juxta Auctorem amicū duntaxat reperire sit, non oratorem, Stiltin-ghus §. 51. elegantem tamen vocat, & eruditam, nec magis eloquentia oratoris, quam libertate ami-ci carere dicit. Sed de Epistolis satis. Superest, ut cum Cassiodoro ** de iisdem loquente excla-memus: *Beati, quibus scribere Domino præstante di-gnatus est!* Concionatoribus vero cum S. Francisco Salesio *Libro I. Epist. 34.* propter excellentem, ut ait, phrasin etiam atque etiam commendatas eas cupiamus. ***

Ex Historicis, & narrationibus præcipua sunt de Muliere septies idta.

Vita S. Pauli primi Eremitæ.

Vita S. Hilarionis.

maxime autem *Vita Malchi Monachi.*

In his omnibus sic ingenio indulgit, ut veritati ta-men nec minimum officeret. Et in primo quidem libello adhuc juvenis lusit, ut remissum, ac defue-tum jam stylum acueret nonnihil, & ad pristinum usum revocaret. De Vita vero Pauli *Epist. 21. ad Paulum Concordiensem, nunc 10.* ipse testatur, se po-tius laborasse, ne eloquentior esset, quam lecto-rum simplicitas ferret. *Misimus interim,* ait, *te tibi, id est, Paulo Seni Paulum Seniore, in quo propter simplices quosque multum in dejiciendo ser-mone laboravimus. Sed nescio, quomodo, etiamsi aqua*

* *Libr. contra Vigilantium initio fere. Cresollus Libr. IV. Theatr. Rhetor. cap. 9. ornatissimam appellat.*

** *Libr. I. de Instit. divin. Liter. c. 21.*

*** *Lege etiam, quæ de illis memorant Trivultenses ad annum 1704. a pag. 916.*

aqua plena sit, tamen eundem odorem lagena servat, quo, dum rudis esset, imbuta est.

His, quæ copiosissime de Hieronymi Eloquentia disputavimus, adjungi præterea possunt, quæ habent Vergerius oratione citata de *Laudibus S. Hieronymi*: Franciscus Philadelphus *Libro VI. Epist. ultima*: Erasmus in *Vita*, in *Dedicationibus* item, & *Præfationibus* operum, & in *Epistolis I. XXV. & XXVI. Libri 2.*: Christianus Massæus in *Chronico*: Marianus Victorius in *Vita*, & *Præfatione*: Cornelius Schultingus Steinwichius in *Præfationib. Confessionis suæ Hieronymianæ*. Hieronymus Guadalupe in *vita*: Baronius in *Annalibus*: Joan. Philipp. Thomæus *Orat. de Laudib. Hieronymi*: Gaspar Barthius *Libro LI. adversar. cap. 11.* Joan. Bapt. Masculus in *Ponderationibus Concionalib. ad opera S. Hieronymi*: Fridericus Gronovius *Libr. observator. in scriptor. Eccles. cap. 19.* Joannes Martianay Maurinus in *Vita*, aliisque ad novam editionem spectantibus: Joannes Croiset in *Exercit. Pietat. ad diem 30. Septembr.* Ignat. Hyacinth. Amat de Graveson *Libr. II. Histor. Eccles. pag. mihi 36.* Joannes Clericus in *Questionibus Hieronymianis undecim*: Augustinus Dolci in *Commentario de Morib. doctrin. & Reb. gest. S. Hieronymi*: Dominicus Vallarsius in *ultima editione Veronensi*, quæ Maurinam multum antecellit: Joannes Stiltinghus in *Actis SS. ad diem 30. Septembr. præsertim §. 5. & alias*, obiter quidem, verum præclare semper de eloquentia S. Doctoris commemorans.

DISSERTATIO VIII.

De Eloquentia S. AUGUSTINI.

CAPUT I.

Quæ laudes illius, & sententiæ Auctorum?

Equidem hic stylo vixdum arrepto velut in Scopulum quemdam video me imegisse. Quid enim, interpellabunt plurimi, & tantum non junctis vocibus inclamabunt, quid? Augustinum quoque inter Eloquentiæ exempla obtrudi nobis? Quid.

Quidvis magnum, atque excelsum de eo dicas: sanctissimum appelles licet, & doctissimum: primas adeo illi tribuas inter ceteros Doctores: verum oratorem, atque eloquentem ne vendita. Ut enim coneris, & opere maximo des operam, nunquam ostendes, nunquam persuadebis, nunquam nisi apud imperitos fidem es inventurus. Itaque familiares sibi homilias allegant, in quibus jam densas stribilignes, plebeiam phrasin, & speciem quamdam loquacitatis: jam affectata acumina, & lusus verborum: jam earundem rerum crebram repetitionem, jam subinane quiddam ac vacuum, jam protensum, & implexum genus dicendi, circuitusque quam fusos, tam obscuros putant se deprehendisse. Addunt forte, habere Augustinum suæ gentis non aliqua solum, verum omnia, quibus necesse sit fieri, ut tenuiter literati eum ægerime intelligant, & politiores, nisi pietas fastidium excludat, cum tædio evolvant. Satin' verborum, an plura super? Ergo & mihi respondere fas sit, quando hæc non nova, sed antiquissima sunt, atque apud Erasimum iisdem fere sententiis legi possunt.

Et primo quidem loco illud commemorandum est, Augustinum adeo Rhetoricæ ignarum non fuisse, ut eandem Carthagine, Romæ, Mediolani, maximis scilicet, & literatissimis Urbibus luce palam professus sit, & in libris de doctrina christiana cum summis dicendi Magistris hodieque de palma decertet. Imo *Libr. IV. Confess. c. 16.* de se ipse affirmat, quod omnes libros artium, quas liberales vocant, per se ipsum legerit, & quidquid est de arte loquendi aut differendi, sine magna difficultate, nullo hominum tradente, intellexerit.

Secundo, ausim dicere, dimidiam fere partem, quæ inter scripta ejus recenseri solet, non esse Augustini, sed vel fraude, vel inscitia in opera genuina

nuina irrepfisse. Inter homilias vero *de tempore, de Sanctis, de diversis* numerus ingens illi suppositus; atque utinam non plura in ipso Penſo canonico ſplendidum hoc nomen præferrent, quæ dudum convenit inter eruditos ex Auguſtini calamo nunquam profluxiſſe. Qui fidem mihi non habet, obiter cujuſque Tomi appendicem percurrat, vadem me præſto, tantum ille corruptarum ejusmodi mercium reperiet, quantum in nullo alio,* maxime autem iſtuc in Tomo illo decimo apparet, quem idcirco Werlinus, qui in legendo Auguſtino totus fuit, minime dubitat fæces operum Auguſtinianorum appellare.

Tertio Materiæ conditio ea plerumque eſt apud Auguſtinum, in qua vix eſſe poſſit eloquentiæ locus. Neque ullus eſt Patrum ſive Latinorum, ſive Græcorum, cui tanto numero jam ſubtilia, jam erudita, jam abſtruſa & ante incognita tractanda ſe offerebant.

Quarto ſtudioſa quoque negligentia ſcribere nonnunquam aggreſſus eſt Auguſtinus, uti legere-tur a populo, quemadmodum librum, quem *agoneſt* inſcribit. Ut enim latine adhuc loquebantur Poeni, ſic male, & barbare loquebantur. Eum enim ait ſe *fratribus in eloquio latino ineruditis humili ſermone conſcripiſſe, fidei regulam continentem, & præcepta vivendi. L. 2. Retract. cap. 3.* Eandem rationem ſimplicioris ſtyli dat *L. 1. de Geſeſi contra Manichæos cap. 1.* Recentior Criticus Claudius Fleury *de Moribus primorum Chriſtianor. §. 40.* ita in hanc rem loquitur: *Sermones S. Auguſtini inter omnia ejus opera omnium maxime popu-*

* Quod ſi quis examinare rem per ſe velit, toties ab aliis jam examinatam, legat Simonem Werlinum in *Criſi Auguſtiniana*, & Bernardum Windingum in *Critico Auguſtiniano caſtigato*, aut certe Maurinorum in ſingula opera admonitiones conſulat.

pulares sunt. Stylus est longe concisior, faciliorque, quam sit ille Epistolarum; quod scilicet in oppido suonautas maxime, opifices & propolas auditores haberet. Verum in scriptis polemicis de dogmatibus, præcipue in libris contra Julianum eloquentiam, quam publice docuerat, præclare usurpare, & adhibere novit.

*Quinto, ut Erasmi verbis utar, multa non scripsit, sed dictavit: pleraque per notarios ex ore loquentis excepta sunt, cujusmodi ferme sunt enarrationes Scripturarum ad populum, quos ipse tractatus appellat, aut confutationes cum hæreticis, quæ olim publicitus apud plebem fieri consueverunt. Nec alibi mihi videtur admirabilior. Quibus mediocre contingit ingenium, si lucubrandi curam adhibeant, excudunt interdum aliquid non contemnendum. Ceterum in extemporali dictatione tantam adesse mentis perspicaciam, tantam memoriæ præsentiam, tam paratam orationis copiam, non sine perpetua quadam jucunditate, quis non miretur, quis hoc hodie præstare queat vel ex istis, qui studium omne collocant in paranda dictationis facultate? **

*Sexto quod si quædam ipse per se scripsit, inter tot labores rebus semper, non verbis intentus, vel propere ea coniecit in chartam, vel certe limare noluit, minus exornare. Ut omittam cetera, vel ex sola Epistola 56. nunc 118. ad Dioscorum clarum est, quantum sub mole ea negotiorum, & totius Ecclesiæ hostibus in unum ipsum incumben-
tibus, cum respirare vix licebat, a jactantia & studio famæ abhorreret.*

Septimo fructus concionum uberrimi, plausus videlicet, acclamationes, concursus, hæretici dein, & gentiles ad Ecclesiam adducti, inolita vitia emendata & ipsa per se locupletissima sunt testimonia, quam maxime Augustinum dicendo valuisse, nec facile

* In Nuncupatoria Operum ad Archiepiscopum Toletanum.

facile æqualem populari facundia habuisse. Testatur Possidius, ad Tractatus ad populum habitos ipsos etiam hæreticos, sanctitate & eruditione viri permotos, miscuisse se Catholicis, atque ardore ingenti, & Notariis adeo adductis, qui excepta ab ore ejus describerent, ex omni Africa concurrisse. Sed & ipse fatetur in *Prolog. Retract.* quotiescunque se præsentem negotium aliquod incidisset ejusmodi, ut de superiore loco essent verba facienda, sibi solitum demandari. Quod eo magis est mirandum, quia & Presbytero contigit: imo in Concilio Carthaginensi necdum Episcopum de fide, & symbolo disputantem audire voluerunt Patres, cum biennio ante Presbyterum præsentem Episcopo dicere plane inauditum fuisset. Hac ergo eloquentia, uti ipse rursus fatetur *, ex Mauritanie antiquissima urbe, quam Cæsaream dicunt, ludos immanes, & nefarios Augustinus relegavit. Ludi autem sic erant, si tamen ita nominare eos licet. Cives in duo agmina discreti lapidibus inter se eo furore, & pertinacia decertabant, uti a fratribus fratres, ab amicis amici, quin filii a parentibus veluti per jocos necarentur. Ne vero quid deesset ad immanitatem, non momentis aliquot, aut etiam horis, sed diebus continuis civile illud bellum durabat. Vir sanctus barbariei impatiens, cum esset in animis inveterata dulcedo infantiæ ejus, convocata concione immanissimum morem gravissimis verbis dementiæ ac furoris accusat, nec ante dicendi, aut tonandi potius, fulminandique finem facit, dum ex omnium comploratione, & poenitentia significationibus aliis intellexisset, mentes ad humanitatem, & rerum suarum odium inclinatas. Id quod re ipsa post contigit, consuetudine ea penitus abrogata. „Egi quidem, ait, granditer, quantum
„valui.

* *L. 4. de Doctrin. Christian. c. 24.*

„ valui, ut tam crudele, atque inveteratum ma-
„ lum de cordibus, & moribus eorum avellerem,
„ pelleremque dicendo. Non tamen egisse aliquid
„ me putavi, cum eos audirem acclamantes, sed
„ cum flentes viderem. Acclamationibus quippe
„ se doceri, & delectari, flecti autem lacrimis in-
„ dicabant. Quod ubi aspexi, immanem illam
„ consuetudinem a patribus & avis, longeque a
„ majoribus traditam, quæ pectora eorum hosti-
„ liter obsidebat, vel potius possidebat, devictam,
„ anteaquam reipsa id ostenderent, credidi: mox-
„ que sermone finito ad agendas Deo gratias cor-
„ da, atque ora converti. Et ecce jam ferme octo
„ vel amplius anni sunt propitio Christo, ex quo
„ illic nihil tale tentatum est., Atque ita S. Do-
ctor morem tam inveteratum, quam atrocem elo-
quentiæ vi sustulit penitus: victoria tali, cui pa-
rem vel a summis oratoribus partam vix ullibi sit
reperire. Addit denique eodem loco: *Sunt & alia
multa experimenta, quibus didicimus, homines, quid
in eis fecerit sapientis granditas dictionis, non cla-
more potius, quam gemitu, aliquando etiam lacrimis,
postremo vitæ mutatione monstrasse.* Idem eod. Libro
c. 18. obiter de sua aliqua concione memorat, quod,
cum de calice aquæ frigidæ, cui Deus, si disci-
pulo datus esset, æternam mercedem promisit,
diceret ad populum, tanquam de illa aqua frigida
quædam flamma surrexerit, quæ etiam frigida ho-
minum pectora ad misericordiæ opera facienda spe
cœlestis mercedis accenderet.

Denique turpissimum Afri morem habebant,
uti sub specie religionis in ipsis templis Martyrum
vinolenta convivia instituerent, eaque ratione an-
nuas eorum festivitates profanarent. Augustinus
adhuc Presbyter contra abusum hunc tam vehe-
menter, eaque copia dixit, ut subigeret populum
denique, & epularum loco hymnos, & laudes

divinas substitueret. Rei gestæ seriem ex ipsiusmet *Epistola 29. ad Alypium*, quantum licuit, a Maurinis contracta, recitabo. * Antequam solennis dies recurrisset, cum nuntiatum esset Augustino, tumultuari homines & dicere, se ferre non posse, ut illa solennitas prohiberetur, opportune accidit, ut quarta feria ante diem quadragesimæ capitulum Evangelii ex ordine; seu *consequenter* tractandum sese illud offerret: *Nolite dare sanctum canibus*. Eo ad propositum adhibito effecit, ut viderent, quam esset nefarium intra Ecclesiæ parietes id agere; quod in suis domibus si agere perseverarent, a sancto, & margaritis Ecclesiasticis eos arceri deberet. Sed hæc quamvis grate accepta essent; tamen quia ad concionem pauci convenerant, non erat satisfactum tanto negotio; præterquam quod iste sermo, cum ab eis, qui adfuerant, pro cuiusque facultate, & studio foris ventilaretur, contradictores multos habuit.

Itaque postquam dies quadragesimæ illuxisset, quo frequentior multitudo ad horam tractationis occurrit, lectum est istud in Evangelio, ubi Dominus de templo expulit venditores animalium, & nummulariorum mensas evertit. Quod capitulum ipse quoque Augustinus proposita vinolentiæ quæstione recitavit, adjunxitque disputationem, qua ostenderet, quanto commotius & vehementius Dominus noster ebriosa convivia, quæ ubique sunt turpia, de templo expelleret, unde sic expulit concessa commercia. Tum ex præparatis sibi lectionibus adjecit, ipsum adhuc carnalem populum Judæorum in illo templo, ubi nondum corpus & sanguis Domini offerebatur, non solum vinolenta, sed nec sobria quidem unquam celebrasse

* Epistola hæc primum reperta, atque edita est a Maurinis.

brasse convivia, nec eos publice religionis nomine inebriatos inveniri in historia, nisi cum festa fabricationis Idoli exsolverent. Ibi autem codice accepto locum illum totum recitavit: addiditque cum dolore, quo potuit, siquidem Moyſes propter illos ebrios binas lapideas tabulas confregisset, quomodo non possemus illorum corda confringere, qui homines novi testamenti Sanctorum diebus celebrandis ea vellent solenniter exhibere, quæ populus veteris Testamenti & semel, & Idolo celebravit? Tunc reddito codice crimen ebrietatis exaggerans sumpsit Apostolum, & inter quæ peccata id positum esset, ostendit, legens hunc locum: *Si quis frater nominatur aut fornicator, aut idolis serviens, aut avarus, aut maledicus, aut ebriosus, aut rapax, cum ejusmodi nec cibum sumere: ingemiscendo admonens, cum quanto periculo convivarentur cum eis, qui vel in domibus inebriantur. Legit etiam illud, quod non longo intervallo sequitur: Nolite errare, neque fornicatores, neque idolis servientes &c.* Quibus lectis monuit, ut considerarent, quomodo possent audire: *Sed ablutistis*, qui adhuc tales concupiscentiæ sordes, contra quas clauditur regnum cœlorum, in corde suo, interiore Dei templo, esse patiuntur. Inde ventum ad illud capitulum: *Convenientibus ergo vobis in unum &c.* quo recitato diligentius commendavit, ne honesta quidem & sobria convivia licere in Ecclesia celebrari. Commemoravit etiam Evangelii capitulum, quod pridie tractaverat, ubi de pseudopropheta dictum est: *Ex fructibus eorum cognoscetis eos.* Deinde in memoriam revocavit, fructus eo loco non appellari nisi opera: & recitato illo capitulo ad Galatas: *Manifesta autem sunt opera carnis &c.* interrogavit, quomodo de fructu ebrietatis inter carnis opera nominatæ agnoscerentur Christiani: egitque ut adverterent, quam esset

pudendum, atque plangendum, quod de illis fructibus carnis non solum privatim vivere, sed etiam honorem Ecclesiæ deferre cuperent: de spiritualibus autem fructibus, ad quos & Scripturarum auctoritate, & ipsius gemitibus invitarentur, nolent afferre Deo munera, & his potissimum celebrare festa Sanctorum. His peractis codicem reddidit, & imperata oratione ante oculos constituit commune periculum, cum eorum, qui ejus curæ commissi essent, tum suum ipsius, qui de illis rationem redditurus esset pastorum Principi, per cujus humilitatem, insignes contumelias, alapas, & sputa in faciem & palmas, & spineam coronam, & crucem, ac sanguinem obsecravit, ut si se ipsi offendissent, vel ipsius misererentur, & cogitarent venerabilis senis Valerii circa ipsum ineffabilem caritatem, qui ei tractandi verba veritatis tam periculosum onus propter eos imposuerit, eis-que sæpe dixerit, suas orationes exauditas esse de ipsius adventu, quem non utique ad communem mortem vel spectaculum mortis eorum, sed ad communem conatum in vitam æternam ad se venisse lætatus est. Postremo etiam dixit, certum se esse, & fidere in Deum, quod si hæc tanta, quæ sibi essent lecta, & dicta, contemnerent, visitaturus esset in virga, & in flagello, nec eos permissurus cum hoc mundo damnari. Cum talia dicerentur, „ non ego illorum lacrimas, ait Augustinus, meis lacrimis movi, sed fateor eorum „ fletu præventus meum abstinere non potui. Et „ cum jam pariter flevissemus, plenissima spe correctionis illorum, finis sermonis mei factus est. „

Postridie vero cum illuxisset dies, cui solebant fauces, ventresque præparare, nuntiatum est sancto Presbytero, nonnullos eorum etiam, qui sermoni aderant, nondum a murmuratione cessasse, tantumque in eis valere vim pessimæ consuetudinis, ut ejus

tan-

tantum voce uterentur, & dicerent: Quare modo? num enim antea, qui hæc non prohibuerunt, Christiani non erant? Quo audito, quas maiores ad eos commovendos machinas præpararet, omnino nesciebat; disponebat tamen, si perseverandum putarent, lecto illo loco de Ezechiele: *Explorator absolvitur, si periculum denuntiaverit, etiamsi illi, quibus denuntiatur, cavere noluerint*, vestimenta sua excutere, atque discedere. Verum Deo votis ejus, & conatibus favente, qui de oppugnatione vetustæ consuetudinis conquesti erant, iidem ipsi cum forte jam vererentur, ne sanctum virum vel Hippone, vel a præsentī saltem concione abscedere cogerent, ingressi sunt ad eum ante horam, qua exedram ascenderet. Quos ipse blande acceptos paucis verbis in sanam sententiam transtulit: atque ubi ventum est ad tempus disputationis, omīssa lectione, quam præparaverat, quia necessaria jam non videbatur, de hac ipsa quæstione pauca disseruit, nihil se nec brevius, nec verius posse afferre adversus eos, qui dicunt: Quare modo? nisi & ipse dicat: Vel modo. Deinde ne illi, qui ante vel permiserunt hæc in Sanctorum natalitiis convivā, vel ea prohibere non ausi sunt, aliqua ab eo affici contumelia viderentur, exposuit populo, qua necessitate ista in Ecclesia crederentur exorta: scilicet post persecutiones facta pace, cum turbæ gentilium in christianum nomen venire cupientes hoc impedirentur, quod dies festos cum idolis suis solerent in abundantia epularum, & ebrietate consumere, nec facile ab his perniciosissimis, & tam vetustissimis voluptatibus se possent abstinere: visum fuisse Majoribus nostris, ut huic infirmitatis parti interim parceretur, diesque festos post eos, quos relinquebant, alios in honorem sanctorum Martyrum, vel non simili sacrilegio, quamvis simili luxu celebrarent, ut jam Christi nomine colligatis, & tantæ auctoritatis jugo subditis salu-

taria sobrietatis præcepta traderentur, quibus jam propter præcipientis honorem, ac timorem resistere non valerent: quocirca jam tempus esse, ut qui non se audent negare christianos, secundum Christi voluntatem vivere incipiant, ut ea, quæ, ut essent Christiani, concessa sunt, cum Christiani sunt, respiciantur. Deinde hortatus est, ut transmarinarum Ecclesiarum, in quibus vel ista recepta nunquam sunt, vel jam correctæ, imitatores se præbere velent. Et quoniam de Basilica beati Petri Apostoli quotidianæ vinolentiæ proferebantur exempla; dixit primo, audisse se, id sæpe esse prohibitum, sed cum remotus sit locus ab Episcopi habitatione, atque in tanta civitate magna sit carnalium multitudo, peregrinis præsertim, qui novi subinde veniunt, tanto violentius, quanto inscitius illam consuetudinem retinentibus, tam immanem pestem nondum compesci, sedarique potuisse. Verumtamen ipsis, si Petrum Apostolum honorarent, præcepta ejus audienda, & multo devotius epistolam, in qua voluntas ejus perspicitur, quam Basilicam considerandam esse, statimque accepto codice recitavit: *Christo enim passa pro nobis per carnem, & vos eadem cogitatione armamini. Sufficit enim vobis præteritum tempus voluntate hominum perfecisse, ambulantes in libidinibus, desideriis, ebrietate, comessationibus, & nefandis idolorum servitutibus.* Quibus gestis, cum omnes uno animo in bonam voluntatem ire; contempta mala consuetudine, jam cerneret, hortatus est, ut meridiano tempore divinis lectionibus, & psalmis interessent: ita illum diem multo mundius, atque sincerius placere celebrandum. Et certe de multitudine convenientium facile posse apparere, qui mentem, & qui ventrem sequerentur. Ita lectis omnibus sermo terminatus est. Pomeridiano autem die major, quam ante meridiem adfuit multitudo, eisque ad horam, qua Presbyter Augu-

Augustinus cum Episcopo egrederetur, legebatur alternatim, & psallebatur: ipsisque egressis duo psalmi lecti sunt. Deinde Augustinum invitum, qui jam cupiebat peractum esse tam periculosum diem, compulit Valerius, ut aliquid plebi loqueretur. Habuit brevem sermonem, quo gratias ageret Deo. Et quoniam in hæreticorum basilica audierat ab eis solita convivia celebrata, cum adhuc eo ipso tempore, quo a catholicis ista gerebantur, illi in poculis perdurarent, dixit, diei pulchritudinem noctis comparatione decorari, & colorem candidum nigri vicinitate esse gratiorem; ita suum spiritualis celebrationis conventum minus fortasse futurum fuisse jocundum, nisi ex alia parte carnalis ingurgitatio conferretur: hortatusque est, ut tales epulas instantè appetèrent, si gustassent, quam suavis est Dominus. Atque in hanc sententiam pro tempore, cum ea, quæ Dominus suggerebat, dicta essent, acta sunt vespertina, quæ quotidie solebant: & Augustino recedente unacum Episcopo, fratres, forte monachi, eodem loco hymnum dixerunt, non parvâ multitudine utriusque sexus ad obscuratum diem manente, atque psallente.

Hæ tres conciones in negotio tam difficili ad auditores minime faventes ex tempore dicti tam illustres mihi videntur, tamque efficaces, ut vix putem me alios magis admiratum esse, quos vel apud Principes concionatorum legi. Quid enim hic deest ex officiis summi oratoris! quam solida, efficaciaque sunt argumenta! quam intimi, accomodati-que affectus! quæ denique prudentia, quæ peritia conciliandi animos elucent! Quid si sermones ipsi, ut habiti sunt, scripti ad nos pervenissent?

His porro consideratis rectè dixerim cum Causino *: *Scholasticis fortasse innutriti verborum deliciis*

O 4

hand

* L. 15. de Eloquentia sacra, & humana, ante medium.

haud existimarint disertum (Augustinum) sed nesciunt, ubi sit illud, quod quærimus, decus eloquentiæ. Ego vero miror hominem in differendo subtilem, in certando invictum, in exhortando acrem, & sibi instantem, in persuadendo, quod est colophon oratoris, efficacissimum, qui mihi in eo videtur eloquentissimus, quod eloquentiam, qua beatissimum ejus pectus erat oppletum, minime profiteri videatur. Nunc quanta per omnes ætates summorum virorum de eloquentia Augustini existimatio, ac sententia esset, dicamus.

S. HIERONYMUS *L. III. Dialogor. contr. Pelagian. c. 6.* Augustinum virum sanctum, & eloquentem dicit. Additque rationem, cur scribere nollet de argumento, quod Augustinus jam tractasset: *Super sedendum huic labori censeo, ne dicatur mihi illud Horatii: IN SYLVAM NE LIGNA FERAS. Aut enim eadem dicemus ex superfluo, aut si nova voluerimus dicere, a clarissimo ingenio occupata sunt meliora.* Iterum *Epist. 94. nunc 134.* Augustini libellos suo nomini dedicatos eruditissimos, & omni eloquentiæ splendore fulgentes appellat &c.

S. PAULINUS *Epist. 36. nunc 32. ad Romanianum,* Augustinum propter efficaciam commovendi, ac persuadendi *Domini tubam* dixit.

S. POSSIDIUS Augustini per tot annos convictor, & intimus cognitor *Epist. ad Macedonium* præter alia illum propter gesta scriptaque sua vocat *Patrem Patrum, Doctorem Doctorum:* & denique post alia concludens, si cuncta, ait, corporis membra verterentur in linguas, adhuc non essem sufficiens ad laudandum tantum Patrem, & Doctorem.

NEBRIDIUS & ipse sancti discipulus, ac familiaris *Epist. inter Augustinianas 71. nunc 6. Epistolas tuas,* inquit, perplacet ita servare, ut oculos meas; sunt enim magnæ non quantitate, sed rebus, & magnarum rerum magnas continent probationes. Illæ mihi
Chri-

Christum, illæ Platonem, illæ Plotinum sonabunt *.
Erunt igitur mihi & ad audiendum propter eloquentiam dulces, & ad legendum propter brevitatem faciles, & ad intelligendum propter sapientiam salubres.

MACEDONIUS *Africæ Vicarius Epist. 51. nunc 154.* in scriptis ejus, ait, miro modo affici se sapientia ejus, tanto acumini, scientiæ, & sanctitati conjuncta. Dein ista subdit: *Ita mihi Deus propitius sit, ut ego anceps sum, quid in illis magis mirer sacerdotii perfectionem, Philosophicæ dogmata, historiæ plenam notitiam, an facundiæ plenam jucunditatem, quæ ita imperitos etiam illicere potest, ut donec explicent (i. e. legendo absolvant) non desistant, & cum explicaverint, adhuc requirant.*

DARIUS COMES *Epist. 263. nunc 230.* nequit explicare satis ingens desiderium eundem concionantem audiendi. Digna sunt verba, quæ legantur, verum longiora, quam ut huc transcribi possint.

S. PROSPER in *chronico ad annum 395.* vocat virum multa facundia, doctrinaque excellentem. Et *Libr. contra Collatorem cap. 1.* ut ostenderet, quantum voce & stylo contra hæreticos, Pelagianos præsertim, valeret, *Viginti, inquit, & eo amplius anni sunt, quod contra inimicos gratiæ Dei catholica acies hujus viri ductu pugnat, & vincit.* Similia habet æque gravia *Carminè de Ingratis.*

JULIANUS POMOERIUS *Libr. 3. de Vita contempt. cap. 31.* Augustinum acrem ingenio, suavem eloquio appellat.

VICTOR VITENSIS *L. 1. de Persecut. Wandalic.* Augustinum dicit *flumen eloquentiæ, quod ubertim per omnes campos Ecclesiæ decurrens, dulcedinem suavitatis dulcius propinatum fudit.*

* Quo suavitatem Sancti Doctoris vult significare.

CASSIODORUS *cap. 1. de Instit. div. lection. vocat disertum, atque cautissimum disputatorem. In Prologo autem super Psalmos, Doctorem eximium, literarum omnium Magistrum, qui tanquam fons purissimus de nulla fœce pollutus decurreret.*

FACUNDUS HERMIANENSIS *Libr. 9. de trib. capitul. c. ult. Augustinum vocat præcipuum fidei catholicæ prædicatorem, virum apostolicum, & adaman-tinum, in quo omnes oblocutorum dentes frangantur.*

S. GREGORIUS MAGNUS *Libr. 10. Epist. 37. Si delizioso cupitis pabulo saginari, beati Augustini opuscula legite, & ad comparationem filiginis illius nostrum fursurem non quæritis.*

S. PRUDENTIUS TRECENSIS *Epistol. ad Hincmarum, & Pardulam cap. 1. Nullus Doctorem, ait, abstrusa earum (Scripturarum) scrupulosius rimatus est, diligentius exquisivit, verius invenit, veracius protulit, luculentius enodavit, fidelius tenuit, robustius defendit, effusus disseminavit.*

HINCMARUS RHEMENSIS *Libr. de Prædest. cap. 11. Augustinum nominat gratiæ cælestis oratorem.*

B. PETRUS DAMIANI *Serm. de S. Stephano Augustinum vocat Linguam Ecclesiæ.*

ODO CAMERACENSIS dum forte libros Augustini de libero arbitrio coëmisset, quod mundanæ sapientiæ deditus magis delectaretur lectione Platonis, quam Augustini, in scrinii angulum projecit. Cum vero post Boëtium de consolatione Philosophiæ discipulis prælegeret, devenissetque ad librum quartum, qui est de libero arbitrio, recordatus empti libri, lectoque ejus initio convocatis scholaribus suis affirmavit: *Vere hætenus ignoravi Augustinum tantæ, tamque delectabilis fuisse facundiæ. Perlegendo dein tertium librum in virum alterum mutatus, scholas paulatim deferuit, Ecclesiæ frequen-tavit, ac demum toti mundo nuntium remisit.* Ita refert

refert Herimanus Tornacensis Monachus in *Spicilegio Dacherlano* Tom. 12.

S. BERNARDUS *Serm.* 80. in *Cantic.* Augustinum vocat *validissimum malleum hæreticorum*, quo scilicet ob vim, & efficaciam contusi omnes, & obtriti fuerunt.

MARTINUS V. PAPA in *Serm. de Translat. S. Monicæ*: Quicumque, ait, de Christo, de Fide, de Religione aliquid saperent, omnibus in ore erat Augustinus, ut nihil pene ex sacris libris possit nisi eo duce intelligi, nihil nisi eo interprete explicari. Eo jam auctore factum, ut nec Philosophis sapientiam invidemus, nec oratorum eloquentiam desideremus &c.

S. THOMAS VILLANOVANUS *Conc. III. de D. Augustin.* Quis ita, exclamat, excelluit ingenio? quis ita valuit facundia? quis humanarum, divinarumque rerum sapientia sic effulsit? quis tot, tantisque voluminibus Dei Ecclesiam illustravit?

Quod si quis hic nomini, gratiæve, certe doctrinæ Augustini datum aliquid existimat, age, inimicos, qui certe assentari minime voluerunt, eloquentiæ ejus judices constituamus. Hos inter NECTARIUS vir paganus * Augustinum *instructum omnibus disciplinis utrum* appellat. SECUNDINUS Manichæus **, contra quem pugnavit Sanctus Doctor: *Hæc scripta*, inquit, *cum suspenso animo, agilique oculo iterum, iterumque repetissem, summum inveni ubique oratorem, & Deum pene totius eloquentiæ.* Et infra: *Ego namque fateor non tali diligentia, nec tanta industria Anicianæ domus micare marmora, quanta tua scripta perlucet eloquentia.* Alius hæreticus Donatista, CRESCONIUS Grammaticus ***, audet eo nomi-

* *Epist.* 201. nunc 90. inter Augustinianas.

** *Epist.* præfixa *Libr. contra eundem* Tom. VI. *antiqu.* nunc 8vo.

*** *Libr. I. contra Cresconium sæpe.*

nomine Augustinum vocare in invidiam, quod nimis eloquentia valeret, tantumque ad populum sermonibus posset. LONGINIANUS Philosophus Ethnicus *Epistol. 21. nunc. 234.* sancta scripta ejus vocat jam non melle, sed nectare dulciora. De MAXIMO MADAURENSI gentili pariter Philosopho aptius infra dicetur. De DONATISTIS autem, sed & aliis notum est, acumen eos, & stringentes Augustini figuras adeo pertinuisse, ut disputare cum eo hac de causa omnes recusarent, quin affirmate edicerent, hominis eloquentiam, & dialecticam sectatoribus suis omni ratione fugiendam. Itaque, ut ex fine *Epistol. 168. nunc 34.* habemus, coactus est aliquando, uti eos ad disputandum cum alio Præsule, liberalium artium imperito invitaret. Taceo jam heterodoxorum posteriorum judicia, nihil dico hæresiarchas complures, qui Augustinum efferre super omnia non contenti, sententias quoque ejus, & stylum adeo, ubi poterant, imitari studuerunt. Illud omittere nequaquam possum, ipsum PETRUM BAILEUM, ducem illum incredulorum, atque Evangelii naturæ scitissimum præconem, quando in *Lexico* suo ad Augustini nomen devenit, hæcere, & de perspicacia, subtilitate, & acie ingenii, quæ passim ex scriptis ejus elucerent, cum stupore quodam commemorare. Quid jam habent græculi hujus ætatis, quod oratori nostro succensent tantopere? nempe causa ceciderunt, & suffragiorum numero tantum non obrutos fateri se debent. Eant itaque, rideant, aut indignentur etiam, ubi Augustinum *Magnum, eloquentem &c.* nominari audiunt: dicant, quod nuper Proteſtans quidam Caraccioli interpres fecit, calamum Augustini non aureum, sed plumbeum potius dicendum, & hac ætate a strenuo aliquo Concionatore plus subin soliditatis, quam a Doctore isto posse expectari. Miseret me horum ob summam levitatem, atque judicii inopiam, tantum

tum abest, ut assensum præbere iis possim. Cogito enim mecum, quod acerrimus Criticorum Claudius Fleuryus *Dissertat. in prima 6. Sæcula* §. 15. præclare advertit. *Qui hunc Sanctum Patrem, inquit, non miratur, non ejus laudi, sed suæ existimationi detrahit, ut qui ignorantiam scilicet suam prodat, & veræ scientiæ nihil habere se confiteatur.* Hoc Apophtegmate concludamus, atque ad alterum caput, Augustini characterem, transeamus, ubi multo etiam magis patebit, quam insignis injuria Sancto Doctori ab iis fiat, qui ex numero disertorum expunctum illum volunt.

CAPUT II.

Quod ejusdem discerniculum?

Character Augustini facillime dignoscitur; talis enim est, ut, quod Maurini *Præfat. in Tomum V.* monent, illum vix quisquam imitatione assequatur. Et certe Hieronymus in oriente degens, cum nomen appositum non esset, cognovit illico stylum ejus, & notas ita discrevit, ut ne dubitaret quidem, cujus scriptio esset, quod *Epist. inter Augustinianas nunc 68. alias 13. ipse testatur.* Porro eloquentiam Augustini neque sincerius, neque felicius quisquam descripsit Sixto Senensi in *Bibliotheca Sancta.* Ait enim, ut sana est, & amoena crisi: „ Dicendi mo-
„ dus in prædictis omnibus operibus eundem sem-
„ per & ubique respicit auctorem. In *Libris* tamen
„ magis, quam in *Tractatibus* * est eruditus, acu-
„ tus, ac sublimium rerum subtilitate usque adeo
„ reconditus, ut Hieronymus in Epistola quadam
„ non vereatur eum obscurissimum Scripturarum ex-
„ po-

* Puta Sermonibus; sic enim vocari tum solebant.

„ posito rem appellare *. Quæstionum præterea,
 „ disputationum, argumentationum, ratiocinatio-
 „ num locupletissima copia abundat, & super om-
 „ nes Ecclesiasticos Scriptores divinæ Scripturæ te-
 „ stimoniis, & sententiis profluit instar magni flu-
 „ minis hyberna nive exundantis. In Tractatibus
 „ est stylus aliquanto parcior, & apertior, magis-
 „ que accommodatus ad allegoricas, & morales
 „ explanationes, in quibus Augustinus propter au-
 „ res imperitæ multitudinis se usque ad barbaris-
 „ mum demittit, illud frequenter dictum in ore
 „ habens: *Malo, ut me reprehendant Grammatici,*
 „ *quam non intelligant populi &c.* „ Et iterum multo
 „ pressius. „ Orationis ejus, & dictionis genus foe-
 „ cundissimum, & exuberantissimum est, ditissima
 „ & copiosissima, ne dicam nimia, diversarum re-
 „ rum affluentia redundans, & periodis in longum
 „ productis, mistim & indiscriminatim quamplu-
 „ rima secum volvens, ac rapiens, digressionibus,
 „ excursibus, & ambagibus vagabundum, quod
 „ ingeniosum, attentum, memorem, & patien-
 „ tem requirat lectorem **: quem, ne multilo-
 „ quii tædio fastidiat, Punicis quibusdam argutiis
 „ recreare solet, ludens sæpissime in similiter pro-
 „ gredientibus, & similiter cadentibus sententiis,
 „ aliis-

* Verum id Hieronymus nominatim de *Commentariis in Psalmos*, non vero de libris intellexit. Quæ in re Sixtum attentio nonnihil destituit. Cassiodorus de *Instit. divin. Liter.* c. 22. etsi in quibusdam nimiam difficultatem fatetur, in aliis tamen planissimum dicit, & a parvulis quoque intelligendum.

** Oritur redundantia hæc cum ex omnigena eruditione, feliceque memoria, quæ semel lecta in promptu ubique habebat, tum ex subtili ingenio, nova identidem suggerente. quæ duo cum copiam efficiant singularem, lima tamen, & ordine quam maxime opus habent, nisi quis malit aliqua abjicere, quæ veniunt in mentem. Vide Erasmus *Tom. III. Hieronymi pag. 157. in Scholiis.*

„ aliisque non injucundis Rhetorum figuris, quæ
 „ longum, & implicitum prolixæ lectionis iter
 „ emolliant. „ Atque in ea re ejusdem cum Sixto
 sententiæ Erasmus fuit. Ait enim in *Præfat.* ad
 opera: *Habet Augustinus suum quoddam dicendi ge-*
nerus, argutum, & periodis in longum productis mul-
ta convolvens, quod lectorem, & familiarem & acu-
tum, & attentum & bene memorem requirit, denique
tædii laborisque patientem, quales non ita multos repe-
rias. Et *Libr. 2. Ecclesiasticis*, seu de concionandi
 ratione: *Augustinus in hoc genere extemporalis (con-*
cionum) felix est, & argutus. Quod autem dulcior
est, quam gravior, quod numeris, ac similiter desi-
nentibus gaudet, quodque digressionibus moratur audi-
torum animos, suæ gentis ingenio tribuit vir pius, &
humanus. Item *Antibarbaror. Libr. 1.* Aurelium
 Augustinum, ait, acute quidem, sed obscure ac per-
 plexe, & suo quodam more dicere: & huic tamen
 esse suam gratiam ob schemata, quæ frequenter af-
 fectaret.

Equidem non pauci imitari Augustinum hac in
 parte voluerunt, ingeniosi videlicet concionatores,
 de quibus idem fere dicas, quod Quintilianus *Libr.*
X. Instit. Orat. cap. 1. ad finem de imitatoribus Se-
 necæ. „ Amabant autem eum magis, quam imita-
 „ bantur. . . . Foret enim optandum, pares aut sal-
 „ tem proximos illi viro fieri. Sed placebat pro-
 „ pter sola vitia, & ad ea se quisque dirigebat effin-
 „ genda, quæ poterat: deinde cum se jactaret,
 „ eodem modo dicere, *Augustinum* infamabat. Cu-
 „ jus & multæ alioqui & magnæ virtutes fueruat,
 „ ingenium facile & copiosum, plurimum studii,
 „ multarum rerum cognitio. . . . Multæ in eo,
 „ claræque sententiæ, multa etiam morum gratia
 „ legenda. . . . Multa probanda in eo, multa etiam
 „ admiranda sunt; eligere modo curæ sit. „ Qui
 vero sint imitatores vitiorum ejus, et si optima
 men-

mente dici posset, non est tamen clarius dicendum; minus enim peccatum est, si Augustino vitia dicendi exprobres, quam illos significes frigide, & contra, quam oporteret, fuisse concionatos. Atque hæc (cum ea tamen, qua par est, tanti Doctoris reverentia) de vitiis quibusdam facundiæ Augustinianæ. Sed virtutes etiam spectandæ, & expendendæ sunt.

Ex his non meo solum, sed plurium aliorum iudicio illa præcipua est, quod habet præsertim in sermonibus nescio quid familiare, alliciens, honestate, pietate, modestia conditum, simplex item, quodque scintillis ingenii promicantibus excitat, ac tenet, ut videas pastorem ad oviculas, præceptorem ad discipulos, aut parentem potius ad liberos imparatum, & sine studio ad genium populi & ætatis suæ fermocinari.

Alter dos Augustini est continuatio quædam, & perpetuitas argumenti, quod semel assumpsit. Ut ipsemet fere verbis *Libr. 4. de Doctr. christ. c. 10.* utar, rem quam semel explicare, & persuadere cupit, versat multiplici varietate dicendi; quæ sane tanta in eo est, ut cessare ante non possit, quam & lectori, & quod haud paulo difficilius, sibi ipsi faciat satis. Notum est & illud S. Sidonii Apollinaris *Lib. 4. Epist. 3.* ADSTRUIT UT AUGUSTINUS. Quoties enim cum adversario agit, et si sit mansuetudine, & moderatione incredibili, tamen argumentis ita instat, & urget, & propellit & stringit, ut parta jam victoria vel jacentem vix dimittere possit. Cardinalis Federicus Borromæus ecclesiasticæ facundiæ intimus cognitor *Libr. 5. de sacris Oratoribus* hoc ipsum in Augustino egregie notavit. *Non ille, inquit, peragit rem unico argumento, sed congerit plurima semper, nec una contentus victoria vincere sæpius amat, vultque ducere victor in triumphum.* Hanc ipsam vim ineluctabilem pulcre

cre etiam Claudianus Mamertus * expressit, quando Augustinum *veluti quemdam Chrysippum* vocat argumentandi virtute. Et S. Prosper Carmine de Ingratis cap. 3.

*Nam quocunque gradum convertit callidus hostis,
Quaque per ambages anceps iter egit opertas,
Hujus ab incurfu est præventus; nulle viarum
Insidiis aditum non repperientibus ullum.*

Brevius ** *Libr. contra Collatorem cap. 1.* ait: *Pugnat, & vincit: vincit dico; quia non patitur respirare, quos vincit.* Hæc dos illi præ aliis Patribus maxime propria, quæ passim elucet, & cujus exempla plurima infra recurrent. Hanc admirari sapientes omnes debent, hanc ubique Scriptores extollunt, hæc Augustinum facit. Recte igitur paulo ante laudatus Cardinalis concludit: *Fuere qui dicerent, nusquam esse sui similem Augustinum, nisi, ubi cum adversariis altercaretur.* *ibid.* Et risus mihi plane excussus est, ubi *** legi, Maximum Madaurensem Paganum rogasse ab eo, ut remoto facundie robore, atque exploso, qua cunctis clarus esset, omiſſis etiam, quibus pugnare solebat, Chrysippæis argumentis, posthabita paululum Dialectica, quæ nervorum suorum luctamine nihil certi cuiquam relinquere nititur, secum disputaret. Hæc enim confessio quam optime rem propositam declarat, & jucundissimum est audire, quam timerent eum hostes, qui non nisi cum nudo, & arma ponente congredi audebant.

Hanc porro dotem Augustinus non in communioribus tantum argumentis præfert, verum & in diffi-

* *Libr. 2. de statu. anim. c. 9.*

** *Etſi non eodem prorsus ſenſu.*

*** *Epistola 43. Augustini, nunc 16.*

difficillimis quibusque, ac subtilissimis. Est autem probe notandum, quod de eo Erasmus *Loc. jam citato* scribit: *Difficultatibus quaestionum aiebatur. nec ullis materiis lubentius indulgit, quam quæ subtilitate torquerent, nec conquiescebat, donec nodos omnes explicuisset.* Sed & illustrissimus scriptor Daniel Huetius * Episcopo cuidam Anglo, qui Augustini calamum haud obscure aspernabatur, verissime respondit: *In quamcunque materiam incubuerit, eam totam complectitur, in eam penetrat undique, ejus omnes partes insigni artificio aperit, & enodat.* Principia enim primo constituit certa ea, ac solida, dein comportatis undique ingentibus faxis, omnisque generis materia ædificium molitur non ad splendorem magis, atque elegantiam quam firmitatem. Quod tum non sine admiratione legentium apparet, cum ex his, quæ dixi, principiis tot, tanta, tamque inexpectata confectaria eruit, ac veluti aliud egisset, jam hanc, jam illam molem superstructam ob oculos proponit.

Volebam jam & ad ceteras Augustini scribentis dotes gradum facere. Sed quid agam? Ut splendendum omnes dicunt, & singularem, de nulla tamen dote alia sciunt commemorare, quin simul illi hanc, quam dixi, præcipuam non tam adjungant, quam cum ea permisceant. Itaque quidquid deinceps adderem, repetere, quæ ante dixi, videri possum. Duorum tamen sententias comittere haud possum, ut præteream. Prima est Francisci Riberae nostri, in Patribus versatissimi viri, qui de interpretationibus Augustini mentione facta **: *Augustinus, inquit, ingenii mirabili acumine & facilitate res subtiles, & abstrusas explicandi, in omni-*
bu,

* *Huetiana* de Monsieur de Soissons, & d'Auranches §. 10.

** *Proæmio in Malachiam* §. II.

bus præstans sive se ad historiam vertat, sive ad allegoriam, ut scriba doctus in regno cælorum profert de thesauro suo nova, & vetera, eruditione in admirationem excitat legentem, subtilitate erigit, & oscitare non finit, eloquentiæ suavitatem demulcet, argumentis validis movet, & vehementer stimulat ad pietatem.

Altera est Viri doctissimi Joannis Christophorsoni Episcopi Ciceſtrenſis *, qui Augustini characterem ita depingit. „ Certe nemo unquam vel „ in dimicatione suscepta cum hæreticis nervosior, „ vel ad eorum argutias eliciendas, quibus ocu- „ los simplicium perstringunt, perspicacior. Cum „ eos feriat, ictus non resilit irritus, cum telum „ in illum sit conjectum, facile repellit, & non „ raro in adversariorum caput retorquet. Non- „ nunquam ita fulminat, ut eos instar tonantis „ Jovis perterrefaciat, aliquando eminus, tan- „ quam hastis prolixioris, & longius perpetuatæ „ orationis, sæpe cominus quasi gladiis spinosæ, „ & acutæ in disceptando subtilitatis dimicat. Quis „ quæso videtur, cum in mysteriorum aditis ape- „ riendis versatur? quam admirabilis, cum alle- „ gorias scriptis persequitur? quam argutus in sub- „ tilium quæstionum solutionibus? quam in Scri- „ pturis explicandis divinus? quam disertus in o- „ mnibus? quam in nulla re inconcinnus? Lo- „ quitur, ut vult, exprimit, quæ vult: sententiis „ refertus maximis, quas brevibus numeris, sub „ aurium mensuram apte cadentibus, artificiose de- „ vincit. De cujus eloquentia satis ornate dicere, „ eloquentia opus est vel maxima. „

Sed neque illud in characterem Augustini exci- dere nobis debet, quod mirabilem passim lenita- tem, modestiamque præfert in scriptis suis. Nam

* *Præfatione in Historiam Ecclesiasticam Eusebii &c. quam in latinum convertit.*

& adversarios longe mitius habet, quam ceteri, nihilque dat affectibus; sed apparet adeo ex ipsis verbis, eum causæ solum, non hominibus esse inimicum, utut maxime stylum ejus illi provocassent. Ex quo sane vis magna exsurgat necesse est; nam eo plura obtinet ab animis ante peccatis, cum nihil astute dici, nihil hostiliter geri ab illo vident. Qua parte nulli alteri imitabilis est Augustinus; quod simili stylo scribere is demum solus possit, qui eadem vilcera habeat. Ex visceribus enim hæc enascuntur potius, quam ingenio expromuntur, quemadmodum in viro hoc sanctissimo factum, qui omnia ex amore veritatis, & abundantia charitatis suscipiebat.

Huic doti affinis est dulcedo, & suaviloquentia illa Ecclesiastica jam affectu aliquo per sententiam prolato, jam verbis Scripturæ condensatis, jam alia mira simplicitate se effundens. Ex quo iterum unctio admirabilis existit, qua ejus opera, saltem quæ subtilitatem & certamina non habent, resperla ubique sunt. Maxime autem id tum contingit, quando de *vita sua ante acta*, de *contemptu rerum terrenarum*, de *cura animæ*, de *amore Dei*, de *cælestibus gaudiis* sermonem habet. Advertit eam præ aliis sanctus Paulinus, & prædicavit pluribus locis: neque id mirum cuiquam, qui vitam utriusque, & intimam pietatem novit. Certe alter alterum imitatus videtur; tam sunt similes in hoc genere, ne dicam æquales. Eandem unctionem velut ex instituto Severus Episcopus Milevitanus celebravit*; ait enim, ne verba ipsa paululum involuta, & longiora afferamus, reperire se ibi veluti favos quosdam constitutos, plenos nectare,

* *Epist. 37. apud Augustinum nunc 109.* Cui ex Recentioribus adde S. Thomam Villanovanum *Conc. II. de divo Augustino*; fuse enim, & eleganter versatur in hoc argumento.

clare, misericordiamque, & veritatem manantes, quorum vitali pastu delicietur animus, & confirmetur. Benedicit inde Deum, a quo solo dotem eam haberet, & qui ad illustrandos, & rapiendos lectores ore ejus veluti instrumento uteretur. Sed Erasmo quoque *Ecclesiasticis Libro I. Augustinus blandus, & hærens* dicitur. Similia & apud Recentiores invenire est, quorum tamen nolim locos congerere, ne excrescat oratio in ea ipsa re, quam facilius quisque per se sentiat, quam percipiat ab aliis.

Ludovicus Antonius Muratorius * & illud in Augustino solícite notari vult, quod valde popularis esset, & miro modo se ad plebeculæ sensa demittere sciret. „ Porro divum Augustinum, in „ quit, facile advertimus, id præcipue curasse, „ uti sermonem haberet, quam maxime captui „ quorumcunque accomodatum. Seu data, seu „ accepta occasione diceret pro concione, nun- „ quam non deprehendas familiari ad populum di- „ ctione usum, doctrinas, & sensa ad consideran- „ dum proposita non implicuisse longioribus pe- „ riodis, delectatum stylo conciso, cui interrogatio- „ nes, & lumina alia orationis a quotidiano ser- „ mone non abhorrentia immiscebat. Ac tum quo- „ que, cum ab argumento digreditur, causam „ non deserit, in id perpetuo intentus, ut audi- „ torum animos quam largiter, & copiose erudi- „ ret. Equidem viri tanti ingenium passim osten- „ dit, Africanis hominibus, præcipue vero sibi, sat „ perspicaciæ, atque acuminis fuisse. Ceterum non „ labore, non vexatione aliqua ea dictionis industria „ parabatur, sed nec ad materiam obscurandam „ faciebat, quin usque adeo serviebat involutis, si „ quæ se offerebant, explicandis, ut & sublimius

P 3

„ ex-

* De dignitate Eloquentiæ popularis cap. 8.

„ excogitata ad infimorum hominum intelligen-
 „ tiam pervenirent. „

Postquam autem tam multa de discerniculis styli Augustiniani dixi, & virtutes sic extuli, ut neque vitia tacerem, ad illam præcipuam dotem lectores revoco, quæ in argumentationibus ejus posita est, & auctor sum omnibus, uti in hac potissimum sanctum Doctorem imitari, atque exprimere adlaborent. Quo reipublicæ christianæ commo fieret, si peccatorum excusationibus, & abusibus publicis persequendis ita oratione instarem, uti Augustinus Ethnicos, hæreticos, schismaticos urgebat, ubi manus semel cum iis conseruisset. Sentit mecum Cardinalis Borromæus sæpe memoratus; dum loco citato ita loquitur: *Qui volent orationem in suggestum asserre vividam acrem, & robustam, valida nervorum compage, sequi debent Augustinum, cujus tanta excellentia est in eo genere, ut nesciam, an possit Græcia tale quid ostentare. Quam præclare, pergit, a nobis fieret, si robur, & impetus illos disputantis in hæreticos Augustini transferre conaremur in eos sermones, quibus hominum vitia, & injurias in Deum objurgamus!*

Idem Laurentius a Villavincenzio monet*, cujus hæc verba sunt: *Si disputationes contra adversarios susceptas spectemus, sanctus Augustinus eam sibi methodum præstituit, & persequitur, quam nemo alius: & haud scio, an æquari ei quisquam mereatur. Equidem confirmare non vereor, in disputationibus Augustinum sine controversia unum esse, cujus civilitatem, modestiam, candorem, in oratione acumen, in argumentationibus gravitatem, & pondus in rebus omnibus omnes optimo jure sibi proponant imitandum.*

Sapientissime ista, & quam maxime ad usum nostrum, modo persuadere quam plurimos possemus,

* *Lib. IV. de Ratione studii Theologici cap. 5. observat. 14.*

mus, uti legisse admonitionem non contenti mal-
lent rei periculum per se ipsi facere, quam fidem
nobis simpliciter adhibere.

Sed hæc de Augustini charactere plusquam fa-
tis sunt. Quod si quis magis excusatum ejus di-
cendi rationem videre vult, adeat Erasmum *Cen-
sura in Libros Retractionum, Confessionum, de
Moribus item Ecclesiæ Catholicæ, & Manichæo-
rum*: atque iterum *Præfatione ad Epistolas*. Cor-
nelium Lancillotum in *Vita Libr. 1. c. 8*. Præfatio-
nem Maurinorum in Tomum V. Juvat apud eos-
dem *Caput 6. Libri IV.* vitæ legisse, ubi varia de
ejus concionandi ratione, eaque utilissima percen-
sent. Tantum ergo abest, ut Augustinum elo-
quentibus accensere ego dubitem, ut mallem plu-
res, etiam eloquentiorum Patrum, quam unum
mihi Augustinum deesse. Adeo nævos quosdam
sermonis, etsi demus non minimos esse, pluribus
iisque summis dotibus obruit, & abunde compen-
sat. Plus dico, & ejusmodi aliquid, quod cupe-
rem ab omnibus notari, unica sæpe viri sententia
velut gemma quædam plus apud me valet, quam
integra moderni cujusdam licet cultissima oratio;
tantum in ea ingenii, sapientiæ ac supernæ dulce-
dinis resplendet. Et video, sæculares quoque,
nec illiteratos homines, ubi talem audierunt ali-
quando, vel legerunt, excitari ab ea mirum in mo-
dum, repetere data occasione etiam apud alios,
atque ex animo tota vita non deponere.

C A P U T III.

Ubi eloquentem magis se Augustinus ostenderit.

Universe notandum est, quod ornatum, & ele-
gantiam attinet, juvenem fere melius multo
scripsisse, quam virum, aut senem. Ratio est,
quod inter tot negotia rebus semper magis, mi-

nus autem verbis vir sanctus attenderet. Accedit, quod, ut ajunt Maurini *, in iis, quæ juvenes scribimus, pinguior incedat oratio, ac plenior eloquentiæ succo, plusque habeat vivacioris ingenii, quam ea, quæ torpente jam ætate meditamur. Id experimento constat in primis hisce libris, quos Rhetoricæ præceptis perfecte imbutus elimavit Augustinus, ante, pauloque post baptismum suum. Habent ergo plurimum momenti hæc opera, sive ingenium, & eloquentiam, sive doctrinam, ac pietatem spectes.

Hoc generatim notato ad singularia descendamus. Ut vero in tanta scriptorum copia, & varietate ordine id fiat, partiamur omnia 1^{mo}. in ea, quæ contra Infideles. 2^{do}. quæ contra Hæreticos. 3^{to}. quæ in sacras Literas. 4^{to}. quæ promiscue præsertim ad mores, & eloquentiam Augustinus scripsit.

Inter ea, quæ sunt contra Infideles omnium judicio eminent Libri XXII de Civitate Dei, & Liber de vera Religione. In his enim non siccis, nudisque argumentis ille pugnat, sed ornatum sæpe, ac motum cum festivitate quadam, & facundia adhibet. Et prima quidem lucubratio, quam ipse Auctor *Libr. 2. Retractionum* OPUS GRANDE appellat, perenne erit ejus ingenii, eruditionis, atque etiam eloquentiæ monumentum, cujus solius causa, si aliud nihil scripsisset, summis viris accensendus fuerat Augustinus. Certe ubi ars typographica ingenti Reipublicæ commodo inventa apud nos est, hi libri cum Institutionibus Lactantii omnium primi e prælo prodierunt. Quod quidem satis ostendit, quo loco apud literatos, & disertos homines semper illi fuissent. Leonardus Coquæus vir magnæ eruditionis, ac doctrinæ putat, post scripturas Canonicas primum his libris locum

* Præfat. in Tomum I.

cum deferendum. Erasmus in *Præfatione ad eor-
dem* vocat *eximium opus*. Ludovicus Vives ad *Hen-
ricum VIII.* ait, Augustinum in hoc opus opti-
mam eorum partem, quæ apud veteres legerat
auctores, tanquam in thesaurum coniecisse, nem-
pe cum hominibus acutissimis, summa præditis &
eloquentia & doctrina disputaturum. Quo factum
sit, ut aliud agens magis, optimarum rerum ser-
varet reliquias, domiciliis earum, & quasi sedibus,
unde prius peti solebant, everfis. Cornelius Lan-
cillotus eodem loco, quem supra citavimus, hos
præcipue libros testes vult cognitionis omnium ar-
tium, & nominatim facultatis dicendi. „ Quod ,
„ inquit, cum aliis a sese libris compositis, tum
„ iis maxime, qui de Civitate Dei sunt inscripti,
„ luculenter testatur; in quibus germanissima vis
„ artis Oratoriæ, Poëticæ, Philosophicæ, tum
„ etiam Historicæ, & cujusvis alterius facultatis
„ quasi succus quidam continetur. Quod si res
„ ab eo pertractatas inspexerimus, si notitiam an-
„ tiquitatis, si dicendi modum, si decorum, in
„ quo consistant omnia, vel cum primis oratori-
„ bus audebimus eum conferre. Quantus est in
„ verbis ejus splendor! quam apposita propria!
„ quam venustæ translationes! quam similia rebus
„ accomoda! quam insignes allegoriæ! quam de-
„ nique numeris omnibus oratio expolita! „

Taceo aliorum laudes, qui cum Petrarcha *
omnes mirantur, *quod Civitatis Dei muros tanta
arte construeret*. Editor Maurinus, qui & veterum
de iis æstimationem affert, in *Præfatione* ait: „ Ma-

P 5

„ ximi

* *Epist. 4. ad Boccacium*. Inter ceteros vero laudato-
res operis præcipue memorandi duo Acatolici Ga-
spar Barthius *Libr. XLVIII. Adversar. cap. 4.* &
Jacobus Brukerus *Tom. III. Histor. Phil.* Ubi de Au-
gustino non semel. Deinde etiam Ignat. Hyacinth.
Amat de Graveson *Libr. II. Histor. Eccl. pag. mihi 39.*

„ ximi momenti opus maxima cura elaboravit pro
 „ materie præstantia, & dignitate, proutque vi-
 „ rum decebat, & summo ingenio præditum, &
 „ omnium scientiarum genere ornatissimum. Nam
 „ immane dictum est, quanta hic sit rerum varie-
 „ tas, quam profusa eruditio, quam solers, &
 „ exquisita ratio differendi. Quasi nihil strenuus
 „ civitatis Dei vindex voluerit neque artis, & in-
 „ dustriæ, neque eruditionis sive sacræ, sive pro-
 „ fanæ desiderari his in libris, e quibus reipsa tan-
 „ quam e penu refertissimo eruditi disputatores,
 „ quicunque adversus inpios divinæ religionis de-
 „ fensionem posthac suscipient, opem, & copiam
 „ sibi petendam putant. „

Librum de vera Religione, quem Catechumenus scripsit, vehementer jam Sanctus Paulinus * probavit. Et profecto tam clare in eo mysteria fidei explicat, ut veteranos doctores superet. *Certe liber de vera Religione*, ajunt Maurini **, *si quis alius, hoc elogium (Paulini) Augustino demerebatur. Et si enim recens tum, cum eum scripsit, in veræ religionis partes perductus esset, nec alio, quam christiani Catholici nomine præditus, eo tamen sublimi modo christianæ religionis sacramenta exponit, oppositorumque dogmatum, imprimis Manichæorum, revellit fundamenta, ut jam tum absolutissimi doctoris, & strenuissimi Episcopi vices impleverit.* Sed longe splendidius est elogium, quod iidem in *Vita* cap. 3. n. 4. lucubrationi huic texuerunt. *Vix ulla est lucubrationum Augustini, ajunt, quæ ad illius incredi-*
bilis

* *Epistola olim 35. nunc 24. inter Augustinianas, ubi Libros duos de Genesi contra Manichæos, duos de Moribus Ecclesiæ Cath. & de morib. Manichæor. & unum de vera Religione ita mirari se atque suspicere dicit, ut dictata divinibus crederet; tam varia, tamque valida ibi sunt arma, quibus Manichæorum errores labefactat, atque evertit.*

** *In admonitione ad hunc librum.*

bilis ingenii magnitudinem demonstrandam plus valeat. Nihil enim admiratione dignum, vel stupendum magis, quam hominem Religionis christianæ mysteriis recens imbutum, nec adhuc alio, quam fidelis nomine in Ecclesia decoratum de divina illa Religione tam eximie differere, & adeo egregiam illius dignitatis, ac excellentiæ imaginem depingere potuisse. Sed & Godefridus Hermant in Vita Sancti Athanasii Libro 12. c. 2. vocat eximium librum, imo ostendit exemplis, plures in eo sententias esse, illis omnino similes, quas Athanasius in Tractatibus contra Gentiles habet; etsi verisimile non sit ab Augustino lectos, adeoque conspirationem eam sublimi, solidoque ingenio ejus tribuendas.

Nunc ad ea, quæ contra Hæreticos Augustinus scripsit, convertamur. „Quemadmodum in præliis, ait Erasmius *, solet potissimum emicare virtus, & ardor militum, ducumque: ita divus Augustinus, cum nusquam non sit multis suspiciendus nominibus, haud alibi tamen magis eluxit, quantum valuerit acumine ingenii, subtilitate judicii, vehementia, copiaque differenti, quam in his libris, in quibus pro tranquillitate Domus Dei, quam unice diligebat, pugnat adversus hæreses: quas cum hoc odio majore prosequeretur, quo impensius amabat Christi sponsam Ecclesiam, tamen ubique singulari charitate laborat, ut homines sanet potius, quam perdat. In eandem fere sententiam Maurini Præfat. in Tomum IX. addentes illam ipsam rationem, quod hic scilicet vis, & acumen ingenii, doctrina, eruditio, Scripturarum peritia, eloquentia, prudentia, & dexteritas, ut in proprio argumento, lumen suum explicent, dum urgentium adversariorum impetus omnes animi nervos ad eos debel-

* Præfatiuncula in Tomum VI. Augustini.

debellandos excitant, & proritant. Neque prætereundum, quod iidem *ibid.* jam ante monent: propter hæc scripta potissimum, præcipuum ac summum Ecclesiæ Doctorem haberi eum, ut in quibus cum hæreticorum antesignanis commissus, ita versatus sit, ut adhuc vivens in orbe celebraretur, atque a Catholicis, teste Hieronymo *, antiquæ fidei conditor agnitus, hæreticorum contra ea odia sibi conflaret, ut ad necem usque quæreretur.

Inter illa, quæ *adversum Manichæos* lucubravit, eminet opus insigne contra *Faustum XXXIII.* libris constans, & magis adhuc *Liber contra Secundinum Manichæum*; de quo volumine ipse *Libro 2. Retract. c. 10.* inquit: *Quod mea sententia omnibus, quæ adversus illam possem scribere potui, facile præpono.* Conferantur hi cum aliis sive Græcorum, sive Latinorum libris contra eosdem hæreticos editis, & earum pretium statim apparebit.

Contra Arianos præcipui habentur *Libri duo contra Maximinum Episcopum*, quos Agatho Papa IN VI SYNODO GENERALI cum præstantissimi Doctoris appellatione merito commendavit. *Libri XV. de Trinitate*, quos deprimit Erasmus, tanto magis æstimati sunt ab aliis etiam antiquissimis, uti Cassiodoro **, & hodieque æstimantur. Græci vero ob notam operis præstantiam suæ genti vindicare voluerunt.

Contra Donatistas, uti jucundior, pressior, & strictior in argumentando, sic & in eloquendo cultior, ornatiorque mihi visus est in iis, quæ contra literas Petiliani, & earum defensoris Cresconii edidit. Hisque scriptis plus quam Imperatoriis legibus debetur, illam ipsam Civitatem Cirtensem, cujus Petilianus Episcopus fuit, fere totam ad Ecclesiæ sinum redivisse. *Liber III. contra Petilianum*
præ-

* *Epist.* inter Augustinianas nunc 195. olim 25.

** *Libr. Institut. cap. 16.*

præcipue legendus, quem *sane admirabilem* vocat, qui in *Tomum IX Maurinum* præfatus est. Generatim vero lector advertat, quomodo in gravissima hac pugna hostibus præter doctrinam, lenitatem, & charitatem nihil opponat, dignus sane, qui vinceret, atque ita vinceret, ut ex validissimo hæreticorum corpore, nonnisi semianime cadaver, & ex communi incendio non nisi favilla, & fumus relinqueretur.

Contra Pelagianos, præter *Libros ad Simplicianum*, quos, etsi ante ceteros editi essent, valde auctor commendat, præstantius tamen nihil est *Libris VI. prioris Refutationis contra Julianum*. Hos ætate senex superbo juveni opposuit, & ipse *Libr. 2. Retrañ. c. 62.* laudavit, opus istud suum *tantum, tamque elaboratum* appellans. Et in prioribus quidem juxta plures Criticos Julianum, in ultimis seipsum superavit. Cardinalis vero Norisius *Libr. 1. Hist. Pelag. cap. 21.* non dubitat dicere, Sanctum Doctorem, qui in ceteris a se adversus Pelagianos editis libris mirabilis esset, in hoc opere pene divinum apparere. Et sane hic nativa quædam facundia, gravis illa quidem, sed perpetuæ eruditioni, & vi ineluctabili conjuncta elucet.

Tractatus inter & Expositiones (sic enim Sermo-nes in Scripturam ille appellat, qui a Notariis excepti sunt omnes, ideoque minus eloquentes sunt) eminent *Tractatus in Joannem*. Inter libros ipsos Biblicos *XII. illi de Genesi ad literam* tantum excellunt, ut Cassiodorus, idoneus sane testis*, doctrinarum pene omnium decore vestitos dicat: & quod mirum est, beatorum Basilii, & Ambrosii Hexamero longe superiores. De iisdem Sixtus Senensis ait: ** *In quibus Libris, quamquam ipse fateatur plura a se quæsitæ, quam inventa, & ex in-*

ventis

* *Loci citati capite 1.*

** *In Bibliotheca sancta.*

ventis pauciora firmata, & tanquam diligentius perquirenda in medium relicta: tantum tamen est in eis artium, disciplinarum, ac scientiarum omnium thesaurus ut facile appareat, neque eruditius, neque sublimius in expositione horum trium capitum vel ante, vel post Augustini tempora prodixisse quidquam, neque deinceps futuris temporibus fortasse proditurum.

Enarrationes in *Psalmos* plerumque non admodum arridebunt; nec enim ita scripti, sed dicti sunt. Obscura præterea haud pauca, & allegorica habent. Quare optime facturus est, qui loco ingentis ejus tomi leget *Cassiodorum in Psalmos*. Hic enim velut Augustini compendium quoddam est sane præclarum.

De universa Sermorum turba eleganter doctissimus Thomassinus de *Vet. & nov. Eccles. discipl. Part. II. L. 3. c. 89.* qui cum unum adduxisset, ad quem nec præmeditatus accesserat, istuc subdit: *Hujus Augustini Concionis ab imparato tunc effusæ perquam simillimæ sunt ceteræ ejus omnes præter paucissimas, quæ sua brevitate, stylo pressiore se ipsæ clamant, accuratiore calamo, & diligentia non penitenda conscriptas fuisse.*

Inter promiscua ponimus *Epistolas*, fidei, vitæque ac dicendi regulas. Et *Epistolas* quidem si non primo loco, certe ante pleraque alia, legi a Concionatore velim. Et quam ob rem ain'? Ut nihil de eo dicam, quam alte viri sanctissimi imaginem, & mores admirandos imprimant animo, quod præclare, fuseque Erasmus in *Præfatione* explicat, pro omni conditione etiam summorum hominum * faciunt, & gravissimis de rebus agunt, plenæ utilissimorum documentorum. Accedit, quod, cum

eas

* Legantur præcipue 185. & 220. novæ Editionis, olim 50. & 70. ad Bonifacium comitem: item 153. & 155. novæ Editionis, olim 54. 52. ad Macedonium, Africa Vicarium. Eximie enim sunt, atque in hoc genere ab omnibus in pretio habentur.

eas magnam partem scripserit, non dictarit, multo etiam tersiores sunt, & diligentius ceteris libris exaratae habentur. Dein, quod item Erasmus *Præfat. in Libros de Civit.* notavit, complures scripsit adhuc juvenis, & ob id magis etiam redolent eloquentiæ studium.

Ex iis, quæ Fidei, & vitæ regulas spectant, eminet *Enchiridion*, quod doctrinam de fide, spe, & charitate exhibet. Hoc Maurini *Præfat. in Tom. VI.* vocant opus vere aureum, nocturna, & diurna manu versandum; quod quam breve, tam grande mihi elogium est. Porro *Libri Confessionum* admirabilem habent unctionem, atque intime in animos se insinuant. Ipse Augustinus *L. 2. Retract. cap. 6.* ait: *Confessionum mearum Libri XIII. & de malis & de bonis meis Deum laudant, justum, & bonum, atque in eum excitant humanum intellectum, & affectum.* Hoc, ut addit, in ipso egerunt cum scriberet & legeret: hoc agunt in aliis omnibus, quotquot vel obiter in manus sumunt, atque evolvunt. S. Salesius harum rerum æquissimus æstimator *L. 1. Epist. 34.* summam omnium utilitatem istis confessionibus tribuit. Quæ gratia haud dubie est in hodiernum diem inauditæ demissioni repensâ, qua Vir summus vitæ prioris labes deslere non contentus, toti orbi publicare constituit, atque earum memoriam ad posteros etiam transmittere.

Ad Eloquentiam propius faciunt Libri celebres *De doctrina Christiana*, præsertim IVtus. In hoc enim, quemadmodum ante conversionem docendæ profanæ Rhetoricæ juvenis operam dedit, nunc Episcopus, Senex, tantæque vir experientiæ in id incumbit, ut christianos prædicatores informet. Veteranus Orator Rollinus, cui quam plurimum ego tribuo, *præclaram tractationem, nec eloquentiæ Magistris sat commendandam* vocat. Sed & ipsa
res,

res, & omnium, quotquot de arte dicendi scripserunt, præceptiones inde sumptæ per se satis ejus libri pretium, atque utilitatem demonstrant.

Quæret jam aliquis, quinam ergo librorum Augustini a stylo ipso, & elegantia dictionis laudem præ ceteris, & commendationem habeant? Ut vel hac quoque in causa Lectoribus fiat satis, fidenter ita pronuntio; Elegantissimi omnium sunt *Libri duo de Moribus Ecclesiæ Catholicæ, & de Moribus Manichæorum. Libri de ordine, & Liber de bono Viduitatis.*

In Libris enim de *Moribus Ecclesiæ, & Manichæorum* stylum plane limavit, ac alius omnino, totusque a se diversus Augustinus comparet. Erasmus elegantiarum curiosissimus arbiter sic de illis in *Præfat.* loquitur: „Mox ut nomen dederat „Imperatori Christo, quo commilitonibus suis „certissimam fidem faceret, se bona fide a Manichæis transfugisse, sub quorum signis novem annis militaverat, prodit illorum mysteria, idque „facit admirabili sermonis elegantia, qua utinam „illi licuisset in ceteris uti lucubrationibus. Hoc „fane opere declaravit, si quid offendit eruditos „in ipsius dictione, non fuisse inscitæ, sed charitatis, qua stylum demisit ad imperitorum intelligentiam &c. „

Liber de ordine ex eadem ratione plurimum placere debet; latinitatem enim præfert & leporem nescio quem, ab Afro minime quærendum, præfertim ea ætate. Ipse etiam Erasmus accuratiore stylo elaboratum admonuit.

Liber de bono Viduitatis ejusmodi est, ut elegantissimo cuivis scriptori supponi posset. Miram enim habet dictionis facilitatem, & candorem; qua de causa & hic Erasmo vehementer placuit. Verum in hoc sentire cum illo minime possumus, quod Auctori *Epistolæ ad Demetriadem* tribuere
cum

eum velle videtur. Cur enim id facit Erasmus? Propter ipsum illum verborum nitorem, modumque scriptiois; neque enim diffitetur. Sed si ita est, superiores quoque illos, imo & *Libros de Civitate*, pluresque alios abjudicare Augustino debet, ut ceteris multo elegantiores. Sileo ceteras rationes, quibus refellitur manifeste ea opinio, & quas Maurini in *Admonitione* opusculo huic præfixa adduxerunt.

Hæc de Eloquentia, & præcipuis Augustini Libris. Porro de omnibus omnino opusculis, Sermonibus, Epistolis iudicium meum interponere uti temerarium, sic immensi laboris, neque etiam instituti mei foret. Sed & ipsos, qui seu Vitam, seu libros ejus versarunt, Gerardum Moringum, Cornelium Lancillotum, Prosperum Stellatium, Joannem Nævium, Joann. Bapt. Masculura, Joannem Rivium, Sebastianum Tillemontium, Maurinos item, ac Bollandianos, etsi de eloquentia quorundam commemorent, raro tamen, obiter, & parce admodum id video præstitisse. Si quis tamen volet, ipse eos, & quos per decursum citavimus, adire poterit.

DISSERTATIO IX.

De Eloquentia S. PAULINI.

CAPUT I.

Laudes ejus.

Equidem nefas fuerit de Eloquentia S. Paulini Nolensium Episcopi obiter solum hic commemorare; quando tot ab omni retro antiquitate laudatores habet, & celebritatem sane maximam est consecutus. Quantus olim in sæculo splendore generis, tantus postmodum scriptis, gestisque in Ecclesia evasit. Liberalibus disciplinis omnibus a puero excultus, maxime tamen Poëtica, atque Oratoria se dedit, usus Magistro Ausonio, cujus clarissimum tum erat nomen, quemque & bonitate ingenii, & industria singulari brevi

non æquavit solum, verum & superavit. Ausonio ad aulam Cæsaris digresso, ipse ut causas ageret, ad forenses strepitus & curiæ lucem processit: ubi eam dicendo famam invenit, ut ad honores continuo evocatus ante Ausonium Consul renunciaretur. Dein ad varias regiones visendas animum adjecit, ac omnem fere occidentem peragrans, summis ubique viris Martino, Ambrosio, Severo familiaris factus est: denique Burdigalæ baptismo suscepto, opibus, literisque valedixit penitus, omnesque curas unice ad studia pietatis transtulit. Sed audiamus nunc, quæ de ejus facundia summorum hominum judicia essent.

S. AMBROSIIUS *Epist.* 30. vel 36. ad Sabinum, nunc 58. de secessione Paulini loquens, quot illa sermonibus esset causam præbitura, ita ait: *Hæc ubi audierint Proceres viri, quæ loquentur? ex illa familia, illa indole, tanta præditum eloquentia migrasse a Senatu! interceptam familiæ nobilis successionem &c.*

AUSONIUS ipse cum alias magnifice Scriptiones ejus effert, tum *Epist.* 20. Pollere, inquit, Paulinum ornatu, quo ipse careret, cedere se ingenio tantum, quantum ætate præcederet, & novæ ejus camoenæ assurgere. Quin jurat aliquando, nulli imitabilem Paulini calamum esse.

S. AUGUSTINUS *Epist.* 39. nunc 26. ad Licentium celebrat opes ingenii ejus.

S. EUCHERIUS *Parænesi ad Valerianum* testatur, Paulinum uberrimo eloquentiæ fonte fuisse, & cunctis admodum mundi partes eloquio, operibusque resperxisse.

IDACIUS in *Chronico* ad annum Honorii 30. Paulinus, ait, nobilissimus, & eloquentissimus dudum conversione in Deum nobilior factus &c. Extant operis ipsius egregia studia prædicanda.

S. quo-

S. quoque GREGORIUS TURONENSIS *Libro de Gloria Confessor. cap. 107.* mentionem eloquentiæ, & Carminum Paulini facit. Quem si qui minus idoneum his de rebus testem putant, illud certe debent cogitare, Gregorium saltem, quid alii de Paulino sentirent, scire, & scribere potuisse.

VENANTIUS FORTUNATUS *Libr. II. de vita S. Martini post medium, ore rotundum*, id est sermone facundum disertumque Paulinum dicit.

S. GREGORIUS MAGNUS *Libr. III. Dialogor. cap. 1.* Paulinum vocat *eloquentissimum, atque ap- prime exterioribus quoque studiis eruditum.*

DUNGALUS DIACONUS Sæculi IX. auctor minime obscurus *contra Claudium Taurinensem: Beatum Paulinum*, inquit, *sanctitate, & sapientia præditum quasi quamdam pharum lucidissimam, & turrim inexpugnabilem imprimis prætendimus.*

Sed nemo antiquorum Paulini eloquentiam magis celebravit, atque divus HIERONYMUS, cujus sane elogium insigne prorsus, ac disertum non sine admiratione magna fateor me legisse. Cum enim *Epist. 13. nunc 58.* primores ecclesiasticorum Scriptorum enumerasset, Tertullianum videlicet, Lactantium, Victorinum, Hilarium, Cyprianum, neque eos, qui tum vivebant, omisisset, subjicit, cuique deesse aliquid ad perfectionem, unumque Paulinum statuit, in quo nihil desideraret, futurum affirmans, ut si divinarum Literarum interiorem notitiam adjiceret, scriptores sive græcos, sive latinos omnes anteiret. „Maeste virtute, ex-
„clamat, qui talia habes rudimenta, qualis exer-
„citus miles eris? O si mihi liceret istiusmodi
„ingenium non per Aënios montes, & Heliconis
„vertices, ut Poëtæ canunt, sed per Sion, & Ita-
„byrium, & Sina excelsa ducere! si contingeret
„docere, quæ didici, & quasi per manus tradere

„ mysteria Scripturarum ! nasceretur nobis aliquid,
 „ quod docta græcia non haberet. „

Et iterum : „ Si haberes hoc fundamentum
 „ (scientiam Scripturarum) imo si quasi extrema
 „ manus operi tuo induceretur , nihil pulcrius ,
 „ nihil doctius , nihilque latinus tuis haberemus
 „ voluminibus. „ Denique addit : „ Magnum habes
 „ ingenium , & infinitam sermonis suppellectilem ;
 „ & facile loqueris , & pure , facilitasque ipsa , &
 „ puritas mixta prudentiæ est. Capite quippe fa-
 „ no omnes sensus vigent. Huic prudentiæ , &
 „ eloquentiæ si accederet vel studium , vel intel-
 „ ligentia Scripturarum , viderem te brevi arcem
 „ tenere nostrorum. „ Idem *Epist.* 153. nunc 85.
 magnifice de eadem Paulini eloquentia prædicat ,
 excusatque eleganter , quod pauca & inornata ad
 eum virum mittat , cujus utpote eloquentissimi ,
 doctissimi , & græce scientissimi iudicium formida-
 ret. Hæc Hieronymus , cui certe adulationem ne-
 mo objecerit , præsertim literariis in rebus ; cum
 ad hominem scriberet a conversione recentem , &
 sacris in disciplinis adhuc tyronem.

Sed neque posteriorum temporum laudes de-
 sunt.

JOANNI TRITHEMIO *Libr. de Scriptorib. Eccle-
 siast.* Paulinus vir in Scripturis divinis eruditissimus
 vocatur , & in sæcularibus literis nulli suo tempore
 secundus , qui non minus sanctitate , quam eruditione
 clarus effulisset.

JODOCUS BADIUS ASCENSIUS in *Præfat. ad S.
 Paulini opera* sic loquitur : Sanctus Paulinus , qui
 cum Ethnicorum literis esset instructissimus ; sic ta-
 men divinis usus est , ut in ejus libris , & Pytho illa ,
 & suadæ medullæ sessitasse merito prædicentur. Do-
 cet enim , & movet , afficitque legentem , imo , quo
 vult , impellit supra modum.

HENRICUS GRAVIUS *Præfat. in Paulinum, Paulinus*, ait, *vel unus merebatur, ut incorruptissimus servaretur.*

SIXTUS SENENSIS in *Biblioth. Sanct. Paulinus*, inquit, *Nolæ Episcopus vir fuit divinæ Scripturæ studiosissimus, & eloquentiæ singularis.*

CARDINALIS BARONIUS ad annum 431. libros Paulini nobilissimi ingenii monumenta dicit.

PHILIPPUS FERRARIUS in *Catalogo SS. Italiciæ XXII. Junii* de Paulino asserit, quod *divinarum & humanarum rerum cognitione egregie instructus, etiam dicendi facultate præpolleret.*

NICOLAUS HEINSIUS, Danielis filius, ad *Valer. Flaccum* pag. 187. Paulinum vocat *Scriptorem texum & latinum.*

NATALIS ARGONENSIS de *Optima Method. legendi Eccl. Patres Part. II. Cap. 5.* ait: *Sanctorum Paulini, Eucherii Lugdunensis, atque Salviani Masfilienfis stylus satis comprobatur, nonnihil veneris, & puritatis Romanæ in Gallias translatus fuisse.*

CARDINALIS BONA in *Notitia auctorum Paulinum Sanctitate, & scientia eminentem, sensu, & eloquio sublimem appellat.*

De juvene adhuc Paulino eleganter scribit JOANNES CROISSET in *Exercit. Pietat. ad Festum ejus: Puritas, & teneritudo styli, splendor cogitationum, facilitas indolis, ardor phantasiæ, vis & dulcedo eloquentiæ ejus toto orbe celebrem reddidere.*

Finio verbis Officii Ecclesiastici, quod ad diem XXII. Junii ita habet: *Paulinus Nolæ Episcopus, eruditus studiis humanitatis, doctus etiam divinis Literis, multa eleganter, & ornate scripsit versibus, & soluta oratione. Atque ista de eloquentia Paulini universe, nunc peculiariter quoque audiamus.*

Henricus Gravius supra allegatus ad Paulini characterem delapsus, *sermonis puritatem, aliasque dotes eximias* ei tribuit, hac exclamatione adjuncta: *Quid enim eo purius? quid nitidius? quid gravius, aut ardentius?* Dixit aliquid, sed totum non dixit. Qui enim Paulino aliquantum assueverunt, aliud præterea, & quidem præcipuum in eo detegunt. Et quid illud? quod admirabilem fere facilitatem, & suavitatem redolet. Hanc S. Sidonius Apollinarius jam advertit, qui *Libr. IV. Epist. 3.* dicit: *Paulinus provocat, id est, vim habet, & unctiorem.* Hoc ipsum & Uranius Presbyter *Epist. ad Pacatum de obitu S. Paulini num. 9.* laudavit: *Erat suavis, & blandus in literis, dulcis, & bene suavis in versibus.* Sed magis idoneum testem Augustinum habemus, qui Paulini suavitatem non advertit solum, sed verbis etiam gravissimis exaggeravit. Sic autem habet *Epist. 32. nunc 27.* ad ipsummet Paulinum. „ Legi literas tuas fluentes lac, & mel, præferentes simplicitatem cordis tui, in qua quæris Dominum, sentiens de illo in bonitate, & affectu ei claritatem, & honorem. Legerunt fratres, & gaudent infatigabiliter, & ineffabiliter tam uberibus, & tam excellentibus donis Dei, bonis tuis. Quotquot eas legerunt, rapiunt, quia rapiuntur, cum legunt. Quam suavis odor Christi! & quam fragrat ex eis! dici non potest, illæ literæ cum te offerunt, ut videaris, quantum nos excitent; ut quæraris. Nam & perspicabilem faciunt, & desiderabilem. Quanto enim præsentiam tuam nobis quodammodo exhibent, tanto absentiam nos ferre non sinunt. Amant te omnes in eis, & amari abs te cupiunt. „ Dein ad singularia in literis contenta digressus, ita conclu-

cludit : „ Hæc atque hujusmodi suavissima, & san-
 „ tissima spectacula literæ tuæ præbent legentibus,
 „ literæ fidei non fictæ, literæ spei bonæ, literæ
 „ puræ charitatis. Quomodo nobis anhelant sitim
 „ tuam, & desiderium, defectumque animæ tuæ in
 „ atria Domini? quid amoris sanctissimi spi-ant?
 „ quam opulentiam sinceritatis exæstuant? quas
 „ agunt gratias Deo? quas impetrant a Deo? Blan-
 „ diores sunt, an ardentiores? luminosiores, an
 „ foecundiores? quid enim est, quod ita nos mul-
 „ cent, ita accendunt, ita compluunt, & ita sere-
 „ næ sunt? Quid est, quæso te, aut quid tibi pro eis
 „ rependam, nisi quia totus sum tuus in eo, cujus
 „ totus es tu? si parum est, plus certe non ha-
 „ beo. „

Ad unctionem hanc declarandam usurpari pos-
 sunt verba ipsius Paulini *; etsi enim de se illa non
 dixit, quam maxime tamen faciunt in rem nostram:
*Sapor mentis, ait, in sermone gustatur: Sermo viri
 mentis est speculum, & thesaurus pectoris publicatur elo-
 quio.* Sed Dungalus quoque Diaconus adhuc au-
 diendus. Librum enim quemdam Paulini comme-
 morans *loc. cit. Cuncta flores, inquit, aromata, ro-
 sas, lilia suaveolentia, ac mellis sua esse.* Et ne vete-
 res solum testes appellem, Cardinalis quoque Per-
 ronius in Patrum Scriptis versatissimus *contra Ples-
 sæum de Missa pagina 403.* delicias has, dulcemque,
 & religiosum Paulini spiritum miratur, ac commen-
 dat vehementer. Non nego id ingenio viri mire
 suavi, ac benigno ex parte aliqua tribuendum. Hæc
 enim decora ejus omnia consummabat, & jucun-
 dissima quadam luce, & gratia respergebat. *Quid
 autem tam amabile, ait Ansonius **, tamque hospita-*

Q 4

le,

* *Epistola 42. alias 32. item 33. nunc & olim, denique
 25. alias 39.*

** *Epistol. 21. ad Paulinum.*

le, quam tu? ut me participes, delicias tuas in ipsa primitiarum novitate defraudas? o melle dulcior, o gratiæ venustate festivior, o ab omnibus patrio stringende amplexu! Eundem Paulini genium probe advertit Gaspar Barthius, qui *Libr. LXVIII. cap. 5. Adversarior.* ita scribit: *Omnia jam peritura spernens, jam toti mundo præmortuus, jam totus Christum vivens, & spirans Paulinus in illis suis dulcissimis Epistolis & Poëmatibus.* Ipse adeo Julius Cæsar Scaliger in *Hypercritico*, Paulini probitatem, ait, legis in ipsius scriptis, neque solum hoc, sed etiam animi æquabilitatem, quam cum suo stylo communicavit. Fere enim quibus quisque moribus præditus est, eos etiam transfundit in suam dictionem &c. Præclare istuc, atque in rem nostram aptissime dictum. Unctio enim Paulini ab exemplo est, a specie vitæ ejus animis obversante, atque hac velut imagine quadam sui, & cordis indice stylo ita rapit, ita excitat ad pietatem.

Sed præter dulce ingenium, & candidissimam mentem, quæ in Paulino quilibet etiam minus perspicax deprehendere debet, Carmina æque, ac Epistolæ, vel cum negligere verba videtur, sensibus nobilissimis, & plane sublimibus gemmarum instar extantium resplendent. Adde sententias non qualescunque, sed eas, ex quorum pondere satis apparet, eundem toto pectore Evangelii perfectionem combibisse. Exemplis id declaro.

O miseri homines, ait Epist. 32. alias 12. largiri nos aliquid Deo credimus: negotiamur, & liberales habemur, qui avarissimi omnium esse convincimur, & quidem tanto avariores cupidissimis terrarum sæeneratoribus, quanto amplius est caelestia de terrenis, & beata de miseris, egenisque rebus emere, quam terrena terrenis, & labentibus lapsura mercari, & dominum, quam hominem sænerari.

Et pulcrius Natali 9.

*Et res magna putatur
Mercari propriam de re pereunte salutem?
Perpetuis mutare caduca, & vendere terram,
Cælum emere? Ecce, Deus quanto me carius emit
Morte crucis! passus, dejectus imagine servi,
Ut viles emeret pretioso Sanguine servos!*

*Epistola 26. * O beata injuria displicere cum Christo!
Magis nobis timendus est amor talium, quibus
sine Christo placetur. Et 11. alias 5. Nihil habemus
nisi Christum, ait de paupertate, & vide si nihil ha-
beamus, qui omnia habentem habemus.*

De Morte autem Mystica Natali 10.

Vita prior pereat, pereat ne vita futura.

*Epist. 24. alias 2. Vicem injuriæ reddere humana
ultio est: at inimicum etiam diligere vindicta cælestis
est.*

Et alia similia, præsertim in Carminibus, quæ
longum est majore numero huc transcribere. Ma-
xime vero ejusmodi sensibus abundat Epistola 50.
ad Celantiam nunc 2. in appendice.

Omnia paucis comprehendit Joannes Croiset
supra laudatus. Etiamnum, ait, admirationi sunt
in Epistolis & Carminibus ejus sublimitas sensuum,
elegantia styli, unctio & eminens pietas: quæ singula
totidem Notæ hujus Sancti characteristica fuerunt.

Dicent, qui Paulini quædam legerunt, etiam
placeant multa in sancto hoc Doctore, ea tamen
non videri, in qua tot, tantæque laudes conge-
rendæ sint. Quibus duo respondere debemus, sa-
ne digna, quæ ponderentur. Et primo quidem
testimonia Veterum Libros Paulini deperditos po-
tius

Q 5

tius respiciunt, quam qui modo habentur. Interierunt enim tantæ facundiæ monumenta celebriora, quibus maxime famam sibi & Oratoris, & Poætæ tam insignem comparavit. Carminum, Ausonio laudatissimorum, nec vestigia, extant. Imò nec ex *Rhythmis*, quos a conversione recens composuit, multi saltem integri ad nos pervenerunt. *Gazophylacium* non Epistola, ut perperam multi inscribunt, sed sermo ad populum, satis testatur, multa in eo genere a Paulino præsertim Episcopo elaborata, quæ pariter temporum injuriis interciderunt universa. Epistolarum quoque numerus ingens deperditus, nec pauca, ut conjicio Historica desiderantur. Sed & illis caremus, quæ contra Paganos teste Augustino conscripsit, pluribusque aliis, ex quibus Gennadius omnium præcipua facit *Librum de Penitentia*, & de *Laude generali omnium Martyrum*. Nullius tamen scriptionis jactura æque dolet, ac libri pro *Theodosio Seniore adversus Criminatores Ethnicos* editi. Certe quoties fere Hieronymi recordor, id quod sæpe fit, toties desiderium libri recrudescere in me sentio. Sic enim de eo loquitur sanctus Doctor l. c. *Librum tuum, quem pro Theodosio Principe prudenter, ornateque compositum transmissisti, libenter legi, & præcipue mihi in eo subdivisio placuit. Cumque in primis partibus vincas alios, in penultimis te ipsum superasti. Sed & ipsum genus eloquii pressum est, & nitidum, & cum Tulliana luceat puritate, crebrum est in sententiis. Facet enim, ut ait quidam, oratio, in qua tantum verba laudantur. Præterea magna est rerum consequentia, & alterum pendet ex altero. Quidquid assumpseris vel finis superiorum, vel initium sequentium est. Felix Theodosius, qui a tali Christi oratore defenditur. Illustrasti purpuras ejus, & utilitatem legum futuris sæculis consecrasti.*

Itaque jam non illum habemus Paulinum, qui fuerat, sed mancum sane, aut lacinias potius ejus aliquas, ubi inferiora pleraque illo viri disertissimi ore, & ingenio sunt. Nihil amplius de *leni illa, ac suavi simul, magnificaque vena, mellea modulatione, vegetaque, & sublimi alacritate, sic appetente summa, ut non decideret, nihil de tanta elegantia, solus ut videretur affectus (quod contra naturam est) brevitatis ut obscura non esset, nihil de Epistolis, & Carminibus, quæ Aufonius jurat, nulli unquam imitabilia.* *

Alterum est, quod Paulinus, quidquid post abdicatas jam Musas procudit, Evangelica simplicitate temperavit. Totus enim ad actionem, & contemplationem conversus, ut res suas omnes, ita chartas adeo neglexit, ut eorum ** nec recordaretur amplius. Deferbuerat ambitio, ac cupido famæ, quæ maxime acuit stylum, & in viro, qui non solum dignitatibus, atque divitiis, sed literis quoque valedixerat, nihil jam erat, quod ad expoliendum stimulare. Itaque contemptim scriptabat Paulinus. ut se calamo res quæque offerebat, imo quod *Epist. 50. alias 42.* patet, literas dictare tantum notario consueverat. Nec mirum est, cum scripta ipse sua non curaret, ab aliis quoque minus quam deceret curata esse, sicque libros plures veluti partus a parente destitutos facilius interiisse.

Eodem pertinent, quæ Victor Giselinus in vita Sulpitii Severi admonuit. Enimvero, ait, ea tempestate, qua liberæ jam esse cæperant Christianorum, & Gentilium contentiones, eoque acerrime hinc inde exercebantur, nihil frequentius fuit, atque usitatus
omni.

* Lege IV. partem vitæ divi Paulini a Franc. Sachino scriptæ, aut *Epist. 19. & 21. Aufonii ad Paulinum.*

** *Epist. 1. alias 6.*

omnibus Christi nomen profitentibus, iis præcipue, qui summo aliquo loco constituti præire exemplo suo aliis gestiebant, quam odio paganismi sacras tantum Literas versare, easque non vita solum, sed sermone etiam, aliisque vitæ muniis exprimere: adeo ut ne literæ quidem familiares familiaribus de rebus scriberentur, quin & historiam sacram, & phrasin saperent, spirarent, loquerentur. Exemplo sint, (ut Augustinum, Hieronymum, aliosque ejus generis Ecclesiæ Proceres præteream, ne quod domi abunde est, aliunde videar assumere) sint ergo exemplo solæ Paulini nostri Epistolæ, quas nemo nisi in divinis Scriptis versatissimus aut legere poterit, aut intelligere; nominatim vero Epistolam septimam, cujus extrema parte hujus propositi, sive consuetudinis mentio adjecta est singularis. Giselinus adstipulantur reliqui, qui de Paulini rebus scripsere. Andreas Schottus in *Receptione Operum: Stylum*, inquit, Christianis jam sacris initiatus, & rite baptizatus mutavit, verborum jam lenocinia fugiens, & sacras Literas, pietatemque adamasse, piæ ejus ad Severum Sulpitium, aliosque Epistolæ missæ declarant &c. Optime vero Jodocus Badius Ascensus l. c. Postmodum inspirante Deo ad Christianam pietatem penitus conversus, Ambrosio, & Augustino usus præceptoribus. . . . omnem mundi pompam rejecit, venamque fluentem, ac pene lascivientem gravem, & stabilem fecit, anxieque omnem gentilem ritum vitavit, usque adeo, ut ne Virgilium quidem postmodum nominare fuerit ausus, magno documento, alium stylum decere sacris initiatum virum, alium profanis adhuc deditum &c. Idem repetit Gravius, qui verba adeo Badii exscripsit. Sed nihil satius fuerit, quam ipsummet Paulinum ea de re loquentem inducere. Ubique enim prodit, se sanctitatem religionis tam alte in animum demisisse, ut nihil jam cum sæcularibus literis commune sibi esse veller. Ita significat Epistola 16. alias 38. *Epistola*

folia 1. alias 6. Epistola 4. alias 40. prima ad Augustinum. Carmine vero ad Ausonium, qui ad Musas revocare eum laborabat, & laceſſebat non raro, palam, & line fuco reſcripſit:

*Negant camænis, nec patent Apollini
Dicata Chriſto pectora.*

Jam quas tu veneres, quas delicias ſermonis ab eo expectes, qui profanos ſcriptores vel appellare tantum piaculo ſibi ducat, gentilesque literas non abjiciat ſolum, ſed ubi ultro ſe effundunt, contineat? Tantum ſcilicet reſert ſcire, non ſolum quid quis ſcripſerit, ſed quando, qua mente, quo ſtudio facere id aggreſſus ſit. Atque hæc ſuſius propter eos monere debui, qui in Eraſmi Cicero-*niano* Paulinum legunt *vix umbram habere Cicero-
nis, nec ſententiis nec verbis admodum felicem.* Viderat *Paulinum* antea, quam hæc ſcriberet Eraſmus, ſed non legerat, ſecus aliter haud dubie ſcripturus, uti reapſe aliter ſcripſit, quod proxime dicemus.

C A P U T III.

Pretioſiora ex iis, quæ adhuc extant.

Sunt tamen inter reſidua Paulini opuscula, in quibus vix quidquam deſideres ad eloquentiam. Talem dico Epistolam, quam Celantiæ Matronæ Romanæ inſcripſit, quæque hætenus inter Hieronymianas decima quarta poni ſolebat. Hæc omnibus numeris abſoluta mihi videtur, planeque ex illo genere, de quo Hieronymus *Epist. 153. nunc 85.* eleganter ad ipſummet Paulinum perſcripſit: *Vocæ me provocas ad ſcribendum, terres eloquentia, & in epistolari ſtylo prope Tullium repræſentas.* De ea Eraſmus, qui primus, quod ſciam, Paulini eam eſſe odora-

tus est, sic in *Argumento* ait: *Epistola cum primis eloquens, & erudita.* Addit, hanc & alias quasdam Paulini, Hieronymianis immistas, eloquentiam Hieronymi propemodum æquare, & hanc unam se hoc loco inferendam duxisse, ut si forte lector requirat, specimen aliquod habeat eloquentiæ Paulinianæ tantopere ab eloquentissimo Hieronymo laudatæ. Et denique antea quam eam orditur, ita magnifice: *Nunc christianum*, inquit, *Ciceronem audiamus.* Neque ab hac aliæ Paulini Epistolæ abluunt: laudatque eas idem Hieronymus *Epist.* 103. *nunc* 53. iterum ad ipsummet, in *fine.* *Habes hic*, inquit, *amantissimum tui fratrem Eusebium, qui litterarum tuarum mihi gratiam duplicavit, referens honestatem morum tuorum, contemptum sæculi, fidem amicitiae, amorem Christi; nam prudentiam, & eloqui venustatem etiam absque illo ipsa epistola præferbat.* Quam pulcra item illa sunt, quæ *Epistola* 11. *alias* 5. de hortulo suo? quam amoena, quibus 49^{na} *alias* 36. naufragium Valgii persequitur? * Quo sensu, quamque obnixo studio Epistolam ad Delphinum & Amandum deprædicat gratiam sibi factam? Quam amice, quam venuste, & graviter 11^{ma} *alias* 5. Severi jocum reprehendit? Quæ humilitas in admissio Victoris servitio elucet *Epist.* 23. *alias* 3. & 4. ad Severum? Qua figurarum conversione ostendit *Epist.* 24. *alias* 2. relictas opes non nisi rudimentum esse spiritualis militiæ suæ? Quam splendida pietate Nicetam celebrat in *Propeptico*, & Victricium *Epist.* 181. *alias* 282. Quantum ingenii in *Epigrammate ad Severum* misso, & effigiei suæ juxta Beatum Martinum collocatæ adscri-

* Gregorius Fabritius *Tom. I. Orthodoxographorum Basileæ* 1569. *Historica*, inquit, *etiam tractat Argumenta, in Epistolis de Melania, ad Severum, de Valgii naufragio ad Macarium, in quibus suavitate narrantis admodum delectat.*

scribendo? * Recte ergo Joannes Fridericus Gronovius *Libr. Observator. in Scriptor. Eccles. Epistolas Paulini piæ facundiæ, & officii plenas affirmat.* Carmina porro ejus, quæ nonnullis parum placere video, pene dixerim primo loco legenda, atque æstimanda esse: non quidem verborum, ac styli causa, quæ duo, uti diximus, ille sus, deque habuit, sed quod sensus habent eximios, & pietatem spirant singularem. Recte Juretus **, cum eorum quædam ederet, pronuntiavit, esse sanctissimi, doctissimique Poëtæ veluti superstites tabulas, naufragio scilicet literario ereptas. Expertus est earum suavitatem Joannes Baptista Mantuanus Poëtarum non postremus, qui sic in Apo-
logetico: *Quid de Paulino Nolanæ urbis Episcopo Hieronymi contemporaneo, & familiari? quid dicam? Nonne pulcherrima, quæ adhuc extant, & semper extabunt, excudit Poëmata? Cum adhuc adolescentulus essem, & a studiis ecclesiasticis, illius ætatis more, abhorrerem, forte in ea Poëmata incidi, & carminis suavitate delectatus, animum ad res divinas paulatim appuli, & ex illo tempore literarum sacrarum studiosior fui.*

Petrus quoque Crinitus de Poëtis Latinis c. 91. sic Sanctum nostrum dilaudat: *In Poëtica facultate magnopere excelluit. . . . Leguntur adhuc quædam ipsius Paulini carmina, in quibus mirifica eruditio, & incredibilis elegantia apparet.* *** Jodocus Badius Ascensius l. c. *Eruditus itaque, inquit (Paulinus) interioribus, & cultioribus literis facundo suo ingenio admiranda fecit poëmatia, inter quæ de Caesaribus ex Suetonio nonnulla.* Caspar Barchius *Ad- versar.*

* *Epist. 32. alias 12.*

** *Præfat. ad Pitholum.*

*** *Est autem hoc ipso loco mira Criniti contradictio, cum inter Carmina discrimen facit, & duos ex illis Paulinos sibi exsculpit.*

versar. Commentar. L. XIII. c. 14. ita de Paulini Carminibus habet: „Christianorum Poëticis clau-
 „rorum nemine in Paulino præponere possis. Pro-
 „funda eruditio sæcularium literarum phrasin ipsi
 „fecit, quam divinis mysteriis sine fūco tractan-
 „dis egregie, & amabiliter immiscet. Quod si
 „ipso Dei præcones Apostolos latinis numeris
 „laudes Domini pangere voluisset diceret, talibus
 „utique usuros fuisse confitereris. Dici non po-
 „test, quam contemptim vulgo tam divina opera
 „habeantur. Quotus enim quisque est vel erudi-
 „torum, nihil non pervagantium alioquin, qui
 „horum bis, aut ter meminerit? unde longe etiam
 „majorem illustrantis diligentiam requirunt, quam
 „putatum hæcenus est &c. „

Eadem Carmina eruditissimus Gronovius supra laudatus *ingentis spiritus* appellat. Nimirum uti nos Germani (sed & ceteræ nationes) carmina quædam habemus vetera, in templis, ac domibus decantata: propiore exemplo utar, quemadmodum in Officio Ecclesiastico hymnos invenire est, ubi metrum subinde nutat quidem, & verba vel obsoleta, vel loco non suo posita sunt, quæ tamen majestatem, ac pietatem admirabilem spirant, aut ad naturam quam proxime accedunt: sic versus illi sanctissimi Paulini, pleni effectus, pleni animi religiosi, ac Deo afflati. Cardinalis Bona in *Notitia Auctorum* observat, ævi vitio modulum syllabarum in versibus sæpe negligere. Sed ut hoc sit, Paulinus studio simplicitatis, non socordiæ, minus ignorantia causa id fecit, ut vel ex superioribus ejus carminibus manifestum est. In his enim si leges metricas pensi nihil habuisset, aut ignorasset omnino, qui demum obsecro ad celebritatem eam erat perventurus? Neque enim deerant vel illa ætate, uti Claudianus, & alii quidam, qui illas & callerent perbene, & solícite etiam observarent.

Quam-

Quamquam & ipsum metrum non raro amœnitatis & nitoris quam plurimum habet. Quo sensu accipi debet Laurentius Berti, quando in *Ecclesiast. Histor. Breviar. Sæcul. V. cap. 4.* ait: *Natales decem S. Felicis Martyris, aliaque plura eleganti metro composuit.*

Sed contra propositum fusiores fuimus. Quod si quis plura nihilominus de admirabilis viri facundia nosse cupit, libros ejus, vitamque a Francisco Sacchino Scriptam adire debet. Item Petrum Franciscum Chiffletium in *Paulino illustrato*. Henricum Vaughan, qui res ejus 1654. anglice conscripsit. Joan. Bapt. le Brun, qui & opera ejus edidit, & vitam separatim vulgavit *Parisiis* 1686. Franc. Girum & Hadrianum Baillet in *vitis SS. ad 22. Junii.* denique omnium maxime diligentem Ludov. Anton. Muratorium in *editione ultima Veronensi*. Quique ex instituto Ecclesiæ Scriptores recensent, Dupinum, Tillemontium, Ceillierium &c. Etiam Trivultienfes ad annum 1744. *Mense Augusto* memorant *Vitam Paulini cum Analysis Operum, & Dissertationibus* lingua Gallica editam a D. Gervasio, ubi plurima de stylo & eloquentia ejus, accurate ab iisdem Censoribus ad leges Criticæ revocata.

DISSERTATIO X.

De Eloquentia S. EUCHERII.

CAPUT I.

Elogium.

S. Eucherius ex Senatore, & principe viro Lugdunensium Antistes, doctissimus*, atque una floridissimus Scriptor, magnos passim eloquentiæ præcones numerat, sive antiquos illos, sive Recen-

* Sunt, qui vel hebraicæ linguæ cognitionem Eucherio tribuant.

Recentiores: quorum sententias tanto lubentius, ut dictum est, ubique referimus, ne nobis ipsis, qui minimi sumus, sumpsisse aliquid in ea re iudicanda videamur.

Primus, quod sciam, Eucherium laudavit S. HILARIUS ARELATENSIS æqualis eorum temporum, quique viri dotes præ ceteris cognitas habebat. Hic *Epist. ad ipsummet Eucherium*, libros illius *florulentæ. & speciosa opera* appellat, additque se *universa miratum*.

SALVIANUS quoque, *Epist. 2.* iterum ad ipsummet, mentem hominis *prope singularem* asserit, & *Epist. 8. ad eundem* ita de libris sibi missis rescribit: *Legi libros, quos transmisisti, stylo breves, doctrina uberes, lectione expeditos, instructione perfectos, menti tuæ, ac pietati pares. Nec miror, quod utile, & pulchrum opus ad institutionem potissimum sanctorum, ac beatorum pignorum * condidisti. Cum enim eximium in eis templum Deo ædificaveris, doctrina novæ eruditionis quasi summum ædificiæ tui culmen ornaſti **.*

CLAUDIANUS MAMERTUS *Libro II. de statu animæ cap. 9.* „Haudquaquam, inquit, Eucherium „præterierim, mihimet viventem, doctrina, & „præsentaneis coram disputationibus cognitum, „non porro nuntiis, aut lectione compertum. „Qui scilicet viridis ævi, maturus animi, terræ „despuens, cæli appetens, humilis spiritu, arduus „merito, ac perinde ingenii sublimissimus, scientiæ „plenus, eloquii profluus, magnorum sæculi „sui Pontificum longe maximus, editis in rem „fidei multijugis variorum operum voluminibus, „ad

* VERANI, & SALONII, ambos post celebres Episcopos, quos Sanctus noster antea, quam sæculo valediceret, ex justo matrimonio susceperat.

** Atqui in libris illis vix erat eloquentiæ, sed doctrinæ tantum concessus locus.

„ ad populum quoque super animæ statu multa nobiliter * concionatus est. „

RUSTICUS, nescio quis (forte idem, ad quem SS. Hieronymi ac Leonis Magni epistolæ extant, ex monacho & post Presbytero Massiliensi Episcopus Narbonensis) *Epistola ad Sanctum nostrum*, quam dat Sirmondus in *Scholiis ad Libri II. Epistolam* 11. S. Sidon. Apollinar. laudans forte librum ejus *de obscuris Scripturæ quæstionibus*, elogium quam plenum, tam elegans gravissimis hisce verbis texuit: „ Quam „ admirabilis mihi fuerit, manifestius declarasse non „ potui, quam ut eum a me fatear non digne posse „ laudari. Quamquam quid ego ad attollendum, „ quæ edidisti, solum me esse imparem dicam? pace dictum sit omnium, qui sunt optime his, quæ „ liberalia appellant studia, instituti, nec ab eis „ quidem mira librorum tuorum præconia satis digne excoli posse existimo; quia licet facilius esse „ decernam judicare, quam dicere, mihi tamen „ adeo persuasum est, non esse hoc facile, ut merito definiam, quod nemo rectius tam præclari „ operis prædicator existeret, quam ejus inventor, „ & cognitor; quia quod nemo sic potuit invenire, „ utique nemo sic laudare possit. „ Mox eam in rem affert exemplum illius, qui Virgilium a solo Virgilio pro meritis laudari posse existimavit: denique ita concludit: „ Omnium christianorum ore, & „ amore celebraris, prædicandus in posterum, dum „ doces posteros. „ Hæc ille, cujus verba ultima unice memoratum supra librum respiciunt, illum videlicet, in quo ratione argumenti minimum eloquentia habere locum potuit.

S. ISIDORUS HISPALENSIS *Libro de viris illustrib. cap. 15. Eucherium Franciæ Episcopum elegantem sententiis, ornatum in verbis dicit.*

R 2

ADO

* Alii legunt: *His super animæ statu concionatus est.*

ADO VIENNENSIS Archiepiscopus in *Martyrolog.* Eucherium vocat *admirandæ fidei, vitæ, & doctrinæ virum.*

S. PETRUS DAMIANI *opuscul. XXVIII. cap. 2.* S. Eucherium *virum nobilissimum* nominat, & *eloquentissimum.*

EX Recentioribus JOANNES TRITHEMIUS *Libro de Scriptorib. Ecclesiast.* Eucherius, inquit, *Episcopus Lugdunensis in Gallia, vir doctus, & monachorum disciplina a juventute imbutus, ingenio promptus, & sermone compositus, vita, & conversatione Deo, & hominibus gratus, quippe qui multos & verbo, & exemplo ab iniquitate avertit: scripsit plura egregia volumina.*

M. ANTON. COCCIUS SABELLICUS *Enneade VIII. Libr. 1.* S. Eucherium *dicendi copia, & doctrina celebrem* vocat.

ERASMUS ROTERODAMUS *Epist. ad Alardum Amstelredamum,* a quo Eucherii Parænesin acceperat, hujus libros inter ea veterum monumenta numerat, quæ sunt ejusmodi, ut cum vera pietate veram eruditionem, eloquentiamque conjunxerint.

JOANNES SICHARDUS in *Nuncupator. ad Albertum Cardinal. & Elector. Mogunt.* Eucherium vocat *sanctissimum, atque eruditissimum suæ tempestatis Episcopum, qui literis, & vitæ sanctimonia, ut erat ejus loci viro dignum, esset habitus clarissimus.*

SIXTUS SENENSIS in *Biblioth. Sanctæ.* ita Eucherium celebrat: *Eucherius Lugdunensis Ecclesiæ Episcopus natione gallus, vir inter eos, qui pietatis, eruditionis, & eloquentiæ gloria floruerunt, insignis, multa in sacras Literas præclari ingenii sui monumenta reliquit, latino sermone conscripta, & elegantibus verbis, argutisque sententiis florentissime exornata. Idem ibid. ad Sancti viri conciones delapsus, celebratissimas appellat.*

PETRUS GALESINIUS in *Epistola operibus præfixa hunc in modum Eucherium laudat, ut eloquen-*

quentiam quoque illi tribuat minime vulgarem : sed gravem , neque popularibus refertam sententiis , quæ quibusdam quasi luminibus eluceat , in qua dicendi vis cernatur , quæque ornatum , & splendorem habeat. Hæc Galefinius , qui tamen nihil de scriptis ejus , quod ad eloquentiam pertineret , præter *Paræneticam* de contemptione , & despicientia rerum humanarum viderat : imo *Commentarios in Genesin* , & in *Libros Regum* , parum sane disertos , Eucherii esse putabat. Quid putas scripturum , si consequentis sæculi beneficio & crisi magis instructus ille fuisset , & *librum de laude Eremi* habuisset ad manus , denique *sermones* Eusebio Emiseno tributos olim , nunc auctori redditos studiose contuitus esset ?

PETRUS GERARDUS , & CLAUDIUS CHEVALLONIUS , qui scripta sancti Doctoris repurgata , atque in lucem emissa Guilielmo Parvo Trecensi Episcopo & Regis confessario dicarunt , ipsa fronte *Eucherium Lugdunensis Ecclesiæ quondam Archiepiscopum Theologum disertissimum* scribere voluerunt.

DIONYSIUS FAUCHERIUS Monachus Lerinensis *Præfat. in Opusc. S. Eucherii de laude Eremi* , ipsum Eucherium primo loco inter eos Lerinenses ponit , in quibus cum vitæ sanctimonia eruditio , & eloquentia certare videbantur.

Eadem S. Eucherii scripta laudat CARDINALIS BARONIUS *ad ann. 441.* ac pro iis mirum in modum sollicitum se ostendit , illud exoptans vehementer , uti integra aliquando , & asserta auctori suo in lucem prodirent.

HERIBERTUS ROSWEYDUS *Nuncupator. ad Henric. van der Heyden Villariæ Abbatem* , vocat Eucherium magnum olim Galliæ decus seu pietatem , seu doctrinam , stylique elegantiam spectes. Et statim ibidem : *Et si sæcularibus* , ait , *hominibus , si humanos affectus inspicias , non admodum grata tractat , eo ta-*

men sententiarum pondere, ea dicendi amœnitate rem suam prosequitur, ut si quis vel promulsidem pagellæ unius ceperit, non defiturum eum affirmare ausim, quin recta se totius libelli cœna sit exsaturaturus.

THEOPHILUS RAYNAUDUS in *Indicul. Sanctor. Lugdun.* Eucherium fuscè exornat, atque eloquentiæ, & doctrinæ laude florentem dicit. Idem jam in *Prolegomenis* illius opusculi: *Magnum Eucherium inter Lugdunenses Antistites genere, eloquentia, sanctitudine illustrissimum* vocat.

Nec inelegans est laudatio, qua Eucherium Andreas Saussaius in *Martyrolog. Gallican. XVI. Kalend. Decemb.* extulit, ita de ejus scriptis loquens. „ Quæ
 „ ex jugi cœlestium rerum meditatione, vel sacra-
 „ rum Literarum lectione hauriebat, chartis impri-
 „ mens, atque admirando verborum ornatu, quo
 „ superne ditatus erat, vestiens, ad amicos dirige-
 „ bat, quos vel a fluctuantis sæculi jactatione ad tu-
 „ tum religionis, & casti secessus portum, crucis-
 „ que, ut aiebat, anchoram advocaret, vel jam ad-
 „ ductos animaret: quin per eorum industriam
 „ charitatem ceteros mundi adhuc turbinibus im-
 „ plicitos, divinorum placitorum, promissorum-
 „ que prædicatione, Beatorum, qui sæculum for-
 „ titer calcaverunt, commendatione, & delecta-
 „ tione ipsa christianæ sapientiæ (cujus mirificis ar-
 „ tificiis decora promit) ex ipso exitiali pelago
 „ ad eundem salutis portum abduceret. Extant
 „ divini illius viri pia, præclaraque opuscula, quæ
 „ sanctissimi quique, disertissimi tum hujus ævi,
 „ tum sequacium annorum Patres, & Scriptores
 „ miris extulerunt præconiis, in quorum laudibus
 „ magno præ ceteris æstu commendationis arserunt
 „ Sancti Episcopi Hilarius Arelatensis, Sidonius Ar-
 „ vernensis, Isidorus Hispalensis, Ado Viennensis,
 „ Claudianus Mamertus Presbyter itidem Vien-
 „ nensis, Salvianus Massiliensis præter Gennadium,

„ Cy-

„ Cyprianum vitæ S. Cæsarii Scriptorem, Marcelli-
 „ num Comitem, Honorium Augustodunensem,
 „ & innumeros Recentiores, etiam pietatis parum
 „ amicos, qui uno ore floridissimi omnino, & do-
 „ ctissimi dissertatoris libros suavissimos, eruditissi-
 „ mos, sapientissimos, excultissimos, atque ut uno
 „ dicam verbo, divinißimos prædicant, & miran-
 „ tur. „

ANTONIUS PAGIUS in critica Baronii ad ann. 441.
 Libros S. Eucherii egregia vocat ingenii monumenta.

NATALIS ALEXANDER Sæculo V. cap. 4. art. 20.
 Eucherium, ait, cum doctissimis operibus editis, tum
 eloquentissimis ad populum habitis concionibus celebrem,
 id quod probat ex Mamerto supra citato.

DIONYSIUS SANMARTHANUS Gallix christiænæ
 Tomo IV. de Ecclesia Lugdunensi pag. 23. ita de
 Eucherio nostro habet. *Eucherius I. natione Gal-
 lus, patria, ut videtur, Lugdunensis, natalibus illu-
 strissimus, præstantissimorum sui ævi virorum Paulini
 Nolensis, Honorati, & Hilarii Arelatensium Præsu-
 lum, Salviani, Claudiani Mamerti, S. Sidonii, Cassia-
 ni &c. amicitia, & elogio clarissimus, impense quoque
 a Gennadio, Isidoro Hispalensi, & Adone laudatus,
 subtili, ac sublimi ingenio, eminenti scientia, eloquen-
 tia maxima, sanctitateque summa percelebris fuit. Et
 paulo ante pag. præcedent. Consulantur ejus opera,
 & quas scripsit Epistolas, ubique in eis viget incorrupta
 linguæ latinæ integritas, ubique lucent sermonis ele-
 gantia, & veneres.*

ABBAS LADVOCAT in Lexico historic. portat.
 S. Eucherii tractatus excellentes appellat *. Hucus-
 que de elogiis eloquentiæ Eucherianæ, quibus dili-
 genter perscriptis superest jam, ut de genio quo-
 que & charactere ejus nonnulla addamus.

R 4

CAPUT

* Recolat etiam Lector, quæ supra capite primo Dissertationis de eloquentia S. Paulini ex Natale Argonenfi attulimus.

CAPUT II.

Dos Characteristica.

Gennadius *Libro de Illust. Eccl. Scriptorib. cap. 63.* *scholasticum sermonem, & rationabilem* Eucherio tribuit, id est talem, qui elaboratus sit ad regulas artis, & materiæ tamen accomodus. Verum hæc nimis generica sunt, quam ut inde scribendi notiones illas extundere possis. Sed neque a stylo huius hominis ferreo aliud quid licet expectare; qui vel si habuit salivam ad genus sermonis discernendum, quod non credo, verbis tamen semper caret, quibus explicare discerniculam illud, & legentibus repræsentare deberet. Itaque Eucherii character in eo esse mihi videtur, quod genus orationis habet dulce admodum, æquabile, pellucidum, amœnum, rotundum, quod instar hortensium aquarum placidissimo sono labitur, atque decurrit. Lepor in eo minime fucatus, nexus ipse, ac constructio verborum æque flexibilia, & sic numeris suis illigata sunt, ut ad scribentis arbitrium veluti accomodet se oratio, modesteque exultet, imo perennem illam serenitatem, sanctamque malaciam purissimi auctoris demonstret. Atque hanc sententiam nostram video omnes, quotquot de Eucherio scripserunt, assensu excipere, nullusque est, qui non mella, & blanditias, & byssina verba in Eucherio deprædicet. Sic Theophilus Raynaudus in *Titulis cultus Sanctor. Special. mellissimum doctorem*: in *Indiculo autem Sanctor. Lugdunens. mellitissimum auctorem* vocat, cuius *excriptione ipse non satietur*. Petrus vero Justus Sautel Poëta celebris in *Anno Sacro poët. ad XIV. Nov.* ait, videri calamus eius, quem alii atramento intingerent, mero melle imbutum. Equidem videtur Senecam legisse Eucherius, si leporem sententiarum spectemus: neque desunt, qui *Senecam* *Christia-*

Christianum appellant *: verum ab eo plurimum noster ille differt; nam cum acumina, & vivacitatem magnam habeat: ab argutiis tamen, & ingenii ostentatione, quam Philosophus ubique sectatur, longissime recessit; ut adeo si virtutes Senecæ quasdam non est plenissime affecutus, vitia tamen eius omnia evitaverit. Sed in eo quoque toto cœlo distant Seneca, atque Eucherius, quod in Seneca aliquis rigor, severitasque stoica ubique elucet, quod probitatis opinionem, & magistrum quoddam putide affectat, quod utraque ejus pagina superlationibus, ac hyperbolis ita turget, ut sæpe candorem, sæpius etiam judicium in eo desideres. Contra Eucherius tam mitis, tam lenis, tam placidus, & tractabilis est, tam modeste, atque etiam verecunde agit, ut assensum non tam extorqueat legenti, quam eblandiatur. Atque ista suavitas, ista facultas insinuandi se animis in sententiam minime quidem temerariam, sed novam me adducit, non Ambrosium, non Bernardum, sed Eucherium potius per *antonomasiā* mellitum, sive *mellissimum doctorem* appellandum esse. Illorum enim facundissimorum, suavissimorumque Patrum libri, uti alvearia quædam exhibent, aculeos tamen figunt sæpius, quam mella propinent: in Eucherio, quasi bile caruerit, benignitas ubique regnat, & suavitas: quod etiam ubi assurgit, & grandescit oratio ejus, deferere nunquam potest. Certe enim de Eucherio præ ceteris dicas, quod de S. Honorato ipse dixit, cum ab eo epistolam in tabulis, ut tum mos ferebat, cera illitis recepisset: *Mel suum ceris reddidisti* **. Atque hac de causa dictionem viri, ut primum studiose

R 5

perpen-

* Raynaudus non semel, Cardinalis Bona in *Notit. Auctor.* alique, quorum nunc non recorder.

** S. Hilarius Arelat. in Vit. S. Honorati.

perpenderis, ab omnibus aliis continuo internoscas. Et recte Dionysius Faucherius in *Præfat. ad Libr. de laud. Eremitæ*: *Character ipse, & dulcis disertæ orationis fluxus eundem ipsum esse facile indicat.*

Alterum in Eucherio singulare est sublimitas quædam cogitationum, grandesque ac nobiles sententiæ. Equidem flores in eo perpetui, quocunque spectes; quæ ipsa est ratio, cur toties, præsertim a Raynaudo nitor, & venustas in eo laudentur, cur *florulentissimus, floridissimus &c.* ipsa vero opera *omni dictionis cultissimæ flore* vernantia dicantur **: verum flores isti nihil apud eum officiant magnis sensibus, quos velut sponte oblatos profundere solet. Observavit id Erasmus *Præfat. in Hilarium*; ibi enim Eucherio *quiddam grandiloquentiæ* tribuit, *Gallorum ingeniis peculiaris*: addens, Hilario, qui maxime est grandiloquus, magis, feliciusque elaboratum videri sibi. Itaque cum sententias ejus considero grandes, luminosas, velut aulaea quædam mihi obijciuntur, ubi auro, argento, gemmis contexta sunt plurima, ac mirificum quemdam splendorem emittunt; ejusdem tamen illum generis, itaque temperatum, ut cum videas artificium, non agnoscas. Quod si verba, & numeros, & transitus, ceteraque exteriora circumspicio, velut in hortum delatus undique amoenissimò odore afflari me sentio, sed & novam oculis, eamque mirificam oblatam voluptatem; a qua sic recedam, ut regustare identidem, ac repetere animus sit. Ita afficit, ita hæret animo, ut invenire me semper putem, ad quod ante non adverterim, unumque doleam, a tali calamo non quam plurima alia profluxisse, aut si profluxerunt, a temporum injuriis vindicata non esse. Verum character

* Libris citat. & alibi sæpe.

rafter Eucherii multo magis elucebit, ubi de *Parænesi* ejus singulatim sequenti capite dicemus.

CAPUT III.

Delectus Scriptionum.

Inter omnes eminet Parænesis, ad Valerianum cognatum scripta. Est enim opusculum prorsus egregium, in quo sive ad doctrinæ copiam, sive ad eloquendi facilitatem nihil prorsus defidetur. Certe cum nemine de eo usquam collocutus sum, sed nec facile quemquam legi, qui ejus sine laude singulari non meminisset. Antonius Possevinus in *Bibliothec. Libro XVIII. cap. 10.* de ea Epistola loquens: *Quæ una, inquit, superat sexcentas alias, quæ cordatissime videri possint a Cicerone perscriptæ.* Andreas Schottus in *Recensione operum ad pium Lectorem: Aurea vero est, ac melita omnino Epistola ad Valerianum propinquum &c.* Heribertus Rosweydydus semel, iterumque *aureolum libellum* dicit. Theophilus Raynaudus *opellam* vocat, in quam omnes dicendi venteres confluisse videntur *. Novissime autem, quo solet nitore, atque accuratatione Ignatius Weitenauer, vir de omni pene genere literarum hac nostra ætate meritis: In *Epistola*, ait, *ad Valerianum, quæ primas partes obtinet, reconditas, exquisitasque sententias vestit molliis, & pellucens oratio. Nihil tam tenerum, quam illius comprehensio verborum, nihil tam flexibile, nihil, quod magis auctoris arbitrio profluat. Nihil fingere possis liquidius. Nihil uspiam adhærescit. Multa translata, sic tamen, ut ea non immissa in alienum locum, sed immigrasse in suum diceres.* Hæc ille, hac maxime in parte idoneus, ac locuples testis, *Libro XI. Subsidiorum*, ubi brevem Scriptorum Ecclesiasticorum recensionem habet.

Sed

* Iterum in *Indiculo Sancti Lugdun.*

Sed necdum omnia diximus. Age ergo illum audiamus, post cujus sententiam nemo aliam requireret. Erasmus intelligo Roterodamum, qui Parænesin hanc jam anno 1530. cum notis quibusdam in lucem emisit. „Libellus, quem misisti, „(scribit ad eundem, ut supra, Alardum). cum sum „is dotibus undique mirum in modum placuerit, „tum hoc placuit impensius, quod olim puero „mihi & lectitatum esse, & placuisse memini. „Si quid meo suffragio tribuis, nihil video profectum a nostræ religionis hominibus, qui eloquentiæ quoque gloria floruerint, quod cum hujus phrasi sit conferendum. Ut nusquam non præstat egregium artificem, sive spectes ordinem, sive transitus subinde novos, sive non vulgarem ingressum, veluti limen argumentationis! Nullam suasorii generis partem non tractat. Nusquam desidet in locis communibus, magis urget, & instat argumentis, mire pungit epiphonematis, delectat juxta, ac movet sententiis: quodque magis etiam mirandum est, sic Ilocratis schematibus modulata, structa, picturaque est oratio, ut nusquam frigeat, aut ineptiat: sic arguta, ut interim nervosa, sic elaborata, ut tamen dilucida, sic nova, sed ut tædio careat affectationis, sic festiva, ut nihilo secius gravis, ac seria: sic rhetorica, ut *γυναικίως* tamen christiana, denique sic acris, & vehemens, ut sui tamen ubique similis pari intentione ad extremum usque calcem properans sani videlicet, vegetique ingenii argumentum“. Hoc testimonium eloquentiæ Eucherii quam elegans, tam singulare est. Venit enim ab eo, qui in genere dicendi, quo plurimum valuit, neminem facile palpavit, quod vereretur semper, ne, quantum accederet aliis, tantum sibi detraheretur. Unde sicut in scriptis *Patrum* dijudicandis erat implacabilis

bilis, ita ubicumque licebat, nec *Patrum* reverentia absterri potuit, ut eorum monumentis parceret, muris instar, ut ex ejus nomine ludere nonnullis placuit, qui nullo discrimine & viles, & pretiosos codices arrodant.

Non ergo mirum est, si tantum in Valeriani animum libellus hic potuit. Ejus enim præceptis Rosweyda *loc. cit.* tribuit, quod ille mundum reapse contempserit, quod ad Monachos confugerit, quod denique, ut omnia dicamus, ad summam virtutem, & gloriam pervenerit, notissimus hodieque Sanctus, Valerianus Cimeliensis Episcopus. Sic autem ait Rosweyda: *Producit ille duo sæculi ornamenta, honores, & opes, quæ ita caduca, ita incerta ostendit, ut merito viri aliquot magni (quorum seriem nescit) ea contemptui habuerint. Et quidem, ut ij ad omnem mundi contemptum exemplo suo multis præluxere, ita nullum mihi dubium est, quin Eucherius cognati sui Valeriani animum illecebroso hac dape inescarit, & a sæculi vanitatibus ad veras duraturasque spiritus delicias avocarit.* Gaspar Barthius *Libro X. Adversarior. c. 14.*, ait: *Mirifice jucunde me affecit, cum eam perlegerem, parænetica Epistola Eucherii Lugdunensis ad Valerianum cognatum, cui aliam nunc gratiam rependere non possum, quam ut illustrem eam, & recenscam, faciamque opera mea, ut minus illi insit obstaculorum, quibus lectorem attentum possit morari.* Et *ibid.* infra: *Nos vero divinus hic Eucherii libellus adeo cepit, ut carmine illum totum descripserimus.* Sed nec illud omittendum est, quod multum valet ad libelli utilitatem demonstrandam, quam plurimas ejusdem impressiones curatas ad usum juventutis. Occurrunt passim illæ in Bibliothecis *Marianarum Congregationum*, quarum impensis inter adolescentes distributæ sunt; quod nihil censeretur blandius, efficacius nihil ad teneras mentes a sæculi illecebris abstrahendas. Eadem de

de causa Rosweyduſ ipſe Antwerpienſi prælo, eo-
que nitidiſſimo edidit, ut, quemadmodum inquit,
homines ſæculi faſtu turgidi, opibus inflati diſcant
cervices ponere, aurum calcare, & ad religionis por-
tum enavigare. Videri etiam poteſt Gaſſinius lo-
co ſupra allegato.

Secundo loco laudandus eſt libellus *de laude*
Eremitæ, de quo ita S. Iſidorus Hiſpalenſis, primo
jam capite citatus. *Edidit ad Hilarium, poſtea*
Arelatenſem Antiſtitem eremi deſerta petentem unum
opusculum de laude ejusdem eremi luculentiffime, &
dulci ſermone dictatum. In quo opere laudamus do-
ctorem, etſi pauca, tamen pulcra dicentem. *Brevitas*
*enim, ut ait quidam *, laus eſt interdum in aliqua*
parte dicendi, in univerſa eloquentia laudem non ha-
bet. Dionyſius Faucherius Monachus Lerinenſis,
qui opusculum hoc e pulveribus, ſituque vindica-
verat, vocat *Epistolam ſtylo elegantem, qua vitæ mo-*
naſticæ inſtitutum miris laudibus effert. Item pre-
tioſiſſimum theſaurum, ac rem nullo ſatis digno pre-
tio æſtimandam: cujus artifiſcium, eloquentiamque
cum chriſtiana pietate conjunctam, ſi laudare voluerit,
fore, ut ſuperſluus merito poſſit judicari. *Ele-*
gantiffimum illum libellum, ait Raynaudus loc cit. in
ſeceſſu prope Lerinum conſcriptum ad Hilarium, po-
ſtea Arelatenſem Præſulem, pridem a Genebrardo edi-
tum, recognitum, ac diſſectum recudi nuper curavi-
mus, ut lucubratiuncula longe elegantiffima fruerentur,
qui eam intercidiſſe proxime expoſtulabant, eaque id-
circo magnam Patrum Bibliothecam fraudarant **.
Idem Raynaudus alibi ***: *Exquiſitas prærogativas,*
quibus ſolitudo jam olim decoratur, complexus eſt
vernantiſſima ſcriptione Eucharius. Denique Dio-
nyſius

* Ciceronem in *Bruto* ſignificat.

** Porro ipſam Raynaudi editionem nunquam vidimus.

*** Tom. IX. *dissertat. 12. de S. Maria Egyptiaca.*

nysius Sanmarthanus *Tom. IV. Galliæ christianæ* pag. 23. *Scriptit Eucherius, inquit de laude Ere-
mi, seu de vita solitaria libellum elegantissimum, con-
ceptum eminentia, verborum ornatu, facili, ac cum
lenitate fluenti oratione præstantissimum.*

Tertio loco veniunt Sermones seu Homiliæ com-
plures, Eusebio primum Emisseno, post Eusebio
cuicunque Gallicano adscriptæ. Tam autem lati-
næ sunt plerumque, ut mirer ego, tamdiu tri-
bui Scriptori græco potuisse, nisi forte, qui vide-
runt, ultra *titulum* legendo progressi non sunt.
Quotquot de iis commemorant, *elegantes* dicunt,
& Gagnei editionibus appellatio *eloquentissimarum*,
& *religiosissimarum* præfixa fuit. Certe Eucherium
in eis vides, si alia argumenta deessent, ip-
seque per se loquitur, suas esse. Stylus quippe
idem, vividus universe, sententiosus, suavis, fe-
stivus, antitheta ubique immiscens, & verbis non
multis comprehendens quamplurima, quæ ne-
quaquam evolvit, sed lectori meditanda relinquit.
Andreas Saussajus *loc. cit.* ait, *cas Eucherium omni
venustatis flore, & pietatis affectu concinnavisse.* *
Non tamen similes sunt omnes sive elegantia, si-
ve robore, & aliquæ ad Faustum Rhegiensem, &
etiam Cæsarium Arelatensem, multo minus diser-
tum spectant. Corpus ipsum venustissimum est,
atque etiam comptum: verum minus elegantia illi
assuta sunt. Sed Raynaudum denuo audire de-
bemus *eod. loc. Indiculi.* Quo minus, inquit, omnes
*quingenta homilias per errorem Eusebio Emisseno
tributas, Eucherio vindicatas velim (nam ceteræ, quæ
de Tempore dicuntur, ac Eusebio item Emisseno per-
peram*

* Vide etiam Gasparis Barthii *caput 16. & 26. Libri
XLIII. Adversariorum*, & Andreæ Schottum *Præ-
fatione ad Eusebium Gallic.* ubi haud obiter agitur de
hoc corpore Homiliarum.

peram adscriptæ sunt, ne pilum quidem, vel atomum
 nativæ Eucherio elegantiae habent *) facit styli in-
 plerisque dissimilitudo, & quod aliquas ex eis Fausti
 Rhegiensis, aliquas Maximi item Rhegiensis, non-
 nullas Casarii esse, aut Hilarii Arelatensis, evictum
 jam pridem videam a Bellarmino, aliisque recentio-
 ribus, quorum judicia frons postremæ earum homilia-
 rum editionis præfert. Ibidem ad earum laudem
 digressus celebrat concinnitatem, & acutam venusta-
 tem, quam in eo prisca omnes suspexerint. De reper-
 tis vero a Joanne Livineio, & ad calcem cateche-
 sium B. Theodori studitæ positis ita pronuntiat:
*De quibus idem judicium ferendum est, quod de su-
 perioribus, nimirum aliquas quidem nitorem Eucherii,
 venustatemque redolere, nec injuria ei adscribendas vi-
 deri: quasdam tamen alium omnino parentem habere.*
 Id quod etiam nominatim de illa, quæ est in Sa-
 cerdotis, & altera in S. Honorati depositione, tamen-
 si pereleganti, & culta, ostendit. Elegantissimi
 loci fere sunt in Sermonibus ad festa Martyrum
 popularium. Recteque Raynaudus in eod. Ind.
 dixit: *Vivam illam cognati vocem sanguinis ** apud
 eundem omni tuba clarius insonare.*

De Libro *Formularum spiritualis intelligentiæ ad
 Veranum*, & duobus aliis *Instructionum ad Saloni-
 um* super difficiliores quæstiones sacrae Scripturæ,
 non est, cur plura dicamus. Etsi enim eos Mar-
 cellinus Comes in *Chronico*, & eosdem vir litera-
 tissimus Andreas Schottus in *Recensione* non qualia-
 cunque, sed *necessaria scripta* vocet, etsi splendi-
 da Rustici laus, capite primo allata, ultimos hos
 maxime respiciat, tamen ex argumenti conditione
 rheto-

* Sunt S. Brunonis Astensis, seu Signiensis dicti, qui
 diu post vixit.

** Quæ ipsius Eucherii phrasis est *Homil. de SS. Epipo-
 dio, & Alexandro.*

rhetoricari in iis minime licebat. Non nisi docere tum Eucherius voluit, *confectans*, ut in *Præfation. ad Salon.* ait, *non tam eloquii exultantis ambitum, quam necessariæ brevitatis modum.*

Aliter dicendum de *Epitome Cassiani* ab Eucherio concinnata: verum hæc magno rei christianæ detrimento intercidit; id quod tanto magis dolendum, quod B. Petri Damiani ætate adhuc extabat: uti patet ex *Opusculo* ejus *XXVIII*, quod capite primo allegatum est. Ibi enim hæc habet: *Legite collationes Patrum, quas Eucherius Lugdunensis Episcopus elimato sermone abbreviare studuit.*

Plura dabunt Guilielmus Paradin in *Historia Lugdunensi Libr. II. cap. 1.* Vincentius Barralis Salernus in *Chronologia Lerinensium*, et qui jam ante prodiit Jacobus Severtius in *Chronologia Historica Antistitum Lugdun.* Josephus Antelmus in *Dissert. de unico Eucherio.* Hanc cum morte præventus ipse non absolvisset, frater ejus Carolus editurum se est pollicitus: an vero promissis steterit, ego quidem non scio, certe scriptiorem ipsam necdum vidi. De lamure in *Historia Eccl. Lugdun.* P. De Colonia in *Biblioth. Auct. Lugdun.* Ignatius Weitenauer *Subsidior. Libro XI.* Denique Critici Dupinus, Tillemontius, Ceillierius &c. cum quibusdam rerum Ecclesiasticarum Scriptoribus. Nobis priores illi non sine delectu adhibiti abunde sufficiunt.



DISSERTATIO XL

De Eloquentia SALVIANI.

CAPUT I.

Commendatio, & celebritas ejus.

Inter eloquentissimos Latinorum Patrum Salvianus numerandus est, de quo partim incuria, partim infelicitate temporum eorum est factum, ut sane quam paucissima habeamus. Quidam Aquitanum, alii Trevirenses, iterum alii Coloniensem faciunt. Nobili loco natus, & prædiis omnibus excultus ad humanitatem, Palladium uxorem duxit. Qua primum ad Sacra nostra, post ad continentiam quoque adducta, in Ecclesia Massiliensi Presbyter est factus. Fuit autem summis ea ætate viris Agroecio Antipolitano, S. Honorato Massiliensi, S. Eucherio Lugdunensi non usu tantum, sed amicitia, & intima necessitudine conjunctus. Quantum vero eruditioni, & eloquentiæ ejus Eucherius tribueret, ex eo satis manifestum est, quod cum ipse doctissimus, atque una disertissimus esset, filios tamen suos Salonium, & Veranum, summæ spei juvenes Salviano tradidit, humanis æque, ac divinis literis imbuendos. Falluntur autem vehementer, qui Episcopum faciunt. Error inde est ortus, Quod in quibusdam Gennadii editionibus homilias *Episcopus factus* multas composuisse dicitur, cum potius homilias *Episcopis* vel *ad Episcopos factas* legendum sit. Vir enim doctus, & magnam dicendo celebritatem consecutus inter alia sermones quoque conscripsit, qui post ab ipsis Episcopis, ejus operam frequenter expetentibus, in Ecclesia recitarentur. Quæ eadem sane causa est, ob quam Gennadius *Magistrum Episcoporum* eum appellat.

Hæc

Hæc non alia scimus, ad Salvianum pertinentia; quare ad testimonia convertimur, quæ varii cum veteres, tum recentiores scriptis ejus gravissimis tribuerunt.

S. EUCHERIUS in *Nuncupatoria librorum suorum ad Salonium* Salvianum dicit *eloquentiâ pariter scientiâque præminentem*.

S. HILARIUS Episcopus Arelatensis *Serm. de vita S. Honorati cap. 4.* Salvianum cum alias, tum nominatim propter scripta sua *egregium, & in Christo beatissimum virum* appellat.

GENNADIUS in *Catalog. Viror. illustr.* ait: *Salvianus apud Massiliam Presbyter humana, & divina literatura instructus, & ut absque invidia loquar, magister Episcoporum scripsit scholastico, & aperto sermone multa &c.*

Post hos altum de Salviani eloquentia silentium; nisi forte apud eos, qui Gennadium pro more exscripsisse contenti fuerunt. Latuit enim auctor in bibliothecarum angulis usque ad

JOANNEM ALEXANDRUM BRASSICANUM, qui primus protraxit in lucem, & typis edidit. Hic vero eloquentiæ Salviani ejusmodi elogium texit. ut in ejus laudibus, quæ sunt amplissimæ, ordine prædicandis nescire videatur, quid primum in eo admiretur, quid postea comprobet, quid postremo laudibus vehat, & demum superlatione homerica eum præferat omnibus. Sed quæ minus verbosè dicta sunt, huc transcribamus.

„ Quis, exclamat, hoc Salviano vel sanctius, vel
 „ incorruptius de iis omnibus rebus, quas maxi-
 „ me conveniebat esse sublatas e medio, scripsit?
 „ quis christianos sibi perverse blandientes, ita
 „ nominis sui rationem habere admonuit? quis ita
 „ probabilibus argumentis docuit, nos, omnes
 „ tandem calamitates, pericula, & excidia non
 „ a Deo pati, sed nostro vitio, stultitia, atque

„ perversitate mala tanquam cæcias nubes in ca-
„ put nostrum advocare. . . . Jam quis planius
„ ostendit, nullos omnino homines ita summi sui
„ Imperatoris præcepta, vel minima illa pro nihi-
„ lo ducere atque Christianos? quis certius pro-
„ bavit, nos esse reliquis omnibus, utcunque bar-
„ baris, & incultis gentibus improbiores, qui Deum
„ etiam ipsum incredibili pietate singulis exposi-
„ tum, invitum, & nolentem (utcunque perditum
„ simus) in perniciem nostram non aliter, quam
„ Thessalæ mulieres lunam e cælo deducentes ex-
„ citamus. Omitto, quam graviter ille divites,
„ ac potentes in ordinem redigat, quam illos de
„ cælo detrahat, quam officii sui meminisse do-
„ ceat, quando ex iis turpissima vivendi exempla,
„ si sint impotentes, & improbi, in universos
„ omnium mores defluant. Rursus quam solícite
„ pauperum, hoc est innocentiae causam agit:
„ quam unum aliquem ex multis, omnibus flagi-
„ tiis coopertum, non nominatim perstringit, sed
„ ita alloquitur, ita corripit, ut ferme cum om-
„ nibus loqui videatur; quoniam de vitiis iis lo-
„ quitur, quæ nescio an non in omnibus abunde
„ reperiri possint? Probat autem non tantum ap-
„ posite sacrarum Literarum præsidio, verum et-
„ iam feliciter, quidquid semel instituit, & ut in
„ castigando mirus est artifex, ita & in docendo,
„ formandoque magister est acerrimus. Adhæc
„ suæ ætatis excidia quædam, & post excidia et-
„ iam crescentia vitia sic ob oculos ponit, sic lu-
„ culenter exponit, sic historica fide narrat, ut
„ mihi videre videar hoc corruptissimum sæculum
„ tanquam in tabula graphice expressum: adeo
„ strenue a nobis defudatum est, ne superiorum
„ etiam ætatum perversissimis hominibus videre-
„ mur ex aliqua parte esse meliores. Socratis
„ autem platonici sententiam de communibus uxori-
„ bus

„ribus, atque liberis, utcunque ab Attico, Græco
 „Philosopho, defensam, nemo, quantum ego
 „quidem judicare possum, vel verius confutavit,
 „vel rectius everti posse prorsus invictis, ac hone-
 „stissimis argumentis ostendit. Atque hæc ad ju-
 „dicium, integritatemque summi Scriptoris atti-
 „nent. De eruditione modis omnibus absoluta
 „nemo rectius judicabit, quam qui libros illius
 „legerit, meditataque diligentia non semel evol-
 „verit. „

Idem Brassicanus in *Hendecasyllabis* operi præfixis Salvianum vocat *magnum Scriptorem, scriptorum decus elegantiorum, dignum, quem studiis, modisque cunctis mirentur, celebrent, legant frequentes, quotquot sunt, aut aliis erunt in annis magni judicio, & viri periti.*

SIXTUS SENENSIS in *Bibl. Sanct.* Libros Salviani multa laudatissima opuscula vocat.

DIONYSIUS FAUCHERIUS *supra* in Eucherio citatus virum affirmat Salvianum, in quo cum vitæ sanctimonia eruditio, & eloquentia certare videbantur.

PETRUS PITHOEUS, cum Nicolao Fabro Gallix Regis Consiliario Salvianum nuncuparet, istuc, ni fallor, insigne in Salviani commendationem profitetur: *Quamquam autem ea nunc morum labes est, ut neque mala nostra, neque remedia pati posse videamur; quando tamen ægroto, dum anima est, spes esse dicitur, dedi & hoc spei nostræ, ut Salviani de non absimili sæculo querelas nostris potissimum hominibus exponerem, quibus nullum tot, tantisque malis præsentius remedium esse putavi.*

JOANNES THEODORICI MACHERENTINUS Soc. nostræ Theologus, vir magna opinione sanctitatis, ad excindendam avaritiam nullum præsentius medium putavit, quam si Salvianum ea de re agentem ederet, atque illustraret; illud utique persuasum habens, Viri eloquentiam divinam potius, quam hu-

manam esse. Cum enim in *Nuncupatoria* apud Seruatorem amare de cupiditate, duritia, & cæcitate divitum questus esset, denique ad calcem in has voces erumpit; *Placeat tibi Domine, ab oblivione Sanctorum Patrum nostrorum doctrina vindicetur, quæ eadem tua est. Prodeat zelo tuo ardens beatus servus tuus Salvianus, & eloquentiæ suæ, aut potius tuæ fervore legentium pectora inflamment.*

CONRADUS RITTERSHUSIUS editor, admirabili vir eruditione, atque notitia antiquitatis, tanti libros Salviani fecit, uti eum totius orbis christiani magistrum appellaret.

GASPAR BARTHIUS *Libro XLIII. Adversar. c. 16.* jam doctissimum, jam eximium scriptorem sane diligenti lectione dignum, jam virum clarissimum eloquentia affirmat. Eundem rursus laudat *Libro XXIX. Adversarior. c. 3.*

ANDREAS SAUSSAJUS Episcopus Tullensis in *Martyrolog. Gallican. ad diem XXII. Julii* vocat scriptis, & meritis gloriosum, qui cælestis sapientiæ irradiatus lumine, ætate sua jubar rectæ fidei, & sanctimonix perfectæ speculum nitidum fuit, cumque adhuc esset Presbyter, jam magister Episcoporum Veranum, & Salonium Episcopos fratres, S. Eucherii Lugdunensis filios, postea laude sapientiæ christianæ insignes, in divinis thesauris erudiverit. Ad quem Salonium libros suos plane cælestes de divina Providentia dicatos miserit, & inscripserit. Libros etiam sub Timothei nomine de Ecclesia catholica concinnasse, addit, in quibus cernere sit, quam corruptus jam esset hoc ævo Cleri, ac populi christiani status; contra quorum vitia vir totus zelo Dei plenus mirum in modum excandescat, & apostolici spiritus vehementia acerbè invehatur.

THEOPHILUS RAYNAUDUS quoties fere Salviani mentionem injicit. scripta viri, & eloquentiam commendat. Sic *Tom. XI. de confix. Libror. pag. 279.*
diser-

disertissimum, Tom. II. pag. 342. non minus *elegantia scriptiois*, quam *pietate præstantem* dicit. Quam sæpe autem, & qua laude adjecta locos ejus transcribit, ac gemmarum instar orationi immiscet!

CARDINALIS BONA in *Notit. Auctor.* Salvianum cultum, ac pium auctorem, sæculi sui *Jeremiam* dicit. Quod ultimum ei præconium propter vehementiam, ac libertatem jam ante Cardinalis Baronius ad ann. 406. Andreas Libavius in *Prolegom. edit. Rittershusian.* Dominicus Bouhours in *dictis ingeniosis Patrum*, aliique plures tribuerunt.

NATALIS ARGONENSIS, de Salviani facundia quid sentiat, in *Dissertat. de eloquentia S. Paulini* jam est indicatum.

RENATUS RAPINUS de *Eloquent. Sacr. considerat.* II. Salvianum inter paucos eos PP. ponit, qui neque sicce, neque aspere scripsissent, aut depravato temporum eorum gustu corrumpi se passus essent.

Venerab. PAULUS SEGNERI, Itatorum Cicero, quo nemo melior testis hac in re adhiberi potest, *Serm. 5. Quadrag.* Salviani *divinam facundiam* appellat. Sed & alii summi concionatores, quemadmodum scriptis ejus utuntur frequenter, sic allegatum vix unquam sine commendatione singulari dimitunt. Norunt id, qui in hoc genere studiorum versati sunt. Itaque missa facio nomina eorum, contentus unicum memorasse, sed cum, qui sit instar omnium futurus, Ludovicum Burdaloueum. Neque enim uno loco prodit, quantum & tribuat huic nostro, & quantum ex sensis, & argumentis ejus mutuetur.

BOLLANDIANI ad diem XXII. Julii inter dimissos, ut Salvianum neque Sanctum, neque Episcopum faciunt, sic propter *scripta & merita*, longum & elegans elogium viro præclarissimo debitum non negant.

STEPHANUS BALUZIUS in *Præfat. operum, elegantissimum scriptorem* appellat.

JOSEPHUS JUVENTIUS, cujus in humanitate judicanda & sanissimum judicium, & usus plurimus, & gravissima auctoritas est, in aureo opere, quod *de ratione discendi & docendi jussu, & auctoritate Congregat. General. XIV. edidit, Part. I. cap. 3. art. 2.* Magistris scholarum inferiorum vehementer auctor est, uti diebus dominicis mane e SS. Patribus latinis præter Cypriani & Ambrosii, Salviani etiam elegantiores locos, & illustriores ad pietatem non minus quam eruditionem alendam volvant.

Me quod attinet, hoc ipso summi viri hortatu animatus primum ex omnibus Patribus Salvianum in manus sumpsi, & non semel tantum, sed terque, quaterque legi; neque diffiteor, voluptatem, quam ex ejus lectione maximam cepi, in causa fuisse, uti ad alios quoque accederem, denique post annos plures huic maxime rei impensos, opus istuc molirer. Quare mirari nemo debet, si cum comparatione ad molem libri, ex nullo alio tot schemata allegabo: si pro viribus, quoties id licet, commendo, si transferri in omnes linguas cupio, si denique suasi semper, & nunc suadeo, uti qui ad conciones adjecerint animum, hac maxime ætate, nunquam e manibus Salvianum dimittant, eundem spoliarent totum, atque exscribant, neque dedecori sibi ducant, ejus viri labores usurpare, qui, eo tempore, ubi tot summis viris Galliæ florebant, moresque hominum æque perditæ erant, delectus adeo ab Episcopis fuit ad conciones scribendas, quas ipsi memoriæ mandatas publice coram populo recitarent.

Sed nemo Salviani eloquentiam dignius celebravit, atque interpretes duo Galli apud *Trivultiensis* anno 1735. & 1702. quorum elogiis sua quoque iidem Censores addiderunt, quæ ut vertere longum, ita ibidem legere jucundissimum fuerit.

CA-

CAPUT II.

Character proprius, & peculiaris.

Idem Brassicanus, quem ante laudavi, & qui de
 Salviano præ omnibus optime est meritus, *loco*
dato ita stylum ejus describit. „ Gennadius illi
 „ sermonem scholasticum, & apertum tribuit; quo
 „ nomine mirum in modum commendari meretur.
 „ Si apertus est (ut est egregie dilucidus) quæ ma-
 „ jor illi laus accedere potuisset? quoniam summa
 „ virtus orationis est perspicuitas. Si scholastico
 „ sermone præcellit, neque hoc vulgare, aut asper-
 „ nandum fuerit ornamentum; præcipue si ita ni-
 „ tidum, si purum, si eruditum, ac explicatum
 „ sermonem Gennadius intellexerit. Nam nihil
 „ minus est illius oratio, quam quæ scholastica, si
 „ ita inelaboratam, frigidam, ac eruditis auribus
 „ minime ferendam velis intelligere. In aliis fui,
 „ aut paulo superioris sæculi Scriptoribus Severi-
 „ no, cognomento Boëthio, Cassiodoro, Clau-
 „ diano Mamerto Episcopo Viennensi, Sidonio
 „ Apollinari, Ennodio, ac aliis nonnullis non ubi-
 „ que puritatem latini sermonis agnoscimus: in hoc
 „ nostro plane nihil est, quod ferri non possit, nisi
 „ quod paucis quibusdam dictionibus suo sæculo,
 „ ut puto, familiaribus raro admodum utitur, at-
 „ que ita utitur, ut non ingenii, sed ætatis suæ vi-
 „ tio, usus esse videatur. Et cum reliquis Gallis
 „ peculiaris sit quædam grandiloquentia, illius ora-
 „ tio sic est constituta, ut nusquam supra modum
 „ assurgat, nusquam in illa emineant venæ, nus-
 „ quam ossa numerentur: sed temperatus, ac bo-
 „ nus sanguis impleat omnia membra: denique ner-
 „ vos ipsos, & robur tegat, & venustas commen-
 „ det. Quamobrem ut illum non arbitror omni-
 „ bus esse præferendum, ita neminem etiam ex illis
 „ antiquioribus illi præfero: quippe qui & erudita

„ pietate, & juxta pia eruditione summos etiam il-
 „ los Antistites (neminem autem in invidiam voco)
 „ multis stadiis præterierit. Ne vero vel impu-
 „ dentius de illo judicare, vel arrogantius pronun-
 „ tiare videar, exponam ordine, quanta ille feli-
 „ citate, atque dexteritate scribendi usus sit. Ve-
 „ rum itaque judicium, & attentam Dei providen-
 „ tiam asserturus, non tantum sacrarum Literarum
 „ munimentis, verum etiam omnium meliorum ar-
 „ tium præfidiis utitur, & in hunc modum utitur,
 „ ut dubites, an fortior sit in demoliendis impio-
 „ rum argumentis, quam expeditus in nostris astru-
 „ endis: qui certe nervi, ut Lactantio Firmiano,
 „ ita & multis aliis defuisse videntur. Ad hæc, ut
 „ multa paucis colligam, quis ordinis elegantiam,
 „ quis exquisitos transitus, quis explicatissima ar-
 „ gumenta, quis felicissima epiphonemata, quis
 „ annominationes festivas, quis luasorii generis om-
 „ nes partes, quis contentiones arduas, nec minus
 „ jucundas, quis sententias graves, quis exclama-
 „ tiones vehementissimas, quis insignia antitheta,
 „ quis instructissima dilemmata, quis Iſocratis om-
 „ nia schemata tanta felicitate, copia simul, ac ve-
 „ nustate exhibuit? „

Itaque hæc expendentibus nobis, Lector optime, quatuor potissimum occurrunt in eo planè singula-
 ria, quæ ita eminent, ut nescias, utrum alteri præ-
 ponderet, & frustra fere in aliis, etiam celeberrimis oratoribus conjuncta ea requiras. Sunt autem illa fervor, & impetus uni illi proprius, robur, densitas, ac dispositio argumentorum, amplificatio, & copia admirabilis, venustas denique, elegantia, pigmentis, floribusque omnis generis illustrata, quæ omnia sive nostris, sive aliorum verbis magis adhuc, magisque explicanda sunt.

Et primum quod attinet, ardens illi ingenium, quod freno semel laxato contineri vix potest, quin
 inci-

incitet orationem, & procurrat, & rapidissime, liberrimeque feratur. Eleganter Caussin^{us} *De eloquent. Sacr. & hum. Libr. III. cap. 14.* Vis, inquit, & impetus Salvianum stipant quasi satellites. Et *Libr. XIV. cap. 26.* cum mirificam ejus vocasset acrimoniam & vim dicendi, subjicit aliqua, ex quibus (ita enim loquitur) hominis impetum cum Demosthenico comparandum possis agnoscere. Conspirat cum Caussino Scriptor nuperus Franc. Xav. Mannhart in opere, quod *Bibliothecam domesticam* vocat, *Libr. IV. cap. 6.* ubi sic habet: *Salvianus ut plurimum abripi se passus quodam orationis æstu, ac impetu non inferiore illo, quo Demosthenes, tonabat potius, quam perorabat.* Ardorem hunc animi inflammabat magis zelus quidam, & vehementissimum studium ad gloriam Dei, & Ecclesiæ tuendam, servandosque mortales, velut ex condicto ad interitum properantes. Quæ si cogitemus, nunquam vitio illi dabimus affectus tragicos, paradoxa grandia, & quantamcunque loquendi, & increpandi libertatem. Ita exaggerat vitia christianorum, ait Bellarminus, & maxime Clericorum sui temporis, ut nimius videri posset, nisi ex vero zelo gloriæ Dei, & salutis animarum oratio ejus proficeretur*. Atque istuc de se ipse confitetur, quando in Epistola, libris ad Ecclesiam præfixa, incognitus, & quasi de alio quodam loquens, ita animum suum velut oculis subjicit: „ Scriptor ille; ut etiam „ scripta ipsa testantur, habet hunc in se cultum, „ & affectum Dei, ut Deo nihil præponendum putet; secundum illud scilicet Domini nostri dictum, „ quo ait: *Qui amat filium, aut filiam plus quam me, non est me dignus* &c. Videns igitur Scriptor ille, „ quem diximus, graves, atque multiplices christianorum pene omnium morbos, atque a cunctis „ in Ecclesia positis non solum non postponi omnia „ Deo,

* *Libr. de Scriptorib. Eccles.*

„ Deo , sed prope cuncta præponi &c. commune
 „ hoc esse malum prope universorum, labemque
 „ hanc non ad mundiales tantum homines, sed
 „ etiam ad poenitentes, atque conversos, ad viduas
 „ quoque jam continentiam professas, atque ad
 „ puellas in sacris altaribus consecratas, quodque,
 „ ut ita dixerim, prope inter monstra reputandum
 „ est, ad Levitas etiam, atque Presbyteros, &
 „ quod his feralius multo est, etiam ad Episcopos
 „ pervenisse, ex quibus multi, quos supra dixi,
 „ sine affectibus, sine pignore, non familias, non
 „ filios habentes, opes & substantias suas non pau-
 „ peribus, non ecclesiis, non sibi ipsis, non deni-
 „ que, quod his omnibus majus est, ac præstantius,
 „ Deo, sed sæcularibus vel maxime & divitibus, &
 „ extraneis deputarent: factus est in corde ipsius,
 „ sicut scriptum est, zelus Domini quasi ignis ar-
 „ dens, & quia æstuantibus sacro affectu medullis
 „ suis, aliud in tali æstu non potuit, in vocem do-
 „ loris erupit.,

Nequè opus habebat Salvianus id de se confiteri;
 nam qui aliter sit comparatus, qui zelo non flagret,
 ita scribere nequaquam potest, nisi forte superbiæ,
 & impotenti animo adscribere volumus severitatem
 illam, ac libertatem? Sed qui obsecro id cogites de
 homine, qui temperantiæ studio nomen adeo suum
 suppressit in primario opere? qui hac ipsa, quam di-
 ximus, epistola, omnium minimum se, atque pos-
 situm judicat, qui inter alia hæc dicit: „ Sed ta-
 „ men, quod confitendum est, præcipuum illud
 „ fuit, quia scriptor ille, ut legimus, humilis est
 „ in oculis suis, & vilis sibi, exiguum se penitus,
 „ atque ultimum putans, & hoc, quod majus est,
 „ mira fide, non officio humilitatis assumptæ, sed
 „ judicii simplicis veritate. Unde est, quod jure
 „ se etiam ab aliis talem habendum putans, qualis
 „ a semetipso haberetur, recte libellis suis alienum

„ no-

„ nomen inferuit; scilicet, ne auctoritatem salubri-
 „ bus scriptis personæ suæ parvitas derogaret. Om-
 „ nia enim amodo dicta tanti æstimantur, quan-
 „ tus est ipse, qui dixit. Siquidem tam imbecilla
 „ sunt judicia hujus temporis, ac pene tam nulla,
 „ ut qui legunt, non tam considerent, quid legant,
 „ quam cujus legant: nec tam dictionis vim, atque
 „ virtutem, quam dictatoris cogitent dignitatem.
 „ Idcirco igitur Scriptor ille abscondi, & latitare
 „ omnibus modis voluit, ne scripta, quæ in se ha-
 „ bent plurimum salubritatis, minora forsitan fie-
 „ rent per nomen auctoris. „

Ne igitur aliud in Salviani reprehensionibus, &
 quantacunque sermonis vehementia cogitemus,
 quam ardorem mentis sæculi ejus licentia atque im-
 pietate succensum; cujus proin culpa, siqua esset,
 non ipsi, sed ceteris, quibuscum vivebat, sit tri-
 buenda. Theophilus Raynaudus *Tom. XI. de con-*
fix. libror. pag. 259. „ Non modo, cum agitur contra
 „ hæreses, inquit, aut errores, sed etiam, cum
 „ mores perversi oratione forti sunt perstringendi,
 „ innoxia esto severitas, & non parcens iniquitati
 „ mordacitas. Quam enim asper, & mordax in
 „ Afros, & Gallos suos Salvianus in opere de Pro-
 „ videntia? quam salitus in libris ad Ecclesiam Ti-
 „ mothei nomine? Nemo tamen eam asperitatem
 „ scriptionis, & quasi piam sævitiam reprehensione
 „ dignam dixit, quin potius summopere celebra-
 „ vit Salviani zelum, quisquis corruptissimos illius
 „ ætatis mores valide, & absque palpatione defri-
 „ candos perspexit. „ Et iterum *ibid. Hæc durities,*
& asperitas exprompta ad modum propositum non est
vitio vertenda scriptori, sed referenda est in conditionem
materiæ. Id quod ex ipsius Salviani, in sui tempo-
ris depravatissimos mores styli strigilem, ut ait,
*stringentis, excusationibus conficit *. Addo,*
 ipsa

* In Epilogo Operis ad *Eccles. Cathol.*

ipsa paradoxa, in quibus totus est, & unde vehementiæ quam plurimum petit, nihil assurgere supra verum, neque artis potius, quam ipsarum rerum partus esse*.

Atque hæc ideo fusius tractanda duximus, ne qui Salvianum legunt, imitari hac in parte vereantur, sed potius cum res postulat, exemplo ejus animati nomine christiani proposito in ruborem dent sceleratos, adversitatum nostrarum invidiam retorqueant in scelera, in ingratitude, in avaritiam, luxum, libidinem, crudelitatem, quibus barbaris omnibus improbiores quidam facti sunt, maxime de genere potentum, divitum, ac magistratuum. Medicos enim cogitare se debent, qui desperata ulcera ferro, ac flammis adoriuntur, repugnet licet æger, & vociferetur, & in rabiem, furoremque convertatur. Sæculum & ipsi vivimus, quod nullæ plagæ, clades nullæ emendarunt. Itaque eadem severitate usi ardentes illas actiones, minas, contentiones, exclamationes in subsidium vocemus, insurgamus omnibus lacertis in sceleratos, Dei, sui-que oblitos homines, excindamus rapacitatem, adulteria & impuritates theatrorum: innocentie causam agamus: pseudophilosophos, & effæminatos Sybaritas tandiu proscindamus, terreamus, exagitemus, rubore suffundamus, dum vehementia nostra veluti fulminum, aut grandinis incussa vi defixi, atque attoniti resipiscant tandem: vel si perditos fervare jam non licet, præservemus ceteros, ne eadem contagione & ipsi perdantur. Tolli ista non possunt? at possunt coerceri. Ad quod brevi obtinendum ingens in Salviano exemplar propositum est, qui, solo fors Chrysostomo excepto, parem in eo genere nullum habet, vitiorum implacabilis

* Quod Salvianus eloquentiæ artibus ævi sui flagitia non exaggerarit, ostendit *Baronius ad ann. 428.*

cabilis adversarius, & disciplinæ christianæ rigidissimus exactor. Hæc de impetu, & vehementia Salviani. In ceteris, quæ minoris sunt momenti, breviores erimus.

Alterum, quod comendari in Salviano debet; est robur, densitas, & dispositio argumentorum: & ipsum magna utique dos oratoris. Sic autem in ea noster excelluit, ut paulatim velut per gradus ascendat ad oppugnandum, & undique opera molitus claudat infessos, ac neque eruptioni, neque effugio locum relinquat. Id quod vel maxime in confutationibus apparet, ubi instat, & urget, & propellit summo nisu, inversionibus vero, & retorsionibus ipsum non raro Ciceronem superare mihi videtur; tam est invictus, tam subitus, & arduus imminet, tam naturalem tenet ordinem rerum, ac rationum.

Porro amplificatio, & copia ejus singulares sunt. Versat enim argumenta multiplici varietate dicendi, diducit omnia, probeque expendit: denique eandem rem pluribus velut faciebus ostendens, magis, magisque auget, dilatat, exaggerat, vel contentum jam, & explerum lectorem non dimittens, dum ipse sibi fecerit satis, longeque plura præstiterit, quam pollicitus erat. Quare non capio, quid Sixtus Senensis præter latinum, & candidum, *succinctum* quoque illi *sermonem* tribuat: nisi forte ad ea respicit, quæ interciderunt? Tum vero nova quæstio: quomodo discernere potuit, quæ nunquam vidit?

Venustas denique, & elegantia Salviani longe supra ætatem. Equidem nihil horum affectavit, sed quod sponte nascerentur, oblata minime rejecit, ut solent, qui rebus magnis intenti sunt, de minoribus non nisi obiter curare. Ipse de se in libros *de Gubernat.* præfatus hunc in modum loquitur. *Nos autem, qui rerum magis, quam verborum amatores, utilia*

utilia potius, quam plausibilia sectamur, neque id quaerimus, ut in nobis inania saeculorum ornamenta, sed ut salubria rerum emolumenta laudentur, in scriptiunculis nostris non lenocinia esse volumus, sed remedia; quae scilicet non tam otiosorum auribus placeant, quam aegrotorum mentibus prosint, magnum ex utraque re caelestibus donis fructum reportaturi.

Vel sic tamen, cum se minime comat, & exornet, placet, & rapit mirifice Salvianus. Theophilus Raynaudus *libr. cit. pag. 260.* cum dixisset, sermones de Cardinalibus Christi operibus, quibus ipse quam plurimum defert, Salviano tribui a nonnullis: negat se ei sententiae accedere posse, quod sibi cultior, & planior videretur Salvianus. Et certe quam plurima in eo reperire est, quae delicatis etiam, & elegantiae studiosissimis arridere debent, amoenas descriptiones, grandes, generosasque sententias, transitiones facillimas; item quam perpetuas, tam varias, subitasque conversiones figurarum, numeros ipsos constantes, mixtum gravitati leporem, omnemque pompam, & amoenitatem dictionis. Itaque longissime abest, ut vastus fiat, ac deformis in reprehendendo. Ipsi adeo questus, & lamenta, & expostulationes jucundae sunt, quod suavitatem ubique novit aspergere, & acorem illum suum temperare. Id quod sane plures animadverterunt. Joannes de Bussieres in *Floscul. historiar. part. 2.* Illustravit Gallias, inquit, Salvianus Massiliensis, suavissimis querelis, & ipso melle conditis ævum incusans. Sed jam ante Brassicanus in *Hendecasyllabis* meras apud Salvianum, 'delicias, meros lepores, nectar, & nepenthen, & casiam, & rosas promittit. Nec parum ad id conferunt ipse stylus, & latinitas viri. Et si enim non omnino purus est, & saeculo suo quid dedit, tamen vel non offendit legentem, vel tam facile iterum permulcet, ut venia ne opus sit quidem.

Abbas

Abbas Ladvocat ita in hanc rem pronuntiat: *Opera hæc scripta sunt stylo elaborato, nitido, facili, & amano.* Quæ vera sunt singula, si minutias quasdam non attendimus, ut fere in pulchro corpore exiles nævi vix advertuntur nisi a curiosis. Tales sunt repetitiones quædam eorundem verborum, & scabrities nescio quæ, ac interjectiones longiores. quæ filum sermonis rumpant potius, quam interrumpant. Quæ meo judicio inde sunt orta, quod etsi quædam per otium formaret, multa nihilominus, quæ primo calore cogitationis conceperat, effunderet magis, quam parturiret. Id quod fere omnibus accidit, qui natura sunt extemporales. Ipse enim ardor ingenii facit, ut ad recognoscendum tardiores se præbeant, citiusque expromant nova, quam vetera eliment. Ad illud facti sunt, ita fert eorum indoles: hoc contra naturam est, cum qua hic pugnare semper difficile, præsertim iis, qui gloriæ non serviant, neque famæ sint appetentes.

Neque omitti hoc loco debent paradoxa Salviani, quæ passim ille immiscet, & quibus inter Latinos parem nullum habet. Ejusmodi sunt: *Illuc devenisse nos, uti donum fidei plus obsit nobis, quam prosit: Non jam vitii, sed virtutis nos pudere: Nihil nobis vilius anima, & Deo esse: Infideles atque hæreticos, quo minus ad fidem accedant, a nobis maxime impediri: Plus nocere nos Religioni, quam ipsos ejus hostes: Subditos plus jam a Dominis, quam ab hostibus perpeti: Ante nos a vitiis, quam barbarorum armis superatos: Bonitate Dei peiores nos reddi: Liberos una opum, & vitiorum paternorum hæredes fieri: Nemini minorem a nobis fidem haberi, quam ipsi Deo: Paucos esse vel inter christianos, qui vere crederent, quod credere se profiteantur: Peiores nobis inimicos non esse, quam affines, & propinquos: Malle nos facultates nostras quibuscunque aliis prodesse, quam nobis &c.* Hos enim locos tibi

proprius ita exornat, ita diducit, atque exaggerat, ut nihil supra. Cum Chrysostomo ex æquo eum conferas hac in parte, cujus inter Græcos Patres si non unica, certe peculiaris quædam gratia, atque solertia in Paradoxis fuit. Hæc ergo præ ceteris attendenda in Salviano, atque excerpenda, præfertim ab iis, qui quo vitiis obsistant fortius, familiarem sibi reddere, atque adeo imitari præstantissimum Scriptorem statuerunt.

Non desunt etiam, qui valde in nostro hoc laudent allegationes Scripturarum; tam apte scilicet, tam apposite, tam loco suo illas profert, ac interponit. Equidem si delectum, si promptitudinem specto in testimoniis, longe Salvianus & a Cypriano, & a Bernardo superatur; verum & ipse, quod sensui proprio inhæret, Bernardum, & quod parcius est, nec tanta copia, ac densitate locos accumulat, Bernardum, & Cyprianum quam maxime antecellit. Vide Gasparem Barthium *Libro XLIII. Adversarior. cap. 16.* infra sequenti capite adducendum. Item Joannem Alexandrum Brassicanum toties memoratum *ibidem*, qui testimonia hæc instar tessellarum composita, & ubi maxime decebat, inserta, egregie dilaudat.

Anacephaleosis loco esse possunt, quæ Ignatius Weitenauer *Libro IX. Subsidiarum* habet. Sic enim brevissime complexus est, quæ de charactere isto dicebamus. *Libertati & vehementiæ in reprehendendo Salvianus junxit eloquentiam sibi uni propriam, in qua cum summa acrimonia nitorem elegantissimum; cum gravissimo impetu certum, statumque numerum orationis: cum austeritate maxima doctrinæ omnem facundia storem, & omne genus oblectamenti copulavit.*

CAPUT III.

Ubi triumphet in primis Salviani eloquentia?

Non est dubium, in utroque opere *de Gubernatione Dei*, & *ad Ecclesiam Catholicam* haberi quam plurima, prorsus eximia, quæ vix ullam admittant comparationem. Nihilominus ego ultimum semper prætulerim. Hic enim unum idemque perpetuo urget, & multo plenior est, & impetum illum suum ex magno maximum facit. Raynaudus Libro sæpe dicto pag. 236. *egregium opus* dicit. Joannes Theodorici Macherentinus *loc. cit.* libros hos quatuor a se editos *vere aureos* vocat, *dignosque, qui in omnium linguas transferantur.* Atque utinam valeret votum pientissimi viri! sic enim & spes ejus, quæ fuit maxima, impleretur continuo, amorque pecuniarum, communissima hodie pestis, si non ab omnibus, pluribus certe hominibus negotio nullo profligaretur. Juvit hæc scriptio Ecclesiam ea ipsa ætate, quæ summis sceleribus summas sibi calamitates accersivit, nec tamen emendavit. Si ergo hodie vernaculo sermone legi ab omnibus posset, quanto majores, quanto præsentiores ubique effectus haberet! Et quid, rogo, tot alii libelli pii, quid principes ipsi Ascetarum, qui omnium teruntur manibus, quid, inquam, ad horum sententias, copiam, ardorem, vimque velut innatam tam convincendi, quam permovendi?

Libri *de Gubernatione Dei*, vel *de Providentia* inscripti insignes pariter, & majoris etiam usus sunt, quam quos prius dicebam. Editor Petrus Galestinus in brevi *Præfatione ad Lectorem*, reputans secum, quam pie, graviterque locum de Providentia pertexuerit Salvianus, non dubitat denique pronuntiare, eum Græcis, qui de eadem Providentia sane plurimi & disertissimi scripserunt, non Philosophis modo, verum etiam nostris, multis fortasse parti-

bus esse superiorem. Ignat. Hyacinth. Amat. de Graveson *Hist. Eccl. Libr. II. pag. mihi 43.* eosdem *elegantissimum Tractatum* appellat. Gaspar Barthius *Libro XLIII. cap. 16. Adversarior. aureolos* dicit hos *libros*. Speciatim etiam, & mirifice idem opus extollit Interpres Gallus, in *Diario Trivultienſi anno 1702.* de quo supra capite primo est memoratum *. Porro inter octo libros illos magis oratorii mea opinione sunt, longeque ceteris præstant *Quartus, Quintus, Sextus, & Septimus*. Nam in primis tribus, ubi docet præcipue, & viam sequentibus sternit, non est tam grandis, neque violenta fertur oratione: *Octavus* autem maximam partem aut perditus est omnino, aut vetustate ita est oblitteratus, ut spes nulla affulgeat illius restituendi **.

Inter *Epistolas* Auctoris nostri optimæ sunt *Quarta, & Quinta*. Illam ad *Socerum & Socrum* datam Editor Bremenſis *in vita*, operibus præfixa, merito *accuratissimam* vocat, & *eloquentissimam non tam facti sui Apologiam, quam deprecationem culpæ non culpæ*. Hæc una epistola penitus confutat eos, qui Salvianum ad vehementes solum affectus valuisse dicunt. Inde enim patet, ad lenes, & teneros occasionem duntaxat defuisse viro, non artem, non facultatem. Sed hac ipsa de causa tristissimum accidere literarum amatoribus debet, quod vitiata est non uno loco, imo hiatus, & lacunas habet. Alteram ad *Catturam Sororem*, cui a gravi morbo recreatæ salutem gratulatur, & ipsam maximi facio. Est enim mira facilitate, unaque hominis fraternum animum, & sensa vere religiosa luculentissime declarat.

Sed

* Reliqua enim Salviani ipse non transtulit.

** Recole, quæ capite I. tam de hac, quam de prioriscriptione ex Andrea Saussajo recitavi. Testimonia enim Auctorum ut distrahare semper minime licet, sic repetere satis est injucundum.

Sed quid jam de *Homiliis* Salviani, illis scilicet, quas teste Gennadio Presbyter scripsit, ab Episcopis ipsis recitandas? an deperditæ omnes? an in tanta copia (multas enim fuisse idem Gennadius affirmat) ne unica quidem triste naufragium evasit? Ita quidem communiter sentiunt, quotquot ejus rei mentionem aliquam fecerunt. Neque nego, in eadem opinione fuisse me semper, & futurum hodieque, nisi in Gasparis Barthii *Adversariorum Librum XLIII.* incidissem. Hunc enim cum legerem, nutare primum, denique & dubitare aperte cæpi. Sed verba ipsa eruditissimi hominis audienda sunt, *Cum vir clarissimus eloquentia esset, ait cap. 16. & mirificus testimoniorum divinatorum collector, & illustrator (quo in genere sane paucos pares habet) non dubito, multos optimos viros, minus his donis a Deo dotatos, ejus eloquentissimas homilias populis suis proposuisse; ut inde merito Episcoporum Magister ab οὐνοχρονω suo Gennadio sit nuncupatus. . . . Nec vero dubito, quin elegantissimarum harum homiliarum multæ sint inter illas supersites, quas Parisiis nomine Eusebii Emissemi aliquoties editas habemus.* Sed de eo alibi plenius scilicet *Libro eodem cap. 26.* ubi istuc addit: *Salviani quidem multas in iis esse, placiditas styli nervosa, & tractus sententiarum cum erudita quæpiam simplicitate penitus mihi persuaferunt.*

Plura de Salviani eloquentia dare possit Jacobus Merlohorstius in *septem tubis orbis christiani*. Item Petrus Gortius noster, qui Salvianum gallice redditum anno 1655. *Parisiis* vulgavit. Neque dubito, hominem, quo scripta ejus popularibus commendatiora redderet, plura in laudem illorum profunderet: quæ ego omnia, quod editionem hanc videre hætenus non licuit, vel invitatus debeo præterire. Joannes Baptista Guesnay in *Massilia gentili, & Christiana, seu Annalibus Provinciæ Massiliæ*, Honoratus Bouche cum ceteris, qui de rebus Provinciæ, atque Massiliensibus scripsere. Item Adrianus Bailletus in *vitis SS. Historia literaria Franciæ Tomo II.* & Critici omnes, quotquot ex professio

Ecclesiæ Scriptorum opera dijudicant. Præ omnibus autem Galli duo Interpretes, quos dixi: apud quos eloquentiam, characterem styli, opera singula fusa, & eleganter illustrata habes, maxime si ipsorum Trivultiensium judicia præmittere volueris.

A P P E N D I X.

De Eloquentia S. VINCENTII *Lirinensis.*

Unicus, atque ille exiguus admodum libellus est, quem Vincentius noster exaravit: & tamen eo plus veræ gloriæ, ac celebritatis invenit, quam vel his obtingat, qui plura, eaque vastissima volumina posteris reliquerunt. Quod quam verissimum, minimeque exaggeratum sit, omnium temporum Scriptores docere possunt, quos more nostro diligenter, & ordine, nec parvo numero testes advocabimus.

Et ex Veteribus quidem S. Eucherius, qui filios suos summæ expectationis adolescentes in disciplinam Vincentio tradiderat, *Epist.* ad Salonium, qua librum de obscuris Sanctarum Scripturarum capitulis illi offerebat, Vincentium *virum* dixit *eloquentia pariter, scientiaque præminentem.*

GENNADIUS *de viris illustribus cap. 62.* ita de Vincentio loquitur: *Vincentius natione Gallus apud monasterium Lirinensis insulæ presbyter, vir in Scripturis Sanctis doctus, & notitia ecclesiasticorum dogmatum sufficienter instructus composuit ad evitanda hæreticorum collegia nitido satis, & aperto sermone validissimam disputationem adversus hæreticos &c.* Quibus fere verbis etiam Honorius Augustodunensis *Libro de Luminaribus Ecclesiæ* est usus.

Apud Recentiores vix ullus est Patrum, qui tot, tantosque laudatores sit nactus. Et primo quidem JOANNES MOLANUS in *auxilio Matyrologii Usuardi ad diem XXIV. Maji.* MELCHIOR CANUS *de locis*

Locis Theologicis Libro VII. cap. 3. ISAACUS CAUSAUBONUS ad calcem notarum in *Epistol. Nysseni de peregrinat. Hierosolymit.* BARONIUS quoque in *Not. ad Martyrologium Romanum eodem die* *: item NICOLAUS SERARIUS in *Prolegomenis Biblicis cap. 28* ANTONIUS POSSEVINUS in *Apparatu.* THEOPHILUS RAYNAUDUS variis locis, CHRISTIANUS LUPUS *Tom. IV. in Synodos pag. 758.* Aureum dicunt commonitorium Vincentii, aitque Daniel Papebrochius in *Adis SS. ad XXIV. Maji* sic passim appellari. Qua quam brevi, tam communi, atque eximia laude præmissa, nunc cetera audiamus.

JOANNES TRITHEMIUS *Libr. de Scriptorib. Ecclesiast.* ita de Vincentio: *Vincentius monachus, & presbyter monasterii Lirinensis insulæ, natione Gallus, vir in divinis Scripturis eruditissimus, & sæcularium literarum non ignarus, vita, & moribus clarus. Extat ejus insigne opus, quod sub Peregrini nomine composuit, a veteribus Doctoribus percelebre laudatum, de erroribus, & collegiis hæreticorum fugiendis.*

SIXTO SENENSI *Libro IV. Biblioth. sanctæ. ad finem* Vincentius Lirinensis est *Presbyter disertissimus,*

DIONYSIUS FAUCHERIUS *supra* in Eucherio & Salviano *laudatus* Vincentium inter præcipuos eos ponit a Lerina prolatos, in quibus cum vitæ san-
ctimoniam eruditio & eloquentia certare videbantur.

FRANCISCO RIBERÆ *Proæmio in Haggæum doctissimus* dicitur, & eloquentissimus.

CARDINALIS BELLARMINUS *de Scriptorib. Ecclesiast. Libellum ejus parvum mole, virtute maximum* nominat.

CARDINALIS BARONIUS in *Annalib. ad annum 434* „ Hoc ipso anno, ait, qui numeratur terti-
„ us a Concilio Ephesino, Vincentius Lirinensis
„ cum adversus omnes hæreses, tum præcipue ad
„ sepeliendas penitus, recens emerfas Pelagii, Cæ-

* Et iterum in *Annalibus* ad annum 431.

„lestii, atque Nestorii hæreses disertissimum elu-
 „cubavit commentarium., Et inferius: „Flo-
 „rebat plane his temporibus illud cœnobium, il-
 „lustris Sanctorum domus, insulæ Lirinaensis. . .
 „Hæc excepit e tumultibus Galliarum tanquam
 „portus, ut ipse ait, e procellis liberum Vincen-
 „tium ipsum, cujus quidem, quam mira fuerit
 „eruditio, libellus ipsius ostendit: ut vix sit repe-
 „rire, qui paucioribus chartis majora, & feliciori
 „tractatu concluderet; licet commentariolus idem
 „sit, ut ipse testatur in fine, ex duobus a se
 „scriptis commonitoriis Epitome, his temporibus
 „admodum accomodatus, & in Ecclesia catholi-
 „ca semper posteris profuturus, cum nunquam
 „defuturi sint novatores hæretici, ad quos peni-
 „tus explodendos idem auctor summa industria
 „laboravit., Idem in Notis ad Martyrolog. Ro-
 „man. jam laudatis: „Aureo plane illo opusculo,
 „ait, fidem catholicam egregie testatam reliquit,
 „quo cum omnes hæreses, tum maxime hæresin
 „Pelagianam cum auctoribus suis impugnat. . . .
 „Claruit temporibus Honorii Imperatoris, mag-
 „namque sui nominis in Ecclesia laudem reliquit.,
 Ad ann. vero 431. sublimius, cum omnium hære-
 ticorum fundamenta convellere dicit.

PETRUS PITHOEUS *Præfat. ad Salvianum*, ubi
 Scriptores Galliæ suæ præstantiores recenset, de
 Vincentii commonitorio istuc affirmat, *nihil eo ge-
 nere, aut majore judicio, aut acutiore stylo conscrip-
 tum se meminisse.*

HERIBERTUS ROSWEYDUS in *Notis ad Eucherii
 libellum de laude Eremitarum Vincentium nobilem illum
 Scriptorem ecclesiasticum appellat.*

PHILIPPUS LABBEUS *Dissertat. Historica de Scrip-
 toribus Ecclesiasticis*, hoc Vincentii commonitori-
 um ait esse libellum, quem tantum non ad cælum,
 ac sane meritissimo jure eveham Pontificii, quoque se
 obtri-

obtritos, ac proſtigatos ultro fateantur, cum ad cor redeunt, ſanamque mentem, omnes a fide majorum ſuorum Apoſtatae, Miniſtri, ac Prædicantes Lutherani, Zwingliani, Calviniani, Anabaptiſtae, Sociniani &c.

ANDREAS SAUSSAJUS in *Martyrolog. Gallican. ad diem XXIV. Maji. nobiliſſima* in hoc opusculo admirabilis doctrinae, & ſacrae eruditionis monumenta agnoſcit.

PHILIPPUS BRIETIUS *Sæcul. V. c. 4. idem* Commonitorium egregium contra omnes hæreticos, laudatum a viris magnis vocat.

BRUNO NEUSSERUS in *Prodromo Velitari Part. II. in Vindiciis pro S. Vincentio, & Lirinenſibus, ſemi-pelagianismi perperam* accuſatis, de eodem ait: Nihil unquam nervoſius ad conterendas Novatorum blaſphemias, ſuo ſaltem judicio, a majoribus nos accepiffe. Et mox ibidem vocat arma Catholicorum, & Eccleſiæ antiquum illum clypeum jam a mille ducentis annis Novatoribus oppoſitum.

CARDINALIS NORIS *Hiſtor. Pelag. Libr. II. c. 11. Commonitorium eruditiffimum & elegantiffimum* volumen, ipſum vero Vincentium eximiae eruditionis, ac ſanctitatis Patrem appellat.

JOSEPHUS ANTELMIUS *Differt. IX. de veris ſcriptis SS. Leonis, & Proſperi n. 17. Commonitorium* noſtrum opus aureum & nunquam ſatis pro dignitate commendandum affirmat. Quibus verbis adoptatis,

ANTONIUS PAGIUS in *Critica Baronii* hæc addit ad ann. 434. Omnes hæreſes impugnât; ideoque hæretici validius impugnari non poſſunt, ac felicius vinci, quam doctrina Commonitorii Vincentii Lirinenſis.

JOANNES MABILLON *Tract. de ſtud. Monaſt. part. 2. mihi pag. 129. ita de Vincentio* habet: Cujus Admonitorium maximum eſt & doctrinae, & eloquentiæ ſpecimen, ac perenne contra omnes hæreſes antiquas, novas, & futuras monumentum.

STEPHANUS BALUZIUS, qui Vincentium ultimus edidit, initio *Notarum* libellum hunc ejus vocat *elegantissimum illud Commonitorium adversus hæreses, quod toties bono publico editum est.*

IGNAT. HYACINTH. AMAT. DE GRAVESON in *Tabul. chronolog. pag. mihi 108.* Vincentius, ait, *Lirinenfis elegantissimus Scriptor.*

ANONYMUS nescio quis, recensque auctor *Compendii chronologici Ecclesiast. Histor. gallice scripti Tabula IV.* Vincentius, inquit, *Lirinenfis Monachus tractatum condidit contra hæreses sui temporis, qui sane in pretio esse debet.*

ABBAS LADVOCAT in *Lexico suo historico portatili* Commonitorium Vincentii appellat *excellens opusculum.*

Et sic alii complures, quos molestum sit omnes commemorare, tanta consensione, quæ major esse vix possit. Verbo dicam, vix a quoquam vel allegatum duntaxat Vincentium legi (legi autem sæpissime) qui non cum commendatione id faceret, vel sine elogio libellum eum prætereundum sibi putaret. Recte igitur Cardinalis Noris *Loc. cit. hic Peregrini liber*, ait, *omnium laudes demeruit.*

Istuc porro nefas sit omisisse, quod ipsi adeo Hæretici laude maxima hanc Vincentii lucubrationem extulerint. Ex his CENTURIATORES illi Magdeburgenses, cum mentio de Commonitorio incidisset, ita loquuntur: *Quod si quis diligentius pensitabit, dicet scriptum esse eruditum, & acutum, quodque hæreticorum fraudes clare in apertum producat, detegat, atque egregie impugnet: quin & præsens valde remedium, & antidotum quasi contra eorumdem venena ministret. In quo ipsius scriptoris vis ingenii elucet, & doctrinæ ipsius magnitudo. Antiquitatis enim eum fuisse studiosissimum manifesteprehenditur, & tam in Græcorum, quam in Latino-*
rum

rum lectione verſatum, in Scripturarum tractatione argutum, facilem, & perſpicacem;

GASAUONUS in *Notis ad Gregorii Nyſſeni Epistolam ad Euſtathiam* pag. 118. *Præclare, ait, Vincentius Lirinenſis in aureolo Libello.*

GEORGIUS CALIXTUS Lutheranus *Commonitorium* hoc ſemel iterumque edidit præſatione, ſeu panegyri potius præmiſſa, quam, quia ad manus mihi nunc non eſt, ſatis ſit hic allegaſſe. Alium habet locum *Libr. de arte nova &c. Francofurti ann. 1652.* edito, ubi vocat *exiguum illud, ſed eximium, & hæcenus omnium vocæ, ſuffragiisque approbatum libellum.*

CASPAR BARTHIVS *Libr. XVIII. Adverſar. c. 7.* *Commonitorium Vincentii Lirinenſis nunquam homini chriſtiano deponendum manibus putem, imo inſtar quotidiani Euchiridii circumferendum, ut ſolidum beatitudinis noſtræ documentum eleganter, & nerveſe literis ab eruditiffimo homine ſignatum, utinam non paulo copioſius!* Item *Libr. XXIX. cap. 10.* Vincentii *Commonitorium inſigne, & Libr. XXV. cap. 2. divinum librum appellat.* Noviffime

SIGEBERTUS HAVERCAMPUS in *Apologeticum Tertulliani* præſatus Vincentium Lirinenſem non inſacundum ſcriptorem affirmat. Mitto alios ex Heterodoxis OSIANDRUM, FRIDERICUM ULRICUM CALIXTUM, MARCUM ANTONIUM DE DOMINIS, CAVEUM, FABRITIUM, qui omnes non vulgari quadam, ſed ſumma cum laude de parvulo hoc libello commemorant. *

Atque

* Nec tamen propterea falſum, quod ſupra Læbæus dixit; Rivetus enim, Dallæus, & Blondellus inter Duces Calvinianarum partium nihil omiſerunt, quo ſive auctorem, ſive librum ejus deprimerent. Et Dallæus quidem (neque enim omnes vacat allegare) *Libr. II. de uſu Patrum c. 2 delirum Eremitam, & ſemipelagianum*; honorificis ſane vocabulis, Vincentium ſalutavit.

Atque hoc iudicium, quod de eruditione, eloquentia, & utilitate opusculi ejus isti tulerunt, pro re nata opponere iis possumus, qui pro partium studio infensiores se præbere Vincentio solent, putantque obsequium se gregalibus suis præstare, si, ubicunque possunt, Virum tantum, omnium laudibus cumulatam, incessere ipsi sciant, modisque omnibus lacerare.

Quod si jam quæritur a nobis, quam in scribendo rationem teneat Vincentius? Character meo iudicio haud difficulter dignosci potest a ceteris Patribus. Commonitorii hujus ille est scopus, novitatem quamlibet doctrinæ suspectam in Ecclesia esse oportere, antiqua vero, & communi Patrum consensu celebrata dogmata retinenda constantissime, ac defendenda. Hoc nunquam ex oculis dimittit Vincentius, hoc urget perpetuo, hoc versat mira dexteritate & varietate. Quod dum facit, duas præcipue dotes ostentat *elegantiam*, & *nervum*, uti priori capite ex Barthio audivimus, neque illas separat aliquando, atque divellit. Igitur neque nos in charactere ejus describendo eas a se invicem dividemus. Hoc enimvero Auctori nostro proprium, ac peculiare, quod nullo quæsito fuce, nullo lenocinio verborum affectato, pari semper robore, atque efficacitate docertet, atque ita cominus congrediatur, ut ardens ingenium, & stringentes numeri, ac velut lacerti quidam eloquentiæ in eo emineant. Invictum se prebet, & insuperabilem loricatus hic scriptor, neque ullus tam potenter gladium versavit, ac ipse stylo depugnat. Quare eleganter ab Antelmio *Dissertat. IX. de veris scriptis SS. Leonis, & Prosperti, valentissimus pugil* nominatur. Ita ad manus conferendas, ad cædendos, ac proterendos hostes totus factus, certusque de victoria unus provocat omnes, & tantum non pascitur, recreaturque præliando.

liando. Putes te exaudire palmares ictus, crepitusque plagarum quam maxime sonoros, quas undique circumfusus hostibus infligit, dicasque una & palmam ab adversariis, & a legentibus admirationem referre. Belle de eo, ut solet, Ignatius Weitenauer *Libro XI. Subsidior. in Recensione scriptorum.* „ Vincentius Lirinensis Salonii Magister, in quo, dum contra hæreseon impietatem decertat, robur eloquentiæ eminet, & la- „ certi quidam, ut eo fieri nihil possit valentius. „ Invicto suo, & insuperabili commonitorio alienum Peregrini nomen præfixit &c. Spectato „ styli modo, qui nihil blandi habet, sed ad præliandum, & vulnerandum factus est, ferreum „ scriptorem dixeris, ut apud Romanos Atilium „ tragicum esse appellatum M. Tullius perhibet: „ vel si de Patre e Patribus phrasin mavis, cum „ S. Ennodio *Epist. I. 2.* affirmaveris, ferratis verborum calcibus Lirinensem omnes Ecclesiæ Romanæ hostes elisisse. „

Ut hæc verissima sint omnia, tersus est tamen Commonitor noster, gravis, aptus numeris, copiosus, sui ubique similis, & qui pondus rerum verbis felicissime assequatur. Atque ut paucis me expediam, ita stylum suum regit, ut retenta vi sua persuadendi, & ineluctabili efficacia, aptius scribere vix potuisset, nihilque sit, quod dictione ejus ut firmitus atque robustius, sic tersius, facilius magisque proprium nec ab eloquentissimo quovis expromi potuisse videatur. Sed & illud tacere hic minime possum, quod Melchior Canus, quem ego inter disertissimos homines soleo computare, non contentus, quod supra dixi, aureum vocasse Vincentii Librum, eumque frequenter, & cum honoris præfatione allegasse, ejus adeo verba adoptet pluribus locis, hæud secus atque illa Ciceronis sui. Neque enim semel deprehendere me memini

memini Vincentianas phrasas latinissimis ejus ita commistas, ut ex usu, & lectione perpetua vel uti propria adhiberet, non citaret ut aliena.

Porro nitor ille armorum, & militaris ornatus tanto magis mirandus est in Vincentio, quo certius constat, nihil eum minus cogitasse, quam ut egregium aliquid, ne dicam perfectum extruderet. Imo ne tantillum quidem laboris sumpsisse sibi videtur, uti disponderet aliter, quæ conceperat, limaretve, & comeret aliquantum. Ita enim de se in vestibulo operis confitetur, hanc se scribendi legem fervare, ut nequaquam omnia, sed tantum necessaria quæque perstringat, neque id ornato, & exacto, sed facili, communique sermone, ut pleraque significata potius, quam explicata videantur. *Scribant alii laute inquit, & accurate, qui ad hoc munus vel ingenii fiducia, vel officii ratione ducuntur: me vero sublevandæ recordationis, vel potius oblivionis meæ gratia commonitorium mihi parasse suffecerit: quod tamen paulatim recolendo, quæ didici emendare, & implere quotidie Domino præstante conabor.* Atqui hoc ipsum idcirco præmonui, ut si forte elapsum nobis in manus Sanctorum * devenerit, nihil in eo temere reprehendant, quod adhuc videant promissa emendatione limandum. Tantum vero abest, ut ad id præstandum tempus ille nancisceretur, aut facultatem, ut Pars commonitorii altera pene tota intercideret eo vivente. Quod manifesto mihi argumento est, totum librum nondum transcriptum fuisse ab aliis, sed pressum adhuc, atque absconditum delituisse apud auctorem, qui curam ejus futuro tempori reservabat, quo per otium augeret, & ornato, delectuque verborum ampliore illustraret. Atque hac ipsa de causa factum est, ut & variet nonnunquam lectio, & ver-

* Ita pro more ætatis ejus Ecclesiasticos, & Monachos vocat.

& verbum ipsum ejusmodi sit, quod conjecturæ locum faciat, errore notariorum mutatum potius, quam a Vincentio usurpatum esse. Certe etsi operæ non perpercit Baluzius in eodem restituendo, atque ad fidem veterum codicum emendando, mihi tamen, ut ingenue fatear, nec ipse videtur obtinuisse, uti omnia sic legenda nobis persuadeamus, quemadmodum ipse legit. Hæc de Vincentii charactere plus, quam satis sunt.

Porro qui alia præterea videre cupit ad Vincentii facundiam illustrandam, habet sane complures, quos adire possit: Vincentium Barralem in *Chronologia Lirinensium*: Franciscum Macedo in opusculis Apologeticis pro S. Vincentio Lirinensi contra Henricum Noris: Josephum Antelmium in *Dissertationibus supra laudatis*, & in *Distrib. de Secretis Lirinensium*: Brunonem Neusserum Libro jam memorato, & (nisi hic idem est) Anonymum quemdam contra Henricum Noris in opusculo: *Scrupuli orti ex Libro &c. Parte II.* Item *Historiæ Pelagianæ Henrici Noris ab Anonymi hujus scrupulis Vindicias Romæ 1695.* Ludovicum Eliam Dupin in *Bibliotheca nova*: Sebastianum Tillemontium in *Mouiment. Eccles.* Remigium Ceillier in *Historia Scriptorum Ecclesiasticorum*, ac novissime Joannem Salinas Neapolitanum, Canonicum Regularem Lateranensem in *Vindiciis Vincentii Lirinensis*: Et Laurentium Alticotium in *Dissertatione de Semipelagianis rebus, & hominibus præfixa parti V. Summæ Augustiniana.*

DISSERTATIO XII.

De Eloquentia S. LEONIS.

CAPUT I.

Præstantia hujus, & existimatio apud disertos homines.

Quotquot de admirabili hoc Pontifice vel obiter tantum scripsere, de facundia omnes singulari cum laude commemorant. Dolendum tamen summopere, res ab illo difficillimis tem-

temporibus tam fortiter, tam sapienter gestas, neminem ejus ætatis auctorem, qui sub oculis positus haberet, literis consignasse: atque adeo tanto viro ex omni antiquitate usque in hanc diem deesse dignum laudatorem. De institutione ejus, & primis literis nihil assequi nisi conjectando licet. Necessè est enim, oppido fuisse salutarem, & Leonem jam inde ab adolescentia dotes ad dicendum amplissimas, exercitationem Scripturarum, lectionem antiquorum Doctorum, judicium acre, linguam promptam, atque ut ratio nominis postulabat, ingentes animos attulisse. Nihil dico de studio orationis, de elegantia vitæ, ceterisque virtutibus, ac præfidiis dicendi, quas in eo Historiæ silentio cogitare facilius sit, quam sermone complecti.

Adhuc Diaconum ob facundiæ vim, ac celebritatem publicis negotiis adhibitum constat. Forte enim inter Duces Romanos Aëtium & Albinum similitates ortæ ita exarserant, ut scinderetur in partes exercitus, & bellum Civile omnia spectarent. Nihil tum importunius, nihil alienum magis accidere poterat, quod populi ferocissimi undique coorti Imperii provinciis se infunderent, ac velut ad prædam propositam impotenti furore raperentur. Ergo ad concordiam restituendam Leo in Galliam pacificator est missus, atque a dissidentibus illud obtinuit, ut arctissimis in rebus, arma, quæ in mutuas cædes sublatum ibant, in Imperii potius, & Ecclesiæ hostes converterent.

Cum vero maxime reditum maturaret, inopinatus venit nuntius, Sixtum III. Pontificem Maximum morte sublatum: Leonem vero, Diaconum ejus, communibus votis successorem postulari. Itaque ingressus ejus in urbem triumphi speciem habuit: ille vero Summæ Sedi impositus magis etiam ostendit, quantum animo, quan-

quantum sapientia, & voce valeret. Attila Hun-
 norum Rex ingentibus victoriis elatus, cum po-
 pulabundo exercitu torrentis instar in Italiam pro-
 currebat. Consternatis omnibus, cum extrema
 imminerent, nihil territus Leo conspectum adeo
 Barbari subire, & qui ferro alios subigeret, ipsum
 oratione subigere decrevit. Itaque in viam se dat,
 & ubi Mincius in Padum influit, cum maxime
 copias trajicere Rex pararet, paucissimis comitan-
 tibus occurrit, colloquium flagitans. Ergo inter
 districtos enses, & omnium in se vultus conver-
 sos deducitur ad tentorium Tyranni, cui, si un-
 quam alias, ardebant oculi, totoque ab ore cru-
 delitas promicabat. Verum prima allocutione ita
 cum defixit, atque etiam demulsi vir Sanctus, ut,
 data pace, paulo post moveret castra, atque ul-
 tra Danubium in Pannoniam, mirantibus omnibus,
 reverteretur. Quare sermonibus causa est præbi-
 ta, Leoni perquam honorificis, lupum furem
 audacia, cædes anhelantem, obvium in via leo-
 nem habuisse, cujus voce perterritus prædam,
 quam tenebat, & cui parum aberat, quin cruen-
 tos dentes jam infingeret, subito dimisisse ex un-
 guibus, & fugam quantocius capessivisse. Ingens
 profecto spectaculum! Quam enim jucundum erat
 videre, hostem, quem neque Aëtius fortissimus
 Romanorum, neque quatuor foederati Reges jun-
 ctis viribus compescere potuerant, ab uno sacer-
 dote inermi repressum, hocque flagellum terribile
 Deo velut e manibus extortum!

Haud multo post apud Genfericum quoque Wan-
 dalorum Regem, Arianum illum, & immanitate
 parem Attilæ, eadem suada effecit, ut cum urbem
 repente invasisset, eaque potitus jam esset, conten-
 tus spoliis a flammis saltem, ignominiiis, & san-
 guine abstinere. Atque ita tertia vice Leonis
 eloquentiæ salutem Roma debet, quam vel sua

eloquentia ipse Cicero non nisi semel servaverat. Deinceps in hæreticos versa facundia, Manichæos, Eutychem, Pelagianos, Nestorium, Priscillianistas aggressus est, non sine maxima strage, ut adeo non Ecclesia solum eos pelleret, atque arceret, sed tantum non orbe toto exterminaret. Quot beluas Leo noster fugavit! quot monstra exterruit! quam tetras, venenatas, & immanes feras prostravit solus, atque discerpsit! Immortales igitur Deo ter optimo maximo grates sint, cujus providentia singulari est factum, uti scriptorum ejus thesaurus inæstimabilis, in quo veræ Religionis imago excelsa, itemque morum, ac disciplinæ saluberrimæ leges tanta dignitate traditæ sunt, per illa ipsa sæcula, quibus omnia divina, satque humana miscbantur, instar opulentissimæ hæreditatis, si non totus, maximam certe partem ad nos devolveretur. Nunc quanto in pretio apud omnes idoneos æstimatores Leonis facundia fuerit, breviter pro more nostro, nec tamen indiligenter exponendum est.

THEODORETUS CYRENSIS inter Græcos Patres quam maxime eloquens *Epist. ad ipsummet Leonem*, Scripta ejus satis esse, inquit, ad significandum viri characterem apostolicum. Incidisse se enim in ea, & quam accurate, ac perfecte exarata forent, admiratum esse.

HADRIANUS I. PAPA *Epist. ad Carol. Magn.* Leonem vocat *egregium*, atque *mirificum prædicatorem*.

Venerab. HERVÆUS DOLENSIS in *Medulla Tristici Part. IV. cap. ult. Rhetorem divinum*.

MARTYROLOGIUM Romanum inter alia præconia *luculenter scripsisse Leonem* asserit.

JOANNES TRITHEMIUS de *Scriptorib. Ecclesiast. Virum* dicit in *Scripturis divinis eruditissimum*, & in *declamandis homiliis ad populum adeo celebrem*, & *facundum*.

*cundum, ut superiorem in Ecclesia Romana habuerit neminem. Quod, ut deinceps addit, sermones ejus clarissimi testantur. Fuit enim ecclesiasticæ dictionis Tullius, sacrae Theologiæ Homerus, rationum fidei Aristoteles, * auctoritatis apostolicæ Petrus, & in christiano pulpito Paulus. Quo sane elogio quid grandius, sublimiusque dici a nobis vel etiam cogitari possit, ego quidem minime video. Ni forte quis putat, rationem Trithemio defuisse, qua adductus tam gloriose de Pontificis nostri oratione sentiret. Verum id quidem minime ferendum; quando viri merita in tuto posita sunt, & sua ætate cum eruditionis, tum pietatis laude parem Trithemius vix habuit.*

Sed laudum necdum est satis. A RAPHAEL VOLATERRANO *Libro XXIII. commentar. urb. Leo inter viros doctrina, eloquentia, ac sanctitate præcipuos connumeratur.*

CAROLUS SIGONIUS *in Histor. occidental. Imper. Pontificem non solum optimum, sed etiam disertissimum dicit.*

ERASMUS ROTERODAMUS *in Ciceroniano, Thusci Leonis, ait, qui fuit ejus nominis primus Romanæ urbis Pontifex, eloquentiam mirentur omnes.*

SIXTUS SENENSIS *in Biblioth. sanct. Leonem in declamandis homiliis facundissimum fuisse affirmat.*

Sed nemo hæc eloquentiæ decora fusius complexus est, quam Venerabilis PETRUS CANISIUS *in Vita Leonis, quam sane luculentam edidit, quamque unam Bollandiani dignam putarunt, ut Actis illis Sanctorum infereretur. Ait autem inter alia plura: Christi spiritum inhabitantem cor ejus movisse oris plectrum, & vim arcanam verbis promanantibus*

U 2

tibus

* Propter subtilitatem ejus & mysteriorum nostrorum intimam cognitionem, qua abstrusissimas hæreses penitus confutavit.

tibus attulisse. Quo factum sit, ut christianum Demosthenem, imo cælestem oratorem sonare passim omnibus videtur. Cætera, quæ addit, haud paulo præstantiora opportunius infra, cum de notis eloquentiæ dicendum, afferemus.

PETRUS RIBADENEIRA in *Vitis SS. ad XI. April.* cum dixisset, absentem licet Leonem summum Pontificem esse electum; quod sanctitate, doctrina, prudentia, & eloquentia parem non haberet: addit, mundum scriptis suis illustrasse, & cunctos etiam doctos divina eloquentia in stuporem dedisse. Et pressius, homilias ejus admirabiles, Epistolas vero gravissimas appellat.

JACOBUS TIRINUS in *Indice Auctorum: S Leo Papa I.* ejus nominis, natione Thuscus, ob egregiam sanctitatem, doctrinam & eloquentiam cognominatus MAGNUS, scripsit pulcherrimas homilias de præcipuis solennitatibus Christi & Sanctorum, & Epistolas.

JOANNES DE BUSSIERES in *Floscul Historiar.* Leonem & Religionis, virtutumque omnium studio, & christiænæ eloquentiæ facultate, & inconcusso animi robore in singulis magnum dicit.

THEOPHILUS RAYNAUDUS in *Heptade Præsulum christiana sapientia, & sacundia clarissimorum* primum ponit Leonem.

PETRUS BLANCHOT in *Elencho Biblioth. Concionat. P. P. S. Leo*, inquit, Pontifex Max. &c. insigni sanctitate, doctrina singulari, & divina eloquentia clarus.

Infelix PASCHASIUS QUESNEL, qui nondum rupto ulcere *, quod venis alebat, Leonem bis edidit, *Dissertat. II. de auctore Librorum de vocat. omn. gent.* ita de illo habet: *Stylo eum pugnasse, ac scriptis, qua videlicet præditus fuisset & Scripturarum sacra-*

* Verbis utor, quæ ipsimet Quesnello *Dissertat. I.* dicti operis de Pelagio loquenti exciderunt.

saerarum doctrina, & dicendi, scribendique facultate excimia.

CASIMIRUS OUDINUS, & ipse nihilo felicior Quelinello, in *Supplemento suo*: S. Leo Magnus cognomine, vitæ sanctitate rebusque gestis, ac scriptis maximus, Romanus Pontifex, vir Apostolicus, orthodoxæ fidei columna, vocis Apostoli Petri interpres, Apostolicorum dogmatum defensor, Apostolis comparandus, scripsit Sermones varios, & in Ecclesia pronuntiavit, christiana pietate, eruditione, facundia admirandos. Scripsit etiam plures Epistolas, quibus catholicam veritatem asseruit, ecclesiasticam disciplinam inflauravit, ac propagavit, canonum transgressores, & contemptores coercuit.

JOANNES MABILLONIUS *Volum. I. de Studiis monast. pag. mihi 239.* Epistolæ atque Homiliæ S. Leonis Papæ . . . multam eloquentiam redolent, ac venustatem.

NATALIS ALEXANDER *Histor. Eccles. Sæc V. cap. 4. Art. 29.* S. Leo, inquit, Magnus cognomine, vitæ sanctimonia, gestisque juxta, & scriptis rebus maximus . . . varios Sermones scripsit, & in Ecclesia pronuntiavit, christiana eruditione, pietate, facundia admirandos.

ANSELMUS DESING in *Compendio Erudition. Libr. II.* Leonem divinæ facundiæ virum vocat.

LAURENTIUS BERTI in *Ecclesiast. histor. Breviario Sæculo V. cap. 1.* S. Leo I. hæreticorum omnium, præsertim Eutychianorum oppugnator, sanctitate, sapientia, facundia, qua Attilam, & Gensericum lenivit, ac deterruit, vere magnus, & jure meritoque a Benedicto XIV. declaratus Ecclesiæ Doctor.

SIGISMUNDUS CALLES *Libro V. Histor. Eccles. Germ. num. 82.* Leo I. Pontifex, ait, doctrina eloquentia, sanctitate, rebusque gestis Magnus.

JOSEPHUS BIER *Apparat. Part. XI. pag. 84.* ita de Leone: Multas scripsit epistolas, & homilias sapien-

sapientia, eruditione, sanctitate plenas, stylo latini sermonis facundo & nervoso prorsus elegantes.

Haud secus Critici ceteri, & quotquot Leonem vel ex solis horariis precibus loquentem subinde audierunt. Nam & amici eadem de causa, quod homiliis ejus mirifice affici, & gaudio efferri se dicerent, cum ejus lectio aliqua recurreret in *Breviario*, etiam me, atque etiam hortati sunt, uti in eloquentia ejus exornanda, quanta maxima possem, industria, atque accuratione versarer. Nempe concors omnium sententia est, Leonem, uti dignitate supra reliquos Antistites eminuic, ita & facundia nulli secundum extitisse, nec minus ob scriptorum excellentiam, quam ceteras dotes, puta prudentiam, moderationem animi, doctrinam, sollicitudinem, zelumque pastorem, fortitudinem demum, rerum usum & auctoritatem *Magni* cognomentum retulisse. Istuc vero tanto mirandum magis, quod cum in tempora incidisset, quibus eloquentia jacebat penitus, vix quidquam tamen de barbarie illa contraxerit, & inter sæculi ejus sordes non illimis tantum, verum & splendidus feratur.

C A P U T II.

Quid habeat Leo uni sibi proprium?

Nihil facilius videtur, quam characterem in magni hujus Pastoris lucubrationibus internoscere. Paucissimis quidem verbis, verum accurate omnino eundem exhibet vir in Veterum scriptis omnibus versatissimus Ludovicus Du Mesnil, qui *de doctr. & disciplin. Eccl. ad ann. 461.* ita de Leone: *Multa scripsit magnifice, & eleganter, in quibus profundioris judicii sapientia, & magni animi firmitas elucet.* Convenit fere cum eo Criticus alius, idemque acerrimus Claudius Fleuryus, ita Leonis

Leonis in scribendo notas definiens *. *Orationis stylus nobilis est, & elegans, quo judicii maturitas, ingenii vis, atque animi magnitudo expressa relucet.* Et Abbas Ladvocat sæpe laudatus. Ait enim: *Stylus ejus est nobilis, & elegans: soliditas item judicii, venustas ingenii, & magnitudo animi in scriptis ejus omnibus admirationi sunt.* Hieronymus Platus *Libro III. de bono Stat. Relig. c. 11.* Leone vero, ait, *quis gravior, numerosior, atque ut sic loquar, rotundior? cujus oratio majestate plena, & quibusdam quasi verborum fulminibus instructa.* Cardin. Augustin. *Valerius de Rhetoric. cælest. cap. 41.* In *Sermonibus S. Leonis*, inquit, *magna inest gravitas, & dicendi majestas.* Erasmus in *Ciceroniano*, *Leoni bene numerosam, satisque perspicuam dictionem, nec ineptos sensus tribuit.* Plene Venerabilis Canisius *loc. dat.*

„ Manat, ait, e sanctissimo Leonis pectore gravis,
 „ & auctoritatis plena oratio, qualem in aliis re-
 „ petire sit multo difficillimum. Etenim licet
 „ omnibus quoque dicendi virtutibus excellent,
 „ quod Leoni maxime concessum est: ægre ta-
 „ men fiet, quin aliquando remittant æquale, so-
 „ lidumque pondus illud verborum, atque senten-
 „ tiarum. Taceo quam operosum, molestumque
 „ in homiliis perpetuam unius dictionis gratiam,
 „ fortemque splendorem ad populum servare. Sed
 „ hac in parte sic Leo regnat, ut ob sapientissi-
 „ mam eloquentiam, & eloquentissimam sapien-
 „ tiam Magni cognomen apud posteros obtinuerit;
 „ sic eloquentia nemini Theologorum cedens,
 „ uti multos excedit sapientia. Et quis demum
 „ hoc hodie præstare queat, quod suis tot, tan-
 „ tisque scriptis Leo? ne ex istis quidem opinor
 „ aliquis, qui studium omne collocarunt in paran-
 „ da dictionis facultate. Tanta autem erat in Leo-
 „ ne, tamque mirabilis ingenii facilitas, tanta sa-
 „ nitas,

* *Histor. Eccles. Libr. XXIX. §. 16.*

„ nitas, tantaque præsentia, ut paratam orationis
 „ ejus copiam cum singulari gravitate, sed & ju-
 „ cunditate quadam conjunctam nullus non im-
 „ pendio miraretur. „ Dein insertis illis Trithe-
 mii laudibus, a Joanne quoque Andrea repititis,
 & auctis, addit: *ita demulcet, ut vinctos auditores*
teneat, ita docet, ut sensibus divinis aures impleat,
ita exhortatur, ut ardoribus virtutis animos incen-
dat. Oratione quidem parcus, sensibus vero subli-
 mis, imprimisque cælestis, & quod est ante omnia
 admirabile, profundissimus, atque planissimus. Quod
 si mihi meam quoque licet sententiam dicere, ma-
 jestatem præcipue, eamque pontificiam, & sum-
 mam spirat Leonis oratio, estque inter Latinos Pa-
 tres haud dubie omnium maxime numerosa. La-
 conice Nicolaus Causlinus *: *In Leonis labris sedet*
majestas. Periodos enim amat, si quis alius,
 passibusque incedit gravissimis, sine tumore tamen
 sine rhythmis illorum temporum, sine alia orna-
 tus affectatione. Qua de re vir doctissimus Lud.
 Antonius Muratorius de dignit. eloq. pop. cap. 8.
 ait: *Augusta est Leonis Pontificis Maximi eloquen-*
tia: præclara arte in circuitus fusæ ducuntur illius
sententiæ: attamen non excedit, neque opprimit intelli-
gentiam popularem. Franc. Xaverius Mannhart
 VII^{ma}. Dissertationum Theologicar. *Nativa facun-*
dia plenos, dicit, Leonis sermones cum quadam elo-
quentiæ strepitu. Ingenium sublime, ac quali ætas
 illa egebat, viro huic fuisse, in scriptis ab eodem ope-
 ribus passim elucens, & undique velut fulgurans. Ema-
 nuel porro Thesaurus, qui commensurata oratio-
 nis genus vel in lapides introduxit, hoc Leonis
 numero, hac gravitate, & pompa clausularum ita
 est delectatus, ut periodos ejus velut *tornatas af-*
fereret, nec alia cathedra, quam throno Pontificio
dignas

* Libr. III. cap. 14 de Eloquentia sacra, & hum.

dignas *. Gravitas igitur quædam admirabilis, & majestatis a Christo traditæ retinens animus in eo utramque paginam implent. Sonitus ipse, lapsusque verborum, ipsi flexus, & ambages sententiarum virum ubique tam aperte, & quasi ante oculos statuunt, ut non dico animus, sed ne auris quidem dubitare possit, Leonem loqui. Verbo, idem de eo dicas, quod de Salomone 2. Machab. 2. v. 9. divinus Spiritus dixit: *Magnifice sapientiam tractabat.*

Neque istuc recentipres modo, verum & antiquos scriptores, eorumque temporum vicinos advertit. Joannes Constantinopolitanus *Epist. ad constantinum Papam*, animum Leonis principalissimum proprio suo vocabulo appellavit. Facundo vero Hermianensi ** *Beatus Leo est fidelis, ac fideus propugnator Ecclesiæ, & hæreticorum non fictus aut trepidus impugnator.* Idem infra *** de eod. *Quis, exclamat, hujus Romani Pontificis gravitatem non prædicet, quis tantam constantiam non honoret!* Denique eleganter **** Soli eundem comparat, velut æterna lege præfixa in quodum suæ dignitatis, ac fidei firmamento luce veritatis irradianti, vel quasi clarissimæ tubæ auctoritate sua insonanti inquietorum ausibus inhibendis. Ex qua ipsa majestate id consequi necesse est, ut sanctissimus Pontifex mirificam quoque vim, & efficaciam præferat. Nicolaus enim I. Papa, libertatis & gravitatis ejus, uti dignitatis hæres *Epist. ad Michaëlem Imperatorem* scribere non dubitavit: in *Ephesino latrocinio, cunctis Præsulibus, & ipsis quoque Patriarchis prolabantibus, nisi Magnus Leo (imitator scilicet illius Leonis, de quo scriptum est: vicit Leo*

U 5

de

* Vide *Idæam argutæ dictionis cap. 4.*

** *Libr. II. de Tribus capitulis cap. 5.*

*** *Ejusdem operis Libr. XII. cap. 2.*

**** *ibidem.*

de tribu Iuda) divinitus excitatus, os aperiens totum orbem & Augustos ipsos concuteret, & ad pietatem commoveret, Religio catholica penitus corruisset.

Est autem multo jucundissimum audire, quomodo Theodorus Petreius Carthusianus, de S. Doctore optime meritis, efficaciam ejus maxime contra hæreticos attollat. Cum enim in *Præfatione ad confessionem* Beati Leonis Magni de Cypriano, & Tertulliano, quorum pariter confessiones vir industrius ediderat, sermonem intulisset, Magnum istum Pontificem *paris eloquentiæ ac fidei auctorem*, vocat, *cujus heroicum scriptionis genus ut summo verborum pondere humanas penetrat mentes, hæreticorumque vim argumentorum elidit, vires incidit, versutius detegit, sic pietati deditum animum divini amoris facibus vehementer inflamat.* Et iterum *ibidem*.

„ Hic est ille Leo, ait, qui inter turbidas hor-
 „ rendæ tempestatis procellas tam infracto semper
 „ fuit animo, ut sicuti leo fortissimus bestiarum
 „ ad nullius expavescit occursum: ita ille tali
 „ tempore, quo præsentis periculi metus audacis-
 „ simum quemque in fugam, ac latebras impu-
 „ lerat, ultro sese, omnem hostilem vim sola ora-
 „ tione, ac vultus sui exhibitione profligaturus,
 „ offerret. Tanta etenim erat in hoc beatissimo
 „ viro, tamque mirabilis agendi, dicendique fa-
 „ cultas, tanta auctoritas, tanta majestas, ut in-
 „ signem orationis hujus copiam cum singulari
 „ gravitate * conjunctam nullus non impendio
 „ miraretur: adeo, ut ad consensum sui, quos
 „ suadendo inducere non poterat, cogendo impel-
 „ leret. Sensere hoc olim, ut non semel Mani-
 „ chæi, Ariani, Macedoniani, Sabelliani (qui &
 „ Patri-

* Et forte idipsum vult absurda phrasis Joannis Adelphi Mulingi, qui *Præfat. in Naz.* sic habet: *Quis Leone & in stylo, & in argumento prægnantior.*

„ Patripassiani) Priscillianistæ, Apollinaristæ: sic
 „ maxime Nestoriani, & Eutychiani, quorum il-
 „ le execrabiliū hæresum portenta qua scriptis,
 „ qua voce velut quibusdam fulminibus evertit,
 „ prostravit, profligavit. „

Est tamen, ut neque istuc dissimulem, Leonis rugitus non tam terrificus, quam sonorus, imo: quod Hincmarus Rhemenfis monet *, jucundam vocem habet. Mixta est enim gravitati lenitas, modestia, & pietas plane singularis. Leo est, sed cicur, & mansuetus, blandus amicis, ad repellendum, quam invadendum promptior; non nisi ad conspectum hostis rictum diducit: unguis vero exerit magis, quam infigit: nec prædas agit, sed cohibet solum, atque absterret alios prædantes. Commendanda est ergo ejus lectio præ multis aliis, & quidem illis maxime, ut suadet Card. Federic. Borromæus **, qui humile nimis dicendi genus sectantur. Hoc enim putat aptissimum medium, quo tollatur humo infelix oratio, atque languor ille, qui plane inutilis est ad persuadendum. Ego ab iis præterea volvi velim Leonis sermones, qui cum diffundunt se nimium, longiores fiunt, & onerant magis, atque fatigant, quam incitent, aut teneant audientes.

Sunt denique, quando majestatem paululum ille dimittit, igniculi quidam in Leonis oratione, qui ultro erumpunt, & motus habent breves quidem, sed intimos, & valde salutares. Id quod obiter jam ex Canisii verbis hoc ipso capite colligi poterat. Sed non solus est Canisius, qui id observaret. Cardinalis Bona in *Notitia Auctōr.* ait, *Leonis Magni Papæ eloquentiam cor afficere, penetrare, urere.* Et jam ante Bonam Trithemius Loc. cit

* *Libr. de non Trina Deitate cap. 8.* ubi *dulcisonum* ejus rugitum appellat.

** *L. 5. de Sacris Oratorib.*

citāt. scripserat: *Ejus sermones cor penetrant, afficiunt animum, fidem Catholicam dulci brevilogio confirmant. Nec mirum; ignem divini amoris gestans accensum in pectore quid aliud, quam verba ardentia proferret?* Ita Trithemius, cui nolim contradicere; neque enim æqualiter omnes affecti sumus. Ego in Leone non tam flammās, quam lucem inveni, putoque gravitati ejus & magnitudini plus longe lenitatis, quam æstus, & contentionis admittum. Quoties ergo extra contentiones movet, & affectum exsuscitat, id quod sæpius facit, unctioni cuidam & melleæ suavitati tribuendum, qua influit potius in animos, quam irrumpit. Atque hanc dotem præ ceteris Joannes Baptista Mantuanus * admirari se dicit:

Quantum decus addat

Florida divinis ejus facundia rebus,

Quis referat? Nemo veterum me iudice Patrum
Dulcius eloquitur.

Et alius melior longe Poëta Petrus Justus Sautel in *Anno S. poëtico* jj. Aprilis S. Leonem *dulci eloquentia præditum* affirmans ita canit:

Mortuus exanimi dederat Samsonius ore,

Iste suo vivus mel dedit ore Leo.

Porro de stylo ipso, etsi quædam dicta jam sunt, nondum plene faciunt ad omnimodam ejus cognitionem. Solum ergo de numeris, & familiari periodo, ut cum majestate ejus quodammodo connexis, loquebamur: extra quæ alia præterea notare debemus, vel ea de causa, ut de Libris ejus aliquot valde dubiis rectius, atque securius pronuntiemus. Qua in re non repudiandus est Quesnellus, cui, ut ipse loquitur **, scripta

* *Libr. 4. sacrorum Dierum.*

** *Dissertat. 2.*

scripta S. Leonis ex instituti sui necessitate sæpius relegendi, familiarissima facta est phrasis Leonina, totusque dicendi character. Advertisse igitur se dicit *oppositorum congeriem in Leone, verbum, a quo pendet sensus, ad finem relegatum, quæ ternarium plerumque numerum non excedat, etsi sæpe etiam ad quaternarium extendatur.* Assumit insuper verba auctoris *Apologiæ SS. PP. de gratia Part. I.* „Est „ stylus auctoris istius elegans, ac sublimis, sermo „ nitidus, & apertus, non injucunda figurarum „ varietate distinctus, frequenti verborum oppo- „ sitorum conflictu oblitus, gravi ratiocinio, con- „ ceptibus nihil humile, ac demissum habentibus, „ catholica ubique, ac cœlesti prorsus doctrina „ refertus, Scripturæ sacræ doctrinam totus spirans, „ atque igneo pietatis vigore, qui Sanctorum „ scriptis inesse solet, plenissimus. Gaudet præ- „ terea diversis periodorum membris similiter ca- „ dentibus, ac desinentibus: tota denique com- „ positio in æquales fere, & commensuratas par- „ tes concinne distributa, venustam, ac perpoli- „ tam orationem exhibet. Equidem verba hæc quanta, quanta sunt, de Auctore *Librorum de vocatione omnium Gentium* Apologista scripsit: verum Quesnellus ex hoc ipso argumento contendit, Leonis libros eos esse, & vel ex styli perfectæ similitudine nulli alteri posse adjudicari *. Neque negant has dotes Adversarii, quin ultro fatentur, omnes in Leone quoque reperiri, sed istuc negant, ac pernegant, reperiri in solo Leone. Quod ipsis mea quidem sententia facillimum sit demonstrare. Quis enim non videt, modum eum scribendi ex frequenti antithesium conflictu, modulatæque ac tinnulæ orationis affectatione constantem, fuisse pluribus usitatum illa ætate, si non omnino communis

* Vide etiam Editorem S. Prosperi *Admonitione in hof-
co Libros.*

munis fuit? certe Quesnellus alio loco * non rogatus ipse concessit. Verum ego me tricis illis non immisceo. Bene hac in parte, an male Quesnellus senserit, nihil ad me, ut cui satis sit sancti Doctoris characterem quibuscunque demum animadversionibus illustrare magis potuisse.

C A P U T III.

Quæ Leonis Scriptiones præcipue laudentur?

Si de ullo alio, certe de beato Leone dici potest, uti dignitatis propriæ, sic materiæ, de qua scribit, conditioni, ubique stylum accommodasse. Atque in *Sermonibus*, ubi haud dubie latior campus est, longe magis exultat, & afficit oratio ejus, quam in *Epistolis*. Et si enim hæ phrasi ipsi unice propria, neque ad familiarium literarum morem exaratae sint: nihilominus, quod ibi ad unum, vel plures duntaxat, non ad populum, non ad omnes dicebat, moderandus fuit adstrictior ille numerus, ac pompa sermonis: sed neque ita seu figuris indulgendum, seu in amplificationes expatiandum. Ergo Leoni Decretales suas scribenti illud usuenit, ut Pontificem Maximum potius, quam oratorem præferret, & potestatis divinitus acceptæ esset observantior. quam præceptionum rhetoricarum. Quid quod judiciorum consuetudini dandum quoque aliquid fuit, & quidam *Curia*, in qua adoleverat, *stylus* retinendus? Tamen quidquid & ibi ex ejus calamo profluxit, Leonem probat. Stylus est æquabilis: & in ea mole negotiorum, curaque totius orbis præsens animus elucet. Videas ubique præclaræ cujusdam conscientiae securitatem, videas divinæ opis, ac beatæ felicitatis certam expectationem, videas hominem,

* Ejusdem Dissertationis.

minem, quem nullæ sæculi illecebræ, nulla ter-
 riculamenta a rectissimo cursu, beneque de omni-
 bus merendi studio avocare, vel impedire tanti-
 sper potuerunt. In Epistolis S. Doctoris vel ipse
 Pontificum accerrimus hostis Witakerus *Pontificii*
spiritus in Leone rugientis notas agnoscere se non
diffitetur.

Et profecto plures ex iis valde patheticæ sunt;
 uti celeberrima illa ad *Flavianum* num. 10., nunc
 secundum Editionem a Fratribus Balleriniis cura-
 tam XXVIII. Item 24. ad *Theodosium* Augustum,
 nunc XLIII. & 75. ad *Leonem* Augustum, nunc
 CLVI. cum aliis nonnullis. Et quidem de illa
 ad *Flavianum*, ut alias præteream, homo acatho-
 licus Joan. Jac. Gryneus *Præfat. in Monument.*
SS. PP. orthodoxographa, ait: *Leo Papa ejus no-*
minis primus graviter ad Flavianum scripsit. Ean-
 dem epistolam Joannes Croiset infra allegandus
admirabilem vocat. Ribadeneira vero dicit, in ea
 divine prorsus, singulari spiritu, doctrina, & elo-
 quentia Verbi incarnationem explicari.

Præcipuum itaque inter Leonis opera sunt con-
 ciones ad populum. De quibus Canisius loco dato:
Pontificia Majestate differens, & apostolico facundus elo-
quio, modestia illa vere christiana, virtuteque divina
cum nusquam non admirabilis existat, tum in suis
præcipue SERMONIBUS, ut nemo alius effulget, quod
brevitatis Magister, & unicus pene artifex latissima
rerum divinarum mysteria perstringat, & secundum*
Canonicas scripturas quemdam sacri eloquii principa-
tum includat.

Inter ipsos porro Sermones eminent nonnulli:
 & inter festos quidem illi, quos de *Principibus*
Apostolorum, ad *Anniversarium assumptionis suæ*,
de Incarnatione item, & Passione Dominica dixit.
 Inter

* Et habent id peculiare hi sermones; neque enim ego
 breviores scio.

Inter Morales me maxime afficiunt, in quibus sunt loci communes de *Misericordia*, de *temporum suorum calamitatibus*, de *Jejunio*, & *penitentia*, breves illi quidem semper, sed succulenti admodum, grandique sensu, quos semel lectos iterum iterumque non sine delectatione quadam regustes.

Libri de *Vocatione omnium gentium*, si beati Leonis essent, præferendi haud dubie forent Epistolis ejus. Cujuscunque autem sint, legi quam maxime merentur, ut qui usum magnum etiam in Eloquentiæ negotio habere possint: recteque Erasmus dixit *: *Utinam tales multos libellos Ambrosianis (seu Leoninis) immiscuisset, qui hos admisceat. Tales imposturas facile tulerimus, quæ pro auro supponunt aurum.* Sed & *Epistolæ ad Demetriadem* suus est nitor, ac venustas, tantum abest, ut Leone indigna habeatur.

Addi possunt ab eo, qui S. Leonis studiosior sit, Ludovici Maimbourg *Historia S. Leonis*, gallice scripta. *Epistola Joannis Andreae Episcopi Aleriensis ad Paulum II. Papam*, ante opera ejusdem Sancti. *Compendium vitæ* a Theophilo Raynaudo & ipsum operibus præfixum. *Approbatio Editionis Quesnellianæ* a Cohædeo Doctore Sorbonico scripta. Josephi Antelmii Canonici Foro-Julienensis *Dissertationes de veris operibus SS Leonis Magni, & Prosperi*. Ejusdem Leonis vita in *Exercitiis pietatis* a Joanne Croiset conscriptis ad diem XI. Aprilis. *Bibliotheca Pontificia Ludovici Jacobi. Benedicti XIV. Bullarium* anno 1754. 15. Octob. *Prolegomena & Observationes ultimæ editionis* tam Romanæ, quam Venetæ operum S. Leonis. Accedunt Recentiores, qui vitas Pontificum & Historiam Ecclesiæ paulo accuratius, neque tam jejunæ, uti superiores, scripserunt: Ad quos alio videlicet properantibus nobis satis hic fuerit lectorem remississe. Omnes enim isti sanctissimi Pontificis eloquentiam celebrant; sed quod nihil novum afferunt, brevitatibus studio prætermittendos nobis existimabamus.

DISSER.

* *Præfat. in hos Libros, Tom. II. Ambrosii, cui ea ætate tribui solebant.*

DISSERTATIO XIII.

De Eloquentia S. BERNARDI.

Pervenimus ad ultimum inter Patres, qui tamen ut aliis rebus omnibus, sic eloquentia quoque non solum postremus non sit, sed vel antiquissimis eorum ac celeberrimis minimum concedat.

CAPUT I.

Quam eximia, quam celebris Bernardi Eloquentia sit?

Bernardus jam adolescens, & ante secessionem a sæculo Eloquentiæ specimina sane miranda dedit; quod vim haberet persuadendi a natura inditam, & gratiæ potius, quam artis subsidio excultam. Vicennis erat, cum Galdricum Patrum, virum militarem eo deduxit oratione sua, uti potentiam, opes, gloriam, & delicias, quæ omnia ille amplissima habebat, cum vita religiosa commutaret. Nec secius quinis fratribus, atque aliis juvenibus egregiis, maximæque spei, secessionem persuasit, & cum ad tyrocinium adiret, triginta socios traxit secum, ac veluti captivos ad Christi servitutem adduxit. Verum multo plus confirmata jam ætate in animos potuit, iisdemque omnino incrementis, quibus sanctitas ejus augebatur, facundiæ quoque aliquid accedebat. Nihil erat tam difficile natura, nihil consuetudine tam inveteratum, quod Bernardi eloquentiam moraretur; quando nec ipsa sive amicorum, sive liberorum arctissimæ necessitudines illi ferendæ pares fuerunt. Guilielmus ex Abbate S. Theodorici Bernardi discipulus, & vitæ scriptor *Libr. I. c. 2. olim 3.* rem miram narrat, quæ nescio utrum de ullo alio uspiam legatur. Quoties Bernardus ad condu-

cendos religiosæ vitæ tyrones excurreret, id quod sæpissime faciebat, matres abscondisse liberos, uxores maritis, amicos amicis timuisse, ne plecti sermonibus ejus, uti aliis contigerat, perpetuo a se illi abstraherentur *. Manricus quoque in *Annalibus Ordinis Cisterciensis ad annum MCXXI.* eleganter inquit: *Vigebat Bernardi Patris zelus, & multos literatos, multos nobiles, multos potentes de sæculo trahebat. Quippe vix unquam Claramvallem egrediebatur, quin agmina Novitiorum secum reduceret, implendo apibus cælesti illi alveari, unde examina nova in dies prodirent.*

Atque ab hac suavitate, & efficacia colloquiorum familiarium conjectura fieri potest, quantum concionando, & publicis actionibus ad populum ille valeret. Certe jam Libro I., cum de fervore Patrum mentio fuit, dicebamus, etiam in Germania gallice dicentem, & paucissimis intellectum commovisse homines, & gemitum quam plurimis, atque adeo lacrimas expressisse **. Unde plurimum horarum itinere veniebant, ut videre saltem virum possent, quem audire prohibebantur. Porro ubicunque ad concionem Bernardus comparuit, concursus fiebant tam grandes, tam insoliti, quales neque Cicero, neque Demosthenes habuit, ita ut illustres etiam viri, & principes sceminæ loco excluderentur. Personabant autem omnia voce tanti oratoris: *Quæ enim scelera non arguit, ait Goffridus, seu Gaufridus ***, quæ odia non extinxit, quæ scandala non compescuit, quæ schismata non refarcivit? quas hæreses non confutavit. Quid vero sanctum, quid hone-*

* Adde, quæ idem Guilielmus infra cap. 7. olim 13. ejusdem *Libr.* itemque Alanus, & *Exordium magnum Cisterciense Distinct.* II. c. 3. habent.

** Vide Goffridum *Libr. III. vitæ* c. 3.

*** *Libr. III. c. 4.* olim, 7.

honestum, quid pudicum, quid amabile, quid bonæ famæ, quid virtutis, aut laudabilis disciplinæ suis ortum in qualibet regione diebus non roboravit ejus auctoritas, non fovit charitas, diligentia non promovit? Quo sane dici non potest, quam sibi sensim famam Bernardus conficeret. Pessimo tum loco erat res christiana; Clerum nundinationes sacrilegæ, & morum licentia intolerabilis vastabat, monasteria a primo fervore defecerant; Imperium cum Sacerdotio collisum, inter Principes dissidia exarserant, serpabant errorum magistri, Terram sanctam receperant Turcæ, horrendo schismate tota Ecclesia distrahebatur. Cum ergo ubique Bernardi præsentia desideraretur, ad ejus adventum acclamationes audiri, & lætitiæ publica significatio dari, ac in ornando uno Monacho inter se summi Præsules, amplissimæ Civitates, Principes, Reges, Imperatores certare, ejus arbitrio permittere causas suas, nec raro arma ipsa ponere. Summis Pontificibus oraculi instar erat, quorum voluntate factum est, ut velut communis causæ Dux, & Christi Legatus negotiis publicis Ecclesiæ etiam in Conciliis non admoveretur tantum, sed quasi præsideret, &, qui nulla erat dignitate, auctoritate tamen, & magnitudine rerum gestarum ceteris omnibus superior esset.

Itaque dissidentium factiones disjecit, Clerum & Coenobitas reformavit, fastum & luxuriam pepulit, ruentes in mutuam cædem exercitus exarmavit, Guilielmum Aquitanix Ducem ex Lupo rapacissimo in Agnum convertit, hæreticos vel nominis terrore fugavit, vel publicis certaminibus contrivit, atque elingues dedit, schisma Petri Leonis abolevit, & orbem, qui totus in partes iverat, rursus sociavit: aliaque plurima fortissime, ac felicissime gessit. Illud nefas sit obiter memorasse, quod bello sacro præstitit. Christianis in Palæstina omnia in dies arctiora fiebant, & amissis præcipuis urbibus, ac propugna-

pugnaculis ægerrime se contra Mahumetanorum assultus tuebantur. Ergo ultro, citroque ire legati, concionatores omnes insonare classicum sacrum, diplomata Pontificiarum largitionum ubique appendi. Frustra omnia, nihil actum, nemo se movebat, donec Bernardus in subsidium vocatus, protractusque e valle sua mel illud orationis profundere cœpit. Tum enimvero brevi tanti exercitus collecti, ut, quemadmodum conceptis verbis Scriptores graves testantur, solitudo fieret plurimis in locis, & occidens jam non haberet, qui armis ferendis idonei essent. Gisbertus in *Præfat. Dialogi de Synagoga & Ecclesiæ altercatione* ait, incredibilem omnium ardorem exstitisse, quo in oras eas certatim homines commigrabant, ut non prædiis, non castellis parcendum ducerent, sed res suas omnes in belli sumptus profunderent potius, quam erogarent. Sed nec amor propinquorum, conjugum, & liberorum, qui magis retinere eos debuisset, impedimento fuit, ne iter istud arriperent; quando tanta constantia, & alacritate valere eos jubebant, ac si nihil omnino ad se illi pertinerent. Ipsi summi Pontifices, ipse Ludovicus Rex Galliæ, Conradus Imperator, ejusque frater Baviaræ Dux (ut Præsules, ac Magnates alios præteream) nomen ei militiæ dederunt, quodque maximam omnium admirationem habet, in Gallia præ ipso Rege supremum copiarum Ducem Bernardum elegerunt, nemine nisi ipso scilicet reclamante. Hæc & his similia alia de Bernardo attoniti legimus, neque dubium est, horum omnium maximam sane partem cœlesti ejus facundiæ deberi.

Sed ne simus in ejus sermonibus celebrandis fusiores, de Libris quoque, in quibus solis ea facundia superstes est, aliquid dicemus. Jocabatur equidem ipse vir sanctus, magistris se quercubus, & fagis usum. Et sane modica ad scribendum subsidia habebat.

bebat. Verum non id ita accipiendum est simpliciter, ut quidam voluere. Mabillonius enim *, rerum ejus cognitor accuratissimus, affirmate pronuntiat, Bernardum, cum in sæculo jam imbutum literis, tum in Monasterio Theologiæ, & Sacris Canonibus operam dedisse. Certe in Scripturæ, & Patrum lectione diligentissimum fuisse, ipsi ejus libri plus quam fatis sit, ostendunt. Toties eos allegat, tam apte eorum verba adhibet. Apiculam dixeris maxime sedulam, quæ semper aliquid melioris succi reperit, quod alveari inferret. Quod ipsum tamen mirissimum est inter eas occupationes, ac valetudines perpetuas fieri ab eo potuisse, nisi dicamus, vacationem a curis, & præfectura ad quindecim ipsos annos concessam otii literarii ei plusculum indulgisse **. Ipsi porro libri, sive argumentum, sive scribendi rationem spectes, plane sunt admirabiles, nec quisquam sine voluptate eas legit, tum ob varietatem rerum jam ad Dogmata, jam ad Leges, jam ad Ascesin, & ad Mores spectantium: cum ob ipsam vim, ac dexteritatem ingenii, qua in explicandis abstrusissimis rebus adeo vivaciter, dilucideque versatus est, ut non ejus solum ætatis, quod Goffridus vult ***, plurimos, & excellentes Doctores, sed ceteros quoque in eo genere fere universos antecedit. Quod ne jactantius dictum videri possit, ipsi nobis testes sint; neque enim alia jam nisi illorum verba proferemus.

PETRUS CELLENSIS *Libr. VI. Epist. 23.* ita scribit. *Nullus sum ego ad illius sancta præconia referenda. Vita ejus, fama ejus, opera, scripta, mira-*

X 3

cula,

* *Præfat. Generali operum §. II.*

** *Ut alia mittamus, Epistola 190. non solum Patres allegat Bernardus, sed Doctores etiam. Qui ergo nullam ipsi humanam scientiam tribuerunt, ipsi produnt, se ejus Scripta non legisse.*

*** *Libro IV. in fine.*

eula, fides, spes, charitas; castitas, abstinentia, mortificatio demum in membris ejus, sermo, vultus, habitus, & gestus ejus, & his similia ipsa sunt, quæ testimonium perhibent de eo.

AUCTOR *Sermonis de Nativ. Salvat. inter opera Petri Damiani præter ceteras laudes ait eloquentiam ejus, & famam per totam latinitatem non immerito decurrisse, seque libenter illius sarcinas adorare.*

NICOLAUS, viri sancti NOTARIUS, homo eruditus, sed versatilis, & demum in vitia, turpissimamque defectionem prolapsus, idem fere repetit *Epist. 24. ad Petrum Cellensem.*

CÆSARIUS HEISTERBACENSIS *Libr. IV. Mirac. cap. 17. ait, per ejus os Purpuratos Patres, Reges, Principesque terrarum quasi per commune mundi oraculum locutus.*

AUCTOR *Apologiæ Libri de conceptu Virginali S. Anselmi propter coelestem facundiam, & sermonis efficacitatem Bernardum Organum Spiritus Sancti appellat.*

S. THOMAS AQUINAS *Serm. de S. Bernard. os ejus vocat vas pretiosum, os aureum, os gemmeum.*

BONAVENTURA PATAVINUS, Sancto ejusdem nominis haud inferior; nam & Cardinalis fuit, & Martyrii præterea palmam adeptus est: hic, inquam, vir summus *Meditationes suas Bernardi sententiis velut unionibus distinguit, eloquentissimum vocans, neque lat verborum habens ad ejus sapientiam, sanctitatem, splendorem, & vim penetrandi, dulcedinem item, atque unctionem exprimendam.*

HENRICUS GANDAVENSIS *Libr. de Scriptorib. Ecclesiast. cap. 11. sic de Bernardo loquitur: Talis, ac*

* *Meditationum in Vitam Christi cap. 36. Atque hæc ipsissimæ Meditationes S. Bonaventuræ Balneoregiensi per errorem suppositæ sunt.*

ac tantus in religiosa conversatione, & doctrina fuit, ut minus ad ejus laudem sit, quidquid ab homine dici potest. Disputator subtilis, & orator vehemens, ad quamcunque materiam vertit ingenium, verba habuit apta negotio, quod contendebat, persuadendo. Hujus opusculorum indiculum texere supervacaneum puto, cum in tantum vulgata sint, ut ea nescire non possit, qui aliud scire potest.

CAROLUS SACCIIUS Theologus *Serm. de S. Bernard. apud Mabillonium* (neque enim impressus habetur) *Sermones*, ait, infinitos habuit, libros elegantissimo verborum cultu expeditissime scripsit.

JOANNES TRITHEMIUS *Libr. de Scriptorib. Eccl.* Bernardo præter divinas, humanasque literas, ac subtilitatem ingenii, eloquentiæ etiam ornamenta tribuit, & nihil, ait, in suis neglexisse scriptis, quod ad ornandam orationem posset conducere, multaque præclara opuscula edidisse.

CAROLUS REGIUS *Libr. III. Orat. christ. cap. 20.* Bernardum concionatoribus omnibus proponit, quem & legant assidue, & cultu peculiari velut Divum tutelarem venerentur.

CARDINALIS BARONIUS *ad ann. 1130. 43. & 53.* appellat tubam cælestem, alterum Eliam, verum Apostolum.

ANGELUS MANRICUS Pacensis Episcopus *ad ann. 1153.* de Libris Bernardi dicere aggressus: *Sequuntur ordine libri*, ait, quos reliquit: ingens volumen, sed pondere, quam mole longe præcellens; nempe gemmea omnia, seu verius aurea.

RENATUS noster RAPINUS *de eloquentia sacra Confid. 11. & 36.* præ ceteris Latinis PP. Bernardum videtur proponere, quem oratores sacri in dicendo sequantur.

Et quoniam laus omnium maxime ab inimicis perficitur, etiam heterodoxum audiamus, GUILIELMUM CAVE, qui *de Scriptorib. Eccles. ad ann. 1115.*

ita de Bernardo ait: *Literis humanioribus non leviter tinctus, scientia theologica instructissimus, longe supra captum sæculi, quo vixit, elegans, ac eruditus.* Ita ille. Sed nimirum his hominibus nihil est novi, Bernardi scripta celebrare, quando ipse eorum parens Lutherus in *Colloq. Conviv. Cap. de PP. Eccles.* clamat: *Bernardus omnes Ecclesiæ Doctores vincit in concionando.* Quod si apud hos quoque existimationem eam Bernardus invenit, nihil mirum, apud omnes ordines, imo Principes, & Pontifices summo in pretio habitum semper, lectum, amatum, commendatum esse. Neque illud omitendum, editiones operum ejus sine numero factas. Nam, quod Godefridus Bouvart testatur*, a prima *Moguntina anni 1470.* ad ultimam *Parisinam 1719.* Bernardus, versionibus minime annumeratis, quadragies prælum fatigavit. Ipsa Roma, ipsa Lutetia ut quondam dicentis, imo redarguentis linguam veneratæ sunt, ita post manum non quibuscunque, sed pontificiis, sed regiis typis honorarunt. Idoneum sane argumentum, quo loco apud omnes essent scripta ejus, & quo loco hodieum esse apud omnes deberent. Nunc ad reliqua pergamus.

C A P U T II.

Character, & discrimen ab omni alia eloquentia.

Character Scriptionum Bernardi & ipse ejusmodi est, qui nullo prorsus negotio a ceteris omnibus dignoscatur. Stylo enim utitur, quem vere peculiarem, & uni ipsi proprium dicas, quem, quotquot assequi conati sunt (quemadmodum Guerrius, & eorum temporum plures) frustra fuerunt semper, nec nisi male operam collocarunt. Emicat enim in scriptis ejus spiritus quidam acer ille, magnus,

* Vide Joannem Pinium Bollandianum §. 58.

gnus, ac sublimis, unctio autem tam affluens, & copiosa, ut omnia redoleant pietatem, nullumque sit cor, quod non hortanti aut dedat se statim, aut difficulter admodum resistat. In rationibus deligendis est solidus, nihilque habet hians, vel infirmum: in sententiis sapientia, dulcedo & ingenium certant, sicque illas effert, ut aures æque, ac animum impleant. Verba ipsa tam sunt concinna, imo elegantia, quæ appareat non delecta fuisse: & cum tinnulus sit maxime, syllabis ludat, vocabula vocabulis opponat, sicque exultans feratur, sensuum tamen ponderi nusquam officit, nusquam obscurus fit, nihil frigidum habet, nihil affectatum, caret omni fuce eloquentia, ornamenta ipsa non accersuntur, sed sponte velut in solo suo nata sic produnt, & quamdam ostentant diligentissimam negligentiam. Paucis dicam, nemo simul tam sublimis, atque perspicuus, nemo tam densus, vividus, ac facilis, uti Bernardus. Etiam communissima nunquam communiter dicit; in magnis argumentis magnus, quin se in minoribus demittat aliquando, sed ut ad illa ipse attollitur, sic ista attollit ad se. Ergo omnibus etiam aridis, atque jejunis leporem, gratiam, imo vitam tribuit, & ubi alii non nisi spinas inveniunt, aut relinquunt, Bernardus meros flores jam ferere, jam metere videtur.

Nunquam animus languere potest in ejus lectione, secum rapit legentes, verbis suis velut animatis semper attentos retinet, erudit, delectat, & persuadet, uti vult, idque tam suavi simul ac potenti quadam ratione, ut quod dicere cupit, non exprimat solum plenissime, verum in imo etiam corde imprimat. Itaque, quod & de me ipso debeo confiteri, novus semper apparet lectoribus, & cum nunquam eos sinat alio evagari, alia tamen, atque alia identidem voluptate perfundit. Atque inde, ni fallor, factum est, ut communi suffragio *Doctor*

Mellitus, seu *Mellifluus* sit dictus. Hunc enim titulum antiquissimi Editores fronti ejus inscripsere. sed & Jacobus Gretserus opuscula quædam edens, Theophilus vero Raynaudus integro libro, quem *Apeim Gallicam* vocat, eundem Bernardo data opera vindicarunt. Ortus est hic titulus haud dubie ex ea ratione, quod aliter homines explicare vix possent, siue dulcorem, siue suavitatem, quam in legendo eo perferentiscebant. Eleganter Ernardus *Libr. II. vitæ c. 8. nunc 6.* ait: Eum *scribentem in tabulis cereis mella (ceris) restituisset, & quidem gratiora prioribus.*

Atque ne in una hac mellis similitudine hæreamus, Hugo Metellus Canonicus Regularis non minus jucunde oleo effuso Bernardum comparat, & *more contritorum aromatum fragrare* ait *. *Guilielmus Parisiensis* ** inquit, eum *gratiosissime docuisse.* Augustinus Valerius Cardinalis & Episcopus Veronensis *** *In Sancti Bernardi libris,* ait, *inest admirabilis quædam suavitas, ita, ut cum sancta animi voluptate semper legatur.* Nicolaus Pithoeus in Epistola, quam thesauro suo ex Sancti operibus collecto præfixit, istuc affirmat, se ab amico, qui Divinum summis laudibus extollebat, maximique ejus dulcia scripta faciebat, ad ea volvenda inductum: tantam vero ex ejus se lectione voluptatem cepisse, ut omnes pene, quæ animum suum tum misere excruiebant, molestiæ abigerentur.

His testibus alium adjungere juvat Calvinianum scriptorem, *Danielem dico Heinsum*, si quem alium eruditum, ac elegantem. Hic *Orat. III.* Quis, exclamat, *suavius Bernardo scribit? cujus ego Meditationes rivum Paradisi, ambrosiam animarum, pabulum*

* *Epistol. ad S. Bernardum apud Mabillonium Tom. I. column. 378.*

** *Sermon. de S. Bernardo.*

*** *In Rhetorica Ecclesiastica cap. 41.*

bulum angelicum, medullam pietatis vocare soleo. Item Lutheranium, Michaëlem scilicet Neandrum, qui Præfat. ad Gnomologias Græcorum præter alia in hanc rem Bernardum melle ac lacte dulciorem vocat, ipsamque pietatem spirare dicit.

Ad hanc porro suavitatem, non nego, plurimum sane ipsa natura contulit. Ut enim Goffridus *Libr. III. vitæ cap. 1.* affirmat, *apparebat in carne ejus gratia quædam, spiritualis tamen potius, quam carnalis, in vultu claritas præfulgebat, non terrena utique, sed cælestis, in oculis angelica quædam puritas, & columbina simplicitas radiabat. Tanta erat interioris ejus hominis pulchritudo, ut evidentibus quibusdam indiciis foras erumperet, & de cumulo internæ puritatis, & gratiæ copiose persusus homo quoque exterior videretur.* Quod si ergo legendo scripta ejus quæcunque ita accendimur animo, ita effërimur, & tantum non exilimus: quid illis accidisse necessum est, quibus vultum hunc, quibus oculos, quibus gestum dicentis videre licuit, qui vocem ipsam argenteam, & blandissime sonantem percipere potuerunt.

Neque tamen (quod pace summorum hominum dixerim) a melle ego repetam totum Bernardi characterem, quin dubito, an vel præcipuus inde repetendus sit. Utut enim favos distillet, utut affluat, & disfluat dulcedine, omnibusque gratiis delibuta sit oratio ejus, utut consoletur intime, levetque animum, & blandissimos passim suscitet affectus, tamen sæpissime plus vini, quam olei, plus aloës, quam mellis habet, plus pungit, quam ungit; atque ideo solum videtur penetrasse in mentes hominum, uti aculeos suos quam altissime, ac penitissime illis infingeret. Nam & apes argumentosæ sunt, certatrices, genusque pugnax, & bellicosum. Arma enim natura habent, glomerantur, stridore suo velut tuba exhortantur sese, & hostis os ipsum
invo-

involant imperterritæ, quoties irritatæ sunt; circumstant autem domum suam, favos acerrime defensantes, & aculeos in vulnere relinquentes; ut mihi adeo examen apum speciem aliquam caltrorum describere, atque exhibere videatur. Quod si jam ista Bernardo accomodemus, certum est, ipsam ejus doctrinam austeritatis haud parum habere. Sed & terrorem subito incutere novit, ferturque concitatius, arguit, & increpat acerrime, socordiam suam homini ponendo ob oculos, nihilque non agendo, quo pudeat eum aliquando, atque poeniteat rerum suarum. Quotiescunque vero id facit Sanctus Pater, fervor quidam mirificus ex eo ebullit, ut non ipse solum ardere totus, sed scintillas, sed faces spargere, atque incendere omnia velle putetur. Eliæ instar surgit tanquam ignis, & verbum ejus sicut facula ardebat. Nempe monitum præclarum, quod omnibus Ecclesiæ Pastoribus inculcavit, exemplo etiam suo ostendit, *suaviter fortis, & fortiter suavis*. Quare neminem veritus, purpurata etiam vitia protraxit in medium, eaque libertate corripuit, quæ ipsi uni videri possit convenire. Et est sane supra omnem non ulum modo, verum & ipsam admirationem, cum ante Regum solia velut Magister ad Discipulos loqueretur, miramque alias libertatem, nunc dicendo; nunc scribendo præferret, vix unquam contigisse, ut offensum se inde aliquis, aut læsum existimaret; verum omnes æqui bonique consulerent sermones ejus, & correptiones ipsas in lucro reponerent. Ergo, quod dixi, nolim Bernardum simpliciter a Melle nominari, sed ab ardore etiam, vi, acrimonia.

Probe id advertit Sixtum Senensem, sagacem, & eruditum hominem, qui in *Bibliotheca sancta*, cum illa, quæ prius de notis Bernardi diximus, omnia confirmat, addit tamen: *Oratio ubicunque dulcis, & ardens ita delectat, & ardens incendit,*

ut

ut ex suavissima lingua ejus mel, & lac verborum fluere, & ex ardentissimo ejus pectore ignitorum affectuum incendia erumpere videantur. Atque jam ante ipsum Goffridus, seu Gaufridus Abbas *Libr. III. cap. 3.* nunc I. admonuit: Quam placabilem, & persuasibilem, quamque eruditam linguam dederit ei Deus, ut sciret, quem & quando deberet proferre sermonem, quibus videlicet consolatio, vel obsecratio, quibus exhortatio congrueret, vel increpatio. nosse poterunt aliquatenus, qui ipsius legerint scripta, etsi longe minus ab eis, qui verba ipsius sæpius audierunt. Siquidem diffusa erat gratia in labiis ejus, & ignitum eloquium ejus vehementer, ut non posset ne ipsius quidem stylus licet eximius, totam illam dulcedinem, totum retinere fervorem: mel, & lac sub lingua ejus, & nihilominus in ore ejus ignea lex. Sed & Jodocus Clitovæus Theologus *Præfat. operibus S. Bernardi præfixa* sic de Scriptis ejus pronuntiat: Si auctorem spectare libet, & vitæ sanctimonia, & præclara eruditione præstantissimus occurret. Si characterem ipsum, rationemque scribendi, comperietur suavissima, & sine asperitatis offendiculo cum summa facilitate, elegantiaque decurrens, ut melle dulcior videatur ex ejus ore fluxisse oratio. Si denique materia, quam pertractat, exquiratur, aliud invenietur nihil, nisi quod involucri sacre Scripturæ in lucem proferat, aut vitia gravi verborum tonitruo effulminet, aut ad virtutem studiosius invitet. Justus quoque Lipsius, quantum nomen! rogatus ab Auberto Miræo, quosnam e Patribus legendos formandis concionibus judicaret, hoc responsi dedit *: *Mihi inter omnes Græcos placet Chrysostomus lectus: inter Latinos Bernardus me capit, & usum habet excitandi ob acrimoniam ubique, & calorem: tum etiam docendi, atque imprimendi ob sententiarum acumen, quas crebro, & salubriter miscet.* Hæc sane omnia

osten-

* *Epistol. 49. Centuria III.*

ostendunt, quod proposui, dulcedinem scilicet non esse præcipuam Bernardi dotem, sed æqualem, aut etiam potiore alteram, quæ acrem præterea, & ardentem pene efficit ejus orationem.

Porro ceteros ductus inimitabilis hujus calami, notasque peculiare varii descripserunt. Ab Hieremia Drexelio diligentissimo Bernardi lectore * dicitur *verbis disertus, sententiis venustus, rebus abundans, sensu, ac succo meliore plenus, nervo dicendi lacertosus, eloquio suavis, & mera pietatis mella stillans assidue, veritatis semper amantissimus. Superi! addit, quam ille delectat! docet! stringit! movet! persuadet! expugnat!*

Ipsæ David Chytræus Melanchtonis discipulus *Orat. de Philip. Melancht. pag. 509. Bernardus, inquit, admirabili Religionis studio, & Sacrarum Literarum peritia, quarum verba, & sententiæ dicenti se sponte offerunt: in movendis etiam affectibus piis non segnibus, nec inefficacibus, simul tamen festivus, & jucundus est, ut mellisui cognomen non immerito ipsi tributum videatur. Profecit ex Erasmo, qui Libro 2. Ecclesiasticis, & alibi similia habet. Nuperrimus Scriptor, Abbas Ladvoat in Lexico suo: Stylus, ait, S. Bernardi vividus est, floridus, sensa nobilia, atque ingeniosa, phantasia splendida, & allegoriarum ferax. Plenus item est unctiois, & teneritatis, modos quosdam blandos, & delicatos habet, quibus continuo illabatur in animum, denique vi, & cum vehementia cor ferit. Copiosissime autem ista omnia Mabillonius expressit, cujus verba tam pulchra simul pro more, tamque gravia sunt, ut non verear huc transcribere universa: „ In Scriptis ejus, inquit, elucet ingenium natura nobile, generosum, excelsum; sed „ humanum, civile, & honestum: eloquentia „ quasi congenita, sine fuce, non sine ornamento, „ sed*

* In *Aurifodina Part. I. c. 7.*

„ sed nativo: stylus pressus, quinino vivax, dictio
 „ propria, cogitatus sublimes, affectus pii, lepo-
 „ resque sponte nascentes, totus sermo unum Deum,
 „ ac cœlestia spirans: ardet non urens, sed inflam-
 „ mans, pungit, & stimulat, non ut irritet, sed
 „ ut moveat: terret, sed amando, non indignan-
 „ do: blanditur, sed non adulatur: laudat, sed
 „ non extollit: urget blande, perstringit sine
 „ molestia, delectat, recreat, placet. „ Recitatis
 „ dein verbis Sixti Senensis supra datis, de ipsa do-
 „ ctrina istuc subdit. „ Jam doctrinam habet minime
 „ vulgarem, Scripturæ Sacræ verbis, ac succo re-
 „ fertam: sic autem Patrum sententiis inhærentem,
 „ ut tamen propria ejus sentiat. Ita quippe scri-
 „ bit de rebus divinis, de gratia, de libero arbi-
 „ trio, de moribus, & officio Pontificum, Cleri-
 „ corum, Monachorum, laicorum, ut fontem
 „ hæc indicent, non canalem. „

Porro phrasis Scripturæ, quam Sanctus Pater
 nunquam ponit, peculiarem hoc loco tractationem
 meretur. Plures ante me observarunt, sic ab in-
 eunte ætate Sacrarum Literarum notitiam, dein
 memoriam quoque imbibisse Bernardum, ut ex ab-
 undantia cordis, & os loqueretur perpetuo, & ca-
 lamus diffunderet. Quidquid ergo conabatur scri-
 bere, versus erat ex divinis Literis desumptus; tan-
 ta est in ea re facilitas, tam apte, tam constanter
 redhibet eos locos, ut quasi ad usum unius hominis
 locutus divinus Spiritus videri possit. *Utebatur sa-
 ne Scripturis*, ait Goffridus, *tam libere, commodeque,*
ut non tam sequi illas, quam præcedere crederetur, &
ducere ipse quo vellet, auctorem earum ducem Spiritum
sequens. Quem nimirum, ut in medio Ecclesiæ aperiret
 os ejus, sic impleverat Deus spiritu sapientiæ, & in-
 tellectus, ut secundum quod in libro Job legitur, pro-
 funda quoque fluviorum scrutaretur, & abscondita pro-
 ferret in lucem. Nam & confessor est aliquando, sibi

meditanti, vel oranti Sacram omnem, velut sub se positam, & expositam apparuisse Scripturam *. Propterea Drexelius *Part. I. cap. 7. Aurisod. calamum Bernardi recte dixit continuo e divinis fontibus stillare. Et Hieronymus Platus de bono Stat. Relig. Libro III. c. 11. Id etiam præcipuum habet, ut ita Scripturas sacras in suum stylum immisceat, & contextat, ut vel ipse Scripturæ verbis loqui, vel Scriptura ipsius ore sonare videretur; quæ res unacum lepore gravitatem quoque, ac vim habet mirabilem. Sixtus vero Senensis loc. cit. Sic, ait, ab infantia sua sacras Literas imbibit, & per omnem ætatem memoria retinuit, ut quoties aut aliquid scribere, aut loqui tentaret, toties in verba, & sententias sanctarum Scripturarum prorumpere cogeretur. Unde & universa scripta ejus, quæ nihil aliud, quam centones divinatorum Voluminum dicqueunt, undecunque Veteris, ac Novi Testamenti sententiis distincta sunt, ceu gemmeis emblematis, hisque adeo commode, & apte insertis, ut ibi nata esse credantur. Denique Franciscus Combes in Not. ad Orat. 2. S. Germani de Dormit. Virg. Tom. I. Auct. nov. ait, hanc verbis, sensusque Scripturæ intextam orationem iis velut margaritis & iplendere, & devotius quid spirare, uti omnes in eo adverterent, mirarenturque. Merito igitur Mabillonius eod. loco illud Apostoli Viro sancto accomodat: Si quis loquitur, quasi sermones Dei, & sensum improprium exornatu argumenti, attentioneque, & delectatione auditorum breviter quidem, verum sapienter excusat. Nolim autem, quando hac de re sermo est, dissimulare, hanc ipsam exuberantiam, in qua sæpe allegoria allegoriam, ut fluctus fluctum trudit, non omnibus placere: imo si sincere, ut sentio, loquendum est, puto id unicum esse vitium, quod Bernardi facundia ab eruditis objici possit.*

Notant

* *Libr. III. vita cap. 3. num. 1.*

Notant & illud auctores in calamo Sancti viri, hoc veluti penicillo aliquo se ipsum totum, rationem vivendi, sensusque omnes ad vivum expressisse. *Bernardi effigiem videre cupis?* quærit Drexelius loco jam dato: *Scripta intueri.* Plane enim loquitur, quæ sentit, neque tam ex ore, quam ipso corde, & intimis visceribus profecta videntur, quæcunque dicit, signans paginam vestigiis suis, neque aliquid exigens a ceteris, quod non ipse cumulatius præstitisset. Itaque Goffridus *Libr. III. vitæ cap. 4. olim 7.* fusius quidem, sed eleganter, postquam de moribus ejus dixerat: „Ceterum, ait, longe emi-
 „ nentius in suis ille libris apparet, & ex literis pro-
 „ priis innotescit: in quibus ita suam videtur ex-
 „ pressisse imaginem, & exhibuisse speculum quod-
 „ dam sui, ut illud quoque Ambrosianum merito
 „ illi posse videatur aptari: *Laude sua ipse se so-*
 „ *net, & laureatus spiritu, scriptis coronetur suis.*
 „ Si quis enim nosse desiderat, quam sollicitus ab
 „ initio sui ipsius dijudicator, & scrutator extiterit,
 „ primum opus illius de Gradibus humilitatis inspi-
 „ ciat. Inde, si quæritur piæ mentis religiosa de-
 „ votio, transeundum ad Homilias in laudibus Vir-
 „ ginis Matris, & illum, quem de diligendo Deo
 „ edidit, librum. Si fervens contra suorum vel alio-
 „ rum vitia zelus, legatur is, quem Apologeticum
 „ vocat. Si vigil eodem in zelo, & circumspecta
 „ discretio, de Præcepto, & Dispensatione disse-
 „ rens audiatur. Quam vero fidelis cujuslibet piæ
 „ conversationis commendator extiterit, & adju-
 „ tor, exhortatorius ad Milites Templi Sermo de-
 „ clarat. Quam non ingratus Gratiæ Dei, ex his
 „ liquet, quæ de Gratia & libero arbitrio tam fide-
 „ liter, quam subtiliter disputavit. Quam liber in
 „ voce, quam disertus, & in rerum superiorum pa-
 „ riter, inferiorumque scientia locuples, in his,
 „ quæ ad Papam Eugenium de Consideratione scri-
 „ Vol. II. Y „ pfit

„ pfit, diligens confiderator agnofcat. Quam devo-
 „ tiffimus prædicator alienæ fanctitatis, tam diligen-
 „ ter Epifcopi Sancti Malachiæ vitam profecutus
 „ oftendit. Nam & in Sermonibus fuper Cantica,
 „ & investigator myfteriorum, & morum ædifica-
 „ tor magnificus innotefcit. In Epiftolis, quas ad
 „ diverfas perfonas ob negotia diverfa dictavit, pru-
 „ dens lector advertet, quo fervore fpiritus iufti-
 „ tiam omnem dilexerit, omnem æque oderit in-
 „ juftitiam. „ Ita Goffridus. Contrahamus jam,
 quæ fufe hoc capite dicta funt, & fic de Bernardi
 charactere paucis habeamus. Bernardus fcribens
 Auguftini fubtilitatem, Hieronymi eruditionem,
 fuavitatem Ambrofii, Chryfoftomi nervum in fe
 collegit, & cum tam apte, tam jucunde, tam ve-
 nuftè fcriberet, patet ex ipsis verbis, quod longe
 majori robore loqueretur. Elucet in eo ubique
 magna humanarum literarum, major divinarum co-
 gnitio, nec unquam aliquis feliciter videtur lenita-
 tem cum efficacia, copiam cum firmitate, gratiam
 cum feveritate conjunxiffe. Allicit enim lenitate
 fua cor, efficacia mentem invadit, copia torrentis
 in morem fecum rapit, firmitate convincit, gratia
 facinat, feveritate, quidquid obftat, destruit, atque
 evertit. Nemo erat, qui ei refifteret, & hodie-
 que, ubi eloquentia ejus fcripta vitæ plurimum
 amifit, difficillimum fit diutius eum dicentem fuf-
 tinere. Hæc de charactere Bernardi diligenter, nec
 fine affectu erga tantum Doctorem dicta funt, at-
 que etiam curiofis harum rerum fufficere poffunt.
 Alia, nec tamen nova dabunt Francifcus Ribera *Proæ-
 mio in Malach.* Carolus Regius *loc. cit.* Theodorus
 Petreius in *Nuncup. Confess. Bernard.* Joannes Croiset
 in *Exercit. Piet.* & alii complures.

CAPUT III.

Quibus Locis præset Bernardus in dicendo, & scribendo?

Tot tamque variorum operum crisin daturus, ut ordine progrediar, illam ipsam mihi sequendam seriem existimaui, quam in nova Editione Mabillonius secutus est. Et primo quidem de *Epistolis*, dein de *Libris de Consideratione*, aliisque præstantioribus *Tractatibus*, denique ultimo loco de *Sermonibus* dicam.

De *Epistolis* idem iudicium ferri minime potest. Aliæ enim Ecclesiasticæ sunt, quæ disciplinam, & Clerum spectant; & hæ ut numero plurimæ sunt, sic fere ardentiores: aliæ Morales de virtutibus, vitiisque ac variorum statuum officiis agunt; & hæ cum Sermogibus, de quibus infra, affinitatem habent: aliæ demum permultæ Asceticam profitentur, atque cum Tractatibus, de quibus post dicemus, multis rebus conveniunt: denique paucae privatas res, & negotia concernunt. Omnes autem Bernardo dignissimæ, &, si breviores quasdam excipias, eloquentissimæ sunt. Robur enim, libertatem, sapientiam, zelum, documentorum item ac sententiarum ubertatem, verbo, totum Bernardum ostendunt. Stylum tamen quod attinet, neque sibi neque aliis operibus semper similes invenias; quod scilicet plurimæ, ut res ferebant, dictatæ solum, aliæ festinantius scriptæ, aliæ demum limatæ fuerunt. *Vid. Guilielmum & Goffridum vitæ scriptores, Libro nostro I. Dissertat. V. cap. 1. §. 5. relatos.* Ceterum miris eas laudibus efferunt duo Interpretes Galli apud Trivultienteses 1702. & 1718., quibus suas ipsi quoque Trivultienteses adjecerunt.

Libri de *Consideratione* omni laude superiores sunt, habentque tot, ac tantos præcones, ut præ

copia verba facere de iis vix possim; cum videam, & initium me difficulter, & exitum fore habiturum. Illos enim non modo Eugenius Papa, cui inscripti erant, veneratione summa suscepit, sed etiam Nicolaus V. ante inventam artem typographicam elegantissime describi iussit. Pius V. præ aliis ad mensam suam prælegi voluit, sententiarumque gravitatem attentissime ponderans, cum iis, quæ suo tempore, ac loco exequeretur, summa diligentia contulit. Gregorius XIII. seorsim impressos habuit, & suo tempore legit. Urbanus VII. familiarissimos sibi reddidit. Gregorius XIV. omnibus etiam inferioribus Prælatiis summo-pere commendari, atque in manibus perpetuo esse optavit. Clemens VIII. suis typis publicari est passus. Sunt & alia antiquiorum præclara elogia his Libris tributa, ut Helinandi Frigidi montis Monachi *de Reparatione Lapsi* c. 8. Ernaldi vel Arnoldi Bonæ vallis *L. II. vitæ* c. 8. *Edition. veter. nunc* 6. &c. Nos Recentiorum laudibus contenti erimus. Hieremias Drexelius *loc. cit.* eleganter ait: *In scripto hoc Bernardus superavit Bernardum. Nam modo cautum Oeconomum, modo sollicitum Patremfamilias, modo fidelem monitorem, modo serium præceptorem, jam Ascetam, jam Ethicum jam & Politicum, nunc Philosophum, nunc Theologum agit. Illustre prorsus scriptum a multiplici eruditione.* Pagius quoque in *Critica Baronii* ad annum 1152. hos quinque libros inter Bernardi opera præstare affirmat. Mabillonius in *Nuncupatoria ad Alexandrum VIII.* plane cedro dignos, & tot oraculis refertos dicit, ut ad dirigendos Summos Pontifices, imo ad regendam universam Ecclesiam quasi divinitus dictati esse videantur. Idem rursus in *Præfatione generali* PLANE DIVINOS vocat. Et *Præfatione ad Tomum II.* de Opusculis universe locutus hæc subiungit: „In his omnibus nullum Bernar-

ardo

„ ardo dignius videtur, quam libri V. de Confide-
 „ ratione ad Eugenium Papam. Si enim argu-
 „ menti & personæ dignitatem spectes, nihil
 „ generosius: si modum tractandi, nihil sublimius:
 „ si styli majestatem, & sententiarum gravitatem,
 „ nihil eloquentius, ac fortius: si denique dicto-
 „ rum puritatem, & inhaerentem sacris Canonibus
 „ disciplinam, nihil catholico Doctore, & san-
 „ ctissimo Patri convenientius. Quid vero ma-
 „ gis arduum erat homini in solitudine educato,
 „ a mundi rebus, & negotiis alieno, quam vi-
 „ vendi leges Summo Pontifici, nedum toti Ec-
 „ clesiæ tradere, & quasi præscribere? Quid ho-
 „ mini privato difficilius, quam de totius Eccle-
 „ siæ statu, de moribus sacrorum Ministrorum,
 „ de omnium officiis, virtutibus, ac vitiis apte,
 „ & accurate breviterque disserere, imo & justam
 „ ferre sententiam! Quid sapientius, quam ita
 „ sublimium quorumcunque hominum vitia, erra-
 „ ta, abusus notare, persequi, castigare: ut non
 „ modo invidiam, & criminandi suspensionem evi-
 „ tes, sed etiam amorem reportes, & admiratio-
 „ nem? Et hæc sane fuit Bernardi seu dexteritas,
 „ seu felicitas, seu divinitus concessa auctoritas,
 „ ut quamprimum ejus Libri de Consideratione in
 „ publicum prodire, eos certatim exquisierint,
 „ lectitarint, amaverint universi, etiam Summi,
 „ quos maxime tangebant, Pontifices., Denique
Præfat. in Tomum IV. iterum præponit omnibus, no-
 „ vumque illis elogium pangit, dicens, in illis li-
 „ bris, quidquid sanctius in sacris Literis, & in
 „ Conciliis, quidquid salubrius in scriptis veterum
 „ Patrum, & in Decretis Pontificum ad regimen
 „ Ecclesiæ præscribitur, id omne sub eleganti com-
 „ pendio comprehensum haberi. Vide versionem
 „ eorum Italicam, de qua Trivultienfes 1760.

Traſſatus de Moribus Prælatorum ad Henricum Senenſem uti argumento ſic ceteris fere dotibus cum Libris de conſideratione affinis eſt.

Sermo, ſeu *Traſſatus de Converſione ad Clericos* ingenti libertate, & ardore ſcriptus eſt, recteque Mabillonius *Admonitione* in hoc opusculum ait: *Gravis, & patheticus eſt hic ſermo.* Nempe vivis coloribus Clericorum ejus ætatis inertiam, & vitia depingit, nihilque non agit, uti ad ſaniora eos convertat. *Declamationes* vero ad eosdem Clericos ſunt multo præſtantiores; nam & accuratiſſime perſcriptas eſſe patet, & ita numeris illigatas, ut vehementiſſimæ licet, & acerrimæ ſint, nihilominus veluti flumen quoddam eloquentiæ fundant.

Apologia ad Guilielmum Abbatem Bernardum tota loquitur, & præter ſacundiam inſignem, comitatem præterea & leporem eximium præfert.

Inter Dogmatica eminet opusculum *de Gratia, & libero arbitrio*, ut quod non Theologum ſolum oſtendit qualemcunque, ſed nitidum, clarum, factumque ad res eas pertractandas. Mabillonius in *Admonitione* præfixa hanc de illo ſententiã tulit. „Parvus liber, ſed qui plus ſucci, & ſolidæ doctrinæ contineat, quam magna librorum volumina, quæ de hoc Theologico argumento pertractant. Stylus vegetus, vivaci ingenio, & lumine plenus, verba propria, & materiæ accomoda, oratio facilis, non arte quæſita, ſed quaſi naturalis, non obefa, non exilis, ſed pinguis, & nervoſa, elegans, concinna, & jucunda, non trivialibus ſcholæ verbis languens, non barbarâ, aut incultâ, non ita preſſâ, ut parce, & guttatim fluat, nec tamen ita profuſa, ut torrentis inſtar, quaſi rupto aggere, & ſiccato alveo erumpat: ſed pari tenore, & gravimajestate æquabiliter profluens, fontem indicat inde-

„ indeficientem, qui non ex alieno plenus sit, sed
 „ ex proprio, imo ex Dei dono, atque ex con-
 „ tinua Scripturæ meditatione, præsertim Apostoli.
 Joannes vero Pinius in *Actis SS. festo D. Bernardi*
 §. 15. ait, *confessione hujus opusculi de Ecclesia Ca-*
tholica universa sanctum Doctorem immortalis titulo
meritum.

His absolutis ad *Sermones* progrediamur, de qui-
 bus generatim dici potest, præclari oratoris foetus
 esse. Wibaldus Abbas Stabulensis, & Corbejen-
 sis *, qui in Germania concionantem audierat, &
 demiratus erat, sanctum Doctorem, tanquam egre-
 gium christiani oratoris exemplum proponit his
 verbis: „ Est tamen interdum in Ecclesia quædam
 „ rerum opportunitas, in qua dicendi artificium
 „ irreprehensibiliter exercetur, & maxime in præ-
 „ dicandi officio, in cujus gratiæ principatu, meo
 „ quidem judicio, ponitur vir nostrorum tempo-
 „ rum valde illustris Bernardus Clarevallensis Ab-
 „ bas. Oratorem non immerito dixerim, qui a
 „ Rhetoribus definitur vir bonus dicendi peritus.
 „ Siquidem vir ille bonus, longo eremi squallore,
 „ & jejuniis, ac pallore confectus, & in quam-
 „ dam spiritualis formæ tenuitatem redactus, prius
 „ persuadet visus, quam auditus. Optima ei a
 „ Deo concessa est natura, eruditio summa, indu-
 „ stria incomparabilis, exercitium ingens, pronun-
 „ tiatio aperta, gestus corporis ad omnem dicen-
 „ di modum accommodatus. Non igitur mirum,
 „ si potenti tantarum rerum virtute excitat dor-
 „ mientes, imo, ut plus dicam, mortuos, & Do-
 „ mino cooperante, & sermonem confirmante, al-
 „ terat homines, & ad jugum Dei trahit captivos,
 „ qui fuerant in curribus Pharaonis. Hunc tu

Y 4

„ vere

* Epistol. 147. ad Manegoldum Scholæ Magistrum apud
 Edmundum Martene Tom. 2. *Veter. Monum.* pag. 339.

„ vere dixisses eloquentem, qui non est intus
 „ Nero, foris Cato, quem si videas, doceris, si
 „ audias, instrueris, si sequare, profeceris.,

Sed Mabillonius quoque *Præfat. in Tom. III.*
 audiendus est: „ Cum in Sanctorum Patrum scri-
 „ ptis ea pars, quæ *Homilias* seu *Sermones* com-
 „ plectitur, minus elaborata passim, & accurata,
 „ quam reliqua eorum ingenii monumenta videat-
 „ ur: hanc sibi laudem præ ceteris, aut certe in
 „ paucis vendicat sanctus Bernardus, quod ejus
 „ Sermones non minori verborum acumine, va-
 „ rietate sententiarum, cogitationumque sublimi-
 „ tate, nec dispari affectuum pietate præditi sint,
 „ quam aliæ ejus lucubrationes. Mihi vero hu-
 „ jus rei causam meditati occurrit, non modo
 „ ingenii ejus solertia, celerisque animi motus,
 „ ad res explicandas, & affectus commovendos
 „ faciles, sed etiam auditorum diversitas, quorum
 „ in gratiam sermones ejusmodi condebantur.
 „ Nam cum veteres illi Patres sanctissimi infor-
 „ mandis christianæ religionis doctrina ac pietate
 „ populis sermones suos exponerent, eos ad vul-
 „ gi captum, & ad communes fere locos, audi-
 „ torum utilitati consulentes, humili stylo pruden-
 „ tes componebant. At Bernardus ad homines
 „ in rebus spiritualibus, atque in scientia Scriptu-
 „ rarum instructos, plerosque in sæculo quondam
 „ eruditione, & dignitate præstantes, sermones
 „ habebat suos, quorum doctrinæ, & perfectioni
 „ accommodanda erat oratio. Unde accidit, ut
 „ non modo eximii Sermones illi in *Cantica*, qui
 „ majori studio conscripti sunt, sed etiam alii sive
 „ de annuis festis ac diebus, seu de diversis argu-
 „ mentis, quos hoc in Tomo exhibemus, vulgari-
 „ bus Patrum *Homiliis*, ac *Sermonibus* a viris
 „ cum piis, tum doctis præferri soleant. Neque
 „ enim privata, aut singularis mea hæc de Bernardi
 Ser-

„ Sermionibus opinio, sed illustrium in re litera-
 „ ria virorum, qui suum hac de re iudicium, seu
 „ verbo, seu scripto protulerunt. „ Afferit dein
 sententiam Iusti Lipsii, quam nos supra, loco vi-
 delicet suo, retulimus, atque ex eo arguit, virum
 doctissimum Bernardum ceteris Latinis Patribus
 anteponendum existimasse. Addit denique nar-
 ratiunculam * de viro summo Henrico Valeſio,
 qui Græcis quoque ipsis præferendum iudicasset:
 „ Ante annos tres, vel quatuor, quam decederet,
 „ quoties Festis diebus morbo vexatus domi se
 „ continere cogeatur, Bernardi Clarevallenſis Ab-
 „ batis sermones ab anagnotæ suo sibi legi jube-
 „ bat, attenteque eos audiebat, & avidis auri-
 „ bus hauriebat. Quippe existimabat, & ami-
 „ cis etiam dicere consueverat, dies dominicos ac
 „ festos Dei laudibus, non studiis literarum im-
 „ pendi oportere. Sermones autem Bernardi
 „ quibuslibet veterum Patrum cum Græcorum,
 „ tum Latinorum Homiliis ac Sermionibus multo
 „ esse ad excitandam in animis nostris, accenden-
 „ damque pietatem aptiores. „ Subdit Mabillon-
 nius: „ Hoc testimonium eo lubentius refero, quod
 „ & ad commendandos Bernardi Sermones pluri-
 „ mum valeat tanti viri auctoritas, & quod animo
 „ meo jucundissima sit hujus viri recordatio qui
 „ me quondam sua & amicitia, & familiaritate
 „ dignatus est. „

Ut vero testimonium istuc apud eos, qui Va-
 lesium non satis norunt, plus ponderis habeat,
 non abs re erit, si addamus hoc loco, illum sæ-
 cularem licet hominem, in Historia omni Ecclesia-
 stica peritissimum, in legendis, edendisque Patri-
 bus ætatem fere omnem contrivisse, atque inter

Y 5

— primi

* Desumpta est ex Hadriano Valeſio, qui Fratris vi-
 tam magna ingenuitate scripsit.

primi nominis Interpretes hodieque ab omnibus haberi.

Porro inter *Sermones* omnium iudicio *Sermones in Cantica* palmam referunt; tantus in illis non solum doctrinæ apparatus, sed splendor quoque & eloquentia est. *Evervinus* Steinfeldensis Præpositus in *Epistola ad Sanctum nostrum* * ita de his sermonibus scribit. *Lætabor ego super eloquia tua, quasi qui invenit spolia multa, qui nobis memoriam abundantiae suavitatis Dei eructare in omnibus didicis, & scriptis vestris soletis, maxime in Cantico Amoris Sponsi, & Sponsæ, hoc est Christi & Ecclesiæ: ita ut eidem Sponso dicere veraciter possimus: Servasti bonum vinum usque adhuc. Huius vini tam pretiosi pincernam te nobis ipse constituit, non cesses propinare, non hæsites, hydrias non poteris evacuare &c.*

Eandem admirabilem unctionem, quæ prima dos est oratoris sacri, atque intimos illos motus, quos Bernardus in piorum animis hisce sermonibus efficit, brevius, non minus tamen eleganter Guericus expressit, quando vivente adhuc auctore scripsit: Eum de *Canticis differentem Interpretem Spiritus Sancti* esse **. *S. Thomas Aquinas* rogatus a *Fossæ novæ* fratribus, ubi æger decumbebat, uti, quod *S. Bernardus* morte præventus non perfecisset, ipse absolveret, quasi diffidens a se posse æquari ejus dulcedinem, respondisse fertur: *Date mihi spiritum Bernardi, & ego perficiam opera Bernardi.* *Sixtus Senensis* ita de iisdem Sermonibus dicit: *Extat præter hæc insigne hujus auctoris opus, quod eruditi omnes ceteris ipsius laboribus præferunt, hoc est in tria prima CANTICI CANTICORUM capita explanationis mysticæ, atque*
continuae

* Apud Mabillonium *Tom. III. Veterum Analector.* pag. 452.

** *Serm. III. in Natali Apostol. Petri, & Pauli.*

continuè Sermones octoginta sex, quos ultimo vitæ suæ anno * coram Monachis suis in solatium quotidiani laboris viva voce, & ex intimo corde profudit: in quibus tanta facundia divinæ charitatis vim, atque sublimitatem expressit, ut appareat, illum omnes in se ipso cælestis amoris affectus, motus, & aculeos vero, ac vivo spiritus sui experimento sensisse. Alexander Natalis *Histor. Eccles. Sæcul. XII. cap. 6. §. 2.* Sermones hos divinum opus appellat. Joannes Mabillonius, quoties mentio ejus incidit, jam *insigne opus*, jam *insignem explanationem*, jam *aureum opus* vocat. Fufius vero *Præfat. in Tom. IV.* eosdem cum libris de Consideratione primo loco inter Bernardi opera ponit, dicens, præcipue apud omnes in pretio esse debere, atque ista addit: „In „ his Sermonibus, quæcunque de vitiis, & virtu- „ tibus, atque de tota vita spiritali resperfa sunt, „ in his, inquam, Sermonibus hæc omnia solidi- „ us, ac sublimius pertractantur, & ex myltica- „ rum allegoriarum involucris, ac figuris totius „ perfectionis eruuntur arcana, non minus jucun- „ do atque utili, quam sublimi modo, ita ut hi „ Sermones, quasi castæ quædam piorum hominum „ deliciæ censendæ sint. Jucundum atque utilem „ hunc scribendi modum appellamus. Hæc enim „ est, teste ipso Bernardo, miranda prorsus, & „ miseranda humanarum conditio animarum, ut „ licet tam multa foris ingenii vivacitate percipiant, „ egeant omnino figuris, & æigmatibus quibus- „ dam corporearum similitudinum, ut ex visibili- „ bus & exterioribus possint vel aliquatenus in- „ visibilia, atque interna conjicere. Quod qui- „ dem his in Sermonibus præclare omnino præ- „ statur. „ Istuc autem eo majorem habet admi-
ratio-

* Fallitur hic Sixtus, uti jam sæpe a pluribus ostensum est.

rationem, quod sanctus Pater filios sæpe solummodo meditatus dixit, antequam scriberet. Nam certe extemporalia multa in iis sunt, uti *Serm. 9. n. 9. Serm. 36. n. 7. Serm. vero 54. n. 1.* conceptis verbis asserit, se primum scripsisse, posteaquam dixerat. Ait enim: *Scripta sunt, ut dicta sunt, & excepta stylo, sicut & sermones ceteri, ut facile recuperetur, quod forte exciderit.* Idem & *Serm. 77. n. 2.* significat. Dolendum itaque, & maximas inter jacturas reputandum est, quod Republicæ negotiis distentus illustre opus abrumperе debuit, & demum ei immortalis, non ultra caput secundum perduxit: quod si omnia complecteretur, nihil simile sive inter Græcorum, sive Latinorum commentarios haberemus.

Post *Sermones in Cantica* commiendari maxime merentur illi, quos de *Beatissima Virgine* jucunditatis, fiduciæ, & pii affectus plenos scripsit. Exultat hic plane Bernardus, atque dulcissimi pulionis instar in matris gremio deliciatur. Recte Petrus Cellensis *Libro VI. Epist. ult.* Bernardum, ait, *Alumnum familiarissimum fuisse Dominae nostræ, & ad ejus laudem politissimos tractatus, & facundos composuisse.* Andreas Brunnerus in *Fastis Marianis ad 20. Augusti Bernardi* volumina meros favos vocat, tum præcipue, cum de mellea Virgine sermo est. Joannes vero Croiset in *Exercit. Piet. Teneritudo*, inquit, *erga Sanctam Virginem singulariter ejus scriptis expressa est.* Neque id mirum. Non enim visus est aliquis erga Mariam magis ardens, magis obsequiosus, magis eloquens, magisque zelans pro inspiranda ejus religione, cultuque propagando. Sufficit legere opera ejus, ut fateamur, sanctam Virginem fors non habuisse unquam sive clientem magis earum, sive servum magis fidelem. Nominatim Homilias super *Missus est Theophilus Raynaudus in Api Gallica c. 85.* lucubrationem melli-

mellitissimam, & Bernardi devotione dignissimam appellat. Et jam ante Guilielmus Libr. 1. vitæ cap. 2. num. 1. infigne opusculum dixit. Sed de hoc plenissime Hippolytus Maraccius in opere de Scriptoris Marianis.

Sermones in psalmum nonagesimum, numero decem, & septem pariter insignes, magnoque studio legendi sunt, cum propter ipsum argumentum, tum ob affectus vivacissimæ, & plane immobilis in Deum fiduciæ. Experti sunt plurimi, tristitiam, & metum futurorum nulla magis repelli, atrasque in animo nubes haud secus, ac favonio quodamstante momento dissipari.

Ceteri quoque *Sermones* Bernardo digni omnes sunt, & paucos reperias, qui non locum aliquem splendidum, atque admirabilem habeant, ad cujus lectionem vel magistri dicendi excitentur, afficianturque suavissime.

Sed & in *Panegyrico genere* singulare quid Bernardus præfert, utque corripit, & reprehendit acerrime, quoties opus est, ita laudare mirifice novit. *Sermones funebres*, quod attinet, uti in *transitu S. Malachiæ* duos, item unum in *obitu Domni Huberti*, egregii quidem sunt: sed nihil ad illum, quem in funere fratris Gerardi dixit, sane ab omnibus mire comprobatum. *. Ut enim pathetica omnia sunt, quæ tempore illo seu fecit, seu dixit, ita quæ scripsit, sunt plane ad movendum, & collacrimandum. Ita autem mecum statui semper, orationem illam exemplar nobis esse debere commotionum omnium, quas in eo genere vel sentire ipsi volumus, vel aliis communicare. Jam enim dolorem, jam amorem summum spirat: nunc lacrimarum, & luctus, nunc laudum, & fiduciæ suavem vicissitudinem efficit, atque eam dulcedinem affectus ubique intermiscet, ut, solo
fors

* Est 26^{us} in *Cantica*.

fors Hieronymo * excepto, non dico parem, sed nec valde proximum illi hac in parte habeamus.

Sed finiendum aliquando, aut abrumpendum potius, quando quidquid de Bernardi facundia dicimus, parum est. Committere autem non possum, ut non clausulæ loco ejus lectionem iterum, iterumque sacris oratoribus commendem. Utor autem iisdem prorsus verbis, quibus laudatus toties Mabillonius *Tractat. de studiis Monast.* ** Religiosos maxime viros, & Monachos ad eandem hortatus est: *In hanc quippe (lectionem) iuxta fluunt, quæcunque alibi dispersa occurrunt; nimirum soliditas, venustas, varietas, proprietates, brevitates, fervor, & energia sermonis.* Provoco autem ad cuiusque experientiam; neque dubito asseverantius pronuntiare, vix præstantiorem Bernardo futurum in dicendo, si partem eorum, quæ precibus, & laboribus dedit, literis dare, & facundiam tantisper more nostro excolere illæ voluisset.

Plura de Bernardi eloquentia dabunt viri immortaliter de eodem meriti, Theophilus Raynaudus in *Hagiologio exotico*, opusculo, quod *Apis gallica* dicitur ***: Jacobus Merlo (vel Merlonus) Horstius in *editione operum S. Bernardi*, cujus cum *Prolegomena*, tum *Appendices* maximam sane laudem merentur ****: Joannes Mabillonius, qui, licet aliis, iisque gravissimis studiis distractus, vitæ maxima parte eruendo, expoliendo, illustrandoque Bernardo omnem curam,

uC

* *In Nepotianum. Blefileam &c.*

** *Parte I. cap. 3. n. 2.*


*** Sanctissimi Instituti Supremis magistratibus tantopere lucubratio ea placuit, ut auctorem communi Decreto omnium apud Snos recte factorum participem vellent.

**** Sed neque ipsum textum melius quis, aut accuratius ante Horstium recensuit; cumque auctiorem de novo, & correctiorem edere parat vir, præventus moræ ad Bernardi consortium, quem mirifice amabat, in cælos evolavit. Idem jam ante in *Septem Tubis Orbis christiani* Libros de Consideratione, maximi a se habitos, luci commiserat.

ac diligentiam impendit. Joannes Pinius Hagiographus Antwerpensis in *Actis SS. ad diem XX. Augusti*, qui pariter ab hominibus piis, & Bernardi studiosis summam opere suo gratiam iniit. Adde Scriptores vitæ ejus Guilielmum Abbatem S. Theodorici, Ernaldum, seu Arnoldum, Abbatem Bonæ vallis, Gaufridum, seu Goffridum Abbatem Clarevallensem. Triumviri hi partes gestorum singulas eleganter non minus, quam fideliter, & accurate literis consignarunt; tanto libentius legendi, & æstimandi magis, quod Bernardi æquales erant omnes, eumque intime noverant. Nec omittendus Angelus Maricus in *Annalibus Ordinis Cisterciensis*, auctor luculentus, summæque fidei: & qui elogium Viro Sancto breviora texuerunt, Goffridus in *Sermonibus de Bernardo* *. Hieronymus Platus *Libr. II. de bono status Relig. cap. 30.* Andreas Sauffayus in *Martyrologio Gallicano* **. Oratores denique sacri recentiores, præsertim Galli, qui insignes locos suppeditant in rem nostram, unctioremque Bernardi, & efficaciam in scribendo æque, ac loquendo, & describunt pulcherrime, & magnifice etiam prædicant, uti Flechier, de la Ruë, Biroat, Massillon, Bretonneau, Abbas de la Tour du Pin &c.

Finis Libri II. de Eloquentia Patrum.

O. A. M. D. G.



* Habetur ad Calcem Tomi VI.

** Est hoc elogium præter morem auctoris magnificum prorsus, dignumque consideratu, & magnam partem egregie huc facit.



Errata in LIBRO II.

Pagina; Linea:

9	21	vita,
36	3	summa quoque
57		ult. dicere.
62	1	num. 3. 13. & 14.
118	17	piscos
123	18	Sed est illud
162	5	tantum
169	27	fecit
175	2	partim studium
177	3 & 4	doles:
190	24	percum
Ibid.	26	mori possum. . .
228	6	peccatis,
249	29	in qua
256	26	pleni effectus,
299	3	GASAEUBONUS
302	2	vel uti
313	11	recentiores
320	4	succulenti
321	29	ipsa

<i>Lege:</i>	vitz,
	summa quæque
	dicere,
	num. 1. 3. 13. & 14.
	piscos
	Sed & illud
	tantum
	fecerit
	partium studium
	dotes:
	parcam

Adde: tacere non possum . . .

<i>Lege:</i>	pacatis,
	in quæ
	pleni affectus,
	CASAEUBONUS
	veluti
	recentiores
	succulenti
	ipse





4-1



